

**PERA LIBRORUM
IUVENILIUM:
LOCVLAMENTVM
QVARTVM :
INSUNT:...**

Johann Christoph Wagenseil



Red Pr. 3914 Wagenseil
1758.

~~Red 385~~

<36628076630015

<36628076630015

33

Bayer. Staatsbibliothek



R

LOCVLAMENTVM QVARTVM.

Insunt:

Logicæ, & Philosophiæ Practicæ
ac Theoreticæ Rudimenta,

Scilicet:

R
Synopsis Logicæ.
Methodus Disputandi.
Synopsis Ethicæ.
Synopsis Oeconomicæ.
Synopsis Politicæ.
Synopsis Physicæ.
Synopsis Artis Valetudinis.
Synopsis Metaphysicæ.







PROOEMIUM.

Nim vero, non utile tantum, sed & necesse fuit, ut priusquam Filius, eam disciplinam, quam Vlpianus, *veram, non simulatam Philosophiam* vocavit, & in quam, a teneris unguiculis, inclinatione quadam voluntatis propendebat, affectaret, iis artibus bene præpararetur pectus; quæ vulgo Philosophiæ nomine veniunt. Quippe, alteram illam sanctiorem severioremque, illotis manibus tractare si instituat, metus erat, ne hæc fastidiret, ipsum inter veneratores admittere. Ergo mature de Præceptis Rudimentisq; memoriæ penitus infigendis ei prospexi, ex illorum libris qui Aristotelis semita incessere, eadem excerpens. Istius enim Philosophi placita, a longo seculorum decursu, pro veris, in Christianorum Scholas fuere recepta; iis ego adolescens imbutus sum; hæc, in legitimi Systematis formam modumq; redacta extant; denique, hæc; Theologia & Jurisprudentia in contubernium admiscere, ita ut ad illorum normam, in suis rebus rationibusque tradendis, se componant; imo & eadem in suum penitus succum ac sanguinem converterint. Dixi, non impediturum me, quo minus postquam Aristotelis scitis mentem

subegit, etiam addiscat quæ Recentiores, salubriter invenere, & ut in Cartesii, aliorumq; castra, se conferat, non tanquam transfuga, sed ut explorator. Verum in diem id differendum esse, nec mihi placere recentem consuetudinem, qua pueri, ut ille ait, adhuc nascentes, velut pestilenti quodam fidere afflati, statim pro Philosophis eclecticis se gerunt, & Aristotelem, alto supercilio, nihili reputant, antequam sciunt, atterne an albus is natus fuerit. Vah! quoties ii se mihi obtulerunt, qui illam ex Peripato, & plerisque Sanctis Patribus probatam definitionem, *Homo est animal rationale*, pipulo ante Sapientiae ædes differendam esse dejerabant persancte, sed, iussi causam exponere, aut meliore nos beare, mox pax, & hic magis mutos se præstabant quam pisces. Tales, Filium cane pejus & angue odisse, imprimis autem, id etiam atque etiam cavere iussi, ne unquam verbum illud fœdum & aperte falsum ex eo audiam, quod tam frequens est in istorum ore, non Aristotelem tantum (hoc vero tolerari potest) sed adeo Divina Eloquia, subinde album calculum adjecisse, Philosophiæ veræ adversis, popularibus erroribus.

SYNOPSIS
LOGICÆ.

SYNOPSIS LOGICÆ.

CAPVT I.

De Præcognitis quibusdam.

Quid discimus in Scholis?

Studia Pietatis & Humanitatis, quæ proponuntur in quatuor Facultatibus.

Quæ sunt istæ Facultates?

Theologia, Jurisprudentia, Medicina & Philosophia.

Quid est Theologia?

Theologia, est doctrina credendorum & faciendorum.

Quid est Jurisprudentia?

Jurisprudentia, est ars justî & æquî.

Quid est Medicina?

Medicina, est ars de sanitate corporis humani.

Quid est Philosophia?

Philosophia, est comprehensio liberalium disciplinarum, quæ subserviunt tribus superioribus Facultatibus.

Quotuplex est Philosophia?

Philosophia est duplex: Theoretica & Practica.

Quid est Philosophia Theoretica?

Philosophia Theoretica est, quæ in nuda consistit contemplatione.

Quid

Quid est Philosophia Practica?

Philosophia Practica est, quæ finem primarium habet actionem.

Quæ sunt partes Philosophia Theoretica?

Philosophiæ Theoreticæ partes sunt tres: Metaphysica, Physica, & Mathesis.

Quid est Metaphysica?

Metaphysica, est scientia, tractans de Ente quatenus ens est, sive, quæ persequitur generalia entis.

Quid est Physica?

Physica, est scientia corporis naturalis, ac proinde velut theatrum naturæ.

Quid est Mathesis?

Mathesis, est scientia, quæ circa quantitatem, quatenus extensa est, occupatur.

Quæ sunt præcipua disciplina Matheseos.

Præcipuæ disciplinæ Matheseos sunt: Arithmetica, Geometria, Cosmographia, Astronomia, Geographia, Optica, Musica, & Architectonica.

Quid est Arithmetica?

Arithmetica, est scientia bene numerandi,

Quid est Geometria?

Geometria, est scientia bene metiendi.

Quid est Cosmographia?

Cosmographia, est scientia de sphaeræ mundi dimensione.

Quid est Astronomia?

Astronomia, est scientia de sphaeræ cœlestis dimensione.

Quid est Geographia?

Geographia, est scientia de sphaera terrestris dimensione.

Quid est Optica?

Optica, est scientia bene videndi; dicitur alio nomine Perspectiva.

Quid est Musica?

Musica, est scientia bene canendi; dicitur alio nomine Harmonica.

Quid est Architectonica?

Architectonica, est scientia bene ædificandi.

Quæ sunt partes Philosophiæ Practicæ?

Philosophiæ Practicæ partes sunt tres: Ethica, Politica, & Oeconomica.

Quid est Ethica?

Ethica, est prudentia de bono morali.

Quid est Politica?

Politica, est prudentia de bono civili.

Quid est Oeconomica?

Oeconomica, est prudentia de bono familiæ.

Quæ supersunt Artes Liberales?

Artes Liberales supersunt septem: Grammatica, Rhetorica, Logica, Oratoria, Poëtica, Mnemonica, & Historica.

Quid est Grammatica?

Grammatica, est certa loquendi & scribendi ratio.

Quid est Rhetorica?

Rhetorica, est ars tradens modum ornate dicendi.

Quid

Quid est Logica?

Logica, est ars tradens modum bene ratiocinandi.

Quid est Oratoria?

Oratoria, est ars copiose dicendi.

Quid est Poëtica?

Poëtica, est ars bene effingendi orationem ligatam.

Quid est Mnemonica?

Mnemonica, est ars bene excolendi memoriam.

Quid est Historica?

Historica, est commemoratio rerum gestarum.

CAPVT II.

De Logicæ Natura.

Quid est Logica?

Logica, est ars disputandi, seu faciendi syllogismum bonum, & refutandi malum, ad inveniendum veritatem. *Seu*: Est disciplina, mentem hominis in rerum cognitione & veritatis investigatione ita dirigens, ut modum eam in omni materia eruendi commonstret.

Quis est Finis Logicæ?

Finis Logicæ duplex est, Internus, & Externus: *Internus*, est Syllogismus bonus; *Externus*, Veritatis indagatio.

Quot sunt Partes Logicæ?

Partes Logicæ sunt tres: *Prima*, quæ dirigit primam mentis nostræ operationem, in terminorum simplicium apprehensione consistentem: *Secunda*,

quæ dirigit secundam mentis nostræ operationem, in terminorum compositione consistentem : *Tertia*, quæ dirigit tertiam mentis nostræ operationem, in ratiocinatione ex compositis consistentem.

CAPVT III.

De Terminis.

Quid est Terminus ?

T*erminus*, latiore significato, notat omne vocabulum, quod est in aliqua propositione ; stricte, notat Extremum propositionis, hoc est, ejus vel Subjectum, vel Prædicatum.

Quid est Terminus Finitus ?

Terminus Finitus est, qui non habet præfixam negandi particulam : ut, *Homo*.

Quid est Terminus Infinitus ?

Terminus Infinitus est, qui habet præfixam negandi particulam : ut, *non-homo*.

Quid est Terminus Abstractus ?

Terminus Abstractus, seu *Abstractum*, est vox, involvens unicum tantum conceptum, nempe formæ, neque simul significans aliquod subjectum : v. g. *Paternitas*, *Albedo*.

Quid est Terminus Concretus ?

Terminus Concretus, seu *Concretum*, est vox, involvens duos conceptus, unum formæ, alterum subjecti, v. g. *Pater*, *Album*.

Quid est Terminus Connotativus ?

Terminus Connotativus est, qui significat aliquid
adja-

adjacens alteri, ut adjacens; sic, *Album*, significat albedinem, ut adjacentem parieti, nivi.

Quid est Terminus Absolutus?

Terminus Absolutus est, qui significat aliquid tanquam per se existens: ut, *Albedo*, *Homo*.

Quid est Terminus Intrinsece denominans?

Terminus intrinsece denominans, est, qui tribuitur ei, in quo est forma per ipsum significata, uti cum dico: *Cygnus est albus*: albedo enim tanquam forma denominans est in *Cygro*.

Quid est Terminus Extrinsece denominans?

Terminus extrinsece denominans, est, cum forma denominans non inest subiecto denominato, sed est extra illud: uti cum dico, *Paries est visus*. Visio enim, tanquam forma denominans, non est in pariete, sed extra parietem, in animali aliquo, parietem vidente.

Quid est Terminus Univocus?

Terminus Univocus seu *Synonymus*, est vocabulum, quod res plures ita significat, ut illis singulis æqualiter possit attribui eadem definitio, secundum illud vocabulum: uti *Homo* est terminus univocus respectu *Johannis*, *Petri*, *Pauli*: quia definitio hominis, quod sit animal rationale, potest æque attribui *Johanni*, ac *Petro* vel *Paulo*.

Quid est Terminus Æquivocus?

Terminus Æquivocus sive *Homononymus*, est vocabulum, quod res plures ita significat, ut illis singulis non possit attribui eadem definitio secundum illud vocabulum. Sic *Homo* est terminus æquivocus, respectu hominis vivi, & picti, quia definitio hominis,

nis, quod sit animal rationale, potest quidem applicari homini vivo, sed non homini picto.

Quid est Terminus Analogus?

Terminus Analogus, est vocabulum, quod res plures ita significat, ut illis singulis eadem definitio attribuat, sed non æqualiter, verum inæqualiter, videlicet, uni primario, alteri secundo. Sic *Risus* dicitur de Homine, & Prato: homini vero *Risus* proprie competit, Prato autem secundum similitudinem tantum. Sic *Sanum*, dicitur de Animali, Medicamento, Vrina, sed Animal revera sanum est, Medicamentum sanum dicitur, quia causa est sanitatis in animali, Vrina signum est sanitatis. Et vero, Analogum per se positum, stat pro nobiliore significato.

Quotuplicia sunt Analoga?

Analoga sunt *duplicia*: Analoga Attributionis, & Analoga Proportionis.

Quid sunt Analoga Attributionis?

Analoga Attributionis sunt, quæ formaliter communem rationem nominis participant, cum dependentia unius ab altero, aut, ut unum formaliter & intrinsece, cætera tantum extrinsece & denominative rationem participant. Sic Deus & Creatura rationem *Entis*; Homo & Medicina, rationem *Sani* participant.

Quid sunt Analoga Proportionis?

Analoga Proportionis sunt, quæ de uno quidem proprie, de aliis metaphorice tantum, vel per quandam similitudinem cum primo dicuntur: ut, *ridere* de homine & Prato.

Quid

Quid est Terminus Prædicamentalis?

Terminus Prædicamentalis significat rem in aliquo Prædicamento locabilem: Vti, *Homo, Animal, Albedo.*

Quid est Terminus Transcendentalis?

Terminus Transcendentalis est, qui significat rem vel conceptum Prædicamenta transcendentem: Ita se habet *Ens* cum Affectionibus suis, *Vnitate, Veritate, Bonitate.*

Quid est Terminus Simplex?

Terminus Simplex, est terminus unicus quoad vocem & significationem; ut, *homo, equus, leo.*

Quid est Terminus Complexus?

Terminus Complexus est, qui constat ex pluribus terminis: ut, *animal rationale, pro homine.*

Quid est Categorema?

Categorema, est terminus, qui potest per se esse prædicatum vel subjectum Enunciationis: ut, *Homo.*

Quid est Syncategorema?

Syncategorema, est vox, quæ neque subjectum, neque prædicatum, imo nec copula aut negatio est Enunciationis; addita tamen huic, certum significandi modum illi tribuit. Sic se habent *Signa* in Propositionibus Vniuersalibus & Particularibus; item *Modi*, in propositionibus Modalibus.

Quid sunt Termini Repugnantes?

Termini Repugnantes sunt, qui de se invicem vniuersaliter negari possunt, ut, *Homo & Brutum.* Dico enim recte: *Nullus homo est Brutum; &, Nullum Brutum est homo.*

Quid sunt Termini convertibiles?

Termini Convertibiles sunt , qui de se invicem universaliter affirmari possunt: ut , *Homo & Risibile* : Dico enim recte : O. *Homo est Risibilis* : & , O. *Risibile est Homo*.

Quid sunt Termini Magis & Minus Communes?

Termini magis & minus communes sunt , quorum unus de altero universaliter affirmari potest , sed non contra: Vt *Animal* est terminus magis communis quam *Homo* ; quia O. *Homo est Animal* , sed , non O. *Animal est Homo*.

Quid sunt Termini Excedentes & Excessi?

Termini Excedentes & Excessi sunt , qui de se invicem particulariter tantum affirmari & negari possunt: ut *homo* , & *albus*. Datur enim *homo* , qui non est *albus* , ut *Aethiops* ; datur *Album* , quod non est *homo* , ut *Cygnus* ; datur quod est utrumq; , ut *Germanus*.

Quid est Terminus Denominativus seu Paronymus?

Terminus Denominativus seu Paronymus est , qui rem ab aliqua forma denominat ; a qua terminatione differt ; sicut vox *Albus* hominem denotat ab *Albedine*.

Quid est Notio prima?

Notio prima est , cum intellectus rem concipit prorsus ut est: puta cum *Petrum* apprehendit ut hominem , ut animal , ut album vel nigrum.

Quid

Quid est Notio secunda?

Notio Secunda est, cum Intellectus rem aliter concipit quam revera est. Vti, cum multos homines inter se vere distinctos, concipit ut unum quid, cum revera tamen multi sint; aut *Animal*, ut subjectum vel prædicatum in propositione. Atque tales notiones vocantur *Entia Rationis*, quia ratio tantum ista fingit; cum Notiones primæ, Notiones Reales seu *Entia Realia* appellentur.

CAPVT IV.

De Vniversalibus seu Prædicabilibus.

Quid est Vniversale?

V*niversale* est, quod de pluribus vere, divisim & univoce prædicari aptum est, ut *animal* de homine & leone.

Quid est Singulare?

Singulare est, quod de uno solo particulari vere, divisim & univoce prædicari aptum est, ut, *Petrus*, *Johannes*, *Bucephalus*. Singulare alias etiam appellatur *Individuum*.

Quotuplex est Vniversale?

Vniversale est *Quintuplex*: Genus, Species, Differentia, Proprium, & Accidens.

Quid est GENVS?

Genus est, quod de pluribus Specie differentibus in Quid prædicatur: ut *Substantia* de Spiritu & Corpore; *Animal*, de homine & bruto.

Quotuplex est Genus?

Genus duplex est: Summum, & Subalternum.

Quid

Quid est Genus Summum?

Genus Summum sive *Generalissimum*, est, supra quod non est aliud genus, ut *Substantia*, *Quantitas*.

Quid est Genus Subalternum?

Genus Subalternum est, supra quod est aliud Genus, seu, quod potest esse *Species*, ut *Animal*, *Magnitudo*.

Quid est SPECIES?

Species est, quod in lineâ rectâ subjicitur Generi, ut *Homo* & *Brutum* respectu *Animalis*.

Quotuplex est Species?

Species duplex est: *Specialissima* & *Subalterna*.

Quid est Species Specialissima?

Species Specialissima, seu *Infima* est, quæ infra se non habet *Speciem*, & tantum de pluribus solo numero differentibus in *Quid* prædicatur, ut *Homo* respectu *Petri* & *Pauli*.

Quid est Species Subalterna?

Species Subalterna est, quæ infra se habet aliam *Speciem*, seu, quæ potest esse Genus: ut *Animal* *Species* est respectu viventis; Genus vero respectu hominis & bruti.

Quid est DIFFERENTIA?

Differentia est, quæ de pluribus *Specie* vel *Numero* differentibus in *Quale* essentialiter prædicatur, atque generi juncta constituit *speciem*: ut *sensitivum* de homine & bruto; *rationale*, de *Petro* & *Paulo*.

Quid est PROPRIUM?

Proprium est, quod de pluribus *specie* vel *numero* differentibus in *Quale* accidentaliter & necessario præ-

prædicatur: ut *nutribile*, de animali & planta: *risibile*, de Petro & Paulo.

Quot modis dicitur Proprium?

Proprium dicitur 4. Modis: atque **Proprium Primi Modi** est, quod accidit soli, sed non omni: ut, *esse Grammaticum* homini. **Proprium Secundi modi** est, quod accidit omni, sed non soli, ut homini *esse aptum ad habendum duos pedes*. **Proprium Tertii modi** est, quod accidit omni & soli, sed non semper, ut homini *canescere*. **Proprium Quarti modi** est, quod accidit omni, soli, & semper, ut *risibile* homini.

Quid est ACCIDENS?

Accidens est, quod de pluribus specie vel numero differentibus, in *Quale accidentaliter* & contingenter prædicatur. Seu: quod potest abesse, vel adesse citra subjecti interitum: ut *album* de Homine & Cygno; *doctum*, de Socrate & Platone.

Quid est Accidens Separabile?

Accidens Separabile est, quod reipsa a suo subjecto separari potest, ut *nigredo* a facie fabri.

Quid est Accidens Inseparabile?

Accidens Inseparabile est, quod reipsa a suo subjecto separari non potest, ut *nigredo* a corvo.

CAPVT V.

De Prædicamentis.

Quid est Prædicamentum?

Prædicamentum est classis quædam, in qua sub uno summo genere, multa genera subalterna, species ac individua, certa serie & ordine disponuntur.

Quot sunt Prædicamenta?

Prædicamenta sunt decem: Substantia, Quantitas, Qualitas, Relatio, Actio, Passio, Quando, Ubi, Situs, Habitus.

Quid est SUBSTANTIA?

Substantia, est ens per se subsistens: ut homo, leo, lapis: ei opponitur Accidens, sive ens, existens in alio ut in subiecto inhætionis: ut calor in igne, eruditio in homine.

Summus Aristoteles, trutinando cacumina rerum,

In duo divisit, quicquid in Orbe fuit.

Nempe in Substantiam & Accidens.

Quotuplex est Substantia?

Substantia duplex est: Prima, & Secunda. Substantia Prima, est Substantia Singularis, ut Petrus, Bucephalus. Substantia Secunda, est Substantia Universalis, ut Homo, Equus.

Quæ sunt Proprietates Substantiæ?

Proprietates Substantiæ sunt 4: Prima est, non esse in alio ut in subiecto. Secunda est, unam substantiam, alteri, per se, seu ratione sui, non esse contrariam; per accidens enim, seu ratione qualitatum, v. g. caloris & frigoris, Ignis Aquæ contrarius esse dicitur. Tertia est, non recipere magis & minus. Unus enim homo, non est magis homo, quam alter, nec una aqua, magis est aqua, quam altera. Quarta est, posse recipere contraria successive, seu diverso tempore: ut, eadem aqua, nunc calida est, nunc frigida.

Quid est QUANTITAS?

Quantitas est, qua aliquid dicitur quantum, vel aliqua dicuntur aliquot. Ut, si quærenti, quantum sit

sit lignum? respondeas, esse bipedale: aut, si quærenti, quot aurei sint in marsupio? respondeas, decem.

Quotuplex est Quantitas?

Quantitas est duplex: Continua & Discreta. *Quantitas Continua* est, cujus partes aliquo communi termino copulantur: ut, Linea copulatur punctis. *Quantitas Discreta* est, cujus partes communi termino non copulantur, ut Numerus & Oratio.

Quotuplex est Quantitas Continua?

Quantitas continua est Triplex: Linea, Superficies & Corpus. *Linea*, est magnitudo longa, non lata, nec profunda, cujus partes copulantur puncto. *Superficies*, est magnitudo longa & lata, non profunda, cujus partes copulantur linea. *Corpus*, est magnitudo, longa, lata, & profunda, cujus partes copulantur superficie.

Quæ sunt Proprietates Quantitatis?

Proprietates Quantitatis sunt tres: *Prima* est: Quantitati nihil esse contrarium per se. Per accidens enim, seu ratione qualitatum, æque ac Substantiæ, ei aliquid contrarium est; uti superficies alba, & superficies nigra dicuntur contrariæ ratione albedinis & nigredinis, quæ qualitates sunt. *Secunda* est: Quantitatem non recipere magis & minus. Una enim linea, non est magis linea quam altera; nec unus numerus, est magis numerus, quam alius. *Tertia* est: Quod a sola Quantitate, res proprie & per se dicuntur æquales vel inæquales. Ut, linea pedalis, æqualis est alteri pedali; inæqualis vero alteri bipedali.

Quid est QUALITAS?

Qualitas est, a qua res dicuntur quales, non essentialiter tamen, sed accidentaliter: ut, ab albedine homo dicitur albus, a iustitia iustus.

Quot sunt Species Qualitatis?

Species Qualitatis sunt 4. quæ omnes duplici voce, sub disjunctione exprimuntur. 1. *Habitus* vel *Dispositio*. 2. *Potentia naturalis* vel *Impotentia*. 3. *Patiibilis qualitas* vel *Passio*. 4. *Figura* vel *Forma*.

Quid est Habitus?

Habitus est qualitas, crebris actionibus acquisita, subjecto firmiter inhærens: ut habitus pingendi in artifice.

Quid est Dispositio?

Dispositio, est qualitas imperfecta, & tantum inchoamentum habitus, ideoque subjecto neutiquam firmiter inhæret. Sic se habent artium & scientiarum prima in animo rudimenta.

Quid est Potentia Naturalis?

Potentia Naturalis, est qualitas innata, subjecto per modum potentiæ inhærens, ad aliquid perfecte agendum patiendumve: v. g. potentia clare seu acute videndi.

Quid est Impotentia Naturalis?

Impotentia Naturalis, est qualitas innata, subjecto per modum potentiæ inhærens, ad aliquid imperfecte agendum patiendumve: v. g. potentia debiliter videndi in habentibus visum hebetem.

Quid

Quid est Patibilis Qualitas?

Patibilis Qualitas, est vel in corpore durable ob-
jectum sensus, vel in anima durabilis affectus: v. g.
Rubor in facie natus, odium inveteratum.

Quid est Passio?

Passio, est vel in corpore obiectum sensus minus
durable, vel in anima affectus minus durabilis: v. g.
Rubor ex pudore, odium languidum.

Quid est Figura?

Figura, est qualitas, ex terminatione quantitatis
orta: uti Circulus, Triangulum, Quadrangulum.

Quid est Forma?

Forma, est qualitas, ex varia diversarum partium
magnitudine, proportionem & colore orta: ut, forma
hominis, equi.

Quæ sunt Proprietates Qualitatis?

Proprietates Qualitatis sunt tres: *Prima est*, Qua-
litates inter se, ratione sui, seu per se, esse contra-
rias. Ita Calor contrarius est Frigori, Albedo Nigre-
dini, Iustitia Injustitiæ. *Secunda est*, Qualitates non
quidem in abstracto, sed tamen in concreto, recipere
magis & minus. Quæ enim calida sunt, eorum
aliud magis calidum est, aliud minus calidum. *Ter-
tia est*, quod a sola qualitate, res proprie dicuntur si-
miles vel dissimiles: uti Petrus dicitur similis Paulo,
eruditione, albedine.

Quid sunt RELATA?

Relata sunt, quæ nihil aliud denotant, quam re-
spectum ad aliud. Ut Pater & Filius, Dominus &
Servus.

Quae concurrunt ad Relationem?

Ad omnem Relationem concurrunt *quatuor* :

1. *Relativum* ipsum, seu subjectum quod refertur: ut homo dicitur Pater: 2. *Fundamentum* relationis seu id quod causa est, cur unum ad alterum referatur: sicut potentia generandi causa est, quod homo dicatur Pater. 3. *Ratio fundandi*, seu fundamentum proximum, i. e. conditio, sub qua relatio, seu fundamentum remotius sequitur, sicut actio generandi est in paternitate; quod enim potentiam generandi habet, tum demum fit Pater, cum actu ipso generat, 4. *Terminus Relationis*, seu id, ad quod relativum refertur, sicut Pater refertur ad Filium.

Quae sunt Proprietates Relatorum?

Proprietates Relatorum sunt tres: *Prima* est, quod uno Relatorum posito, ponatur & alterum, & negato uno, alterum quoque negetur. Sic, si Pater quis est, est & Filius aliquis, & contra: si autem nemo est Pater, nemo etiam est Filius. *Secunda* est: Quod uno Relatorum cognito, etiam alterum cognoscatur, si non distincte, certe confuse. Ita qui novit quid sit servire, facile etiam intelligit quid sit dominari. *Tertia* est: Quod Relata sint simul natura: statim enim atque aliquis incipit esse Pater, adest & qui sit Filius, & vice versa.

Quid est ACTIO?

Actio, est forma, a qua quippiam dicitur agere; ut calefactio, per quam ignis dicitur calefacere aquam.

Quid est PASSIO?

Passio, est forma, a qua quippiam dicitur pati: ut Calefactio, per quam aqua dicitur calefieri ab igne.

Quomodo dividuntur Actiones?

Actiones dividuntur in Transcuentes & Immanentes.

Quid est Actio Transiens?

Actio Transiens vocatur, quæ non recipitur ab eo, a quo oritur, sed ab alio oritur, ab alio recipitur: sicut verberatio: verbera enim a Petro proficiscuntur, & recipiuntur a Paulo.

Quid est Actio Immanens?

Actio Immanens vocatur, quæ in eodem subiecto recipitur ex quo oritur: sicut intellectio ex intellectu oritur, & in intellectu manet.

Quæ sunt Proprietates Actionis & Passionis?

Proprietates Actionis & Passionis sunt duæ: Una est, Recipere contrarium: frigefacere enim & calefacere, sicut & frigefieri & calefieri, contraria sunt, Altera est, Recipere magis & minus: nunc enim magis aliquid calefacit aut calefit, nunc minus.

Quid est QUANDO?

Quando, est existentia rei in tempore: ut fuisse heri, esse hodie.

Quid est VBI?

Vbi, est præsentia rei in loco: ut esse in schola, foro, templo.

Quid est SITVS?

Situs, est dispositio partium in toto, in ordine ad locum: ut stare, sedere, cubare.

Quid est HABITVS?

Habitus, est indumenti vel ornamenti ad corpus applicatio: ut, esse calceatum, coronatum.

CAPVT VI.

De Postprædicamentis.

Quid sunt Postprædicamenta?

Postprædicamenta, dicuntur termini quidam, quorum in Prædicamentis facta est mentio, & quorum proinde tractationem Aristoteles iis subiecit.

Quot sunt Postprædicamenta?

Postprædicamenta sunt quinque : Repugnantia, Modi Prioris, Modi Simul, Species Motus, & Modi Habendi.

Quid sunt Repugnantia?

Repugnantia sunt, quæ de eodem subjecto singulari, simul, vere, simpliciter & eodem respectu, affirmari non possunt : ut, homo & leo : calidum & frigidum.

Quotuplicia sunt Repugnantia?

Repugnantia sunt duplicia : Opposita & Disparata.

Quid sunt Opposita?

Opposita, sunt Repugnantia, quorum neutrum alicui tertio æque, vel magis repugnat, eodem repugnandi modo : ut Album & Nigrum, Album enim nulli tam repugnat quam Nigro, eodem repugnandi modo.

Quotuplicia sunt Opposita?

Opposita sunt Quadruplicia : Relative opposita, Contraria, Privative opposita, & Contradictoria.

Quid sunt Relative opposita?

Relative, inter se opponuntur duo correlata : ut, Pater & Filius, Dominus & Servus.

Quid

Quid sunt Contraria?

Contraria, sunt duæ qualitates, quarum una, alteram ex subiecto suo pellit, nisi una forte a natura infit, hoc est inseparabiliter; ut *albedo* & *nigredo*: calor & *frigus*.

Quotuplicia sunt Contraria?

Contraria sunt *duplicia*, *Mediata* & *Immediata*.

Quid sunt Contraria Mediata?

Contraria Mediata sunt, quorum neutrum necesse est esse in subiecto, ut *album* & *nigrum*; contingit enim, ut corpus, quod albedinem & nigredinem habere potest, neutrum habeat, & sit rubrum aut viride.

Quid sunt Contraria Immediata?

Contraria Immediata sunt, quorum alterutrum necesse est esse in subiecto, ut *sanitas* & *ægritudo* in animali; omne enim animal, necessario est sanum vel ægrum, cum quod nec sanum nec ægrum sit, in rerum natura non detur.

Quid sunt Privative opposita?

Privative opponuntur habitus seu forma, & privatio ejus. Per *Habitu*m autem seu formam, intelligitur omne quod ponit aliquid in re, vulgo, positivum vocant. *Privatio* vero, est absentia illius formæ in subiecto apto, ut eam non habeat, & quidem eo tempore, quando habere debebat. Sic, si absit *visus* in animali, quod natura aptum erat videre, & absit tum, quando per naturam videre debebat, privatio est, & cæcitas vocatur. Ejusmodi privationes, sunt *tenebræ*, *mors*, *surditas*, *calvitium*, & infinita alia.

Quid sunt Contradictoria?

Contradictoria sunt, quæ pugnant, sicut esse & non esse simpliciter, ut *homo, non homo: album, non album.* Arque hæc oppositio, est omnium fortissima & amplissima, quia nullum potest dari ens, de quo non possit prædicari alter terminus, e data quacunque contradictione: *iv. g. nullum est ens, quod non sit aut homo, aut non homo; aut ferrum, aut non ferrum.*

Quotuplex est Contradictio?

Contradictio duplex est, Implicita & Explicita.

Quid est Contradictio Implicita?

Contradictio Implicita, seu Contradictio in Adjecto, item Oppositum in Apposito est, cum alicui termino additur terminus repugnans, v. g. ferrum ligneum.

Quid est Contradictio Explicita?

Contradictio Explicita est, cum idem terminus repetitur, addita negandi particula: v. g. ferrum, non ferrum.

Quid sunt Disparata?

Disparata, sunt Repugnantia, quorum unum alicui tertio, æque, vel magis repugnat eodem repugnandi modo, ut, homo & leo: flavum & viride. Homo enim eodem repugnandi modo, nempe disparato, æque repugnat equo, ac leoni; & flavum, magis repugnat nigro, quam viridi.

Quot modis dicitur aliquid Prius altero?

Prius aliquid altero dicitur quinque modis: Primo aliquid dicitur prius tempore: ut prior est Cyrus Persarum Rex, Alexandro Magno. Secundo aliquid dicitur

citur prius ratione naturæ, & rē esse: ut binarius ternario prior est. *Tertio* aliquid dicitur prius ratione Ordinis, ut Consul prior est Senatore. *Quarto* aliquid dicitur prius ratione nobilitatis: ut Aurum Argento prius est. *Quinto* aliquid prius dicitur, sicut causa effectui: ut, Sol Luce.

Quot modis aliqua dicuntur esse Simul?

Simul aliqua esse dicuntur *tribus* modis: *Primo* aliqua simul dicuntur, si eodem tempore existant, ut Abraham & Loth. *Secundo*, simul dicuntur, quorum unum est, si sit alterum: ut pater & filius, & omnia correlata. *Tertio*, simul dicuntur diversæ species ejusdem generis: ut homo & brutum, earumq; differentiarum constitutivæ: ut rationale & irrationale.

Quot sunt Species Motus?

Species Motus sunt *Sex*: *Generatio*, cum res oritur. *Corruptio*, cum res interit. *Accretio*, cum quantitas fit major. *Decretio*, cum quantitas fit minor. *Alteratio*, cum res acquirit novam qualitatem: Et *Phœsis*, seu *Latitudo*, cum res ex uno loco in alium transfertur.

Quot sunt Modi Habendi?

Modi Habendi sunt *sex*: *Primo* dicitur habere aliquid, qui qualitatem habet, v. g. doctrinam, vel sanitatem. *Secundo* dicitur habere aliquid, qui quantitatem habet: v. g. magnitudinem septem pedum. *Tertio* dicitur habere aliquid, qui ea quæ sunt circa corpus habet, ut vestem vel gladium. *Quarto* dicitur habere aliquid, qui habet ut partem: v. g. manum. *Quinto* dicitur habere aliquid, quod rem complectitur: ut dolium habet vinum. *Sexto* dicitur habere aliquid, qui rem possidet, v. g. domum.

LIBER SECVNDVS.

CAPVT I.

De Nomine & Verbo.

Quid est Nomen ?

Nomen est vox seu dictio simplex, significans secundum impositionem, sine tempore. Nimirum, significat *secundum impositionem*: nam, gemitus, sibilus, & similes soni, quibus homo & bruta, animi affectus produnt, sicut significant naturaliter tantum, ita ex iis orationes minime fiunt. Deinde significat *sine tempore*: nam, in eo Nomen differt a Verbo, hoc enim semper tempus connotat. Sic, qui dicit *Homo*, tantum rem denotat sine tempore.

Quid est Verbum ?

Verbum, est vox seu dictio simplex, significans secundum impositionem, cum tempore, & semper est nota eorum, quæ de alio dicuntur. Sic, qui dicit *Currit*, *Disputabit*, non tantum rem, id est cursum aut disputationem notat, sed & una tempus innuit, puta, cursum nunc institui, disputationem futuram esse. Proinde, vocabula, *Annus*, *Mensis*, *Hora*, Nomina sunt, non Verba; tantum enim denotant rem, quæ est tempus, non vero præter rem ipsam tempus consignant, seu temporis differentiam addunt, in qua sit illa res.

CAPVT II.

De Enunciatione.

Quid est Enunciatio?

Enunciatio seu Propositio, est oratio, quæ aliquid de aliquo affirmat vel negat; seu, est oratio, verum vel fallum significans. ut, *Homo est Animal.*

Quot sunt Partes Enunciationis?

Partes Enunciationis sunt tres: Subiectum, Prædicatum, & Copula.

Quid est Subiectum Enunciationis?

Subiectum Enunciationis, est prior illius pars, de qua aliquid affirmatur, vel negatur.

Quid est Prædicatum Enunciationis?

Prædicatum Enunciationis, est posterior illius pars, quæ de subiecto affirmatur vel negatur.

Quid est Copula?

Copula, est Verbum substantivum Sum, quod subiecto & prædicato interpositum, utrumque connectit. Vt in hac Enunciatione, *Homo est animal*: vox *Homo*, est subiectum: vox *Animal*, est prædicatum; vox *Est*, copula habetur.

Verbum Est, quot modis pro copula in Enunciatione stare potest?

Verbum Est duobus modis pro copula in Enunciatione stare potest: Vno, cum expresse post se habet prædicatum distinctum: ut, *Deus est misericors*. Altero, cum post se nullum habet prædicatum, implicite tamen certum prædicatum connotat; & ita simul copulæ & prædicati totius vim habet. v. g. *Deus est*. Vt *opia non est*, Prior casus vocatur *Est tertii adjecti*, posterior,

sterior, *Est secundi adjecti*. Atque latet in *Est Secundi adjecti*, implicite verbum *Ens*.

Quid hic notandum est?

Notandum primo: tam Subiectum quam Prædicatum, interdum una, interdum pluribus vocibus constare. Vna, constat in hac Enunciatione: *Homo est Animal*: At, plures habet in ista: *Homo pietate doctrina ac virtute præstans, est ab omnibus merito laudandus, & in pretio habendus*. Subiectum enim hic est totum illud: *Homo pietate doctrina ac virtute præstans*: Prædicatum, reliqua omnia, quæ copulæ subijciuntur, nempe: *ab omnibus merito laudandus, & in pretio habendus*. Deinde notandum: Copulam nonnunquam expresse poni, nonnunquam in verbo latere. Sic, in hac Enunciatione, *Homo est animal*, copula *Est* expresse ponitur. At, cum dicitur, *Homo currit*, copula latet in verbo *currit*; perinde enim est, ac si dicas, *est currens*.

Quot modis dividi potest Enunciatio?

Enunciatio, dividi potest vel ex parte materiæ, vel ex parte formæ.

Quomodo dividitur Enunciatio ex parte Materiæ?

Enunciatio ex parte Materiæ, dividitur in Veram & Falsam.

Quid est Enunciatio Vera?

Enunciatio Vera est, quæ est conformis objecto, seu rei significatæ: ut, *Homo est rationalis*.

Quid est Enunciatio Falsa?

Enunciatio Falsa est, quæ est difformis objecto, seu rei significatæ: ut, *Homo est lapis*.

Quo-

*Quomodo dividitur Enunciatio ex parte
Formæ?*

Enunciatio ex parte Formæ variis modis, tribus tamen præcipue, dividitur, secundum tres quæstiones: *Quæ? Qualis? Quanta?* Atque notat *Quæ?* an Enunciatio sit *Categorica*, an *Hypothetica*: *Qualis?* an sit *Affirmativa* vel *Negativa*: *Quanta?* an sit *Universalis*, *Particularis*, *Indefinita*, an *Singularis*.

Quid est Enunciatio Categorica?

Enunciatio Categorica seu Simplex est, in qua unum prædicatum de uno subiecto affirmatur vel negatur: ut, *Christus resurrexit. Pater cælestis reconciliatus est nobis.*

Quid est Enunciatio Hypothetica?

Enunciatio Hypothetica seu Composita aut Conjuncta est, in qua simplices propositiones per conjunctionem aliquam conjunctæ sunt in unam. Vt: *Si Christus resurrexit, sequitur quod Pater cælestis reconciliatus sit nobis.*

*Quotuplex est propositio Hypothetica
seu Composita?*

Propositio Hypothetica seu Composita, est triplex: *Conditionalis*, *Disjunctiva*, & *Copulativa*.

Quid est Propositio Conditionalis?

Propositio Conditionalis seu Hypothetica in specie sic dicta, est, in qua simplices propositiones, per conjunctionem conditionalem, *Si*, *Nisi*, aut similes, connectuntur: ut, *Si fueris felix, multos numerabis amicos.*

Quid

*Quid notandum de propositione
Conditionalis?*

Notandum de propositione *Conditionalis*, eam nihil ponere in esse. Hoc est : Ad veritatem propositionis conditionalis, non requiritur, ut ejus simplices sint veræ, sed tantum, ut connexio seu consequentia sit bona. Sic, hæc Enunciatio, *Si Asinus volat, habet alas* : est vera, licet neque volet asinus, neque alas habeat. Sufficit enim, quod ad volatum asini, si dandus illi esset, alæ requirantur.

Quid est Propositio Disjunctiva?

Propositio Disjunctiva est, in qua simplices propositiones, per conjunctionem disjunctivam, *Aut, Vel, Sive*, ac similem connectuntur : ut : *Petrus aut est sanus, aut egrotus.*

*Quid notandum de Propositione
Disjunctiva?*

Notandum de Propositione *Disjunctiva*, ad veritatem ejus requiri, ut membra disjuncta sibi repugnent. Unde bona est disjunctiva, cum dico : *Petrus aut valet, aut egrotat* : nam valere & , egrotare, pugnant. At, vitiosa est, cum dico : *Petrus aut valet, aut est homo* : valere enim & hominem esse, non pugnant, sed juxta consistunt.

Quid est Propositio Copulativa?

Propositio Copulativa est, in qua simplices propositiones, per conjunctionem copulativam *Et, Ac, Atque, Cum Tum*, similesq; connectuntur. Vt : *Nox & amor, vinumq;, nihil moderabile suadent.* Atque sunt Propositiones Copulativæ triplices : In quibusdam enim multa subjecta junguntur uni prædicato ;
at,

ut, *Aristoteles & Xenocrates fuerunt discipuli Platonis*. In aliis multa prædicata junguntur uni subiecto; ut, *Aristoteles fuit discipulus Platonis, & Præceptor Theophrasti*. In aliis deniq; multa subiecta junguntur multis prædicatis; ut, *Plato & Aristoteles fuerunt præceptor & discipulus*.

Quid notandum de Propositione

Copulativa?

Notandum de Propositione Copulativa, ad veritatem ejus requiri, ut omnia membra sint vera. Ita hæc propositio est vera: *Homo habet duas manus, & decem digitos*. At falsa est ita: *Homo habet duas manus, & digitos centum*.

Quid est Enunciatio Affirmativa?

Enunciatio Affirmativa est, quæ dicit prædicatum inesse subiecto: ut, *Homo est risibilis*.

Quid est Enunciatio Negans?

Enunciatio Negans est, quæ dicit prædicatum non inesse subiecto: ut, *Homo non est equus*.

Quotuplex est Propositio Negans?

Propositio Negans duplex est: nempe Negans Formaliter, vel Virtualiter.

Quid est Propositio Negans formaliter?

Propositio Negans formaliter est, quæ habet negationem expressam: ubi nihil refert, an ea manifeste, an occulte anteposita sit copulæ: ut, *Petrus non est lapis*. *Nullus homo est quadrupes*.

Quid est Propositio Negans Virtualiter?

Propositio Negans Virtualiter est, quæ negationem non habet expressam; sed implicite latentem in ali-

quo vocabulo, vim negandi virtualiter habente : ut, *Solus homo est rationalis. Pauci sunt docti.*

Quid est Enunciatio Universalis?

Enunciatio Universalis est, cujus subjecto præfixum est Signum Universale. Qualia sunt: *Omnis, Quicumq, Quotcunq, Vterq;* item, *Nullus, Nemo, Neuter.*

Quid est Enunciatio Particularis?

Enunciatio Particularis est, cujus Subjecto præfixum est Signum Particulare. Qualia sunt: *Aliquis, Quidam, Alter.*

Quid est Enunciatio Indefinita?

Enunciatio Indefinita est, cui nullum Signum præfixum est, ita tamen, ut subjectum ejus sit terminus universalis, atque sic Signum vel Universale vel Particulare admittat. ut, *Homo est Animal : Homo est doctus.*

Quid est Enunciatio Singularis?

Enunciatio Singularis est, cujus subjectum est singulare seu individuum, adeoque non tantum non signum ei præfixum est, sed nec præfigi potest. ut: *Petrus scribit. Petrus non scribit.*

Quid est Enunciatio Finita?

Enunciatio Finita est, cujus & subjectum & prædicatum est terminus finitus: ut, *Homo est animal.*

Quid est Enunciatio Infinita?

Enunciatio Infinita est, cujus vel subjectum, vel prædicatum, vel utrumque, est terminus infinitus. Ut: *Omnis non doctus est rudis. Omnis homo est non leo. Omne non animal est non homo. Prima dicitur Infinita infiniti subjecti. Altera, Infinita infiniti*

finiti prædicati. *Tertia*, Infinita infiniti tam subjecti quam prædicati.

Quid est Enunciatio Absoluta?

Enunciatio Absoluta est, quæ dicit rem esse vel non esse, citra particulam determinantem seu modum: ut, *Homo est rationalis*.

Quid est Enunciatio Modalis?

Enunciatio Modalis est, quæ dicit rem esse vel non esse, cum particula determinante seu modo: ut: *Necesse est hominem esse rationalem*.

Quot sunt Modi?

Modi sunt quatuor: *Necesse*, *Contingens*, *Impossibile* & *Possibile*. ut: *Necesse est hominem esse animal*. *Contingit hominem esse doctum*. *Impossibile est hominem esse lapidem*. *Possibile est hominem mori*.

Quid significant hi Modi?

Necessarium est, quod non potest non esse. *Contingens est*, quod, cum sit, potest non esse. *Impossibile est*, quod esse plane nequit. *Possibile est*, quod, cum non sit, esse potest. Atque, *Necesse* & *Impossibile*, sunt Modi Univerfales: *Contingit*, & *Possibile est*, sunt Modi Particulares.

Quid requiritur ad veritatem Propositionis Modalis?

Ad veritatem propositionis modalis requiritur, ut modus formalis congruat cum conditione materiæ. Sic hæc propositio: *Contingit hominem esse animal*, est falsa, quia contradictoria est vera: *Non contingit hominem esse animal*.

*Quomodo resolvī debent Propositiones
Modales?*

Propositiones Modales ita debent resolvī, ut ex Infinitivis modis dicti seu enunciationis absolutæ cui modus apponitur, fiant modi finiti; modales vero particulæ inter subjectum & prædicatum collocentur, & referantur ad copulam. V. g. hæc propositio: *Necessè est hominem esse animal*: sic resolvitur: *Homo necessario est animal*. Ista: *Impossibile est hominem esse lapidem*: sic resolvitur: *Homo impossibiliter est lapis*: vel, *Homo non potest esse lapis*. Hæc: *Contingit hominem esse doctum*: sic resolvitur: *Homo contingenter est doctus*. Denique ista: *Possibile est hominem mori*: sic resolvitur: *Homo possibiliter moritur*: vel, *Homo potest mori*.

Quid est Propositio Exponibilis?

Propositio Exponibilis est, in qua reperitur particula Exponibilis.

Quotuplex est Propositio Exponibilis?

Propositio Exponibilis, est Triplex: Exclusiva, Exceptiva, & Restrictiva.

Quid est Propositio Exclusiva?

Propositio Exclusiva est in qua reperitur particula exponibilis exclusiva: quales sunt: *Solus*, *Tantum*, *Duntaxat*, & similes. Atque est Propositio Exclusiva triplex: Exclusiva exclusi subjecti: Exclusiva exclusi prædicati, & Exclusiva exclusi Signi.

Quid est Exclusiva exclusi Subjecti?

Exclusiva exclusi Subjecti est, in qua excluduntur alia subjecta a participatione ejusdem prædicati. Ut: *Solus Deus est adorandus*. Atque cum quælibet propositio

positio exclusiva resolvatur in duas propositiones; hæc ita resolvenda est: *Deus est adorandus. Quod non est Deus, non est adorandum.*

Quid est Exclusiva exclusi Prædicati?

Exclusiva exclusi prædicati est, in qua excluduntur alia prædicata a participatione Subjecti: ut, *Petrus bibit tantum aquam.* Hæc ita resolvitur: *Petrus bibit aquam. Petrus non bibit aliquid, quod non est aqua,*

Quid est Exclusiva exclusi Signi?

Exclusiva exclusi Signi est, quæ Signum Universale excludit a particulari. ut: *Tantum quidam homines salvabuntur.* Hæc ita resolvitur: *Quidam homines salvabuntur: Quidam homines non salvabuntur: vel: Non omnes homines salvabuntur.*

Quid est Propositio Exceptiva?

Propositio Exceptiva est, quæ signum exceptionis habet: cujusmodi sunt, *Præter, Nisi, & voces similes, ipsumq; verbum Excipio.* ut: *Omnis homo præter Christum peccavit.* Hæc ita resolvitur: *Christus non peccavit: Omnis homo, qui non est Christus, peccavit.*

Quid est Propositio Restrictiva?

Propositio Restrictiva, quam alii *Reduplicativam* vocant, est, in qua reperitur particula restrictiva: quales sunt: *Quoad, Quatenus, In quantum, Prout, & similes.* Atque solet denotari per particulas restrictivas, vel pars, vel causa, vel subjectum primum, vel qualitas, vel conditio sine qua non. *Pars* denotatur: uti cum dico: *Homo quoad corpus est mortalis:* Hæc, ita resolvitur: *Homo est mortalis. Corpus est pars hominis, secundum quam ille est mortalis.* *Causa*

denotatur: uti cum dico: *Homo, quatenus rationalis, est docilis.* Hæc, ita resolvitur: Homo est docilis. Rationalitas est causa, cujus vi homo est docilis. *Subiectum primum* denotatur, uti cum dico: *Homo, quatenus est corpus, habet quantitatem.* Hæc, ita resolvitur: Homo habet quantitatem. Corpus est subiectum primum, cujus vi homo habet quantitatem. *Qualitas* denotatur: uti cum dico: *Petrus secundum eruditionem est amabilis.* Hæc, ita resolvitur: Petrus est amabilis. Eruditio est qualitas, secundum quam Petrus est amabilis. *Conditio sine qua non* denotatur, uti cum dico: *Ignis, quatenus est propinquus, urit.* Hæc, ita resolvitur: Ignis urit. Propinquitas est conditio sine qua ignis non urit.

CAPVT III. De Prædicatione.

Quid est Prædicatio?

Prædicatio, est propositio affirmativa, seu, affirmans aliquid de aliquo, ut: *Homo est animal.*

Quid est Prædicatio Propria?

Prædicatio Propria est, cujus omnes partes sive voces, in propria significatione accipiuntur. ut: *Petrus est doctus.*

Quid est Prædicatio Impropria?

Prædicatio Impropria est, cujus aliqua pars sive vox, improprie accipitur. ut: *Herodes est Vulpes.*

Quid est Prædicatio Causalis?

Prædicatio Causalis est, cum causa de suo effectu, vel effectus de causa prædicatur in casu recto; id est, nomi-

nominativo. ut, *Præsentia Solis est dies.* Præsentia enim Solis est causa efficiens diei.

Quid est Prædicatio Concomitativa?

Prædicatio Concomitativa est, cum unum de altero prædicatur in casu recto, ideo tantum quia necessario cum ipso existit. ut; *Vnius generatio est, alterius corruptio.*

Quid est Prædicatio Naturalis?

Prædicatio Naturalis est, cum id prædicatur, quod alteri inest, & subicitur id, cui alterum inest. Inest autem commune particulari sive singulari; & connotativum, seu quod tanquam adjacens de aliquo dicitur, absoluto; & illi, cui adjacet: Proinde Prædicationes naturales sunt: *Homo est animal. Homo est doctus.*

Quid est Prædicatio contra Naturam?

Prædicatio contra Naturam est, cum subicitur quod revera inest, & prædicatur id cui inest. Hoc est, cum particulare seu singulare prædicatur de communi, vel absolutum de connotativo. ut; *Animal est homo. Doctum est homo.*

Quid est Prædicatio præter Naturam?

Prædicatio præter Naturam est, cum ita prædicatur unum de altero, ut neutrum revera alteri inest: uti cum idem prorsus de seipso effertur: v. g. *Petrus est Petrus. Homo est homo.* Quæ prædicatio dicitur *Identica.* Vel, cum concretum unum de altero prædicatur, ratione subjecti vel suppositi, quorum formæ in abstracto de se invicem prædicari non possunt. uti cum dico: *Album est dulce:* respectu nimirum *Lactis.* Atque hæc prædicatio dicitur *Per Accidens.*

Quid est Prædicatio Intrinseca?

Prædicatio Intrinseca est, cum forma prædicati est in subiecto. ut, *Petrus est doctus*. Doctrina enim, quæ forma docti est, in Petro est.

Quid est Prædicatio Extrinseca?

Prædicatio Extrinseca est, cum forma prædicati non est in subiecto, sed subiectum tantum denominat, revera autem alteri alicui inest. ut, *Petrus videtur*. Visio enim, qua Petrus videtur, non est in ipso, sed in eo, qui videt eundem.

Quid est Prædicatio Essentialis?

Prædicatio Essentialis est, cum prædicatum est vel ipsa essentia, vel de essentia subiecti. ut: *Homo est animal Rationale*. Vel: *Homo est rationalis*. *Homo est animal*.

Quid est Prædicatio Accidentalıs?

Prædicatio Accidentalıs est, cujus prædicatum nec est essentia, nec de essentia subiecti. ut, *Homo est risibilis*: *Homo est doctus*.

Quid est Prædicatio in Quid?

Prædicatio in Quid dicitur, qua apte respondetur quærenti quid res sit. ut, si quæras *Quid sit homo?* apte respondetur, quod sit animal. *Quid Petrus sit?* apte respondetur, quod sit homo.

Quid est Prædicatio in Quale?

Prædicatio in Quale est, qua apte respondetur quærenti qualis res sit. Atque hæc rursus est duplex: Una, in Quale Essentiali: altera, in Quale Accidentali. *Prædicatio in quale essentiali* vocatur, qua recte respondetur quærenti, qualis res sit secundum naturam & essentiam suam. ut, si quæras *qualis sit secundum*

cundum essentiam homo : respondetur rationalis. *Prædicatio in quale accidentale* vocatur , qua recte respondetur quærenti , qualis res sit secundum proprietates aut accidentia sua. Ita, si quæras, *qualis sit homo secundum Proprietates?* recte respondetur: Ribilis ; disciplinarum capax : *Qualis secundum Accidentia?* respondetur , albus, doctus, bonus, malus.

Quid est Prædicatio Necessaria?

Prædicatio Necessaria est, quæ sic est vera, ut non possit esse falsa : ut, *Homo est animal.*

Quid est Prædicatio Contingens?

Prædicatio Contingens est , quæ sic est vera , ut possit esse falsa : ut *Homo est doctus.*

Quid est Prædicatio Impossibilis?

Prædicatio Impossibilis est, quæ sic est falsa, ut non possit esse vera. ut: *Homo est lapis.*

CAPVT IV.

De Suppositione Vocum in Enunciationibus.

Quid est Suppositio?

Suppositio est certa vocis alicujus , subjecti imprimis, in enunciatione acceptio.

Quotuplex est Suppositio?

Suppositio duplex est, Materialis & Formalis.

Quid est Suppositio Materialis?

Suppositio Materialis , est acceptio vocis pro se ipsa. ut : *Homo est vox disyllaba.*

Quid est Suppositio Formalis?

Suppositio Formalis, est acceptio vocis pro re significata. ut : *Homo est risibilis.*

Quid est Suppositio Singularis?

Suppositio Singularis, est acceptio vocis Singularis. Qualis est in subiecto hujus propositionis : *Socrates currit.*

Quid est Suppositio Communis?

Suppositio Communis, est acceptio vocis communis. Estque vel Simplex, vel Personalis.

Quid est Suppositio Simplex?

Suppositio Simplex, est acceptio vocis communis, pro suo significato immediato, non pro inferioribus, sive iis, quæ mediate significat. ut, cum dico : *Homo est species. Animal est genus.* Utrobique enim subiectum capitur pro nuda natura, quam denotat; i. e. natura humana, natura animalis, non pro inferioribus, seu iis, quæ naturam illam habent.

Quid est Suppositio Personalis?

Suppositio Personalis, est acceptio vocis communis, pro suis significatis mediatis, sive inferioribus, in quæ communis natura per signum aliquod distribuitur. Ita in his propositionibus : *O. homo est animal. N. homo est lapis;* subiecta non præcise nudam & simplicem naturam denotant, sed inferiora, quæ naturam illam participant: hoc est, Species & Individua.

Quotuplex est Suppositio Personalis?

Suppositio Personalis est quadruplex : Distributiva, Copulata, Determinata, & Confusa.

Quid

Quid est Suppositio Distributiva.

Suppositio Distributiva, est acceptio vocis communis, pro inferioribus vel denominatis, copulative enumerandis, id est, per conjunctionem copulativam copulantem integras enunciationes. Ut: *O. homo est animal.* Sensus est: Et Petrus est animal, & Paulus est animal, & Johannes est animal. Et ita accipitur subjectum universalis propositionis Affirmantis & prædicatum Negantis.

Quotuplex est Suppositio Distributiva.

Suppositio Distributiva est *Triplex*: Vel, pro generibus singulorum tantum; vel, pro singulis generum tantum; vel, pro generibus singulorum & singulis generum simul.

Quid est Suppositio Distributiva pro Generibus Singulorum tantum?

Suppositio Distributiva pro generibus singulorum tantum est, cum vox aliqua accipitur pro omnibus suis speciebus; non individuis. Ita sumitur subjectum hujus propositionis: *O. Sensus sunt in homine.* Sensus enim est: Omnes Sensuum species, sunt in homine, minime vero, omnia sensuum individua. Alioquin enim visus hujus lyncis, & odoratus hujus canis esset in homine.

Quid est Suppositio Distributiva pro singulis Generum tantum?

Suppositio Distributiva pro singulis generum tantum est, cum vox aliqua accipitur pro omnibus suis individuis, non speciebus. Ita accipitur subjectum hujus propositionis: *Omne animal moritur.* Sensus enim est: *O. animalis individuum moritur; non O. animalis species.*

Quid

*Quid est Suppositio Distributiva pro Generibus
singulorum, & singulis Generum
simul?*

Suppositio Distributiva pro generibus singulorum, & singulis generum simul est, cum vox aliqua accipitur non tantum pro omnibus suis speciebus, sed etiam omnibus suis individuis. Ita sumitur subjectum hujus propositionis: *O, animal est substantia*. Non enim tantum omnis animalis species, i. e. homo, leo, equus, sed & omne animalis individuum i. e. hic homo, hic leo, hic equus, est substantia.

Quid est Suppositio Copulata?

Suppositio Copulata seu Collectiva, est acceptio vocis communis pro inferioribus vel denominatis, copulativim enumerandis: i. e. per conjunctionem copulativam, copulantem simplices tantum terminos. Ita sumitur subjectum hujus propositionis: *Omnia elementa sunt quatuor*. Sensus enim est: Aer, Ignis, Aqua & Terra, simul sumpta, sunt quatuor.

Quid est Suppositio Determinata?

Suppositio Determinata seu Disjunctiva, est acceptio vocis communis, pro inferioribus vel denominatis, disjunctive enumerandis: i. e. per conjunctionem disjunctivam, disjungentem integras enunciationes. Ita sumitur subjectum hujus enunciationis: *Aliquis homo est doctus*. Sensus enim est: Vel Petrus est doctus: Vel, (si hic non est,) Paulus est doctus: Vel, (si nec iste,) Johannes est doctus: Vel, (si neque hic) alius quispiam hominum in singulari est doctus.

Quid est Suppositio Confusa?

Suppositio Confusa seu Disjuncta, est acceptio vocis communis, pro inferioribus vel denominatis, disjunctim

junctim enumerandis, i. e. per conjunctionem disjunctivam, disjungentem simplices tantum terminos. Ita sumitur subjectum hujus propositionis: *Aliqua navis est necessaria navigaturo.* Sensus enim est: Hæc, vel illa, vel ista navis (indeterminate seu confuse, cum nulla determinate necessaria sit,) est necessaria navigaturo.

Quid est Suppositio Naturalis?

Suppositio Naturalis, est acceptio vocis communis, pro omnibus quæ naturâ sua significare potest. Ita sumitur subjectum hujus propositionis: *Omnis homo est animal.* Intelligitur enim, per vocem Homo, omne illud, quod ea denotatur, i. e. homines, qui sunt, fuerunt, futuri sunt, vel esse possunt.

Quid est Suppositio Accidentalis?

Suppositio Accidental, est acceptio vocis communis, non pro omnibus, sed iis tantum significatis, pro quibus ut accipiatur, patitur enunciatio. Ita sumitur subjectum hujus propositionis: *Quidam homo nunc scribit:* nec enim capitur vox homo, pro homine, qui fuit vel futurus est, sed pro eo tantum, qui jam existit.

CAPUT V.

De Affectionibus Enunciationum.

Quot sunt Affectiones Enunciationum?

Affectiones Enunciationum, quatenus cum aliis comparantur, sunt quatuor: *Subalternatio, Oppositio, Equipollentia, & Conversio.*

Quid

Quid est SUBALTERNATIO?

Subalternatio, est inclusio enunciationis particularis in universali, idem subiectum ac prædicatum, eandemq; qualitatem habente. ut:

Omnis homo est animal:

Quidam homo est animal.

Nullus homo est lapis:

Quidam homo non est lapis.

Atq; in his Vniversalis, *Subalternans*, Particularis, *Subalternata* vocatur.

Quid notandum de Propositionibus Subalternis?

De Propositionibus Subalternis, duæ Regulæ tenendæ sunt: *Prima est*: Quoties Subalternans est vera, toties etiam vera est subalternata: sed non contra. Sic, quia verum est, Omnem hominem esse animal; verum etiam erit: Quendam hominem esse animal. Non autem, quia verum est, quendam hominem esse doctum; ideo statim sequitur, Omnem hominem esse doctum. *Altera Regula est*: Quoties Subalternata est falsa, toties falsa est etiam subalternans: sed non contra. Sic, quia falsum est, quendam hominem esse lapidem, ideo falsum erit quoq; omnem hominem esse lapidem. Non autem quia falsum est, omnem hominem esse doctum; ideo falsum statim est, quendam hominem esse doctum.

Quid est OPPOSITIO Propositionum?

Oppositio Propositionum, est pugna duarum, Enunciationum, cum idem de eadem re, una affirmat, altera negat.

Quot

Quot sunt Species Oppositionum?

Species Oppositionum sunt quinque : Contradictoria, Contraria, Subcontraria, Indefinitarum oppositio, & Singularis.

Quid est Oppositio Contradictoria?

Oppositio Contradictoria est, cum una propositio-
num est universalis affirmans, altera particularis ne-
gans; vel, una Universalis negans, altera particularis
affirmans. ut : *Omnis homo est rationalis : Non o-*
mnis homo est rationalis : seu, quod idem est : Qui-
dam homo non est rationalis. Item : *Nullus homo est*
rationalis : Nonnullus homo est rationalis : vel, quod
idem est : Quidam homo est rationalis.

Quæ est Natura Contradictoriorum?

Contradictoriorum hæc natura & lex est, ut una
vera, semper falsa sit altera; & una falsa, semper ve-
ra sit altera. Sic, si vera est hæc, *Omnis homo est*
animal : falsa est ista : Non omnis homo est animal :
sive : Quidam homo non est animal. Contra, si falsa
est illa : *N. homo est doctus*, vera est ista : *Nonnullus*
homo est doctus ; sive : Quidam homo est doctus.

Quid est Oppositio Contraria?

Oppositio Contraria, est inter duas Enunciationes
Universales : ut, *Omnis homo est doctus.* *Nullus ho-*
mo est doctus.

*Quæ est Natura Contrariarum Enun-
ciationum?*

Contrariæ Enunciationes hanc habent naturam,
ut interdum quidem simul falsæ esse possint, at nun-
quam simul veræ. Ita simul falsæ sunt hæ : *Omnis*
homo est doctus. *Nullus homo est doctus,*

Quid

Quid est Oppositio Subcontrariarum?

Subcontrarie opponuntur duæ particulares. ut:
Quidam homo est doctus. Quidam homo non est doctus.

Quæ est Natura Subcontrariarum Enunciationum?

Subcontrariæ Enunciationes hanc habent naturam, ut interdum quidem simul veræ esse possint, at nunquam simul falsæ. Ita simul veræ sunt hæ: *Quidam homo est doctus: Quidam homo non est doctus.*

Quid est Oppositio Indefinitarum?

Oppositio Indefinitarum est; quando duæ Indefinitæ inter se opponuntur: ut; *Homo est animal: Homo non est animal.* Atque hæ imitantur naturam Subcontrariarum.

Quid est Oppositio Singularium?

Oppositio Singularium est; quando duæ Singulares inter se opponuntur: ut; *Petrus currit; Petrus non currit.* Atque hæ imitantur naturam Contradictoriorum.

Quenam sunt Requisita justæ Oppositionis?

Requisita justæ oppositionis sunt; ut oppositio fiat secundum idem; ad idem; & eodem tempore.

Quid est ÆQUIPOLLENTIA?

Æquipollentia est, cum duæ pluresve propositiones, ejusdem subjecti & prædicati, quantitatis item ac qualitatis; ita unum idemq; significant; ut Signo tantum & particula negante, aut alio atque alio ejuspositu discriminentur. Tales sunt hæ Enunciationes: *O. homo est animal: N. homo non est animal: Non quidam homo non est animal.*

Vnde

Vnde potest addisci doctrina Æquipollentia?

Doctrina Æquipollentiæ optime addisci potest, ex sequentibus tribus versiculis memorialibus:

*Non omnis, quidam-non: Omnis-non, quasi Nullus:
Non-nullus, quidam: sed Nullus-non, valet Omnis;
Non-aliquis, Nullus: Non quidam non, valet Omnis.*

Quid est CONVERSIO Enunciationum?

Conversio Enunciationum est, cum, salva veritate, ex subjecto Enunciationis fit prædicatum, & ex prædicato subjectum. ut: *Nullus homo est lapis. Nullus lapis est homo.* Prior propositio, quæ convertitur, dicitur *Conversa*: in quam autem convertitur, seu posterior propositio, dicitur *Convertens*.

Quot sunt Species Conversionis?

Species Conversionis sunt tres: *Conversio Simplex, Per Accidens, & Per Contrapositionem.*

Quid est Conversio Simplex?

Conversio Simplex est, cum simpliciter ex subjecto fit prædicatum, & ex prædicato subjectum, manente eadem quantitate & qualitate enunciationum. Hac convertitur Universalis Negans, & Particularis Affirmans. Sic, hæc Universalis Negans: *Nullus homo est lapis*: convertitur in istam universalem similiter negantem: *Nullus lapis est homo.* Et, hæc Particularis Affirmans: *Quidam homo est doctus*: in istam itidem particularem affirmantem: *Quoddam doctum est homo.*

Quid est Conversio Per Accidens?

Conversio Per Accidens est, cum ita convertitur Enunciatio, ut maneat eadem qualitas, sed mutetur quan-

quantitas. Hac convertitur Universalis affirmans, in particularem affirmantem. ut: *Omnis homo est bipes. Quoddam bipes est homo.*

Quid est Conversio per Contrapositionem?

Conversio per Contrapositionem est, cum ita termini translocantur, ut etiam contraponantur, h. e. ut loco finitorum ponantur infiniti. Hac convertuntur Universalis Affirmans, & Particularis Negans. Atque Universalis Affirmans quidem, convertitur in Universalem Negantem, sed subiecti infiniti: ut: *Omnis Equus est quadrupes. Quicquid non est quadrupes, non est equus. Seu: Nullum non-quadrupes est equus.* Porro, Particularis Negans, convertitur in particularem affirmantem, sed subiecti infiniti. ut: *Quoddam animal non est quadrupes. Quoddam non-quadrupes est animal.*

Quid notandum de Conversione Propositionum?

De Conversione Propositionum notandum, ne casus recti ponantur pro obliquis, & contra. Hæc enim propositio: *Quidam equus est in stabulo*; non ita convertenda est: *Quoddam stabulum est in equo.* Sed: *Quoddam, quod est in stabulo, est equus.* Deinde: In propositionibus, quarum copula est temporis præteriti vel futuri, curandum, ut illa copula recte convertatur. Sic, hæc propositio: *Omnis senex fuit puer*: non convertitur: *Quidam puer fuit senex.* Sed: *Quidam, qui fuit puer, est senex.* Item hæc propositio: *Quidam puer erit senex*: non convertitur: *Quidam senex erit puer*: Sed: *Quidam, qui erit senex, est puer.*

CAPVT VI.

De Consecutione, Statu, & Ampliatione Enunciationum.

Quid est Consecutio Enunciationum?

Consecutio Enunciationum est, qua ex finita inferatur infinita, vel contra. Sic sequitur: *Omnis justus est honorandus. Ergo: Nullus justus est non-honorandus. & contra. Item N. Electus est reprobus. Ergo: Omnis Electus est non reprobus: & contra. Similiter: Quidam homo est doctus: Ergo: Quidam homo non est non doctus: & contra. Item, Quidam homo non est doctus. Ergo: Quidam homo est non doctus: & contra.*

Quid est Status?

Status est acceptio vocis, pro re existente eo tempore, quod per verbum seu copulam significatur.

Quotuplex est Status?

Status, pro triplici temporis differentia, triplex est:
 1. *Præsentis temporis*: qualis est in subjecto hujus Enunciationis: *Quidam homo currit.* Sensus enim est: *Quidam homo qui est, seu existit, currit: non qui fuit, vel erit.* 2. *Præteriti temporis*: qualis est in subjecto hujus enunciationis: *Quædam domus est combusta.* Sensus enim est: *Quædam domus quæ fuit, est combusta; non quæ est, vel erit.* 3. *Futuri temporis*: qualis est in Subjecto hujus enunciationis: *Quidam homo nascetur.* Sensus est: *Quidam homo qui erit, nascetur, non qui est, vel fuit.*

Quid est Ampliatio?

Ampliatio, est acceptio vocis pro re existente etiam alio tempore, quam per verbum seu copulam significatur.

Quotuplex est Ampliatio?

Ampliatio est quadruplex: 1. *Respicit Præsens & præteritum*. Qualis est in subjecto hujus propositionis: *Quidam homo natus est*. Sensus enim est: *Quidam homo, qui est, vel fuit, natus est; non vero qui erit*. 2. *Respicit Præsens & futurum*. Qualis est in subjecto hujus propositionis: *Quidam homo morietur*. Sensus enim est: *Quidam homo qui est, vel erit, morietur; non vero qui fuit*. 3. *Respicit Præsens, Præteritum & Futurum*. Qualis est in subjecto hujus propositionis: *Natus morietur*. Sensus enim est: *qui jam natus est, nunc nascitur, vel adhuc nascetur, morietur*. 4. *Respicit Præsens, Præteritum, Futurum & Possibile*: i. e. quod esse non repugnat. Qualis est in subjecto hujus propositionis: *Omnis homo est animal*. Sensus enim est: *Omnis homo qui est, fuit, erit, vel esse potest, est animal*. Atque hoc modo vox aliqua amplissime accipi dicitur. Et ita accipiendum est utrumque extremum propositionis, quæ absolute necessaria.

LIBER TERTIVS.

CAPVT I.

De Syllogismo.

Quid est Syllogismus.

Syllogismus est oratio, in qua, positis quibusdam, diversum quid a positis sequitur, ex necessitate, eo quod illa posita sunt.

Quæ

Qua sunt Partes Syllogismi?

Partes Syllogismi, sunt vel *Propinquæ*, vel *Remotæ*. *Propinquæ*, sunt Propositiones seu Enunciationes; *Remotæ*, sunt Termini.

Quot sunt in Syllogismo Simpliciter Propositiones?

In Syllogismo Simplici sunt Propositiones tres: *Major*, *Minor*, & *Conclusio*; quarum duæ priores etiam Sumtiones seu *Præmissæ* appellantur: *Conclusio*, alio nomine dicitur *Consequens*, item *Questio*.

Quid est Propositio Major?

Propositio Major, est illa Sumtio, quæ in ordine prolationis prior producitur, & continet Majorem terminum cum Medio dispositum. Dicitur alias simpliciter *Propositio*.

Quid est Propositio Minor?

Propositio Minor, est illa Sumtio, quæ in ordine prolationis posterior producitur, & continet Minorem terminum, cum Medio dispositum. Dicitur etiam *Assumptio*, vel *Assumptum*.

Quid est Conclusio?

Conclusio est, quæ ex *Majore* & *Minore* Propositione infertur, & Minorem terminum disponit cum *Majore*.

Quod sunt Termini in Syllogismo?

Termini in Syllogismo sunt tres: *Major*, sive *Majus Extremum*; *Minor*, sive *Minus Extremum*, & *Medius*.

Quid est Majus Extremum?

Majus Extremum, est *Terminus*, qui fit prædicatum conclusionis; & dicitur *Majus Extremum*, quia,

præter Medium terminum, reperitur in Majore Propositione.

Quid est Minus Extremum?

Minus Extremum, est Terminus, qui fit subjectum Conclusionis; & dicitur Minus Extremum, quia præter Medium terminum reperitur in Minore Propositione.

Quid est Medius Terminus?

Medius Terminus est, qui bis ponitur ante conclusionem, semel nimirum in Majore, & semel in Minore propositione; nunquam autem in Conclusionem.

CAPVT II.

De Figuris Syllogismi.

Quid est Figura Syllogismi.

Figura Syllogismi, est legitima trium terminorum dispositio, ad aliquid concludendum.

Quot sunt Figure Syllogismorum?

Figure Syllogismorum sunt tres: Prima, Secunda, & Tertia.

Quid est Prima Figura?

Prima Figura est, in qua Medius terminus est subjectum in Majore propositione, & prædicatum in Minore. ut;

Omnis homo est rationalis.

Petrus est homo.

E. *Petrus est rationalis.*

Quid est Secunda Figura?

Secunda Figura est, in qua medius terminus est præ-

prædicatum, tam in Majore quam in Minore propositione. ut:

O. Homo est rationalis.

N. Lapis est rationalis.

E. N. Lapis est homo.

Quid est Tertia Figura?

Tertia Figura est, in qua Medius terminus est Subjectum, tam in Majore quam in Minore propositione. ut:

O. Homo est rationalis.

O. Homo est bipes.

E. Q. Bipes est rationale.

Quid est Modus Syllogisticus?

Modus Syllogisticus, est dispositio trium Enunciationum Syllogismi, secundum quantitatem & qualitatem.

Quotuplex est Modus Syllogismi?

Syllogismi Modus duplex est: *Directus*, seu directe concludens, qui majus extremum concludit de minori: Et *Indirectus*, seu indirecte concludens, qui minus extremum concludit de majori. Prioris exemplum est:

O. Animal est vivens.

O. Homo est animal.

E. O. Homo est vivens.

Posterioris exemplum est:

O. Animal est vivens.

O. Homo est animal.

E. A. Vivens est homo.

Qui sunt Modi Directi Prima Figura?

Modi Directi Prima Figuræ sunt quatuor:

Barbara. Celarent. Darii. Ferio.

Qui sunt Modi Directi Secunda Figura?

Modi Directi Secunda Figuræ, sunt itidem quatuor:

**Cesare. Camestres. Festino.
Baroco.**

Qui sunt Modi Directi Tertia Figura?

Modi Directi Tertia Figuræ sunt sex:

**Darapti. Felapton. Disamis. Datisi.
Bocardo. Ferison.**

*Quid notandum est de his vocabulis
Technicis?*

In his vocabulis technicis, prima vocalis cujuslibet vocis denotat quantitatem & qualitatem propositionis Majoris: Secunda, Minoris, Tertia, Conclusionis. Exhibent autem sese Vocales quatuor: A. E. I. O. Atque:

A. denotat universalem Affirmantem.

E. denotat universalem Negantem.

I. denotat particularem Affirmantem.

O. denotat particularem Negantem.

Hinc versiculi:

Afferit A, negat E, sed universaliter amba:

Afferit I, negat O, sed particulariter amba.

Qui

Qui sunt Modi Indirecti primæ Figuræ?

Modi Indirecti Primæ Figuræ sunt 5.

Baralip. Celantes. Dabitis.

Fapesmo. Frisesmo.

Atque hi modi Indirecti vocantur, quia omnes majorem terminum, qui prædicatum esse in conclusione debebat, faciunt subjectum conclusionis; & contra minorem terminum, qui subjectum esse debebat, faciunt prædicatum. Vnde etiam valde intricata & minus naturalis in eis est inferendi ratio. Nihilominus, cum nunquam ex veris efficiant falsum, consequentiam legitimam habent; sed in disputando vix adhiberi possunt.

CAPVT III.

De Principiis, & Regulis Syllogismorum.

Quæ sunt Principia Syllogismorum?

Prin cipia seu Fundamenta Syllogismorum, sunt axiomata sive propositiones, per se notæ, quibus nititur consequentia syllogistica: estque unum Principium Affirmativum, alterum Negativum.

Quodnam est Principium Affirmativum?

Principium Affirmativum sive Dictum de Omni, est hæc Propositio: Quicquid affirmatur de omni, sive de subjecto universaliter sumto, hoc est, pro omni eo, quod est ipsum: id etiam affirmatur de cunctis, quæ sub illo continentur. Sic, quod dicitur de omni homine, id necessario etiam dicitur de Italo; nam Italus sub ho-

mine comprehenditur. Atque hoc Principio diriguntur omnes syllogismi affirmativi, & primæ quidem Figuræ actu & evidenter; secundæ vero & tertiæ potestate & obscure.

Quodnam est Principium Negativum?

Principium Negativum sive *Dictum de Nullo*, est hæc propositio: *Quicquid negatur de omni, sive de subiecto universaliter sumto, id etiam negatur de cunctis, quæ sub illo continentur.* Atque hoc Principio diriguntur omnes Syllogismi Negativi: & primæ quidem Figuræ actu & evidenter; secundæ vero & tertiæ potestate & obscure.

Quid est Argumentatio Formalis?

Argumentatio Formalis est, cum in nulla similis formæ, dari potest antecedens verum, seu præmissæ veræ, consequente falso.

Quanam Argumentationes sunt similis formæ?

Argumentationes similis formæ sunt, quæ constant æque multis terminis, eodem ordine dispositis, & æque multis propositionibus, ejusdem quantitatis & qualitatis. ut, hæc argumentatio:

O. *Animal est vivens.*

O. *Homo est animal.*

E. O. *Homo est vivens.*

Similis formæ est cum ista:

O. *Arbor est planta.*

O. *Quercus est arbor.*

E. O. *Quercus est planta.*

Quid

Quid est Argumentatio Materialis?

Argumentatio Materialis est, cum in aliqua simili formæ, dari potest antecedens verum, consequente falso.

Quæ sunt Regulæ Generales Syllogismorum?

Regulæ Generales Syllogismorum sunt Octo:

Prima est: *Non est bona forma argumentandi, qua aliquando, in certa materia, ex veris præmissis colligitur verum, sed, qua in omni materia & semper.* Hinc in definitione syllogismi dicitur, conclusionem sequi debere ex necessitate, & ideo, quia illa posita sunt.

Secunda est: *Mala forma est, non qua semper, sed qua vel semel ex veris falsum concluditur.* Nullus enim syllogismus tam malus est, quin interdum verum concludat.

Tertia est: *Conclusionem esse veram, & eandem sequi ex præmissis, idem non est:* potest enim conclusio esse vera, & tamen ex præmissis non sequi: & rursus, potest conclusio legitime ex præmissis sequi, nec tamen vera esse.

Quarta est: *Ex puris Particularibus nihil sequitur:* ut:

Q. Homo est doctus.

Q. Rudis est homo.

E. Q. Rudis est doctus.

Quinta est: *Ex puris Negantibus nihil sequitur.* ut:

N. Homo est lapis.

N. Adamas est homo.

E. N. Adamas est lapis.

Sexta

Sexta est: *In omni Syllogismo simplici, tres tantum termini esse possunt.* Hinc vitiose concludit iste:

O. Homo est rationalis.

Imago Pauli est homo pictus.

E. Imago Pauli est rationalis.

Septima est: *Conclusio debet semper imitari partem Syllogismi debiliorem*: id est, si una præmissarum sit negans, conclusio negare debet, non affirmare. Si item una sit particularis, conclusio particularis esse debet, non universalis. Hinc male concludit hic Syllogismus:

O. Homo est rationalis.

Q. Bipes est homo.

E. Q. Bipes est rationale.

Octava est: *A non distributo ad distributum, i. e. a termino non distributive accepto in antecedente, ad eundem distributive acceptum in consequente N. V. C.* ut, si ita colligas:

A. Animal non est rationale.

O. Homo est rationalis.

E. A. Homo non est animal.

Majus enim Extremum *Animal*, non distribuitur in majore, quia est subiectum particularis propositionis; distribuitur autem in conclusione, quia hic est prædicatum negantis.

Quæ sunt Regule Speciales Primæ Figuræ?

Regule speciales primæ Figuræ sunt duæ. Vna est: *Ex majore particulari in prima Figura nihil sequitur.* ut:

A. Animal est rationale.

O. Equus est animal.

E. A. Equus est rationalis.

Alte-

Altera est: *Ex Minore negante in prima Figura nihil sequitur*: ut:

O. homo est bipes.

N. Gallina est homo.

E. N. Gallina est bipes.

Quid hic notandum?

Notandum 1. est: Si subjectum Majoris propositionis sit infinitum, tum in prima figura recte & formaliter ex minore negante concludi. ut:

Qui non est ex Deo, verbum Dei non audit.

Judei non sunt ex Deo.

E. Judei verbum Dei non audiunt.

Notandum 2. Ad legitimos Syllogismos primæ Figuræ referri etiam illos, qui Minorem & Conclusionem habent propositiones singulares, etsi hæ proprie neq; universales sunt, neq; particulares: perinde enim fuerit, sive ad Barbara, sive ad Darii reducantur: atq; idem hoc valet etiam in cæteris Figuris.

Quæ sunt Regule Speciales Secunda Figuræ?

Regule Speciales Secunda Figuræ sunt duæ: Vna est: *Ex majore particulari in secunda Figura nihil sequitur*. ut:

A. Animal non est rationale.

O. Homo est rationalis.

E. A. Homo non est animal.

Altera est: *Ex puris Affirmativis in secunda Figura nihil sequitur*. ut:

O. Brutum est animal.

O. Homo est animal.

E. O. Homo est brutum.

Quæ

Quæ sunt Regulae Speciales Tertiæ figuræ?

Regulae Speciales Tertiæ Figuræ sunt duæ. Vna est: Conclusio in tertiâ figurâ semper debet esse particularis. Hinc N. V. C.

O. *Homo est rationalis.*

O. *Homo est animal.*

E. O. *Animal est rationale.*

Altera est: *Ex Minore negante in tertiâ Figurâ nihil sequitur: ut:*

O. *Homo est animal.*

N. *Homo est brutum.*

E. A. *Brutum non est animal.*

At, si subjectum Conclusionis fiat infinitum, recte aliquid sequitur in tertiâ Figurâ ex minore negante. ut:

O. *Avis est bipes.*

Quedam avis non est corvus.

E. *Quoddam, quod non est corvus, est bipes:*

Non vero: E. *Quidam corvus non est bipes.*

Daturne, præter tres supra expositas Syllogismorum Figuras, adhuc alia?

Si Medii termini cum extremis dispositionem respiciamus, atq; tot constituamus Figuras, quot modis illa variari potest dispositio, resultat sane, præter tres expositas, adhuc alia Figura, Averroi *Figura Quarta Galenica*, dicta: sive, quod Galenum Medicum, sive potius, quod Galenum Arabem quendam, cujus duo de *Demonstratione* libri extant, Autorem habet.

Quid

Quid est Figura Quarta?

Figura Quarta est, in qua medius terminus est in
 majore prædicatum, & in minore subjectum. Ejus
 modos constituunt: **Bamalip. Calemes.**

Dimatis. Fesapo. Fresiso. ut:

Bam O. Corpus est extensum.

a O. Extensum est divisibile.

lip E. Q. Divisibile est corpus.

Ca O. Homo est rationalis.

lem N. Rationale est lapis.

es E. N. Lapis est homo.

Dim Q. Homo est doctus.

at O. Doctum est animal.

is E. Q. Animal est homo.

Fes N. Lapis est homo.

ap O. Homo est corpus.

o E. Q. Corpus non est lapis.

Fres N. Lapis est homo.

is Q. Homo est corpus.

o E. Q. Corpus non est lapis.

Sed, hi Syllogismi, etsi formali gaudent consequentia,
 ita, ut nunquam ex præmissis veris falsum conclu-
 dant, ac insuper ad primæ figuræ syllogismos reduci
 possint, & denique regulis generalibus itemque suis
 specialibus alligentur, tamen exiguum habent usum,
 quia non videntur naturaliter concludere: cum judi-
 cium naturale, perceptis eorum præmissis,
 non eam expectet Conclusionem,
 quæ inferitur,

CAPVT IV.

De Syllogismo Expositorio.

Quid est Syllogismus Expositorius?

Syllogismus Expositorius est, per quem, in tertia Figura, medius terminus communis, seu prædicabilis, majoris perspicuitatis causa, mutatur in medium terminum singularem seu individuum: atq; sic inferitur eadem conclusio. ut, hic Syllogismus:

O. Homo est bipes.

O. Homo est animal.

E. Q. Animal est bipes:

sic mutatur in Syllogismum Expositorium:

Petrus est bipes.

Petrus est animal.

E. Q. Animal est bipes.

CAPVT V.

De Reductione Syllogismorum.

Quid est Syllogismus Perfectus?

Syllogismus perfectus est, qui nullo indiget principio perficiente, ut cuius sanæ mentis appareat, necessaria ejus consequentia. Quales sunt omnes Syllogismi legitimi primæ Figuræ.

Quid est Syllogismus Imperfectus?

Syllogismus Imperfectus est, qui indiget principio perficiente, ut cuius sanæ mentis appareat necessaria ejus consequentia. Quales sunt omnes Syllogismi secundæ & tertiæ Figuræ.

Quid

Quid est Reductio?

Reductio est mutatio Syllogismi imperfecti in perfectum, ut ostendatur imperfectus fuisse legitimus.

Quotuplex est Reductio?

Reductio duplex est: *Ostensiva*, & *Per Impossibile*.

Quid est Reductio Ostensiva?

Reductio Ostensiva est, quando Syllogismus Secundæ aut Tertiæ Figuræ, transmutatur in Syllogismum Primæ, ita ut idem concludatur eodem medio in Prima, quod ante concludebatur in Secunda & Tertia. Atque fit transmutatio illa, vel per Conversionem simul & Transpositionem unius præmissarum, vel per Conversionem tantum; & infertur vel eadem planè conclusio in Prima, quæ illata erat in cæteris: vel saltem quæ semper & legitime in eam converti potest.

Ad quem Modum Perfectum singuli Imperfecti reducuntur?

Quatuor sunt literæ initiales quatuor modorum perfectorum, nempe; B. C. D. F. ab harum una incipiunt etiam omnes modi Imperfecti. Proinde prima litera cujuslibet modi Imperfecti significat, illum reduci ad perfectum, ab eadem litera incipientem. ut: *Cesare*, ad *Celarent*: *Darapti*, ad *Darii*.

Quid porro hic notandum?

Porro notandæ sunt literæ S. P. M. & medianum C. Nam, in quam propositionem incidit litera S. ea debet simpliciter converti; in quam incidit litera P. ea debet converti per accidens; in quam incidit litera M. ea debet transponi, id est, debet poni loco Minoris

rioris, si sit Major: vel, loco Majoris, si sit Minor. Denique si in aliquo modo occurrit, litera C. quod sit in Bocardo & Baroco, signum hoc est, quod reductio debeat fieri per impossibile. Hinc versiculi:

S. vult Simpliciter verti: P. vero per Acci.

M. vult transponi: C. per Impossibile duci.

Sola conversione unius propositionis syllogisticae reducuntur:

CeS N. Brutum est rationale.

a O. Homo est rationalis.

re. E. N. Homo est brutum. ad

Ce N. Rationale est brutum.

la O. Homo est rationalis.

rent. E. N. Homo est brutum.

FeS N. Homo est brutum.

ti A. Animal est brutum.

no. E. A. Animal non est homo. ad

Fe N. Brutum est homo.

ri A. Animal est brutum.

o. E. O. Animal non est homo.

Da O. Homo est rationalis.

raP O. Homo est animal.

ti. E. A. Animal est rationale. ad

Da O. Homo est rationalis.

ri A. Animal est homo.

i. E. A. Animal est rationale.

Fe N. Homo est irrationalis.

laP O. Homo est animal.

ton. E. A. Animal non est irrationale. ad

Fe-

Fe N. Homo est irrationalis.
 ri A. Animal est homo.
 o. E. A. Animal non est irrationale.

Da O. Avarus est miser.

tiS A. Avarus est dives.

i. E. A. Dives est miser. ad

Da O. Avarus est miser.

ri A. Dives est avarus.

i. E. A. Dives est miser.

Fe N. Vitium est amandum.

riS A. Vitium est delectabile.

on. E. A. Delectabile non est amandum. ad

Fe N. Vitium est amandum.

ri A. Delectabile est vitium.

o. E. A. Delectabile non est amandum.

Conversione plurium propositionum syllogisticarum, & simul præmissarum transpositione, reducuntur

CaM O. Homo est rationalis.

eS N. Brutum est rationale.

treS. E. N. Brutum est homo. ad

Ce N. Rationale est brutum.

la O. Homo est rationalis.

rent. E. N. Homo est brutum.

DiS A. Animal est rationale.

aM O. Animal est vivens.

iS. E. A. Vivens est rationale. ad

- Da O. *Animal est vivens.*
 ri A. *Rationale est animal.*
 i. E. A. *Rationale est vivens.*

Quid est Reductio per Impossibile?

Reductio per Impossibile est, quando loco conclusionis assumitur ejus contradictoria, transferturque in locum propositionis Majoris aut Minoris, & inferitur Conclusio absurda, ut intelligatur, Conclusionem veterem esse veram, quo ista absurditas evitetur.

Quomodo fit Reductio hac in Secunda Figura?

Reductio per Impossibile in Secunda Figura fit, servando Majorem, & Conclusionis contradictoriam in locum Minoris collocando, secundum versiculum:

Servat Majorem variatq, Secunda Minorem.

Quomodo fit Reductio hac in Tertia Figura?

Reductio per Impossibile in Tertia Figura fit, servando Minorem, & contradictoriam Conclusionis in Majoris locum collocando. Secundum versiculum:

Tertia Majorem variat, servatq, Minorem.

Exemplum Secundæ Figuræ est:

- Bar O. *Homo est rationalis.*
 oC A. *Animal non est rationale.*
 o. E. A. *Animal non est homo.*

Reducitur ad

- Bar O. *Homo est rationalis.*
 ba O. *Animal est homo.*
 ra. E. O. *Animal est rationale.*

Exem-

Exemplum Tertiæ Figuræ est.

BoC *A. Animal non est homo.*

ar *O. Animal est vivens.*

do. E. *A. Vivens non est homo.*

Reducitur ad

Bar *O. Vivens est homo.*

ba *O. Animal est vivens.*

ra. E. *O. Animal est homo.*

CAPVT VI.

De Syllogismo Modali & Exponibili.

Quid est Syllogismus Modalis?

Syllogismus Modalis est, cujus vel una tantum, vel utraque præmissarum est modalis. Atque hi in seriis disputationibus vix aliquem usum habent, & si proferantur, resolvendæ sunt propositiones modales eo modo, qui supra est ostensus. Sic, v. c. sequens Syllogismus est Modalis bonus:

Necessè est omne animal sentire.

Omnis homo est animal.

E. *Necessè est omnem hominem sentire.*

Resolvitur ita:

O. Animal necessario sentit.

O. Homo est animal.

E. *O. Homo necessario sentit.*

Est item bonus modalis:

Contingit omne animal moveri.

Omnis homo est animal.

E. *Contingit omnem hominem moveri.*

Resolvitur ita :

O. *Animal contingenter movetur,*

O. *Homo est animal.*

E. O. *Homo contingenter movetur,*

At Modalis vitiosus est :

Contingit omne currens esse hominem.

Contingit omne rationale esse currens.

E. *Contingit omne rationale esse hominem.*

Resolvitur ita :

Omne currens contingenter est homo.

Omne rationale contingenter est currens.

E. *Omne rationale contingenter est homo.*

Apparet hinc, 4. terminos esse in Syllogismo. 1. Currens. 2. Contingenter esse hominem. 3. Rationale. 4. Contingenter esse currens.

Quid est Syllogismus Exponibilis?

Syllogismus Exponibilis est, in quo reperitur propositio exponibilis ; h. e. *Exclusiva*, vel *Exceptiva*, vel *Restrictiva*. Atque de propositione *Exclusiva* & *Exceptiva* notandum, ne talis propositio ponatur loco Minoris in prima vel tertia figura, est enim virtualiter negativa. Hinc N. V. C.

O. *Animal rationale est bipes.*

Solus homo est animal rationale.

E. *Solus homo est bipes.*

Item male concluditur in tertia.

O. *Homo est bipes.*

Solus homo est animal rationale.

E. *Solum animal rationale est bipes.*

Quid

*Quid observandum circa propositionem
Restrictivam?*

Circa propositionem Restrictivam observandum, ne idem terminus, jam cum, jam, sive restrictione usurpetur; possunt enim hinc oriri plures termini quam tres: Sic, male concluditur:

O. homo est mortalis.

Petrus quoad animam & corpus est homo.

E. Petrus quoad animam & corpus est mortalis.

Sunt enim 5. termini in hoc Syllogismo: 1. Homo. 2. Esse mortalem. 3. Petrus. 4. Quoad animam & corpus esse hominem. 5. Quoad animam & corpus esse mortalem.

CAPVT VII.

De Syllogismis Conjunctis.

Quid est Syllogismus Conjunctus?

Syllogismus Conjunctus est, cujus vel una tantum, vel utraque præmissarum, est conjuncta. Dicitur alias Compositus, item Hypotheticus.

Quotuplex est Syllogismus Conjunctus?

Syllogismus Conjunctus est triplex: Conditionalis, Copulativus, & Disjunctivus.

Quid est Syllogismus Conditionalis?

Syllogismus Conditionalis seu Hypotheticus proprie dictus est, cujus major, aut utraque præmissarum, est propositio conditionalis. ut:

Si Petrus est homo, est animal.

Sed Petrus est homo.

E. Petrus est Animal.

E 4

Item

Item:

Si Petrus est Animal, est substantia.

Sed si Petrus est homo, est animal.

E. *Si Petrus est homo, est substantia.*

Quot sunt Modi Syllogismi Conditionalis?

Syllogismi Conditionalis Modi sunt duo: *Vnus est, in quo posito antecedente, ponitur consequens: ejusque formula vulgaris est: Sed verum est prius. E. Et posterius. ut:*

Si hoc simulacrum est lapideum, est durum,

Sed verum est prius.

E. *Et posterius.*

*Alter modus est, in quo, remoto consequente, remove-
tur antecedens: ejusque formula vulgaris est: Sed
consequens est absurdum. E. Et antecedens. ut:*

Si lapis est homo, est animal.

Sed consequens est absurdum.

E. *Et antecedens.*

Quid significat hic Ponere, Et Removeere?

*Ponere, significat, propositionem aliquam simpli-
cem, sive sit affirmativa sive negativa, quæ erat in
connexo, approbare tanquam veram. Removeere
autem significat, illam propositionem improbare tan-
quam falsam, seu illi contradicere.*

*Quomodo reducuntur Syllogismi Con-
ditionales?*

Syllogismi Conditionales modi primi, sic reducun-
tur ad primam Figuram:

Quicquid est simulacrum lapideum, est durum.

Hoc est simulacrum lapideum.

E. *Hoc est durum.*

Syllo-

Syllogismi Conditionales *modi secundi*, sic reducuntur ad secundam Figuram:

Quicquid est homo, illud est animal.

Lapis non est animal.

E. *Lapis non est homo.*

*Quæ notanda sunt Regula de Syllogismo
Conditionalis?*

De Syllogismo Conditionalis notandæ sunt Regulæ tres:

Prima est: *A Remotione Antecedentis, ad Remotionem Consequentis, non valet consequentia.*
Non enim sequitur:

Si leo est homo, est animal.

Sed non est homo.

E. *Non est animal.*

Ratio est, quia Syllogismus hujusmodi ad simplicem reductus, concludit ex minore negante in prima Figura.

Altera Regula est: *A positione consequentis, ad positionem antecedentis, N. V. C.* Non enim sequitur:

Si leo est homo, est animal.

Sed est animal.

E. *Est homo.*

Ratio est: Quia Syllogismus hujusmodi, ad simplicem reductus, concludit ex puris affirmantibus in secunda Figura. Quid, quod licet tales Syllogismi ad simplicium formam non redigantur, manifeste tamen ex veris falsum inferunt.

Tertia Regula est: *Propositio major in Syllogismo conditionali semper debet esse affirmans.*

Quid est Syllogismus Copulativus?

Syllogismus Copulativus est, qui propositionem majorem habet copulativam: ut:

Non S est homo, S est equus.

Sed est homo.

E. *Non est equus.*

Atque est Syllogismi Copulativi *modus tantum unicus*, qui concludit a positione unius, ad remotionem reliqui, ceu fit in exemplo allato.

Quae notandae sunt Regulae de Syllogismo Copulativo?

De Syllogismo Copulativo notandae sunt Regulae duae. Vna est: *Propositio major in Syllogismo Copulativo debet esse negans.* Non enim sequitur:

Et est homo, S est doctus.

Sed est homo.

E. *Est doctus.*

Altera Regula est: *A remotione unius, ad positionem reliqui N. V. C.* Non enim sequitur:

Non S est homo, S est equus.

Sed non est equus.

E. *Est homo.*

Quomodo reducitur Syllogismus Copulativus?

Syllogismus Copulativus, qualis est hic:

Non S Petrus est homo, S est leo.

Sed Petrus est homo.

E. *Petrus non est leo.*

Sic reducitur :

Quicquid est homo, non est leo.

Petrus est homo.

E. *Petrus non est leo.*

Quid est Syllogismus Disjunctivus?

Syllogismus Disjunctivus est, qui habet majorem propositionem disjunctivam. ut:

Aut Socrates est sanus, aut est ager.

Sed est sanus.

E. *Non est ager.*

Quot sunt Modi Syllogismi Disjunctivi?

Syllogismi Disjunctivi Modi sunt duo: Primus est, qui concludit a positione unius, ad destructionem reliqui; ceu fit in exemplo allato. Alter Modus est, qui concludit a remotione unius, ad positionem reliqui. ut:

Aut Socrates est sanus, aut est ager.

Sed non est ager.

E. *Est sanus.*

Quæ notanda est Regula de Syllogismo Disjunctivo?

De Syllogismo Disjunctivo hæc notanda est Regula: Propositio Major in Syllogismo Disjunctivo debet esse omnibus partibus affirmata; secus fraus paratur. Hinc non sequitur:

Aut asinus est animal, aut non est homo.

Sed asinus est animal.

E. *Est homo.*

Quo-

Quomodo reducuntur Syllogismi?
Disjunctivi?

Syllogismus Disjunctivus *primi modi*, supra allatus, sic reducitur:

Quicquid est sanum, non est agram.
Socrates est sanus.

E. *Socrates non est agram.*

Syllogismus Disjunctivus *secundi modi* supra allatus, sic reducitur:

Quicumq; (homo) non est agram, est sanus.
Socrates non est agram.

E. *Socrates est sanus.*

CAPVT VIII.

De Argumentationibus Imperfectis.

Quot sunt Argumentationes Imperfectæ?

Argumentationes Imperfectæ sunt quinque: Enthymema, Dilemma, Inductio, Exemplum, & Sorites.

Quid est Enthymema?

Enthymema est argumentatio, in qua ex una tantum propositione aliquid concluditur, altera suppressa. Sive, est Syllogismus imperfectus, cui una præmissarum deest. ut:

Superbia est peccatum.

E. *Superbia est fugienda.*

Aut:

O. *peccatum est fugiendum.*

E. *Et Superbia est fugienda.*

*Quomodo cognosci potest, utra Præmissarum
desit?*

Si Subjectum conclusionis, seu minor terminus, non appareat in priore propositione, seu in antecedente, deest Minor propositio. Si prædicatum conclusionis, seu major terminus, appareat in antecedente, deest Major propositio.

*Quomodo reducitur Enthymema ad
Syllogismum?*

Enthymema reducitur ad Syllogismum, additione illius præmissæ, quæ deest.

Quid est Dilemma?

Dilemma est argumentatio bifurcata, qua duplici quæstione adversarium constringimus. ut, quando Christus contra militem se percutientem sic argumentatur:

Aut bene, aut male locutus sum:

Si male, ostendendum est.

Si bene, quare me verberas?

Quomodo Dilemma fit Syllogismus?

Dilemma sic fit Syllogismus:

*Si verberandus sum, ideo verberabor, vel quia
bene, vel quia male sum locutus.*

Sed nec quia bene, nec quia male sum locutus.

E. *Non sum verberandus.*

Quid notandum de Dilemmate?

In Dilemmate adduci debent contraria immediata. Hinc vitiosum est sequens Dilemma: *Aut pulchram
duces uxorem, aut deformem. Si pulchram, habebis
κωήν. Si turpem, habebis πωήν: Vxor enim pulchra
& de-*

& deformis contraria immediata non sunt, sed inter eas intercedit ea, quæ est formæ modicæ & modestæ. *Amplius*: Dilemma reciprocum, sive, quod in adversarium retorqueri potest, est vitiosum. Tale est illud Eunomianorum:

Pater vel nolens Filium genuit, vel volens:

Si nolens, vis ei illata est: at quis ei vim intulit?

Et quomodo is, cui vis illata est, Deus esse potest?

Si volens, voluntatis est filius, non naturæ.

Hoc Dilemma Nazianzenus ita retorfit:

Tu, Eunomiane, aut patre procreatus es volente, aut nolente.

Si ex nolente, vis ei illata est: at quis ei vim intulit?

Si ex volente, periit tibi pater, voluntatis siquidem es filius.

Quid est Inductio?

Inductio est argumentatio, quæ ex enumeratione singularium, colligit universale. ut:

Petrus est risibilis.

Paulus est risibilis.

Johannes est risibilis.

Nec potest dissimile exemplum dari ullius hominis, qui non sit risibilis.

E. *Omnis homo est risibilis.*

Quomodo Inductio fit Syllogismus?

Inductio sic fit Syllogismus:

O. *Qui est Petrus, vel Paulus, vel Johannes &c. est risibilis.*

O. *Homo est vel Petrus, vel, Paulus, vel Johannes &c.*

E. O. *Homo est risibilis.*

Quid

Quid est Exemplum?

Exemplum, est ab uno singulari ad aliud, propter similitudinem aliquam, collectio. ut: *Absalom male periit*. E. *Hic rebellis patri filius male peribit*. *Imperium Græcorum delatum est ad Turcas*. E. *Et Latinum Imperium ad eos deferri potest*.

Quomodo Exemplum fit Syllogismus?

Exemplum fit Syllogismus, si singulare non tam ex alio singulari præcise, quam ex eo, quod ipsum commune cum aliis habet, probetur. Sic *Latinum Imperium* non necessario ad *Infideles* devolvitur, quia ad eos *Græcum* devenit: nec enim, quod uni regno evenit, idem alteri etiam necesse est accidere. Veruntamen, si causam occasus Imperii Græci assumas, & de Latino eandem ponas, valida fit argumentatio. Id autem ut fiat, primo dicendum: *Imperium Græcum propter dissidia & peccata ad Turcam devenit*. E. *Omne Imperium ad infideles hoc modo tandem devolvi potest*. Vnde postmodum argumentari licet:

Omne Imperium Christianum, quod dissidet & peccatis obruitur, ad infideles tandem devolvitur.

Latinum Imperium est tale.

E. *Latinum Imperium ad Infideles tandem devolvetur.*

Quid est Sorites?

Sorites, est argumentatio, in qua, continua serie multarum propositionum, de prædicato præcedentis propositionis, semper dicitur novum prædicatum, donec ultimum prædicatum dicatur de primo subiecto. ut:

Omnis

Omnis Avarus est idololatra.

O. Idololatra mortaliter peccat.

O. Qui mortaliter peccat, damnatur.

E. O. Avarus damnatur.

Quomodo Sorites fit Syllogismus?

Sorites, quia ex plurium Syllogismorum confusione constat, ideo in plures perfectos resolvi debet; atque sunt tot in Sorite potentia Syllogismi, quot sunt præmissæ, unica excepta. Ita in exemplo allato tres occurrunt præmissæ: duo ergo eruuntur Syllogismi, hoc modo:

O. Idololatra mortaliter peccat.

O. Avarus est idololatra.

E. O. Avarus mortaliter peccat.

O. Qui mortaliter peccat, damnatur.

O. Idololatra mortaliter peccat.

E. O. Idololatra damnatur.

LIBER QVARTVS.

CAPVT I.

De Demonstratione.

Quid est Demonstratio?

Demonstratio est Syllogismus; qui constat ex veris, primis & immediatis, notioribus & prioribus, ac causis conclusionis. Sive: Demonstratio est Syllogismus pariens scientiam

Quid est Scientia?

Scientia, est cognitio rei per causam, propter quam res est, quæ illius causa sit, quodque res illa aliter se habere non possit.

Quæ

Quæ sunt Partes Demonstrationis?

Partes Demonstrationis sunt tres : Subjectum, Proprietas, & Causa. *Subjectum*, est res, de qua aliquid demonstratur. *Proprietas* est, quæ ostenditur esse in subjecto. *Causa* est, per quam proprietas in subjecto esse ostenditur. Atque subjectum fit in Demonstratione Minus extremum : Proprietas, Majus : Causa vero Medium. ut : si ita colligas.

O. *Rationale est capax doctrine.*

O. *Homo est rationalis.*

E. O. *Homo est capax doctrine.*

Subjectum, nempe *Homo*, cui capacitas doctrinæ inesse ostenditur, est minus extremum : Proprietas, nempe *capacitas doctrine*, quæ ostenditur esse in homine, est majus extremum ; Causa, nempe ratio, seu esse *rationale*, per quam capacitas doctrinæ homini inesse ostenditur, est medium.

Quanam sunt Notæ Propositionum ad demonstrationem idonearum?

Notæ Propositionum ad demonstrationem idonearum sunt tres : Prima est, ut sint de Omni. Secunda, ut sint per se ; & tertia, ut sint Universaliter primæ.

Quæ Propositio est de Omni?

De Omni seu *ὑπὸ παντός* dicitur Propositio, quando prædicatum competit subjecto omni & semper : ac proinde non requiritur universalitas tantum subjecti, sed etiam temporis. Sic prædicatur de Cygno *albedo* ; de Homine *risibilitas*.

Quot modis dicitur aliquid Per se?

Per se, Græce κατ' αὐτὸ, dicitur aliquid in universum quatuor modis:

Primo Per se dicitur, quod est rei Genus aut Differentia; sive Genus & Differentia remota sit, sive proxima. Sic homo per se est animal, item corpus vivens; illud enim genus proximum, hoc remotum est. *Per se* item competit homini, ut sit rationalis: item, ut sentiat: Ratio enim, differentia ejus proxima est, qua distinguitur a brutis; sentire, remota, qua a plantis differt.

Secundo dicitur Per se, quod rei est proprium; sicut risibilitas dicitur de homine: hinnire de equo.

Tertio dicitur Per se, quod per se subsistit, sicut Substantia respectu Accidentis: quod tamen huc non pertinet.

Quarto dicitur Per se, quorum unum necessario est propter alterum: ut Effectus propter Causam: itaque in hoc modo dicendi per se, subjectum & prædicatum, ut causa proxima & effectus ejus, cohererent. Sic, per se est, eum, cui jugulum confossum est, mori.

Quid est Universaliter Primum?

Universaliter Primum, Græce καθόλου πρῶτον, dicitur, cum non tantum rei omni & per se aliquid inest, sed etiam quatenus illa talis est: uti facultas numerandi, ridendi, discendi artes liberales, inest homini. Omnis enim homo per se, & quatenus homo est, est facultatibus illis præditus.

Quotupliciter dicitur aliquid Primum?

Primum aliquid dicitur dupliciter: *Primo*, ut primum sive proximum & immediatum subjectum, in quo

quo res est : Hoc modo facultates prædictæ sunt in homine, ut primo talium subiecto : nec enim alia res facultates illas habet, nec homo per aliud, sed per se ipsum illis pollet. Secundo aliquid primum dicitur, ut prima seu proxima & immediata causa, a qua res est, uti eadem facultates conveniunt ipsi animæ rationali, ut primæ earum causæ : a ratione enim id est, quod homo ista omnia potest. Hinc propositio illa : *Omnis homo est risibilis* : est prima, primitate subiecti : hæc vero : *Omne rationale est risibile* : est prima primitate causæ.

Tales igitur esse propositiones oportet, ex quibus aliquid demonstratur, id est certa & evidens rei notitiâ hauritur : nam, ea demum, quæ rei o omni, semper, per se, & primo insunt, tam essentialia ei sunt, ut ex iis ipsa rei natura clare & evidenter innotescat, cum quæ contra se habent, nec essentiam ejus attingunt, aut necessario cum ea non coherent, claram & evidentem notitiâ gignere non possint.

Quotuplex est Demonstratio?

Demonstratio duplex est : *διόν*, seu Propter quid, & *ὄν*, seu Quod, vel, ut barbare vocant, *Quia*. Hic aliqui addunt *Demonstrationem per Impossibile*.

Quid est Demonstratio διόν?

Demonstratio *διόν*, seu Propter quid, item *Ostensiva* est, in qua proceditur a causa propter quam ad effectum; sive, in qua proprietas de subiecto per causam demonstratur. Atque hæc proprie & *κατ' ἐξοχήν* dicitur Demonstratio, quia proprie & proxime scientiam gignit, cum, quare, seu propter quid res sit, ostendat. ut:

O. *Rationale est risibile.*

O. *Homo est rationalis.*

E. O. *Homo est risibilis.*

Quid est Demonstratio οπ?

Demonstratio οπ, seu *Quod*, appellatur, quæ ex effectu causam demonstrat: ut, si ita colligas:

O. *Risibile est rationale,*

O. *Homo est risibilis,*

E. O. *Homo est rationalis.*

Hic causa, nempe *Ratio*, ostenditur inesse homini ex risibilitate, quæ ejus effectus est. Est quoque *Demonstratio οπ*, quæ ex negatione causæ remotæ ostendit non esse effectum. Vti, si inferas hoc modo:

Quicquid non vivit, non sentit.

Lapis non vivit.

E. *Lapis non sentit.*

Hic, ex negatione vitæ, quæ causa remota est sensus, de lapide ostenditur, ejus effectum, nempe sensum, eidem non inesse,

Quid est Demonstratio per Impossibile?

Demonstratio per Impossibile est, qua probatur aliquid verum esse propterea, quia alias sequeretur absurdum. Hoc *Demonstrationis* genus longe universalius est priori: quippe per quod non solum *Conclusiones*, sed ipsa etiam *principia* probantur, propterea, quod nisi quis *principia* concesserit, cogatur aliquid impossibile admittere. Vt, si quis contra negantem hanc propositionem: *Homo est rationalis*, quæ principium est, per quod demonstratur hominem esse risibilem, veritatem ejus ita probet:

Si homo non est rationalis, non est homo.

Sed homo non est rationalis, secundum aduersarium.

E. *Homo non est homo.*

At, absurdum est, hominem non esse hominem:

E. *Absurdum etiam est, eum non esse rationalem.*

CAPVT II.

De Definitione.

Quid est Definitio?

Definitio est oratio, alicujus rei naturam explicans: ut animal rationale respectu hominis. Ei respondet Definitum.

Quid est Definitum?

Definitum est, cujus natura explicatur: ut Homo respectu animalis rationalis.

Quotuplex est Definitio?

Definitio duplex est: Vna Nominis, altera Rei.

Quid est Definitio Nominis?

Definitio Nominis est, quæ alicujus vocis significationem exponit. Vt, si dicas: *Dialectica est nomen, significans artem bene differendi.*

Quid est Definitio Rei?

Definitio Rei est, quæ rei, per nomen significatæ, naturam explicat. Vti si dicas: *Homo est animal rationale.*

Quid est Definitio Essentialis?

Definitio Essentialis est, quæ datur per sola essentialia definiti: sive, quæ datur per genus & differentiam specificam: ut, *Homo est animal rationale.*

Quid est Definitio Causalis?

Definitio Causalis est, quæ datur per genus & differentiam a causa efficiente desumptam : uti si dicas : *Eclipsis lunaris est defectus luminis, ob interpositionem terræ inter Solem & Lunam.* Atque Definitiones, quæ dantur per genus & differentiam, tum a subjecto, tum a causa efficiente depromptam, vocantur perfectæ.

Quid est Descriptio?

Descriptio est, quæ datur per aliquid, quod non est essenziale descripto. Vt si dicas : *Homo est animal, creatum ad fruendum æterna beatitudine. Vel: Homo est animal implume, bipes, terrestre.*

Quæ sunt Leges bonæ Definitionis?

Leges bonæ Definitionis sunt tres potissimum :

Prima est : *Definitio debet confici ex notioribus.* Cum enim rei naturam explicare debeat, omnis autem explicatio per aliquid notius fiat, bona definitio non erit, quæ definitum, quod obscurum erat, per æque obscurum, aut obscurius, explicare conatur.

Secunda est : *Definitio debet esse convertibilis cum suo definito.* Seu, *Definitio & Definitum debent esse termini convertibiles.*

Tertia est : *In Definitione nihil desit, aut redundet.* Hinc male quis definiret hominem : *Homo est substantia rationalis : vel, Homo est animal rationale, risibile.* Quia in priori desunt prædicata essentialia ; corporea, animata, sensitiva : in posteriori redundat *n* risibile, cum differentia specifica, *n* rationale, in ea ponatur.

CAPVT III.

De Divisione.

Quid est Divisio?

Divisio, est oratio, totum in suas partes distribuens: ut, hominis alia pars est corpus, alia anima. Totum, alio nomine appellatur *Divisum*. Partes, *Membra dividenda*, item *Membra divisionis*.

Quotuplex est Divisio?

Divisio duplex est: *Nominis*, & *Rei*.

Quid est Divisio Nominis?

Divisio Nominis est, qua distinguitur multiplex significatio termini æquivoci. Vt, si dicas: *Nomen Canis* aliquando significat animal latrans, aliquando sidus cœleste, aliquando piscem.

Quid est Divisio Rei?

Divisio Rei est, qua res aliqua, vel terminus univocus, in suas partes dividitur.

Quotuplex est Divisio Rei?

Divisio Rei est *Triplex*, nempe *Totius Integralis*, *Essentialis*, & *Vniversalis*.

Quid est Divisio Totius Integralis?

Divisio totius Integralis est, qua totum integrale dividitur in partes integrantes, i. e. in partes, quæ sua quantitate totius quantitatem constituunt. Vti si dicas: *Hominis alia pars est caput, alia brachia, alia venter, alia pedes*.

Quid est Divisio Totius Essentialis?

Divisio totius Essentialis est, qua totum essenziale dividitur in partes sibi essentielles. Vt: *Hominis alia pars Animal est, alia Rationale*.

Quid est Divisio Totius Universalis?

Divisio Totius Universalis est, quæ totum universale dividitur in partes subjectivas, seu eas, quæ in ipso non actu, sed potestate tantum continentur: ut, Animalium aliud homo est, aliud brutum. Hominum alius est Petrus, alius Paulus.

Quæ sunt Leges bonæ Divisionis?

Leges bonæ Divisionis sunt quatuor potissimum:

Prima est: *Divisum debet plus continere, quam singula membra dividenda.*

Secunda est: *Membra Divisionis debent esse opposita, si non re, tamen ratione.* Hinc non valet, si dicas: *Animal est vel homo, vel brutum, vel canis.* Canis enim & brutum non sunt membra opposita.

Tertia est: *Divisum debet adequari membris dividendis simul sumtis.*

Quarta est: *Divisio debet fieri in partes immediatas, tum inter se, tum respectu divisi;* nisi tamen partes immediatae nobis sint ignotæ: tunc enim totum in partes remotiores dividere cogimur.

CAPUT IV.

De Methodo.

Quid est Methodus?

Methodus, est animi iudicium, apte riteque ordinantis ea omnia, quæ ad universam aliquam scientiam pertinent, ex quo totius illius scientiæ ordo nascitur.

Quotuplex est Methodus?

Methodus est *quadruplex* : Resolutiva sive Analytica; Compositiva sive Synthetica; Definitiva; itemque Geometrica.

Quid est Methodus Resolutiva sive Analytica?

Methodus Resolutiva sive Analytica est, cum a toto integrali ad partes integrantes, a toto universalis, ad partes subjectivas, a conclusione, ad ipsius principia, a fine ad media progredimur.

Quid est Methodus Compositiva sive Synthetica?

Methodus Compositiva sive Synthetica est, cum a partibus ad totum, a specialissimis per subalterna ad generalissima, a primis principiis per interjecta, ad ultimas conclusiones, a mediis ad finem progredimur.

Quid est Methodus Definitiva?

Methodus Definitiva, est partim ex analytica, partim ex synthetica composita, & servatur, cum res in genere primo definitur, deinde explicatis per definitionem rei proprietatibus, in suas partes dividitur & explicatur.

Quid est Methodus Geometrica?

In *Methodo Geometrica*, primo omnium voces aut termini, in quibus est aliqua ambiguitas, definiuntur, doceturque quo sensu eos accipere conveniat. Deinde proponuntur *Axiomata*, *Hypotheses*, sive Propositiones aut Postulata, apta, ut ex iis Conclusiones efformentur. Denique ipsæ Conclusiones ex datis Definitionibus ac Propositionibus eliciuntur. Atque

hæc Methodus in tribus operationibus mentis fundamentum habet, ac proinde tradendis artibus & disciplinis valde est accommodata.

Quid notandum de Methodo?

In quavis methodo procedendum est a notis ad ignotiora, & a facilioribus ad difficiliora.

LIBER QUINTVS.

CAPVT I.

De Syllogismo Topico.

Quid est Syllogismus Topicus?

Syllogismus Topicus est, qui ex principiis communibus est conflatus, nec accuratam rei cognitionem & scientiam, sed confusam tantum notitiam gignit: unde etiam opinionem pro fine habere vulgo dicitur. Atque solet alioqui syllogismus Topicus, etiam *Dialecticus* appellari; sicut & doctrina, quæ de eo tractat, *Dialectica* vocatur, pressius nonnihil accepto vocabulo, quam fit, cum totam Logicam denotat.

Vnde desumuntur illa Principia communia?

Principia communia desumuntur ex *Locis* sive *Sedibus Argumentorum*, suntque propositiones probabiles, communi hominum opinione, cum quibus disputamus, receptæ.

Quid est Locus Topicus?

Locus Topicus, est sedes regularum, certam inter se cognationem habentium.

CAPVT II.

De Ente & Essentia.

*Quomodo argumentamur ab Ente
& Essentia?*

AB Ente & Essentia sic argumentamur:

1. *Omne quod est, necesse est esse*; necessitate scilicet hypothetica seu immutabilitatis, ex suppositione. Factum enim infectum fieri nequit, & implicat, aliquid fuisse præteritum, & tamen non extitisse.

2. *Non entis* (actu non existentis,) *nulla sunt prædicata*, extrinsece denominantia a sensibus externis.) Sic Rosa nondum existens, neque tangi neque videri potest.

3. *Essentiæ rerum sunt æternæ*. Intellige, ratione prædicationis, seu æternitate Logica; non vero ratione existentiae, & durationis, seu æternitate physica.

4. *Non entis* (id est Falsi,) *nulla est scientia*, (scilicet positiva.)

CAPVT III.

De Loco Definitionis & Prædicabilium.

Quomodo argumentamur a Definitione?
A Definitione sic argumentamur:

1. *De quocunq; affirmatur definitio, de eodem affirmatur definitum*: & contra, *de quocunq; affirmatur definitum, de eodem affirmatur*

tur & definitio. Sic, quod est animal rationale, id est homo : & rursus, quicquid est homo, est animal rationale.

2. *De quocunq; negatur definitio, de eodem negatur etiam definitum; & contra, de quocunq; negatur definitum, de eodem negatur & definitio.* Sic, qui negat, equum esse animal rationale, oportet ut neget, eundem esse hominem. Et rursus, quod negamus hominem esse, idem negare etiam debemus esse animal rationale.

3. *Definitio (quantum fieri potest) non sit obscura, debetq; confici ex iis, quæ sunt priora & notiora.* Cum enim clarior esse debeat definitio, talis esse non posset, nisi sit notior.

4. *Vnius rei est unica definitio* (essentialis, & quoad essentialem conceptum.) Vna enim res unam tantum habet essentiam, unum tantum genus, & unam tantum differentiam.

5. *Definitum non debet* (sive expresse, sive implicite) *ingredi Definitionem.* Si enim ingrederetur sui definitionem, idem esset clarius & prius seipso; quod est absurdum.

6. *Omnis Definitio (Logica) debet constare genere & differentia specifica:* debet enim declarare definiti essentiam, quæ consistit in genere, & differentia specifica.

7. *Quicquid affirmatur vel negatur de Definitione* (materialiter sumpta,) *illud etiam affirmatur vel negatur de Definito; & contra.* Sic, Animal rationale est risibile & disputat: Ergo etiam homo est risibilis, & disputat. Homo non est lapis: Ergo

Ergo nec animal rationale est lapis. At, si formaliter accipiatur Definitio vel Definitum, Regula fallit. Non enim sequitur: Animal rationale est definitio hominis; Ergo & Homo est definitio hominis.

CAPVT IV.

De Genere & Specie.

Quomodo argumentamur a Genere?
A Genere sic argumentamur:

1. Posito Genere, ponitur species aliqua, sed indeterminate tamen: Vt, Si est Animal, est vel equus, vel leo, vel homo.

2. Quod de Genere (materialiter sumto) dicitur, dicitur de omnibus speciebus. Vt, si animal est corpus; leo est corpus, lupus est corpus.

3. Quod negatur de Genere, id negatur etiam de specie.

4. Negato Genere, negantur omnes ejus species. Vt, si non est animal, nec equus est, nec leo,

5. Genus (materialiter sumtum) prædicatur de omnibus speciebus sub se contentis.

6. Tota natura Generis (materialiter sumti) continetur in qualibet specie. Vt, Animalis natura est corpus animatum, vivum, sentiens esse; quæ in homine & bruto omnia sunt.

7. Genus (ut per se est) prædicatur de omnibus speciebus equaliter; (id est, sine intensione & remissione graduum.)

roqui nigredo in scriptione, transit quidem de penna in chartam; sed penna non est subiectum immediatum nigredinis, verum atramenti; quod atramentum, dum ex penna fluit in chartam, nigredinem secum trahit comitem.

5. *In Deum non cadit Accidens* (prædicamentale, item intrinsece denominans.) Deus enim est Ens simplicissimum, & omnis compositionis realis expers: ergo non potest componi ex subiecto & accidente. Alia est ratio accidentis prædicabilis, & denominationum extrinsecarum. Dicitur enim coli, abnegari; quæ sunt accidentia extrinsece denominantia. Est vero cultus, in colente Deum, abnegatio, in abnegante, citra intrinsecam Dei mutationem.

6. *Quod est in uno Accidens* (prædicamentale) *in altero substantia esse non potest.* Accidens enim prædicamentale & substantia, sunt contradistincta prædicamenta. Unde albedo, tanquam accidens v. ei tabulæ, nunquam potest esse substantia.

7. *Duo Accidentia* (absoluta) *solo numero differentia. possunt esse simul & semel in eodem subiecto, & eadem subiecti parte.*

8. *Vnum numero Accidens non potest esse in duobus subiectis.* Sic, hæc Albedo in charta, non potest simul esse in lacte.

CAPVT VIII

De Loco Similium, & Comparatorum.

Quomodo argumentamur a Similibus?

A *Similibus* sic argumentamur: *Quod de uno similium valet, id valet etiam de altero.*

Quo-

Quomodo argumentamur a Comparatis?

A Comparatis, in quibus major aut minor verisimilitudo attenditur, sic argumentamur:

1. *Si id non inest rei, quod magis verisimile erat inesse, non inest etiam illud, quod inesse erat minus verisimile.* Vt, Si Petrus literas non novit, multo minus scribere potest.

2. *Si id inest rei, quod minus verisimile erat inesse, etiam illud inest, quod inesse erat magis verisimile.* Vt, si Petrus scribere potest, multo magis literas novit. Notandum vero, a Majore ad Minus argumentationem esse tantum Negativam: a Minore ad Majus, semper Affirmativam.

3. *A Comparativo (in comparatione propria,) ad positivum, valet consequentia.* Est autem comparatio Propria, cum comparativus importat positivum, cum adverbio *magis*; Impropria, cum comparativus importat oppositum sui positivi, cum adverbio *minus*. Hinc recte dico: Plato est doctior Diogene; Ergo Plato est doctus. At, non licet colligere: Simplex furtum melius est sacrilegio. Ergo est bonum. Sed ita: Ergo simplex furtum minus est malum, quam sacrilegium.

CAPVT IX.

De Toto & Partibus.

Quomodo argumentamur a Toto?

A Toto, sic argumentamur:

G

1. Po-

1. *Posito Toto Integrali*, ponuntur omnes partes necessariae, sine quibus totum esse nequit. Vt: Domus est, E. fundamentum est, & parietes, & tectum.

2. *Sublato Toto Integrali*, tollitur aliqua pars necessaria. Vt: Domus non est: E. fundamentum non est; vel, parietes non sunt.

3. *Positis omnibus partibus Integrantibus, apteq; inter se cohærentibus*, ponitur totum. Vt: Fundamentum, parietes, & tectum sunt, apteq; inter se cohærent. E. domus est.

4. *Sublata aliqua parte integrante necessaria, tollitur totum*. Vt: Tectum non est: E. Domus non est.

5. *Sublata quacung; parte, non manet totum tale, quale erat ante*. Sic sublata manu a corpore humano, non manet corpus totum integrum.

CAPVT X.

De Causa & Causato.

Quomodo argumentamur a natura Cause in communi?

A Natura Cause in communi sic argumentamur: —

1. *Posito Effectu, necesse est causam esse, vel fuisse.*

2. *Posita causa proxima in actu, ponitur etiam effectus proximus in actu*, (proportionatus, & respondens actui secundo, sive influxui causæ.) Sic, quando Architectus dormit, & est tantum causa
in

in actu primo, non est effectus, seu domus. Quin, licet etiam causa in actu secundo ponatur, tamen in qualibet actione partiali, totalis effectus dari nequit. Vt, quando Architectus incipit ædificare domum, primo die domus existere non potest.

3. *Posita causa in potentia, effectus quoque tantum in potentia ponitur.*

4. *Negata causa, (quoad esse absolutum, & quoad actum secundum,) negatur effectus (in fieri.)* Negata tamen causa quoad esse absolutum seu existentiam, non est necesse negari effectum jam factum, & contra. Sic, non sequitur: Architectus non amplius existit: Ergo etiam domus, ab ipso fabricata, non amplius existit. Nec valet: Domus est combusta: Ergo illius Architectus etiam non amplius superest.

5. *Omnis Causa agit.* Id est, secundum suum causandi modum influit. Agere enim hic non accipitur pro efficientia, seu effective agere, sed pro influxu cuilibet causæ debito.

6. *Nihil est causa sui ipsius:* hoc est, nihil efficienter influit in sui ipsius existentiam; cæteroquin enim idem esset, ac non esset; esset, quia esset causa; non esset, quia nondum productum esset. At, non licet objicere, Deum esse a seipso, ergo eundem esse causam sui ipsius, quia Deus non influxit efficienter in seipsum.

CAPVT XI.

De Causa Efficiente.

Quomodo argumentamur a Causa Efficiente?

A Causa Efficiente sic argumentamur:

1. *Nulla causa instrumentalis agere potest, nisi eleuata ad id a principali.* Sic malleus non facit horologium, nisi motus manu artificis.

2. *Qualis causa, talis effectus*: Sive: Quicquid prædicatur de causa, (univoca, secundum essentiam & esse absolutum,) illud etiam prædicatur de effectû. Vt, Pater est homo, Ergo etiam filius.

3. *Quicquid est in effectû*, (univoco, quoad essentiam & esse absolutum,) *illud præexistit* (formaliter) *in causa*. *Quicquid vero est in effectû*, (æquivoco quoad essentiam & esse absolutum,) *præexistit virtualiter in causa*. Vt: Filius, tanquam effectus univocus quoad essentiam, est homo: Ergo & pater formaliter erit homo. Rana est quadrupes: Ergo Sol, tanquam causa ejus æquivoca, habet virtutem producendi animal quadrupes.

4. *Causa cause, est etiam causa causati.* Si scilicet coinfluat influxu speciali, siue physico siue morali. Nam, si non coinfluit, non potest esse causa; Vnde non valet: Filius est causa proditionis; Pater est causa filii: E. pater est causa proditionis. Opus quoque est influxu speciali. Nam, Deus concurrit ad omnes actiones hominum, nec tamen ullo modo est causa peccati, quia ipsius concursus est tantum generalis; quemadmodum Sol, generaliter concurrens

rens ad generationem hominis, causa hominis dici non potest, cum non fuerit illius influxus specificus & determinatus ad generationem hominis potius, quam leonis.

5. *Cujus Causa bona est, illud ipsum bonum est.* Hoc est, quo modo causa, secundum esse causæ, est bona, eo modo quoque causatum, secundum esse causati, bonum est. Sic Deus est bonus: ergo etiam Diabolus, secundum id quod est effectus Dei, est bonus; quatenus enim moraliter est malus, eatenus non est creatura Dei.

6. *Propter quod unum quodq; est tale, illud magis est tale.* Si nimirum Prædicatum utriq; insit, & secundum eundem gradum a causa efficiente fuerit in effectu productum, & intensionem ac remissionem recipiat. Vnde non sequitur: Filius est homo propter patrem, Ergo pater magis est homo. Quia homo non suscipit intensionem & remissionem. Sic non valet semper: Discipulus est doctus propter Præceptorem, ergo Præceptor magis est doctus. Sæpe enim contingit, discipulum doctiorem esse præceptore. Nimirum illi gradus eruditionis, secundum quos discipulus antecellit præceptorem, non sunt producti a præceptore in discipulo, quia præceptor illos non habuit. Causa promovens esse poterat, quia viam monstrare potuit ad id, quod ipse non habebat, non vero producens.

CAPVT XII.

De Fine.

Quomodo argumentamur a causa Finali?

A Causa Finali, sic argumentamur :

G 3

I. Quod

1. *Qui vult finem efficaciter, vult etiam media,* (per se ad illum finem ordinata.)

2. *Omnis Finis,* (quatenus est finis,) *est bonum quid,* (sive morale, sive Physicum, sive revera, sive apparenter.) Finis enim movet voluntatem, ut ad illum obtinendum moveat causam efficientem. Nihil autem movere voluntatem ad sui consecutionem potest, quam sub ratione boni.

3. *Acquisito fine* (cujus, complete,) *cessat omnis actio,* (ut circa finem acquirendum.)

4. *Finis dat bonitatem, amabilitatem, mensuram & ordinem mediis.*

5. *Finis est primum* (secundum esse cognitum) *in intentione, & ultimum* (secundum esse reale) *in executione.*

6. *Vnius rei plures possunt esse fines* (extrinseci & intermedii.)

7. *Omnis actio fit propter finem:* Deus enim & Natura nihil faciunt frustra.

CAPVT XIII.

De Materia.

Quomodo argumentamur a causa Materiali?

A *Causa Materiali,* sic argumentamur:

1. *Posita materia,* ponuntur etiam *conditiones materiae.* Vt, Corpus hominis constat ex materia corruptibili: Ergo est corruptibile.

2. *Quic-*

2. *Quicquid habet materiam, habet etiam formam: & contra.*

3. *Ex non-ente* (negativo, id est puro puto nihilo,) *nihil fit,* (per modum generationis & naturaliter.)

C A P U T XIV.

De Forma.

Quomodo argumentamur a causa Formali?

A *Causa Formali,* sic argumentamur:

1. *Posita forma* (quacunque, in unione,) *ponitur ipsum formatum,* (tale, quale forma efficiebat.)

2. *Operatio arguit formam.* Vti, si ratiocinatur, est rationalis.

3. *Quo nobilior est operatio, eo nobilior est forma.*

4. *Forma dat esse* (immediate & præcise) *rei,* (id est, composito, ut compositum est.)

5. *Sublata forma quacunque, tollitur quoque formatum,* (quale efficiebat illa forma.)

6. *Forma* (substantialis) *est indivisibilis* (physice, id est in partes substantiales physicas.) Nam, si divisibilis esset forma physice in partes substantiales, divisibilis esset in materiam & formam; quod manifesto implicat. Vnde non excluditur genus & differentia, in quas dividi potest forma, cum illæ partes sint Logicæ, vel Metaphysicæ. Per partes substantiales etiam excluduntur formæ materiales,

quæ divisibiles sunt in partes integrantes. Porro, accidentales formæ in gradus seu partes graduales possunt dividi: ut, aqua calida tot vel tot habet gradus caloris. Ergo calor in suos gradus est divisibilis.

CAPUT XV.

De Disparatis & Oppositis.

Quomodo argumentamur a Disparatis?

Disparatis, sic argumentamur: De quocungq; affirmatur unum Disparatorum, de eo negatur alterum. Vt, Petrus est homo, E. Petrus non est leo.

Quomodo argumentamur ab Oppositis in genere?

Ab Oppositis in genere, sic argumentamur: De quocungq; affirmatur unum oppositorum, de eo negatur alterum.

Quomodo argumentamur a Relative Oppositis?

A Relative Oppositis, sic argumentamur: Relativa se mutuo ponunt & tollunt.

Quomodo argumentamur a Contrariis?

A Contrariis, sic argumentamur:

I. Cui convenit unum Contrariorum, potest & alterum convenire, nisi unum natura, id est inseparabiliter, insit.

2. Si

2. *Si de aliquo subiecto capaci negatur unum contrariorum immediatorum, de eo affirmatur alterum: Vt, Johannes non est æger, E. est sanus.*

3. *Contraria non possunt esse in eodem subiecto, (simul, secundum eandem partem, & in gradibus excellentibus.)*

Quomodo argumentamur a Privative Oppositis?

A privative Oppositis, sic argumentamur:

1. *Si de subiecto capaci negatur habitus, de eo affirmatur privatio: vel contra. Vt, hic homo non potest videre, E. est cæcus. Et: Hic homo non est cæcus, E. potest videre.*

2. *A privatione, (tanquam termino corruptionis,) non datur (naturaliter) regressus ad habitum (eundem numero.) At vero, ad eundem specie habitum, datur etiam naturaliter regressus: ut a tenebris, ad lucem.*

Quomodo argumentamur a Contradictoriis?

A Contradictoriis, sic argumentamur:

1. *Contradictoria nec simul vera, nec simul falsa esse possunt.*

2. *Alterum Contradictoriorum vel affirmatur vel negatur de quolibet. De quacunque enim re vera est vel affirmatio, vel negatio.*

3. *Inter Contradictoria est repugnantia infinita. Vnde nullum omnino admittunt medium, neque Negationis, neque Participationis.*

CAPVT XVI.

De Actu & Potentia.

*Quomodo argumentamur ab Actu
& Potentia?*

AB Actu & Potentia, sic argumentamur:

1. *A potentia ad actum, siue a posse esse, ad esse, non valet consequentia*, scilicet affirmative. Non enim sequitur: Rosa in hyeme est potentia ens reale: Ergo est actu ens reale.

2. *Ab actu ad potentiam, siue ab esse, ad posse, valet consequentia.*

3. *Qui potest majus, ille, (pro tunc, & non impeditus,) potest etiam minus, (in majori inclusum.)*

4. *Potentia non excedit suum obiectum adæquatum siue possibile.* Sic, visus non potest tendere in id quod est invisibile; auditus, non potest percipere id, quod non est perceptibile.

5. *Frustra est potentia, quæ non traducitur (i. e. traduci potest) in actum, (quantum in se est.)* Hoc autem tantum de potentia creata intelligendum.

6. *Cuilibet potentie activæ, respondet passiva, & contra.*

7. *Quod transit de potentia ad actum, mutatur.* Hoc est: Quod transit de potentia activa ad actum, fit agens; &, quod transit de potentia passiva ad actum, fit patiens.

CAPVT XVII.

De Abstracto & Concreto.

Quomodo argumentamur ab Abstracto & Concreto ?

AB Abstracto & Concreto, sic argumentamur :

1. Si *Abstractum prædicatur de Abstracto*, etiam *Concretum prædicatur de Concreto*. Vt: *Physica est scientia*. E. *Physicus est sciens*. *Albedo est color*. E. *album est coloratum*.

2. *Cui inest Abstractum*, de eo *prædicatur quoque ipsum Concretum*. Vt, *Homini inest doctrina*, E. *vocatur doctus*.

3. *De quo prædicatur Concretum* (intrinsece denominans,) *ei inest quoque Abstractum*. Vt, quia de *Lacte prædicatur*, esse album, esse dulce; ei quoque inest *albedo*, *dulcedo*.

CAPVT XVIII.

De Loco Antecedentis & Consequentis, Conjugatorum & Casuum, itemq; Autoritatis.

Quomodo argumentamur ab Antecedente & Consequente ?

AB Antecedente & Consequente, sic argumentamur:

1. *Posito consequente, ponitur antecedens*. Vt: Si est *Senex*, fuit *juvenis*.

2. *Remoto antecedente, removetur consequens*. Vt: Si non fuit *juvenis*, non est *senex*.

*Quomodo argumentamur a Conjugatis
& Casibus?*

Conjugata & Casus vocantur vocabula, quorum eadem est origo: Vt amor, amare, amicus, amicitia. Vnde talis resultat Maxima: *De quo dicitur, vel negatur, unum Conjugatorum, de eo dicitur quoque vel negatur alterum.* Sic, Petrus amat, E. in eo est amor. Est amicus, E. in eo est amicitia.

Quomodo argumentamur ab Autoritate?

Autoritas duplex est: Divina & Humana. *Autoritas Divina* infallibile nobis præbet argumentum. Vnde primum Theologiæ principium complexum est: *Quicquid Sacra Scriptura, quæ Dei verbum est, dicit, id verum est.* *Autoritas* contra *humana* infirmum nobis suppeditat argumentum, quodque solo hoc nititur fundamento: *Optimis artium Magistris concedendum esse.* Sive, ut vulgo efferunt: Vnicuique artifici in sua arte esse credendum.

CAPVT XIX.

De Actione & Passione.

Quomodo argumentamur ab Actione & Passione?

AB Actione & Passione, sic argumentamur:

I. *Nihil agit in seipsum*, (respectu ejusdem, actione univoca & corruptiva.) Hoc est: Nulla potentia, simul est activa & receptiva ejusdem operationis, respectu ejusdem, & quatenus est talis. Dicitur, respectu ejusdem. Nam, diverso respectu, idem simul

simul agens & patiens esse potest. Vt *αὐτίκα* est agens, quatenus seipsum vita privat, & patiens, quatenus vita privatur a seipso : sed non eodem respectu. Quatenus *privat*, non est patiens, sed solum agens : quatenus *privatur*, non est agens, sed solum patiens. Eadem est ratio actionum immanentium.

2. *Actiones* (theoriæ oppositæ, & prout sunt in rerum natura) *sunt singularium*, (ut principii, a quo oriuntur, subjecti, in quo recipiuntur, termini, qui per eas producuntur.) Nempe, sola singularia existunt : sola autem existentia, actionis & passionis capacia sunt.

3. *Actiones sunt Suppositorum* (tanquam ultimate ab iis denominatorum, & ut principii quod.) Sive : Actiones Suppositi totum suppositum denominant. Per Suppositum intelligitur substantia singularis, completa & incommunicabilis. Quod si simul sit intelligens, tunc vocatur Persona. Vnde Canis est suppositum, non vero est persona. Jam proinde dicimus, *homo textit*, atque sic totum suppositum nominatur texens ; etsi texere corpori tantum, ut principio quod competit, minime vero animæ.

4. *Agens*, (ut tale,) *est nobilius patiente*. Non vero attenditur agens secundum substantiam suam, sed secundum hanc formalitatem, quatenus est agens. Eadem est ratio de patiente. Vnde calor agens in ferrum, ignobilior quidem est ferro, ratione entitatis : ferrum siquidem substantia est, calor accidens ; accidens autem semper ignobilius est substantia. Sed, calor, quatenus est agens, nobilior est ferro, quatenus est patiens : agens enim est communicans quod ha-

bet ;

bet ; patiens , est recipiens ejus quod non habet. Communicare autem, & habere, melius est, quam recipere & non habere.

CAPVT XX.

De Divisione & Distributione.

*Quomodo argumentamur a Divisione
& Distributione ?*

A Divisione & Distributione, sic argumentamur:

1. *Divisum & membra di-videntia* (omnia simul sumta) *debent inter se adæquari, i. e. æquale patere.* Vt, animal æquale patet, ac brutum & homo, simul sumta.

2. *Divisum debet plus continere, quam singula membra di-videntia,* (seorsim sumta.) Sic, animal plus debet continere quam homo ; plus item quam brutum.

CAPVT XXI.

De Eodem & Diverso.

*Quomodo argumentamur ab Eodem
& Diverso ?*

A B Eodem & Diverso, sic argumentamur:

1. *Quæ sunt eadem uni tertio* (singulari & incommunicabili,) *illa sunt eadem inter se, respectu ejusdem tertii.* Hoc est principium Syllogisticum, & in eo consistit, quod prædicatum Conclusionis ideo possit dici de subiecto, quoniam medium, sive tertium illud, convenit utrique. Neque opponere licet l. 47. §. fin. ff. de R. I. *Socii mei Socius,*
So-

Socius meus non est : quasi sic non omnia sint eadem inter se, quæ sunt eadem unitertio, cum Cajus possit esse amicus Seji & Sempronii, ut tamen Sejus & Sempronius sint inimici. Nimirum, dictum est, respectu ejusdem tertii : ergo, licet Sejus & Sempronius respectu suorummet non convenient inter se, conveniunt tamen respectu Caji, tanquam tertii, in hoc, ut Sejus sit Caji amicus, & Sempronius etiam sit Caji amicus.

2. *Talia sunt subjecta, qualia a suis prædicatis esse permittuntur* : & contra. Veritas enim est conformitas rei, per subjectum & prædicatum significatæ. Jam autem illa conformitas, est identitas, quam habet unum extremum cum altero. Si igitur prædicatum revera competit subjecto, tunc propositio est vera : sin minus, est falsa.

LIBER SEXTVS.

CAPVT I.

De Fallaciis in Dictione.

Quid est Locus Sophisticus ?

Locus Sophisticus, est sedes argumenti Sophistici, five ejus, quod speciose fallit : unde alio nomine Fallacia dicitur.

Quotuplex est Fallacia ?

Fallacia duplex est : In Dictione, & Extra Dictionem.

Quid est Fallacia in Dictione ?

Fallacia in Dictione est, quæ latibulum erroris quærit in sermone.

Quod

Quot sunt Fallaciæ in Dictione ?

Fallaciæ in Dictione sunt sex : Æquivocationis, Amphiboliæ, Compositionis, Divisionis, Accentus, & Figuræ dictionis.

Quid est Fallacia Æquivocationis ?

Fallacia Æquivocationis est, quæ provenit ex voce æquivoca æquivoce sumta. Vt :

O. Gallus est avis.

Q. Homo est Gallus.

E. Q. Homo est avis.

Cancer est piscis.

Quidam morbus est cancer.

E. Quidam morbus est piscis.

Qui ducit fratris uxorem, ille peccat,

Ducens viduam Christiani demortui, ducit fratris uxorem,

E. Ducens viduam Christiani demortui peccat.

Quid est Fallacia Amphiboliæ ?

Fallacia Amphiboliæ est, quæ provenit ex integra oratione, vario sensu accepta. Vt in illo Oraculi : Ajo, te Æacida Romanos vincere posse. Ambiguum hic est totum quod dicitur : non tantum enim intelligi potest sic, fore ut Æacides seu Pyrrhus, vincat Romanos ; sed ita etiam, futurum ut Romani vincant Pyrrhum. Hujus farinæ est :

Sacrum pingue dabo non macrum sacrificabo.

Hunc versum scitissimum, & qui demorsos sapit unges, Politianus, picturæ, quæ Florentiæ in Dominicanorum Cœnobii peristylia Abelem & Cainum sacrifici-

crificantes exhibet, adjecit: atque is, si modo consueto & prono sic legatur:

Sacrum pingue dabo, non macrum sacrificabo:

Hexameter est, & ad Abelem attinet: at vero inversus, hoc modo:

Sacrificabo macrum, non dabo pingue sacrum:

Pentameter evadit, Caino conveniens.

Aliud exemplum:

Si decem mundi sunt facti, non erit unicuique tantum mundus,

At decem mundi sunt facti,

E. Non erit unicuique tantum mundus.

Tale est responsum, quod Alberto Placentiæ Domino, cum hostis immineret, per necromantiam redditum perhibent: *Domine sis securus: inimici tui intrabunt terram tuam, & subjicientur domui tue.* Alio sensu significat: *Domi ne sis securus: inimici tui intrabunt terram tuam, & subjicientur* (quæ vox Chaldæis ignem notat) *domui tue.*

Eadem fallacia committitur in sequenti Syllogismo:

Qui sunt ex Deo, verbum Dei audiunt;

Atqui omnes creature sunt ex Deo.

E. Omnes creature Verbum Dei audiunt.

Verum:

Mars Veneri fuerat Vulcani nomine junctus:

aliter exponunt Physici, aliter Astronomi, aliter Astrologi, aliter Chymici.

Quid est Fallacia Compositionis?

Fallacia Compositionis est, cum sensu composito accipitur, quod diviso erat intelligendum. Ut, si

H

qui

quis verba, *Potest sedens stare*, ita accipiat, potest is, qui sedet, dum sedet, simul stare: nam sensus divisus est, & sic intelligere verba oportet: potest is, qui jam sedet, alio tempore stare. Fallacia similis:

O. Animal est rationis particeps & rationis expers:

O. Homo est animal.

E. O. Homo est rationis particeps & rationis expers.

Major, vera est in sensu diviso; falsa, in sensu composito.

Quid est Fallacia Divisionis?

Fallacia Divisionis est, cum sensu diviso accipitur, quod composito accipiendum erat. Sic, si illud: *Duo & tria sunt quinque*: ita intelligas, duo esse quinque, & tria esse quinque separatim: cum ita accipiendum sit, *Duo & tria simul sumpta esse quinque*. Simile exemplum:

Omnes Sapientes Græciæ erant septem:

Thales & Periander erant Sapientes Græciæ:

E. Thales & Periander erant septem.

Hic medius terminus in Majore sumitur compositæ, & usurpatur particula *omnis* collectivæ, non distributive: in Minore divisim, quia particula *Omnis* omittitur.

Quid est Fallacia Accentus?

Fallacia Accentus est, cum ex variatione accentus focus sit: ut:

Qui lepores venatur, canibus indiget:

Poëta lepores venatur.

E. Poëta canibus indiget.

Quod

*Quod edis devorās,
Librum edis,*

E. *Librum devorās.*

Quid est Fallacia Figura Dictionis?

Fallacia Figura Dictionis est, cum phrasis vel ratio loquendi non recte percipitur: Sive, quæ provenit ex vocum diversarum similitudine. ut: *Pons* est generis masculini; ergo & *Frons*. *Docere* actionem significat, ergo & *Valere*.

*Equus est species,
Bucephalus est equus,*

E. *Bucephalus est species.*

*Mus rodit caseum,
Mus est syllaba,*

E. *Syllaba rodit caseum.*

CAPVT II.

De Fallaciis extra Dictionem.

Quid est Fallacia extra dictionem?

Fallacia Extra Dictionem est, quæ latibulum erroris quærit in re.

Quot sunt Fallacia extra Dictionem?

Fallaciæ extra Dictionem sunt Septem: Accidentis, Dicti secundum quid & dicti simpliciter, Ignorantionis elenchi, Consequentis, Petitionis principii, Non causæ, Plurium interrogationum.

Quid est Fallacia Accidentis?

Fallacia Accidentis est, cum id rei per se tribuitur, quod per accidens tantum ei convenit. Ut, si ita colligas:

*Quicquid homines insanos reddit, malum est.
Vinum homines insanos reddit.*

E. *Vinum malum est.*

Scientia inflat : Ergo est mala. Febris cogit hominem temperanter vivere : Ergo est appetenda.

Quid est Fallacia Dicti secundum quid & dicti simpliciter?

Fallacia Dicti secundum quid & dicti simpliciter est, cum id, quod secundum quid rei tribuitur, de ea accipitur simpliciter. Sic recte dicitur Æthiops esse albus, intelligendo id de dentibus ejus : At non tamen id ad totum Æthiopem extendi potest.

Christianis omnia licent : Ergo iis licet impune peccare. Christus jubet, ne simus solliciti de crastino. Ergo nulla sollicitudo est necessaria.

Quicquid non urit, non est verus ignis.

Ignis in fornace Babylonica non uffit.

E. *Ignis in fornace Babylonica non fuit verus ignis.*

Quid est Fallacia Ignorationis Elenchi?

Fallacia Ignorationis Elenchi est, cum non recte intelligitur quod, in quæstione est. Vt, si quis dicat : Cave, ne te vinum decipiat ; & tu intelligas : Cave, ne vinum bibas.

Nimirum, contradictio debet fieri secundum idem, ad idem, similiter, seu eodem modo, & eodem tempore.

Quid est Fallacia Petitionis Principii?

Fallacia Petitionis Principii est, cum id loco probationis sumitur, quod in quæstione, vel saltem æque dubium erat, atque id, de quo quæritur. Vt, si quis animam

nam hominis immortalem esse, probare velit eo argumento, quod non intereat cum corpore.

Veteres disputabant per quæstiones. Hinc dicebatur petere id quod est in principio, ille, qui quæstionem in principio disputationis ad disputandum propositam, sumebat ceu certam, & ut concederetur petebat.

Quid est Fallacia Consequentis?

Fallacia Consequentis est, si consecutionem reciprocam esse putes, quæ non est. Causa itaque deceptionis est, quod putamus, si unum sequitur ad alterum, tum vicissim hoc ad illud sequi, consecutione reciproca. Breviter: Fallacia consequentis est, si, quia posito antecedente, necessario ponitur consequens, ideo putet quis, etiam vicissim, posito consequente, poni antecedens. Vt, si dicas: Si pluit, terra est madida. Ergo, si madida est, pluit. Et si enim, quando pluit, terra madida est, non tamen statim, si madida est, pluit: cum possit alia de causa ipsa madere.

Omne Vinum est calidum. E. quicquid non est calidum, non est Vinum.

Quid est Fallacia non Cause ut Cause:

Fallacia non Cause ut cause est, cum pro causa alicujus rei ponitur id, quod ejus causa non est. Vt, si quis pecuniam causam esse existimet, ut homines ei iniungentes justitiam violent. Aut, si quis ita argumentetur: Baculus stat in angulo: Ergo cras pluet. Ancilla edit caseum: Ergo servus bibit vinum.

Quid est Fallacia Plurium Interrogationum?

Fallacia Plurium Interrogationum est, cum ad plures interrogationes una petitur responsio, ac si esset una interrogatio. Ut, si quærat Sophista: *Sitne Socrates homo & equus*, & tu affirmes, ipse concludet: Ergo Socrates est equus. Si vero neges, ipse colliget: Ergo Socrates non est homo. Item si quærat Sophista, *sintne homo & asinus rationales?* si responderis affirmative, inferet: Ergo asinus est rationalis: si negative; colliget: Ergo homo non est rationalis. Nimirum, duplex interrogatio, duplicem & distinctam responsionem summopere exigit,

Sit Nomen DOMINI Benedictum!



METHODVS DISPUTANDI

METHODVS

DISPUTANDI.



METHODVS DISPVTANDI.

Vnde Disputatio Nomen habet?

Disputatio Nomen habet a *putando*, quod proprie significat noxia ab arboribus remove & abscindere; atque sic *Putamina* dicuntur ea, quæ rejectanea sunt, & inutilia. Disputatio ergo sic dicitur, quod per eam veritas quasi putetur, & ab omni falsitate expurgetur.

Quot modis accipitur Vox Disputationis?

Vox Disputationis interdum late accipitur, pro thematis alicujus controversi tractatione, sicut Suarezius, & Gregorius de Valentia, tractatus suos Disputationes vocant. *Stricte*, accipitur pro actu, qui est inter Opponentem, & Respondentem.

Quid est Disputatio stricte ita dicta?

Disputatio stricte ita dicta, est collatio sententiarum diversarum, qua alter pro viribus propositum defendere nititur, alter impugnare, veritatis declarandæ gratia.

Fuitne eadem olim, qua hodie, disputandi ratio?

Neutiquam eadem olim, quæ hodie, fuit disputandi ratio. Græci enim vetusti vix aliter, quam continuis interrogatiunculis, quibus alterius partis responsiones elicerentur, disputabant. Ad hunc modum in Elenchis Sophisticis respexit Aristoteles, ejusque simu-

simulacrum aliquod deprehenditur in Dialogis Platonis. Nunc, loco interrogationum, substituantur Syllogismi formales, quem modum disputandi, in orbe Latino Christiano, Scholastici introduxerunt.

Quæ est Causa Efficiens Disputationis?

Causa Efficiens Disputationis, est 1. *Proponens*, qui materiam ad disputandum proponit, diciturque alias *Respondens*. 2. *Opponens*, qui res ad disputandum propositas argumentis oppugnat. Accedit 3. nonnunquam *Dirigens*, qui disputationem dirigit, vocaturque alio nomine *Præses*.

Quæ est Materia Disputationis?

Materia circa quam, sive objectum Disputationis est omnis thesis, de qua disputari, quia aut ignota, aut dubia videtur, potest. Proinde non instituendæ Disputationes de iis rebus, quæ captum disputantium excedunt: item nec de manifeste veris, aut citra controversiam falsis: quin nec de otiosis, aut superstitiosis. *Paradoxa* tamen, quæ sub specie falsi veritatem occalunt, admittuntur.

Quid igitur est Disputare?

Disputare, est allatis argumentis veritatem vel ignotam in lucem proferre, vel jam notam confirmare, & adversus contradicentes tueri.

Quot sunt Probationum Genera?

Probationum Genera duo sunt: Vnum ad *Sensum*, cum scilicet sensus rei alicui fidem facere potest: id

quod sit, vel provocatione ad experientiam, quando nimirum ipse sensus docet, ipsaque rei inspectio, quod adversarius negat: vel Inductione, quæ est a singulis ad universalis collectio. Alterum Probationum Genus ad Intellectum attinet, cum non sensu, sed rationibus, & argumentis proprie sic dictis, aliquid ostenditur.

Quæ est Norma disputandi?

Norma disputandi unica, est Logica: unde B. Augustinus dixit, Dialecticam esse bene disputandi scientiam.

Quomodo Disputatio debet esse comparata?

Disputatio esto 1. *Accurata*, nempe ex judicii acumine, cum fervore quodam conjuncta. 2. *Succincta*, nec enim Disputatoris est rhetoricari. 3. *Candida*, ne antagonista directe ea tribuatur sententia, quæ non est ipsius, sed ex ejus sententia consequenter & indirecte tantum fluit. 4. *Modesta*, ne arrogantiam præ se ferat, aut convitiis, nugis, illusionibus sit referta. 5. *Perspicua*: est enim secundum Aristotelem l. 3. Rhet. c. 4. Perspicuitas præcipua orationis virtus. Denique 6. sit *Distincta*, ut nimirum veritas, quæ primo obtutu obscura videtur, eruatur, & aliis conspicienda proponatur.

Quid opponitur Disputationi?

Disputationi, seu veritatis inquisitioni, opponitur *Sophisticatio*, qua quis alteri nititur persuadere falsum, sub veri specie, per contentionem.

Quo

*Qua sunt Regulae Generales tenenda
in Disputationibus?*

Regulae Generales sunt: *I. In Disputationis progressu, a statu controversiae non est recedendum.* Debent enim Disputantes esse contradicentes, quorum unus removet & negat id, quod alter ponit atque affirmat; quod fieri nequit, nisi unus, isque certus, ponatur controversiae status, in quo uterque disputantium permaneat.

2. Contra negantem principia, non est disputandum. Principium enim est sententia verissima, omnibus exinde fluentibus veritatis causa; ejusque terminis cognitis, nemo assensum suspendere potest. Quod quidem intelligendum de Principiis primo veris, quae non per alia, sed per seipsa fidem habent. Quod si vero quis negaverit Scientiae aliqujus Principia, contra eum quoque non est disputandum, scilicet, in illa scientia, cujus ea sunt principia.

3. Disputantium munia non sunt confundenda; ut nonnulla ipsis communia sunt. Opponentis enim est, argumenta opponere; Respondentis, ad opposita argumenta respondere.

In quibus consistit Officium Opponentis?

Opponens debet *I. materiam*, de qua disputandum est, praecognoscere; quae enim ignorat, destruere nequit.

II. Ex propositis Thesisibus sibi certam aliquam impugnandam sumat, quae si aut imperfecta, aut ob-

obscura , aut dubia videtur , petet a Respondente declarationem , ne turpis ignoratio elenchi cæteroquin oriatur.

III. Ex propriis , sive rei , de qua agitur , accommodatis principiis , adversarium refellere instituat.

IV. Præmissa paulo uberiore mentis suæ declaratione , ut & sibi , & Respondenti , & Auditoribus consulat , expresse designet id , quod est impugnaturus.

V. Thesi selectæ & intellectæ , ejusmodi opponat argumentum , cujus conclusio illi thesi sit contradictoria. Sola enim contradictoria oppositio, verum a falso dividit.

VI. Argumentum proponat in forma Syllogistica : nam hæc generale est instrumentum , veritatem facilius inveniendi & proponendi.

VII. Proderit interdum , Opponentis præcedentis argumenta reassumere , & ad illa datas responsiones ulterius examinare.

VIII. In Argumentatione non debet fieri saltus de genere in genus

IX. Cum dubiæ sunt Præmissæ , statim earundem probatio adjicienda , eademque iterum Syllogistice proponenda ; & sic , si opus , iterum confirmanda , donec suo officio sese perfunctum arbitratur.

X. Audienda deinde est responsio Respondentis patienter , usque donec finem sermonis facit. Quod si vero Respondens extra oleas vagetur , aut thesi suæ probandæ inhæreat , ad argumentum autem vel plane nihil respondeat , vel non in forma , tum directam atque formalem responsionem expetere Opponentem licet.

XI. Post datam a Respondente responsionem, Opponentis est adversus eam excipere, sive porro instare.

In quibus consistit Officium Respondentis?

Respondens I. Theses, de quibus disputandum est, crebro & diligenter repetat, ne, ex illarum ignorantia, aliquid contra easdem concedere cogatur.

II. Præmittat, si opus fuerit, dilucidam succinctamque theses oppugnatae declarationem, quo status controversiæ melius formetur.

III. Petat, ut Opponens argumenta sua syllogistice formet, sive argumentandi forma, qua semper ex veris elicitur verum.

IV. Objectum Syllogismum iisdem verbis, quantum fieri potest, repetat, quibus ab Opponente prolatus est. Hæc enim repetitio moram concedit Respondenti ad cogitandum, atque, si forte Respondens Opponentis mentem non recte perceperit, facit, ut uberius explicare se possit.

V. Omnium maxime attendat ad statum controversiæ, num objectio feriat thesin, an secus. Nam, si non feriat, nulla opus est responsione.

VI. Si Propositionis alicujus vim, aut sententiam, propter obscuritatem, non intelligat Respondens, licet ei ab Opponente exigere illius explanationem.

VII. Ante omnia inquiret in formam prolatis Syllogismi, num proba sit, an vitiosa. Nam, si forma vitiosa fuerit, tota consequentia est nulla, cujus rationem forma continet.

VIII. Si

VIII. Si forma bona sit, expendenda Syllogismi materia. Est autem Materia vel Remota, vel Propinqua; Remotam, Termini; Propinquam, Propositiones constituunt.

IX. In præmissis, potior habenda cura Majoris Propositionis. Cum enim plurimum Syllogismi in prima figura proponantur, quæ Majorem exigit universalem, videndum, an in omnibus exemplis valeat.

X. Probationes Præmissarum cum sunt prolatae, videndum, veræne sint, an falsæ. Quod si falsæ sint, ipsarum quoque petenda probatio.

XI. Si Major sit ambigua, aut non omni ex parte falsa, distinguenda aut limitanda est, & tunc distinctio aut limitatio, sive Minori, sive Conclusioni est applicanda: Minor enim, & Conclusio, formaliter limitari non possunt. Interim nihil probant Limitatio vel Distinctio, sed tantum illustrant.

XII. Cum vel ambæ Præmissæ, vel alterutra, falsitate laborant, rejiciendæ.

XIII. Conceditur quandoque totum argumentum, quando scilicet thesi impugnandæ contradictorie non est oppositum: necesse est enim, unum affirmare id, quod alter negat, & unum improbare, quod alter probat.

XIV. Invertitur aliquando argumentum, & in ipsum Adversarium retorquetur.

XV. Si Syllogismus Hypotheticus proferatur, vel ejus Antecedens negandum, vel Consequentia inficianda.

XVI. Per Instantiam respondetur, quando Respondens manifesto exemplo docet, falsam esse universalem.

versalem propositionem. *Limitando* responderetur, quando distinctione suppeditata, Respondens limitat propositionem, & quo sensu vera, quo sensu falsa eadem sit, ostendit.

XVII. Nunquam Negatione responderi debet, ubi limitatione res expediri potest. Non enim adhibenda sunt remedia aspera, ubi leniora sufficiunt.

XVIII. Consequentia a Respondente negari non debet, quando forma Syllogismi est bona. Consequentia enim est deductio conclusionis ex iis præmissis, e quibus sequitur, & proprie ad formam pertinet, ut is, qui negat consequentiam, hoc dicat, adversarium non deducere conclusionem suam per formam legitimam ex præmissis.

XIX. Respondentis non est probare, & ideo nec potest committere petitionem ejus quod erat in principio. Nihil enim aliud propositum habet, quam, ut illud, quod asserit, defendat. Defendere autem, non est argumentis aliquid confirmare, sed argumenta ea, quibus quid impugnatur, dissolvere. Quod si igitur argumenta in contrarium allata solverit Respondens, officio suo functus est. Quod si vero idem docere aliquid instituit, & sic suam quasi provinciam deserit, & Opponentis habitum (cui probare incumbit) induat, doctrinam suam ratione aliqua confirmare tenetur; doceri enim nihil potest, nisi argumentis id stabiliatur.

In quibus consistit officium Præsidis?

Præsidis est I. disputantium discursui moram concedere.


II. De-

II. Debet argumenta Opponentis, leuiora licet, firmitus roborare.

III. Respondentis responsioni subuenire tenetur, eamque, si sufficiens sit, uberius explicare; si deficiens, perficere; si vitiosa, excusare simul, ac corrigere.

IV. Auditorium erudire debet. Quod fiet, si statum controversiæ uberius exponat; diversas diversorum responsiones & sententias proponat; ortum controversiæ ex historiis repetat; loca parallela conferat; Autores, qui de controversia uberius agunt, indicet; ac deniq; suam *Præterea* subiciat.

Sit Nomen DOMINI Benedictum!



SYNOPSIS
ETHICÆ.



SYNOPSIS ETHICÆ.

CAPVT I.

De Natura & Partibus Ethicæ.

Vnde dicitur Ethica?

Ethica nomen habet, vel ἀπὸ τῶν ἠθῶν, a moribus, utpote objecto suo externo; vel ἀπὸ τῆ ἔθξε, ab assuefactione & consuetudine, tanquam causa efficiente Virtutis proxima.

Quid est Ethica?

Ethica, est prudentia, hominem Virtutibus informans, ut Summo fruatur Bono.

Vnde hauriuntur Præcepta Ethicæ?

Κεῖμελον, seu Principium præceptorum Ethicorum, est recta ratio, vel σωτήρησις, i. e. comprehensio primorum principiorum practitorum. Quæcunque enim traduntur in Ethicis, omnia revocari debent ad generalissima enunciata: *Honestæ sunt faciendæ: Turpia sunt fugiendæ.*

Quomodo dividitur Ethica?

Ethica habet partes tres. Harum prima Εὐδαιμονολογία, agit de Fine, nempe de Felicitate civili. Altera ψυχολογία, considerat hominem, ejusq; imprimis Animam Rationalem, tanquam subiectum, cui inexistit illa Felicitas. Tertia Ἀρετολογία, occupatur circa media ad Felicitatem ducentia: Virtutem nimirum tam Moralem, quam Intellectualem.

Quæ

Qua Methodo Ethica tradi debet?

Ethica tradi debet Methodo *Analytica*, ut prius de Fine, deinde de Mediis instituaturs disquisitio. Ethica enim est disciplina practica: nullum autem agens intellectuale actiones suscipit, nullo propositio Fine; is enim dat bonitatem, amabilitatem, mensuram, & ordinem mediis. Vnde ante omnia finis tanquam scopus, ad quem actiones collineare debent, est præfigendus.

Quis est Finis Ethicæ?

Finis Ethicæ est Summum Bonum, seu Felicitas Civilis.

Quis est idoneus Auditor Ethicæ?

Idoneus sive ὁρεστικός Auditor Ethicæ, est vir robustioris ætatis, qui affectus compescere valet. Hinc juvenis non est satis idoneus, vel acroamaticus Doctrinæ Moralis Auditor; quippe, ἀπειρος existit, τῶν καὶ τὸν βίον περὶ ἑαυτῶν, imperitus actionum civilium; unde quid facto opus sit, non tam prudenter definire potest. Deinde, quia est τοῖς πάθεσι αἰσθητικῶς, affectibus obnoxius: ideo horum copia iudicii vigorem opprimit, & a cogitatione rerum honestarum abducit. Valet nihilominus de Ethica illud Poëtæ:

-- Petite hinc Juvenesq; Senesq;

Finem animo certum, miserisq; viatica canis.

CAPVT II.

De Summo Bono, siue Felicitate civili.

Daturne aliquod Summum Bonum?

Summum bonum dari, colligitur ex appetitus humani natura. Is enim cum in infinitum ferri non possit, terminum aliquem statui necesse est, in quo tandem sistat, & in quo acquiescat.

In quibus putatur consistere Summum Bonum?

Recte Seneca ait lib. de Vit. beat. cap. 1. *Vivere omnes beate volunt: sed ad providendum, quid sit, quod beatam vitam efficiat, caligant.* Hinc adeo Varro, teste Augustino, l. 19. de Civ. Dei, c. 1. *trecentis* & plures variorum de Summo Bono variantes collegit opiniones. Celebriores tamen sententiæ eorum sunt, qui Summum Bonum collocant, vel in Voluptate, vel in Divitiis, vel in Honore, vel in Virtutis Habitu, vel in Contemplatione, vel in Actione Virtutis.

Estne Voluptas Summum Bonum?

Voluptatem Summum Bonum esse, Epicurus docuisse fertur: quem tamen ab hoc crimine liberant ex Veteribus Seneca, ex Recentioribus Petrus Gassendus; ostendentes, nihil cum voluisse aliud, quam Summum Bonum consistere in indolentia Corporis, & Animi tranquillitate. Sectatores tamen Epicuri, infamem sententiam, de Voluptate Corporis, tanquam apice Felicitatis, defenderunt. Hac autem nihil est falsius. Nam 1. Voluptas nobis cum bel-
luis,

luis, quibus Natura animam pro sale dedit, communis est; vera autem Felicitas debet esse bonum hominis proprium. 2. Voluptas est res fragilis, caduca, cito transiens, eamque consequitur dolor pede claudo. At Felicitas, stabilis & constans esse debet, ac comitem habere animi sensum, & lætitiā. 3. Voluptas Deo repugnat, omnibus bonis est odio, hominis animam corpusque corrumpit, & fortunæ bona absūmit.

Suntne Divitiæ Summum Bonum?

Divitiæ non sunt Summum Bonum. Nam 1. Divitiæ sunt bona utilia, ideoque ex sua natura ad aliud bonum referuntur. 2. Sæpe etiam mortalium pessimi opibus abundant. 3. Divitiæ a fortuna dependent, & illarum perfacilis jactura est. 4. Sæpe parantur Divitiæ cum aliorum injuria.

Estne Honor Summum Bonum?

Honor, quo nomine comprehendi solent, Nobilitas, Dignitas, Fama, & Gloria Nominis, non est Summum Bonum. Nam 1. non est in nostris viribus situs. 2. Non propter se, sed propter virtutis opinionem expetitur. 3. Est caducus, fragilis, & subjectus fortunæ.

Estne Virtutis Habitus Summum Bonum?

Virtutis Habitus non est Summum Bonum. Nam 1. is inesse potest otioso & dormitanti, quibus nulla competit Felicitas. 2. Nulla forma in actu primo, sed secundo est perfecta.

Estne Contemplatio Summum Bonum?

Plato Felicitatem in Contemplatione Ideæ Bonorum quæsit; cujus tamen sententia parum est ad li-

quidum deducta. Vulgari autem loquendi modo accepta Contemplatio, Summum Bonum esse nequit. Nam 1. quærimus bonum practicum, non contemplativum. 2. Etiam pessimi homines contemplationibus vacare possunt.

Estne Actio Virtutis Summum Bonum?

Est utique. Nam Summum Bonum, est operatio animæ rationalis, secundum virtutem optimam, & perfectissimam, in vita perfecta.

Quare dicis, secundum Virtutem optimam & perfectissimam?

Quia cujusvis Virtutis actio est Summum Bonum, quatenus perfecta inest homini. Trahit enim secum totum complexum reliquarum Virtutum, quavis ferente occasione exercendarum.

Quare dicis, in vita perfecta?

Quia, sicut una hirundo non facit ver, ita nec una, aut altera actio virtuosa, Summum Bonum gignit; sed, Felicitas, est constans Virtutis operatio, ad extremum usque vitæ halitum continuata.

Quanam sunt Instrumenta Summi Boni?

Instrumenta Summi Boni, sunt bona, *vel Animi*; uti Fruditio, Eloquentia: *vel Corporis*; uti firma valetudo, robur, pulchritudo; *vel Fortune*; uti Opes; item Amici, in quibus magnum ad res gerendas præsidium.

Quanam sunt Consequentia Summi Boni?

Consequentia Summi Boni, sunt, voluptas animi, seu lætitia conscientiae, honor, benevolentia hominum, sanitas, & similia.

Quæ-

Quanam sunt Cause Summi Boni?

Summum Bonum paratur auspicio Divino, tanquam causa remota; cui accedere debent, Industria, & Consuetudo, quæ sunt causæ proximæ.

Quanam sunt Proprietates Summi Boni?

Summum Bonum est 1. proprium. 2. difficulter mobile. 3. homini parabile 4. propter se expetibile. 5. sibi sufficiens. 6. communicabile.

Quid est Summum Malum, seu Miseria Civilis?

Summum Malum, seu Miseria Civilis, est habitus animi vitiosus, quo quis, oppressis rectæ rationis hortatibus, omnis generis scelera, per omnem vitam patrare non erubescit; corporis autem & fortunæ bonis, si quibus abundat, ad improbitatem, & nequitiam abutitur.

Quanam sunt Consequentia Miseria Civilis?

Consequentia Miseriæ Civilis, sunt mala conscientia, infamia, paupertas, pœnæ, morbus, denique mors tristis ac miserabilis.

CAPVT III.

De Subjecto Felicitatis Civilis.

Quodnam est Subjectum Felicitatis Civilis?

Subjectum Quod, sive denominationis, est homo ætatis maturæ, & iudicii confirmati. Subjectum Quo, seu illa pars in homine, cui proxime, & immediate inhæret Felicitatis habitus, est Anima.

Quotuplex est Anima Hominis?

Anima Hominis est duplex : Quædam enim per essentiam rationem participat ; alia eadem caret.

Quomodo se habet Anima, quæ ratione caret?

Anima, quæ ratione caret, est duplex. Vel enim nullo modo per se rationi obedire potest, uti Anima Vegetativa, cujus Facultates sunt, Nutritiva, Augmentativa, Generativa. Nec enim, ut v. g. bene coquat stomachus, a Ratione imperari potest. Vel aliquo modo participat Rationem, quatenus ei parere, & actiones suas ad præscriptum hujus potest componere. Atque hæc est Anima Sensitiva, ejusque Facultas Appetitiva.

Quid est Anima per essentiam rationalis?

Anima per essentiam rationalis, est ipsa Mens, seu recta ratio, qua a brutis distinguimur, quaque, adminiculo primorum principiorum theoreticorum, & practicorum, rerum causas cognoscimus, & actiones ad honestatis, & prudentiæ regulam, conformamus. Atque hæc subjectum principale, & præcipuum est Civilis Felicitatis.

Quodnam est Subjectum minus principale Felicitatis Civilis?

Subjectum minus principale Felicitatis Civilis, & secundarium, est Anima per participationem rationalis, seu Sensitiva; cujus Facultates Concupiscibilis, & Irascibilis, possunt ita parere Rectæ Rationi, ut motiones, & Affectus, intra mediocritatem subsistant.

Quotuplex est Imperium Rationis?

Imperium rationis est duplex : unum *Despoticum*, seu *herile*, quomodo imperat membris externis : alterum *Regium seu limitatum*, quomodo imperat Appetitui Sensitivo. Sape enim ille, etiamsi videat meliora probetque, nihilominus deteriora sequitur.

Quid est Appetitus Sensitivus?

Appetitus Sensitivus, est vis Animæ Sensitivæ, qua Animal, præeunte notitia Sensus, inclinatur ad bonum sequendum, & malum fugiendum.

Quotuplex est Appetitus Sensitivus?

Appetitus Sensitivus est duplex : *ἡδυσμυγὲς*, *Concupiscibilis*, quo rem cognitam ut bonam, vel sub ratione boni, appetimus : & *τοῦ μωροῦ*, *Irascibilis*, quo rem cognitam ut malam, vel sub ratione mali, averfamur.

Quæ sunt Facultates Animæ Rationalis?

Facultates Animæ Rationalis, sunt Intellectus, & Voluntas.

Quid est Intellectus?

Intellectus, est Facultas Animæ Rationalis, per quam res diversorum generum cognoscimus. Ac dividitur, in Intellectum *Theoreticum*, quo res necessarias cognoscimus, & in ea cognitione acquiescimus : ac *Practicum*, quo res contingentes cognoscimus, & illam cognitionem ad actionem aliquam referimus.

Quid est Voluntas?

Voluntas, est Facultas Animæ rationalis, qua rem ab intellectu cognitam, ut bonam, appetimus; ut malam, averfamur.

Quomodo Voluntas munus hoc suum exercet?

Voluntas munus suum exercet, per Arbitrii libertatem, sive Facultatem eligendi opposita, quæ duplex est. Una *Contrarietatis* seu *Specificationis*, cum Voluntas circa objecta specie diversa ita se gerit, ut, positis omnibus ad agendum requisitis, unum præ altero eligere aut appetere queat: Sicut homo libere scribere, aut legere potest. Altera *Libertatis Contradictionis* seu *Exercitii*, cum Voluntas eandem specie actionem, circa idem specie objectum occupatam, potest libere vel exercere, vel intermittere: ut sedere, & non sedere; legere, & non legere.

Quotuplices sunt actus Voluntatis?

Actus Voluntatis sunt duplices: *Eliciti*, qui immediate ab ea producuntur: ut, velle, nolle, eligere: *Imperati*, qui ad Voluntatis imperium ab aliis potentiis producuntur: ut currere, edere, bibere. Atque potest cogi Voluntas quoad actus imperatos, minime vero quoad actus elicitos.

Quotuplex est Virtus?

Secundum Animæ divisionem, in aliam per essentiam rationalem, & alteram per participationem, distinguitur ipsa virtus, in *Intellectualem*, quæ Intellectum, & *Moralem*, quæ Appetitum perficit Sensitivum.

CAPVT IV.

De Affectibus Humanis.

Quid sunt Affectus?

Affectus, sunt motus Appetitus Sensitivi, in persecutione boni, & fuga mali. Tales sunt, Amor, Odium,

Odium, Desiderium, Fuga, Gaudium, Tristitia, Spes, Desperatio, Audacia, Timor, & Ira.

Quid est Amor?

Amor, est affectus, quo bonum placet appetitui sensitivo.

Quid est Odium?

Odium, est affectus, quo rei apprehensæ, quod appetitui minus congruat, repugnamus.

Quid est Desiderium?

Desiderium, est affectus, quo appetitus in rem absentem, placitam, intense fertur.

Quid est Fuga?

Fuga, est affectus, quo rem malam, imminere visam, intense fugimus, & aversamur.

Quid est Gaudium?

Gaudium, est affectus, quo, ob bonum præsens, spiritus excitantur, ac e corde diffunduntur.

Quid est Tristitia?

Tristitia, est affectus, quo ob malum præsens, spiritus cordis contrahuntur, & opprimuntur: dicitur alias Dolor.

Quid est Spes?

Spes, est affectus, quo bonum obtentu difficile, possibile tamen, affectamus.

Quid est Desperatio?

Desperatio, est affectus, quo bonum, obtentu impossibile, aversamur.

Quid est Audacia?

Audacia, est affectus, quo bonum difficile acquirituri, sine ratione, nulloque periculi metu, rem aggredimur.

Quid

Quid est Timor?

Timor, est affectus, quo malum futurum, declinatu difficile, averſamur.

Quid est Ira?

Ira, est affectus, cum dolore conjunctus, quo quis injuriam, ſibi ſuiſque illatam, vindicare nititur.

CAPVT V.

De Virtutis Moralis Cauſa Efficiente & Finali?

Qua est Cauſa Efficiens Virtutis?

Cauſa Efficiens Virtutis, non eſt Natura, ſed Doctrina, & magis propinqua, Aſſuefactio ex frequentibus Virtutum actionibus.

Quanam ſunt Principia, ſive cauſa efficientes actionum moralium?

Principia, ſive cauſa efficientes proximæ actionum moralium, ſunt quatuor: π' ἐκείσων, Spontaneum; ἡ περαιρεσις, Electio; β' λειυσις, Conſultatio; β' λησις, Voluntas.

Quid eſt Spontaneum?

Spontaneum eſt, cujus principium eſt in ipſo agente, & ſciente ſingulas actionis circumſtantias.

Qua ſunt illa Circumſtantia?

Illæ circumſtantia hoc verſu comprehenſæ habentur:

Quis,

Quis, Quid, Vbi, Quibus Auxiliis, Cur,
Quomodo, Quando.

*Quomodo vocatur proprie illa scientia, quæ est
in Actionibus Spontaneis?*

Scientia, quæ est principium actionis spontaneæ, proprie vocatur Conscientia, atque ea præcipiendo, & suadendo, vetando, & dissuadendo, actionibus humanis intervenit.

Quid est Conscientia?

Conscientia est judicium intellectus, bonum aut malum esse aliquid, nobis dictantis. Est igitur quasi præco quidam legis naturæ, aut Divinæ; unde nulla dispensatione fieri potest, ut non peccet, qui contra conscientiam peccat.

Quotuplex est Conscientia?

Quotuplex est judicium intellectus, de re quam faciendâ aut omittendâ, totuplex etiam est Conscientia. Est autem judicium intellectus proprie triplex: Rectum sive certum, Probabile, & Erroneum. Hinc Conscientia proprie loquendo triplex tantum est: Recta, Probabilis, & Erronea. Sed quia etiam Dubitatio, & Hesitantia intellectus, interdum improprie judicium intellectus appellantur, hinc fit, ut similiter Conscientia aliqua Dubia, aliqua Scrupulosa dicatur.

Quid est Conscientia Recta?

Conscientia Recta est, quæ faciendum, aut omittendum dictat, quod faciendum aut omittendum omnino est; sive, quæ cum jure Divino, aut humano, certo & indubitato consentit.

Quo-

Quomodo obligat Conscientia Recta?

Quod Conscientia Recta simpliciter præcipit, illud faciendum omnino est, si quis suo arbitrio rem agat; sin minus, saltem ita mandatum Superioris exequi debet, ne quid contra illam fiat. Sic, pauperibus succurrere, ubi opus est, Conscientia Recta præcipit; unde id omnino faciendum est, si de tuo disponas. At, si alterius negotio præsis, minimum ita te gerere debes, ne pauperibus obsis. *Si Conscientia aliquid vetet*, non licet id agere, si res tua sit. Si Jussu Superioris quid agendum, distinguendæ sunt personæ, quibus quid demandatur, itemque Res quæ demandantur. *Personæ*, cui quid demandatur, deferitur vel judicium in ea re, & cognitio causæ, vel nulla tantum executio. *Res*, quæ demandatur, aut continet errorem tolerabilem, aut intolerabilem. Quod si *Judex est*, & error intolerabilis, exequi mandatum non debet: Deo enim magis obediendum est, quam hominibus, Act. 5. Si officio *Executoris* tantum fungitur, & est tolerabilis error, executioni mandare potest rem etiam injustam, nisi a Superiori impetret, ut ab hoc onere ipsum absolvat.

Quid est Conscientia Errans?

Conscientia Errans est, cujus judicium a jure Divino, aut humano, dissentit. Sive, quæ id judicat faciendum vel omittendum, quod faciendum aut omittendum non erat.

Quomodo obligat Conscientia Errans?

Errantis Conscientiæ, nisi Error sit invincibilis, aut de re indifferenti, ista est natura, ut peccet, tam qui secundum eam agit, quam qui contra eam. Nimirum, peccat, qui secundum eam agit, quia errorem, cum

cum possit deponere, non vult: quicquid autem ex errore vincibili fit, a peccato non excusat. Sed & peccat, qui *contra* illam agit; quamvis enim, quod agit, legi Divinæ, aut humanæ non repugnet, prout in se spectantur, quia iudicium conscientiæ errat; repugnat tamen utrique, prout ille statuit, id quod agit, lege Divina aut Principis prohibitum esse, etli revera prohibitum non erat.

Quid est Conscientia Probabilis?

Conscientia Probabilis est, cujus iudicium est probabile, nec habet certitudinem. Dicitur alias *Opinativa*, quia gignit *Opinionem*, quæ est, cum intellectus rei assentitur, non quidem sufficienter ab objecto permotus, sed ob rationabilem electionem, qua voluntas in unam partem magis declinat, quam in alteram, cum formidine tamen oppositi.

Quomodo obligat Conscientia Probabilis?

Conscientia Probabilis obligat ut Recta, ita ut recte faciat, qui secundum eam agit, male, qui contra. Sed, potest iudicium illud conscientiæ multipliciter formari. Et 1. quidem vel formatur ex opinione tutiori, sed minus probabili; vel ex minus tuta, & probabiliori. 2. Formatur vel ex opinione propria, vel aliena. 3. Formatur aliter a Docto, aliter ab Indocto. Sic, fieri potest, ut Homo Doctus, acumine ingenii, id in re aliqua animadvertit, quod cæteri in re illa non perviderunt; unde ex propria opinione conscientiæ probabilis iudicium sibi format. Idem, ex opinione aliena, iudicium sibi formare potest, & Doctorum auctoritati deferre, quamvis statuatur, suam opinionem probabiliorem esse. At, indoctus recte facit, cum eam opinionem sectatur.

tur, quæ maxime ipsi probabilis apparet, quamque doceri a Peritis & Probis videt, licet illa quoque non usque adeo tuta sit. Denique Subditus, non tantum potest, sed & debet, contra propriam opinionem, id amplecti, quod Superiori visum est, modo & illud non sit improbable. Obediendum enim Superiori est, quoties licite id fieri potest; licite autem fit, quod probabilitatem habet. Cæterum, hæc probabilitas, non inde metienda est simpliciter, quod Superior sit ille, cui sententia placet; sed, quia vel Subditus scit, eam a multis Doctoribus comprobari, vel quia Superior ipse doctus & probus est; vel denique, quia hominum prudentum consilio omnia administrat. Hinc Subditi suo Principi obedire tenentur, vocanti eos ad bellum, licet ipsi dijudicare non possint, justumne illud sit, an iniustum. Sufficit enim iis scire, Principem Viris Sapientibus instructum, quorum consilio omnia gerat.

Quid est Conscientia Dubia?

Conscientia Dubia est, cum quis dubitat, & nescit, utri parti contradictionis adhærendum sit, sed utrinque hæret ambiguus.

Peccatne, qui ex Conscientia Dubia agit?

Qui ex Conscientia Dubia agit, peccat; exponit enim se periculo peccandi; tum vero expresse Apostolus ait Rom. 14. *Qui dubitat, si ederit, condemnatus est.*

Quid est Conscientia Scrupulosa?

Conscientia Scrupulosa est, cum statuitur quid licitum esse, ita tamen, ut subsit scrupulus aliquis. Scrupulus autem hic, vel Rationabilis est, vel Irrationa-

tionabilis. Si *Rationabilis*, recte fecerit, qui ejus rationem habuerit; etsi ad id proprie non obligatur. Si *Irrationabilis*, negligendus est, & animo ejiciendus.

Quid est Invitum?

Invitum aliquid dicitur dupliciter; nempe per Violentiam, & Ignorantiam.

Quid est Invitum per Violentiam?

Invitum per Violentiam est, cujus principium foris est, & tale quidem, ut nihil ad id conferat is, qui agit, aut patitur. Sic Violentia est, cum quis, tempestate, aut venti impetu aliquo abreptus, fertur, quo nolebat; aut, cum quis vi manum tuam arripit, eaque alterum pulsat.

Quid sentiendum de iis, quæ per Metum sunt?

Actiones, quæ metus causa suscipiuntur, non sunt ab omni parte sponte, sed omnino aliquid inviti permixtum habent; unde etiam veniam sæpe impetrat, qui quid isto modo minus recte committit: verum, non violentæ sunt istæ actiones simpliciter. Etsi enim nemo, quod metus causa facit, id demto metu faceret, tamen, quia eo loco quis constitutus tum est, ut effugere imminens malum alio pacto non possit, omnino ita vult agere, ut agit; aut pati, quod patitur; imo, rebus sic comparatis, nunquam aliter faceret. Sic gubernator, ubi naufragium timet, jactura, quicquid servari potest, redimit. In bello partem provinciarum cedit victus victori, ne totum Regnum amittat. Non libenter quidem huc descenditur, sed quia tamen ad vitandum majus malum hoc eligitur, spontanea est actio, non invita; malum

enim, quod obtutu majoris mali eligitur, exiit naturam mali, morali æstimatione, & incipit naturam boni habere. Quin, nisi hoc quis admittat, violentæ forent omnes actiones, quæ metu iræ Divinæ, & pœnarum, quas lex Divina, & Respublica statuunt, perpetrantur.

Quid est Actio Imprudens?

Actio Imprudens est, quæ ab agente, circumstantiarum quarundam ignaro, culpæ & fraudis vacuo, proficiscitur, subsequente pœnitentia, ac dolore.

Quid est Invitum per Ignorantiam?

Invitum per Ignorantiam est, quod ex ignorantia committitur, ita tamen, ut eum, qui fecit, illius postea pœniteat.

Quæ sunt Divisiones Ignorantiæ?

Ignorantia alia est *Pravæ Dispositionis*, alia *Puræ Privationis*: item alia *Concomitans* voluntatem, alia *Antecedens* voluntatem. Porro, Ignorantia alia est *Vincibilis*, alia *Invincibilis*; nec non alia *Universalium*, alia *Particularium*; denique alia est Ignorantia *Juris*, & alia *Facti*.

Quid est Ignorantia Pravæ Dispositionis?

Ignorantia Pravæ Dispositionis est, cum quis judicat, rem illud esse, quod revera non est.

Quid est Ignorantia puræ Privationis?

Ignorantia puræ Privationis est, cum simpliciter quid ignoratur, & nullum intellectus judicium intervenit. Sic, cum quis inter venandum hominem transfigit, quem feram esse putabat, ignorantia pravæ dispositionis est: si transfigat casu, & dum nihil petit, ignorantia puræ Privationis.

Quid

*Quid est Ignorantia Voluntatem
Concomitans?*

Ignorantia Voluntatem Concomitans est, cum ignorans quis quid facit, sed tamen id, quod facere idem vellet, si sciret. Sic se habet, qui hostem interficit ignorans, quē interfectorius tamen alias erat: hic enim ignorare & agere uni subiecto accidunt; sed unum tamen alterius causa non est.

*Quid est Ignorantia Consequens
Voluntatem?*

Ignorantia Consequens Voluntatem est illa, cuius voluntas causa est; fitque hoc dupliciter. Principio, cum quis rem, quam scire potuit, scire simpliciter noluit, diciturque ignorantia *Affectata*. Deinde, cum quis, aut habitu vitioso inipeditus, aut affectu præventus, aut ex negligentia sive inadvertentia quadam, rem, quam scire poterat, ac debebat, ignorat. Dicitur ignorantia hæc voluntaria Virtualiter, quia id quod ignorantiam illam peperit, fuit voluntarium actualiter.

*Quid est Ignorantia Antecedens Volun-
tatem?*

Ignorantia Antecedens Voluntatem, est causa volendi, quod alias quis non vellet. Talis ignorantia est, cum ea quis ignorat, quæ nec scire poterat in hac, aut illa re, nec scire tenebatur.

Quid est Ignorantia Vincibilis?

Ignorantia Vincibilis est, cum ea ignoramus, quæ scire poteramus, & tenebamur.

Quid est Ignorantia Invincibilis?

Ignorantia Invincibilis est, cum ea ignoramus, quæ scire non poteramus.

Quid est Ignorantia Universalium?

Ignorantia Universalium est, si quis vel nesciat simpliciter, quid sequendum sibi in vita sit, & quid expediat: ut, an res mala, sit scortatio, aut adulterium; an furari liceat; & similia. Vel alias ignoret Universalia ista: an in actionibus nostris habenda sit ratio temporis, personæ, & loci; an vero omnia, omni loco, & tempore, apud omnes, æque recte fiant.

Quid est Ignorantia Particularium?

Ignorantia Particularium est, si quis singularium rerum, quæ actionem circumstant, aliquam ignoret: puta, si propalet, quæ nesciebat tacenda esse; filium in prælio interficiat, quem sibi persuadebat, hostem esse; neci dedat præter spem, quem emendandi causa verberare volebat.

Quid est Ignorantia Juris?

Ignorantia Juris est, cum quis ignorat jus suum, sive finem suæ actionis; sive, quid in actione sit honestum, justum, utile, aut his contrarium. Hæc, cum plerumque sit affectata, actionem non reddit invitam, nec excusat agentem, imprimis si sit ignorantia Juris Naturæ, aut Juris Divini.

Quid est Ignorantia Facti?

Ignorantia Facti est, cum ignoratur, quid contigerit, sive, quando circumstantiæ ignorantur: in quibus cum præcipua actionis vis consistat, agens tamen providere non potuit. Hæc actionem reddit in-

invitam, & excusat; si caret dolo, non est culpa nostra acquisita, habetque conjunctam pœnitentiam.

*Quomodo Ignorantia causa esse potest
alicujus actionis?*

Ignorantia, quæ privatio est, actionis alicujus, hoc est rei positivæ, causa proprie esse non potest. Quoties igitur quid fieri dicimus ob ignorantiam, toties id volumus, ignorantiam illam tollere scientiam, quæ prohibitura, sive impeditura actum istum fuerat. Simili modo in naturalibus, absentia gubernatoris a navi, causa dicitur, quare navis submergatur; remotio columnarum, causa dicitur, cur fornix collabatur.

Excusatne Ignorantia Juris humani?

Ignorantia Juris humani non excusat in foro exteriori, nec actionem reddit invitam: leges enim quæ constringunt hominum vitas, intelligi ab omnibus debent, l. 9. C. de LL. Sane, indultum est in certis casibus, Jus ignorare militibus, scæminis, rusticis, & in universum iis, qui 25. annis minores sunt: sed id speciale est. Imo, nec in foro conscientiæ excusat ignorantia illa, si diligentiam debitam quis non adhibuerit, maxime, quatenus Leges illæ ad cujusque salutem proprie pertinent.

Quid est Electio?

Electio, sive Proxresis, est earum rerum, quæ in nostra potestate sunt, ex consultatione profecta appetitio. Differt a Spontaneo, quod sponte, certo modo, etiam bruta & pueri agunt; quibus tamen Electio non competit. Electionem enim semper præcedit aliqua deliberatio; cum eligere nihil sit aliud,

quam ex iis, quæ ante inter se contuleris, unum accipere, sive ex multis, quæ consideraris, unum alteri præoptare.

Quid est Consultatio?

Consultatio, est actus intellectus, quo deliberamus & dispicimus, quid in re quapiam facto opus sit.

De quibus rebus instituitur Consultatio?

Consultatio instituitur de rebus, quæ in nostra sunt potestate, & fieri a nobis possunt: quarum enim natura, aut fortuna causa est, eæ sub consultationem non cadunt. Sic nemo deliberat de siccitate, aut imbribus; nemo de inventionē thesauri; etsi hæc interdum contingunt, interdum non contingunt. Sed & de mediis tantum fit consultatio: cum enim finis in practicis principium sit, dubii nihil habet, nec sub inquisitionem venit, sed tanquam certum, & notum quid supponitur. De fine ergo non est deliberatio, nisi forte, quod finis est unius rei, alterius fiat medium.

Quid est Voluntas?

Voluntas, quæ hoc loco non potentiam volendi, sed actum Voluntatis denotat, est boni, seu veri, seu apparentis, ab intellectu ostensi, appetitio.

Quotupliciter quis Quid Velle dicitur?

Velle quis dicitur, cum ipse quid facit, itemque cum approbat, quod facit alius. Atque hoc posterius multis modis contingit. Primo enim approbat, qui jubet; deinde, qui consentit; tertio, qui facientem collaudat; quarto, qui commodi particeps fit; quinto, qui, cum potest, & debet, non impedit;

& sex-

& sexto denique, qui auctorem rei receptat. Thomas. 2. 2. q. 62. art. 7. his versibus inclusa hæc recitat:

*Jussio, Consilium, Consensus, Palpo, Recursus,
Participans, Mutus, Non obstans, Non manifestans.*

*Quomodo augetur vel minuitur ratio
Voluntarii?*

Augetur, & minuitur ratio voluntarii, prout quid sit vel sine errore, & perturbatione, vel per errorem, & perturbationem. Maxime voluntarium est, quod nec errore seducti, nec vi affectuum abrepti ipsi facimus. Minus voluntarium est, quod quis vel errore deceptus, vel affectibus ingratis succumbens, designat.

CAPVT VI.

De Materia & Forma Virtutis, nec
non ejus Definitione, &
Divisione.

Quanam est Materia Virtutis?

Materia, seu Objectum virtutis *primarium*, sunt Affectus, circa quos ad mediocritatem redigendos, & actiones hominum ad rectæ rationis normam componendas, Virtus occupatur. Objectum Virtutis *secundarium*, sunt omnes sive personæ, sive res; & hæc quidem, seu corporis, seu fortunæ bona aut mala: ut robur, divitiæ, honor, conversatio, contractus; in quorum usu recte sese gerere homines Virtus facit.

Quid est Virtus?

Virtus est habitus, cum consilio & deliberatione, inque medietate consistens illa, quæ ad nos, secundum rectam rationem, pro judicio viri prudentis.

Quæ est Forma Virtutis?

Forma Virtutis est Mediocritas, sive medium inter nimium, & parum, rectitudinem includens.

Quotuplex est Medium?

Medium duplex est, unum Rei, alterum Personæ.

Quodnam est Medium Rei?

Medium Rei est, quod simpliciter inter extrema interjacet, & ab utroque æquali distat gradu ac intervallo, nullo habito circumstantiarum, temporis, loci, & personarum respectu. Sic se habet centrum in circulo, quod a circuli circumferentia æqualiter distat.

Quodnam est Medium Personæ?

Medium Personæ, sive respectu nostri, est, quod uni extremorum vicinior, ab altero vero remotius est. Sive, quod ratio, consideratis personarum, loci, temporisque circumstantiis, constituit, ac determinat. Est autem Forma Virtutis Medium Personæ, non Medium Rei.

Quot sunt Species Virtutis?

Virtus dividitur juxta diversa objecta, & varia circa eadem versandi officia, & modos, in Species Undecim. Eæ sunt: Fortitudo, Temperantia, Liberalitas, Magnificencia, Magnanimitas, Modestia, Mansuetudo, Humanitas, Veracitas, Urbanitas, Justitia.

CAPVT VII.

De Fortitudine.

Quid est Fortitudo?

Fortitudo est virtus moralis, quæ mediocritatem servat, in periculis, honestatis gratia, magno animo perferendis, & adeundis.

Quotuplex est Fortitudo?

Fortitudo duplex est: Domestica, & Bellica.

Quid est Fortitudo Domestica?

Fortitudo Domestica est, quæ in adversis prosperisque rebus animum præstat immotum.

Quid est Fortitudo Bellica?

Fortitudo Bellica est, qua, in bello honeste occumbere, vir fortis non dubitat.

Quid est Fortitudo Apparens?

Fortitudo Apparens est, cum non honestate, sed utilitate, jucunditate, aut alia quapiam ratione, ad pericula subeunda incitamur: estque potissimum quintuplex: Civilis, Militaris, Iracunda, Fiduciaria, & Inscia.

Quid est Fortitudo Civilis?

Fortitudo Civilis est, cum Cives in Rep. spe præmiorum, aut pœnarum metu, pericula subeunt.

Quid est Fortitudo Militaris?

Fortitudo Militaris est, quæ militem, ob experientiam, & spem prædæ, in periculis adeundis reddit intrepidum.

Quid est Fortitudo Iracunda?

Fortitudo Iracunda est, cum ira, aut odio, ad pericula subeunda impellimur.

Quid est Fortitudo Fiduciaria?

Fortitudo Fiduciaria est, cum, externorum praesidi-
orum fiducia freti, pericula aggredimur.

Quid est Fortitudo Inscia?

Fortitudo Inscia est, cum ideo periculis nos com-
mittimus, quia eorum magnitudinem ignoramus.

Quanam sunt Extrema Fortitudinis?

Extrema Fortitudinis sunt, in defectu Timiditas,
in excessu Audacia,

Quid est Timiditas?

Timiditas, est vitium, in audendo deficiens,

Quid est Audacia?

Audacia, est vitium, in audendo modum ex-
cens,

Quodnam est Officium verae Fortitudinis?

Officium verae Fortitudinis in eo positum est, ut
intrepide adeantur, & constanter perferantur, cum
alia, tum potissimum mala in Bello obvenire solita;
habeaturq; accurata ratio, & aliarum circumstantia-
rum, & maxime finis, qui debet esse Patriae, Paren-
tum, Religionis, Libertatis, defensio & conservatio.

*Licetne Viro Forti quandoq; adornare
fugam?*

Licet Viro forti quandoq; adornare fugam, si ad-
sit extremus necessitatis casus, nec vel victoriae con-
sequendae, vel vitae aliter conservandae spes affulgeat.
Fortitudinis enim objectum non est periculum
quod

quodvis, sed humana vi propulsabile; quale non est mors præsentissima, & ineluctabilis. Unde vir fortis non ideo pugnat, ut mortem oppetat simpliciter: sed, ita intrepide pugnat, ut, si necessitas mori jubeat, fortiter id sustineat.

Suntne αὐτόχειρες fortes dicendi?

Αὐτόχειρες minime fortes dicendi sunt: non enim honestatem habent præfixam, sed doloris evitacionem; soloque tædio ærumnarum, & animi quadam mollitie, vitam sibi abrumpunt. Quin nec cum Reip. utilitate, sed injuria potius, facinus ipsorum est conjunctum; ac denique æternæ mortis subeunt periculum.

Suntne μονόμαχοι fortes dicendi?

Μονόμαχοι minime fortes dicendi sunt: quia, contra leges a Magistratu sancitas, lites obortas privatis duellis dirimere satagunt.

CAPVT VIII.

De Temperantia.

Quid est Temperantia?

TEMPERANTIA, est virtus, servans mediocritatem, in expetendis fruendisq; voluptatibus, gustum, & tactum afficientibus, sustinendoq; eo dolore, qui ex absentia voluptatum istarum nascitur.

Quodnam est Objectum Temperantia?

Objectum Temperantiæ Internum, idque Præmarium, est cupiditas cibi, potus, & rei genialis; atque hinc orta voluptas. Secundarium, est dolor, ex illorum subtractione secutus. Externum, sunt ipsæ

ipse illæ res; quæ gulam, aut Venerem irritare possunt.

Quænam sunt Extrema Temperantia?

Extrema Temperantiæ, sunt in excessu Intemperantia, in defectu Stupiditas.

Quid est Intemperantia?

Intemperantia, est vitium, quo quævis tactus gustusvè voluptates, citra honestatis rationem, immoderate appetuntur.

Quid est Stupiditas?

Stupiditas, est vitium, quo omnes promiscue voluptates, etiam honestas, & necessarias, aspernamur.

Quænam sunt Species Temperantia?

Temperantia, pro diversitate objectorum, dividitur in Frugalitatem, & Castitatem.

Quid est Frugalitas?

Frugalitas, est Temperantia, in capiendo nutrimento: estque vel Abstinencia, vel Sobrietas. *Abstinencia*, est frugalitas in cibo. Extrema sunt, in Excessu Voracitas; in Defectu, nimia a cibo abstinencia. *Sobrietas*, est frugalitas in potu. Excessus, est Ebriositas; Defectus, nimia a potu abstinencia.

Quid est Castitas?

Castitas, est temperantia, in moderanda Venere. Extremum in excessu, est Libido; In Defectu, est nimia rerum ad speciei conservationem necessarium, præter, aut contra naturæ appetitionem, averfatio.

CAPVT IX.

De Liberalitate.

Quid est Liberalitas?

Liberalitas, est virtus moralis, in erogandis accipiendisque pecuniis modicis medioeritatem servans.

Quodnam est Objectum Liberalitatis?

Objectum Liberalitatis Internum, est cupiditas opum. Externum, sunt ipsa *χρηματα*, per quæ intelligi debent omnia, quorum pretium Numo æstimari potest; omniaque vitæ commoda, quæ ab homine in hominem derivari possunt.

Quanam sunt Extrema Liberalitatis?

Extremum Liberalitatis in Excessu, est Prodigalitas; in Defectu, Avaritia.

Quid est Prodigalitas?

Prodigalitas, est vitium, in dando modum excedens, ita, ut nec quantitas, nec qualitas, nec persona, nec locus, nec tempus observentur.

Quid est Avaritia?

Avaritia est, quæ in dando deficit, in accipiendo vero modum excedit, sine ullo respectu honestatis, & iustitiæ.

Quanam sunt Species Liberalitatis?

Species Liberalitatis, sunt Beneficentia, Hospitalitas, Parsimonia, & *Ἀυτάρκεια*, sive Sufficientia.

Quid est Beneficentia?

Beneficentia est, qua animus ad benefaciendum cuivis, malefaciendum nemini, commovetur. Ex-

trem

trema ejus sunt, Nimia profusio, & Maleficientia, conjuncta cum invidia.

Quid est Hospitalitas?

Hospitalitas est, qua Peregrinos, & hospites, vera benevolentia, & officiis hospitalibus complectimur. Extrema ejus sunt, Nimia in hospites propensio; & Inhospitalitas.

Quid est Parsimonia?

Parsimonia est, quæ res proprias custodit, utiliter collocat, vitatque sumtus non necessarios; suo tamen tempore expendit. Habet fere eadem cum Liberalitate Extrema; nisi quod Prodigalitati magis adversatur.

Quid est Autarkeia?

Autarkeia sive Sufficiencia est, quæ moderatur desiderium opum & possessionum, ut scilicet præsentibus bonis contenti acquiescamus. Excessus, est nimia habendi cupiditas; Defectus, omnis sufficienciae neglectus, & ignavia.

CAPVT X.

De Magnificentia.

Quid est Magnificentia?

Magnificentia est virtus, in magnis sumtibus faciendis mediocritatem servans.

Quomodo differt Magnificentia a Liberalitate?

Differt 1. *Objecto*: nam, cum Liberalitas ad omnes pecuniarias actiones se porrigat, Magnificentia ad sumtuosas tantum pertinet. Differt 2. *Officio*, quod

quod multo diversum est ratione circumstantiarum. Personæ enim hic non nisi illustres esse debent, & vel in generis, vel officii specula eminentes. Finis quoque proximus est potius splendor, & pompa operum publicorum, quam singulorum hominum commodum. Sed & 3. *Extrema* alia sibi opposita habet Magnificentiâ, atque Liberalitas.

Quenam sunt Extrema Magnificentiâ?

Extrema Magnificentiâ, sunt in Excessu Luxus, in Defectu Sordities.

Quid est Luxus?

Luxus est vitium, in magnis sumtibus erogandis modum excedens; uti cum non honestatis, dignitatis, vel necessitatis publicæ causa, sed vanæ tantum jactantiæ, & ostentationis gratia, magnificentiâ affectatur.

Quid est Sordities?

Sordities, est indecora parsimonia, qua, etiam quando honestas & necessitas efflagitat, præsentem opum vi & copia, nihil in splendida, & luculenta opera erogamus, aut, si quid tandem fit, non nisi ægerrime & parcissime præstatur.

CAPVT XI.

De Magnanimitate.

Quid est Magnanimitas?

Magnanimitas, est virtus, in magnis honoribus expectendis fugiendisque modum observans.

Quod-

Quodnam est Objectum Magnanimitatis?

Objectum Magnanimitatis Internum, est appetitio magnorum honorum. Externum, sunt ipsi Honores magni, & quicquid in quavis alia virtute magni & extrinsecus eminet, unde splendor, & dignitas singularis agenti accedere potest.

Quodnam est Officium Magnanimi?

Officium Magnanimi est, in quovis vitæ genere & statu, in quavis fortuna, & occasione, ita magnis honoribus semper dignum se præstare, ut, cum Catone apud Sallustium, quo minus gloriam petit, eo magis eam assequatur: Honorem vero non recipiat, vel ab hominibus vilibus, vel ob res exiles, sed tantum a viris bonis, ob præclara, & luculenta facinora.

Quid est Honor?

Honor est præmium virtutis, tributum viro bono, a congruente ejus judice, ut illius virtus inclarescat, cæterique hoc exemplo ad virtutem excitentur.

Quanam sunt Extrema Magnanimitatis?

Extremum Magnanimitatis in Excessu, est Superbia, seu Fastus; in Defectu, Pusillanimitas.

Quid est Superbia?

Superbia, seu Fastus, est vitium, quo homines, virium suarum ignari, plus sibi virtutis, & honoris tribuunt, quam convenit, istamque vanitatem suam, ridiculo incessu, gestu, oratione, machinatione produnt.

Quid est Pusillanimitas?

Pusillanimitas, est animi quædam dejectio, qua homines dona sua agnoscere nolunt, & cum honoribus debi-

debitis indignos se judicant, virtutis materia & occasione se privant, & in pravitatis speciem incur-
runt.

CAPVT XII.

De Modestia.

Quid est Modestia?

Modestia est virtus, in modicis honoribus expetendis, vel fugiendis, mediocritatem servans.

Quodnam est Objectum Modestiae?

Objectum Modestiae, sunt honores mediocres, propter facta laudabilia, usitata, & quotidiana, hominibus mediocris conditionis collati.

Quenam sunt Extrema Modestiae?

Extremum Modestiae in Excessu, est Ambitio, in Defectu, ἀφιλομία, sive honorum contemptus.

Quid est Ambitio?

Ambitio, est vitium, in modicis honoribus expetendis, modum excedens: dum iis, vel indebitis, vel justo avidius, vel mediis non convenientibus, uti largitione munerum, vi, calliditate, quis inhiat.

Quid est Αφιλομία?

Αφιλομία est vitium, in modicis honoribus expetendis deficiens; uti cum fugimus honores amplectendos, fugimusq; mediis illicitis, laborum præstidentes gravitatem, vel turpe quid committentes, quo indigni honoribus evadamus; vel denique media honesta negligentes, quæ ad honores perducunt.

CAPVT XIII.

De Mansuetudine.

Quid est Mansuetudo?

Mansuetudo est virtus, in ira, & hanc insequente vindicta exercenda, mediocritatem servans.

Quodnam est Objectum Mansuetudinis?

Objectum Mansuetudinis *Internum*, est Ira; *Externum*, sunt omnia mala, quæ iram prolicere solent: ut, injuria, damnum, ignominia, & similia.

Quodnam est Officium viri Mansueti?

Officium viri Mansueti est, ne temere irascatur, sed ut causas irascendi habeat graves: leviores enim, ex infirmitate, aut incogitantia lapsus, condonandi sunt. Deinde, finis iræ non debet esse vindicta, sed correctio. Denique, tantum irascendum, quantum proximi admittit incolumitas, & tui ipsius propria salus.

Quanam sunt Extrema Mansuetudinis?

Extrema Mansuetudinis sunt, in Excessu, Iracundia; in Defectu, Lenitudo.

Quid est Iracundia?

Iracundia est vitium, quo quis ex causa levicula vel injusta, supra modum irascitur, nec circumstantias, causas nempe, personas, modum, locum, & tempus, præ iræ fervore, secum expendit.

Quinam sunt Ordines Iracundia?

Ordines Iracundiæ, sunt Excandescencia, Amarulentia, & Crudelitas.

Quid

Quid est Excandescencia?

Excandescencia, est Iracundia, qua citius, quam par est, irascimur, subitoque placamur.

Quid est Amarulentia?

Amarulentia, est Iracundia, qua tardius quidem irascimur, sed semel irati, vix, nisi vindictam consecuti, placamur.

Quid est Crudelitas?

Crudelitas, est Iracundia nimis aspera, & pertinax, quæ non nisi extraordinaria placatur vindicta.

Quid est Lenitudo?

Lenitudo, est vitium, in irascendo deficiens: quando quis, ob nimiam patientiam, non irascitur iis de causis, quibus debebat, neque iis, adversus quos debebat.

CAPVT XIV.

De Virtutibus Homileticis, & in
Specie de Humanitate.*Quid sunt Virtutes Homileticae?*

Virtutes Homileticae sunt, quæ in civili conversatione medium observant, ne alteri molestia creetur, sed, ut omnia suavitate, & morum elegantia, ac civilitate abundant.

Quot sunt Virtutes Homileticae?

Virtutes Homileticae sunt tres: Humanitas sive Comitas, Veracitas, & Urbanitas.

Quid est Humanitas?

Humanitas est virtus, in quotidiana conversatione mediocritatem servans, ne quis temere offendatur.

Quodnam est Objectum Humanitatis?

Objectum Humanitatis *Internum*, est naturalis inclinatio & cupiditas, suaviter cum aliis vivendi, & sermones, ac res invicem communicandi. *Externum*, sunt ipsi civiles congressus, & conversationes.

Quodnam est Officium Humanitatis?

Officium Humanitatis est, nemini temere molestiam facessere, sed omnibus facilem ac jucundum se præbere, ita, ut unicuique pro sua ætate, statu, dignitate, tribuatur τὸ πρέπον, interdum etiam alter reprehendatur, si ita salus illius, vel etiam publica, postulet.

Quanam sunt Extrema Humanitatis?

Extrema Humanitatis sunt in Excessu, Adulatio; in Defectu, Morositas.

Quid est Adulatio?

Adulatio, seu nimium placendi studium, est vitium, cum homines nulla habita ratione vel gravitatis, vel circumstantiarum, omnia aliorum dicta, factaque promiscue approbant, unde palpones, & plebicolæ audiunt: quod si idem faciant spe offæ, aut lucelli, dicuntur κόλακες, parasiti, gnathones.

Quid est Morositas?

Morositas est vitium, cum homines austeri a conversatione aliorum abhorrent, aut, si congregiantur, nec visu faciles, nec dictu affabiles se præbent.

CAPVT XV.

De Veracitate.

Quid est Veracitas?

Veracitas, est virtus moralis, qua, quod corde sentimus, ore, gestu, factisq; profitemur.

Quodnam est Objectum Veracitatis?

Objectum Veracitatis *Internum*, est cupiditas naturalis communicandi cum aliis animi sensa. *Externum*, sunt verba, & quicquid eorum vice in prodendis animi sensis fungitur, sive gestus sit, sive nutus, sive vestitus, sive aliud quippiam.

Quodnam est Officium Veracitatis?

Officium Veracitatis est, verba aut signa rebus consona proferre, ut ratio habeatur honestatis, & salutis privatæ, ac publicæ,

Quid opponitur Veritati?

Veritati in genere opponitur Mendacium, quod triplex est; Jocosum, Officiosum, & Perniciosum.

Quid est Mendacium Jocosum?

Mendacium Jocosum est, quod in re non adeo magni momenti, vel jocandi, vel delectandi, vel docendi, non vero fallendi, aut nocendi causa suscipitur. Atque hoc, suo loco adhibitum, & gratum est, & omnis reprehensionis expers.

Quid est Mendacium Officiosum?

Mendacium Officiosum est, cum quis ad cavenda *maiora* mala, quoddam non tam dicit mendacium, quam celat veritatem. Sive, quando quis falsum dicit, & simulat, quia id requirit Dei honor, vel salus publica, vel salus proximi, vel salus propria. Hoc

mendacii genus, non pro contrario, sed temperamento veritatis, & prudentiæ accipiendum; ut significet idem, ac non dicere omne verum, vel non dicere illis, quibus non obligaris, vel non dicere id, quod non obligaris. Hinc laudatur Jehu, qui, propter gloriam Dei, omnes Baaliticos Sacerdotes occisurus, ingentem Religionis Baaliticæ zelum præ se tulit, 2. Reg. X. item Chusai, qui propter salutem totius populi, simulabat se hostem Davidis, 2. Samuel. XVI. nec non Rahab, Exploratores abscondens, Jos. II. denique Obstetrices Ægyptiacæ, quæ, propter salutem infantum Judaicorum, falsum dixerunt, Exod. I.

Quid est Mendacium Perniciosum?

Mendacium Perniciosum est, cum quis ex malitioso corde, aliter quam scit, ac sentit, loquitur, alium ut decipiat, in eo casu, ubi veritas necessario est aperienda. Et hoc mendacium directe opponitur Veritati, ac in Excessu dicitur Arrogantia, in Defectu, Dissimulatio.

Quid est Arrogantia?

Arrogantia est Mendacium, quo homines ea sibi, aut aliis inesse fingunt, quæ non insunt, aut, quæ insunt, in majus extollunt.

Quid est Dissimulatio?

Dissimulatio est Mendacium, quo bona aut mala nobis aliisque inexistencia, vel prorsus inesse negamus, vel nimis extenuamus.

Quid comprehenditur sub Veracitate?

Sub Veracitate, velut pars potestativa, comprehenditur Taciturnitas.

Quid

Quid est Taciturnitas?

Taciturnitas est virtus moralis, qua linguam frænamus, ne temere effutiantur, quæ honestius celantur.

Quanam sunt Extrema Taciturnitatis?

Extremum Taciturnitatis in Excessu, est Garrulitas sive Loquacitas; in Defectu, Intempestivum Silentium.

Quid est Garrulitas?

Garrulitas sive Loquacitas, est vitium, in loquendo modum excedens, & tacendo deficiens.

Quid est Intempestivum Silentium?

Intempestivum Silentium, est vitium, in loquendo deficiens, & tacendo modum excedens.

CAPVT XVI.

De Urbanitate.

Quid est Urbanitas?

URbanitas est virtus moralis, servans mediocritatem, in proferendis, aut audiendis festivis jocis, & salibus.

Quodnam est Objectum Urbanitatis?

Objectum Urbanitatis Internum, est naturalis ingeniose jocos fingendi inclinatio. Externum, sunt ipsi sales, & facetiæ, ad oblectandum compositæ.

Quodnam est Officium Urbanitatis?

Officium Urbanitatis est duplex; unum Primarium, in eo consistens, ut tempestive, & ita joci in medium proferantur, quo ratio habeatur personarum, locorum, temporis, præcipue autem finis, qui

esse honesta, atque ab obscœnitate, levitate, & dicitate remota oblectatio. Alterum *Secundarium*, quod, in jocis honestis patienter audiendis, spectatur.

Quanam sunt Extrema Urbanitatis?

Extremum Urbanitatis in Excessu, est Scurrilitas, in Defectu, Rusticitas.

Quid est Scurrilitas?

Scurrilitas est vitium, quo homines, nulla habita ratione honestatis, etiam loco, ac tempore alieno, nec sine offensa audientium, captant risum.

Quid est Rusticitas?

Rusticitas, est vitium, quo homines ita inficeto, sive per naturam, sive per assuefactionem, sunt ingenio, ut nec ipsi jocari, nec alios dictis lepidis ludentes ferre queant.

CAPVT XVII.

De Justitia & Jure.

Quid est Justitia?

Justitia est virtus, qua homines sunt idonei, ad ea, quæ justa sunt, eademque agunt, & volunt.

Quotuplex est Justitia?

Justitia est duplex: Vniversalis, & Particularis.

Quid est Justitia Vniversalis?

Justitia Vniversalis est virtus, qua omnibus legibus, ad politicam societatis conservationem, obedientia præstatur. Atque hæc Justitia non tam virtus est, quam complexus omnium virtutum moralium, quatenus

tenus ea præstat, quæ legibus civilibus sunt sancita; leges autem præcipiunt de omni virtute.

Quid opponitur Justitiæ Universalis?

Justitiæ Universalis opponitur Injustitia universalis, qua homines, effractis legum repagulis, quævis scelera designare, & privatam pariter ac publicam utilitatem turbare non erubescunt.

Quid est Justitia Particularis?

Justitia Particularis est virtus, qua, tam in rerum distributione, quam in commutatione, & contractibus, omnibusque in rebus, in quibus injuria cuiquam fieri potest, homo ita se gerit, ut nec de externis bonis plus sibi vindicet, & minus alteri relinquat, nec de malis, oneribus, & pœnis, minus sibi, & alteri plus quam par est, tribuat.

Quæ sunt Extrema Justitiæ Particularis?

Quia in Justitia Particulari utrumque extremorum, plus scilicet, & minus, est in una eademque actione, & non tam medium rationis, quam rei hic observatur; ideo vitium & in Excessu, & in Defectu, unum nomen habet, Injustitiæ.

Quid est Injustitia Particularis?

Injustitia Particularis, est vitium, in distribuendis, commutandisque rebus externis, modum violans.

Quotuplex est Justitia Particularis?

Justitia Particularis est duplex: Distributiva, vel Commutativa.

Quid est Justitia Distributiva?

Justitia Distributiva est, quæ in distribuendis præmiis, oneribusque, secundum proportionem Geo-

metricam, æqualitatem servat, habita ratione & personarum, & rerum. Non enim omnes accipiunt idem simpliciter, sed idem proportionem, seu secundum quid. Maximo enim cuique plurimum debetur; & in onerosis, validiori plus oneris imponendum est.

Quid est Iustitia Commutativa?

Iustitia Commutativa, quæ Grotio Expletrix dicitur, est, quæ secundum proportionem Arithmeticam, in commutatione rerum, & contractibus, eam servat æqualitatem, ut quisque suum consequatur. Pertinent enim huc res omnes, in quas juris aliquid est alicui, alio quam publico nomine. Commutationes autem, & contractus, late hic sumuntur, ut non tantum veros contractus, & quasi contractus, sed omnes obligationes comprehendant, tam quæ ex delictis, quam quæ ex quasi delictis originem trahunt.

Quid est Proportio Geometrica?

Proportio Geometrica est, cum æqualitas spectatur rerum non omnimoda, sed ad personas relata. Sic si præda, hosti erepta, inter milites benemeritos sit distribuenda, non in æquales partes facienda est distributio. Sed, pro qualitate personarum, quoto dignitatis gradu Centurio superat Signiferum, toto etiam gradu pars prædæ, Centurioni assignata, partem Signifero tributam, superabit, & sic deinceps. Eadem ratione, quo quis in Rep. est opulentior, eo etiam onus portabit majus, ac difficilius.

Quid est Proportio Arithmetica?

Proportio Arithmetica est, cum citra respectum personarum, nuda, simplex, & omnimoda rerum
specta-

spectatur æqualitas, sive id, quod cuique debetur ratione contractus, rerumque commutandarum. Sic in emtione & venditione, inter merces, ac pretium quod persolvitur, omnimoda observanda est æqualitas, insuper habita personarum qualitate, aut dignitate.

Quid est Pœna?

Pœna est malum, quod intuitu antegressi delicti, per modum coactionis, & pro imperio alicui infligitur, in vitæ civilis securitatem, emendationem ejus, qui deliquit, & ut alii hoc exemplo deterreantur, ac cautius mercari discant. Vnde Seneca l. i. de Clem. c. 22. *In vindicandis injuriis hæc tria Lex secuta est, quæ Princeps sequi debet: ut aut eum, quem punit, emendet; aut, ut pœna ejus ceteros meliores reddat; aut, ut sublatis malis, ceteri securiores vivant.*

Qua Proportio observatur in infligendis pœnis?

Pœnæ pertinent ad Justitiam Commutativam, non Distributivam, in iisque observatur Proportio Arithmetica. Pœnæ enim non sunt aliquid, quod distribui possit, quia nihil distribuitur, nisi quod commune est: Pœnæ autem non sunt aliquid commune. Deinde, quicquid distribuitur, id confertur, aut imponitur ideo, quia quis pars civitatis est. At nemo punitur, quia civis est. Sic in distributione omnibus portio cedit; in pœnis, nunquam. Quod si Geometrica proportio in pœnis valeret, tum Nobilis severius, servus mitius puniendus esset: quia majori majus, minori minus convenit in distributione præmiorum, & onerum. Adde, quod in distributione etiam justa, fieri potest, ut aliquis minus consequatur,

quara

quam meritis est : Sed, poenae pro meritis irrogantur. Manet interim proportio Arithmetica, etiam cum Nobiles mitius puniri dicuntur, (in criminibus nempe ex imbecillitate humana profectis) quam alii. Vel enim minus peccaverunt, vel poena, quae mitior videtur, illis aequae gravis est; persona enim hic per accidens spectatur.

Enim vero, extat alia non inelegans, & scita sententia, quae Poenarum irrogationem, nec ad Justitiam Distributivam, nec Commutativam refert, sed ad Justitiam Universalem, hoc est illum Justitiae actum, qui leges ac salutem publicam custodit, & tractat, vitia extirpat, communem felicitatem obsequio civium proborum, malorum vero & contumacium coercitione, promovet; quod quidem Justitiae Universalis munus esse, nemo diffitebitur.

Quid est Jus?

Jus est, quod in usum societatis humanae recta ratio praescribit.

Quotuplex est Jus?

Jus est triplex: Naturale, Gentium, & Civile.

Quid est Jus Naturale?

Jus Naturale, est dictatum rectae rationis, indicans actui alicui, ex ejus convenientia, aut inconvenientia cum ipsa natura rationali, inesse moralem turpitudinem, aut necessitatem moralem, ac consequenter, ab auctore naturae Deo, talem actum aut vetari, aut praecipere. Huc pertinent principia practica nobiscum nata: Honestè esse vivendum, Neminem esse laedendum; &, Suum cuique esse tribuendum.

Quid

Quid est Jus Gentium?

Jus Gentium est, quod gentium omnium, aut multarum consensu, vim obligandi accipit. Gentes enim sibi Jus quoddam per ratiocinationem sive modum conclusionis, in respectu ad civilem societatem, constituerunt. Ab hoc Jure descendunt Dominiorum distinctiones, Bella, Induciæ, Contractus, immunitas Legatorum.

Quid est Jus Civile?

Jus Civile est, quod quisque populus sibi constituit, non per viam conclusionis, sed per determinationem generalis principii ad casus speciales. Hinc obligatio Juris positivi oritur a præcepto & voluntate præcipientis; at, obligatio naturalis, oritur ex natura objecti; quæ enim Juris naturalis sunt, prohibita sunt, quia mala; neutiquam vero ideo tantum mala sunt, quia prohibentur.

Quid subjicitur Juri?

Juri subjicitur Æquitas, quæ est moderata & benigna Juris interpretatio, ejusque emendatio, ea parte, qua deficit. Ei hinc opponitur *παρανομία*, Calumnia Jctis dicta, quæ est malitiosa & nimis mitis Legis interpretatio. Inde, ei opponitur *ἀνεγκλίτως*, jus strictum, quod summa sæpe injuria existere solet.

Quid opponitur ipsi Juri?

Ipsi Juri opponitur Injuria, quæ est damnum, invito alteri illatum, præter meritum, a volente, & sciente singulas actionis circumstantias.

Quid

Quid est Jus Talionis?

Jus Talionis, Græcis τὸ ἀνταποδοῦν, est, cum quis id vicissim patitur, quod alteri fecit.

Habetne Jus Talionis locum?

Jus Talionis, præcise consideratum, in neutra Justitiæ particularis specie locum invenit. Non in Distributiva; nec enim fieri potest, ut patiatur quis eadem, quæ in Rempubl. contulit. Nec in Commutativa; quia non semper simpliciter æqualium rerum fieri potest commutatio, & quia indigentia humana in contractibus omnia ponderat.

Quis est Executor Justitiæ?

Executor Justitiæ cum Distributivæ, tum Commutativæ, est Judex, qui nihil ex arbitrio facere, sed secundum Leges, & jura pronunciare debet: vel, si non satis perspicua, & ambigua Lex sit, ex mente & sententia totius Legis ferenda est sententia.

Debetne Judex judicare secundum acta & probata, an vero secundum Conscientiam?

Quod si per Conscientiam intelligatur certissima & explorata scientia, (in dubio enim, & ubi de facto Judex incertus est, ab actis recedere non debet) judici secundum illam judicandum est. Debet enim Judex ex animi sententia judicare, l. 3. ff. de testib. & innocentem non condemnare, Exod. XXIII. Id quod tamen de Judice superiore intelligendum. Inferior enim, a quo appellari potest, si contra acta, secundum conscientiam, pronunciat, non bene innocentem prospicit; quia Judex Appellationis actorum fidem est sequuturus. Proinde commodius erit, si a judi-

cio abstineat, suoque jure salvo, causam hanc ad Superiorem remittat, ut ita, coram illo, veritatis & innocentiae accusati testimonium, majori spe atque fiducia perhibere possit, & innocentem fortassis servare.

CAPVT. XVIII.

De Virtutibus Intellectualibus.

Quid sunt Virtutes Intellectualles?

Virtutes Intellectualles, sunt habitus animi, quibus anima verum enunciat, affirmando, aut negando.

Quot sunt Virtutes Intellectualles?

Virtutes Intellectualles sunt quinque: Intelligentia, Scientia, Sapientia, Ars, & Prudentia. Harum tres priores sunt *Speculative*, quia res necessarias cognitionis gratia investigant: duæ posteriores sunt *Practice*, quia ad actiones ordinantur.

Quid est Intelligentia?

Intelligentia, est habitus mentis, quo principia scientiarum, sive theoretica, sive practica, promptius & perfectius cognoscuntur.

Quid est Scientia?

Scientia est habitus mentis, quo demonstramus aliquid ex necessariis principiis, idque ope Syllogismi apodictici, seu demonstrativi.

Quid est Sapientia?

Sapientia est habitus mentis, ex scientia, & intelligentia natus, & quo non tantum principia, sed inde quoq; deductas conclusiones cognoscimus.

Quid

Quid est Ars?

Ars est habitus mentis, cum recta ratione effectivus. Proinde omnes Artes 1. edunt opus in sensus incurrens. 2. membris corporis, tanquam instrumentis, utuntur, ad perficiendum opus necessariis. 3. circa certum & determinatum versantur objectum.

Quid est Prudentia?

Prudentia est habitus mentis, qui bona a malis, utilia a noxiis discernit, expetenda ac fugienda præscribit, vitamque totam moderatur.

Quotuplex est Prudentia?

Prudentia alia est *Privata*, qua quis sibi tantum, suisque commodis consulit; alia *Publica*: eaque dividitur in *Legislatoriam*, quæ leges prudenter, & accommodate ad salutem Civium præscribit: *Consultatricem*, qua de iis, quæ ad boni publici conservationem pertinent, deliberatur: & *Judiciariam*, quæ in dijudicandis controversiis forensibus, & obeundis judiciis, occupatur.

Quinam sunt Prudentiæ habitus administrandi?

Prudentiæ habitus administrandi, sunt *Ευεχλία*, *Σύνεσις*, & *Γνώμη*.

Quid est Ευεχλία?

Ευεχλία, Bona Consultatio, est consilii quædam rectitudo, qua media idonea & honesta ad bonum finem, prout res postulat, invenimus.

Quid est Σύνεσις?

Σύνεσις, Sagacitas seu perspicax intelligentia, est, qua dextre, & prudenter percipimus & dijudicamus quæ ab aliis viris prudentibus sunt constituta.

Quid

Quid est Γνώμη?

Γνώμη Sententia, est facultas, qua viri æqui & boni, de aliorum dictis & factis mitius & benignius sentiunt.

CAPVT XIX.

De Virtute Heroica.

Quid est Virtus Heroica?

Virtus Heroica, est habitus animi, cum quadam virtutis moralis eminentia & splendore conjunctus, quo talia patrantur facta, quæ, Divina gubernatione, ad illustrem aliquem finem diriguntur, aut certe Divina ope, & præclarius, quam vulgares hominum vires ferant, geri existimantur. Distinguendum autem accurate est, inter *Virtutem Heroicam*, & *Motum Heroicum*. Illa, non potest abesse a probitate morum; hunc, sæpe abesse ab eadem, exempla multorum stupendis factis celebrium virorum testantur.

Quanam sunt Virtutis Heroicæ Extrema?

Virtutis Heroicæ Extremum in Excessu, est Feritas seu Bestialitas; in Defectu, summa & extraordinaria Ignavia.

Quid est Feritas?

Feritas seu Bestialitas, est vitium morale extraordinarium, quo homo, summa ac nefanda vitiorum turpitudine, in belluam fere degenerat.

Quid est summa Ignavia?

Summa Ignavia, est vitium morale extraordinarium, quo homo ab honesta virtutis actione plane abhorret.

CAPVT XX.

De Virtutibus Imperfectis.

Quid sunt Virtutes Imperfectæ?

Virtutes Imperfectæ, sunt Virtutes, nondum ad habitum perfectum perductæ: ac proinde, tot species earum constitui possunt, quot sunt virtutis perfectæ. Commode tamen omnes ad Continentiam, & Tolerantiam revocantur. Cum enim omnis Virtus moralis in Voluptatibus & Doloribus versetur, Continentia vero, & Tolerantia illud ipsum obiectum exhauriant; Continentia enim circa Voluptates, Tolerantia circa Dolores occupatur: hinc non potest ipsa virtus perfecta latius patere.

Quid est Continentia?

Continentia, est virtus imperfecta, qua omnem inordinatum, imprimis alimenti & veneris appetitum, invitum ac reluctantem, rectæ rationi subijcimus.

Quanam sunt Extrema Continentiæ?

Continentiæ Excessus, est Incontinentia; Defectus nomine caret.

Quid est Incontinentia?

Incontinentia, est vitium imperfectum, quo quis quodammodo invitus, cum in aliis affectibus, tum præcipue in gula ac venere, modum excedit.

Quotuplex est Incontinentia?

Incontinentia est duplex: Præcipitantia, & Infirmitas.

Quid est Præcipitantia?

Præcipitantia est, qua, vehementiore affectu, subito ad peccandum abripimur.

Quid

Quid est Infirmitas?

Infirmitas est, qua pravis affectibus aliquandiu re-
luctati, tandem succumbimus.

Quis est Defectus Continentiæ?

Defectus Continentiæ, est nimia affectuum vo-
luptatumq; fuga, & detestatio.

Quid est Tolerantia?

Tolerantia, est virtus imperfecta, qua res laborio-
sas, & adversas, cum dolore quodam, honestatis
causa, perferimus.

Quanam sunt Extrema Tolerantiæ?

Tolerantiæ Extremum in Excessu, est Pertinacia;
in Defectu, Mollities.

Quid est Pertinacia?

Pertinacia, est vitium, in perferendis quibusvis ad-
versis, modum excedens.

Quid est Mollities?

Mollities, est vitium, in perferendis adversis defi-
ciens.

CAPVT XXI.

De Amicitia.

Quid est Amicitia?

Amicitia, est mutua, & manifesta benevolentia,
ex amabili aliquo bono, erga eos, qui amantur,
concepta.

Estne Amicitia Virtus?

Amicitia aut est virtus quædam, aut cum virtute
conjuncta: id est, plenius, & amabilius exercitium,
virtutum cum aliarum, tum præcipue Homiletica-
rum, inter notos, & familiares.

Quotuplex est Amicitia?

Amicitia principio, alia est Illaudabilis, alia Laudabilis. *Illaudabilis* est, quam mali fines, & mala media conciliant: ut sunt conspirationes latronum, & furum. *Laudabilis* est, quam jungunt media suo modo licita, & fines honesti.

Quotuplex est Amicitia Laudabilis?

Amicitia Laudabilis, pro respectu triplicis boni, Honesti nimirum, Vtilis, & Jucundi, triplex est: *Honesta*, quæ propter Honestatem; *Vtilis*, quæ commodi percipiendi causa; *Jucunda*, quæ ob suavitatem conversationis initur. Ex his tamen Amicitiae speciebus, ea sola vere nuncupanda est Amicitia, quæ ad vere bonum, quod honestum est, adspirat: in fine enim honesto, vere utile & jucundum includitur; utile vero, & jucundum, seorsim, sine honesto, consistere nequeunt. Dum enim ab hoc sejunguntur, non sunt vere bona, imo nec utilia, aut jucunda; sed nobis tantum, ob depravationem, videntur talia.

Quid est Honesta Amicitia?

Honesta Amicitia, est proborum hominum mutuus, confirmatusque amor, ex virtute consurgens, ad vitæ honestæ conjunctionem perducens.

Quenam sunt Extrema Amicitia?

Extrema Amicitia per analogiam dari possunt: estque in Excessu *ὑπερφιλία*, insanus amor, quo in gratiam Amici quis nihil non tentare audet, etsi honestatem violat. In Defectu, *μισανθρωπία*, fuga hominum, & conversationis averratio.



**SYNOPSIS
OECONOMICÆ.**

SYNOPSIS OECONOMICÆ.

CAPVT I.

De Oeconomica Natura.

Quid est Oeconomica?

Oeconomica est prudentia, recte gubernandæ familiæ.

Quodnam est Objectum Oeconomica?

Objectum Oeconomica, est Domus, sive Familia.

Quid est Familia?

Familia, est Societas hominum, ejusdem Patris-familias imperio subditorum.

Quis est Finis Oeconomica?

Finis Oeconomica, est recta gubernatio Familiæ. Atque hic finis subordinatur alii fini ulteriori, & perfectiori, qui est Felicitas Reipublicæ. Nam, familia per se non potest esse beata, sed tantum in Republica bene constituta.

Quenam sunt Partes Oeconomica?

Partes Oeconomicae sunt duæ: quarum prima agit de Personis, ex quibus Familia constat. Altera agit de Rebus, quæ ad constitutionem ac conservationem Domesticæ Societatis sunt necessariae.

CAPVT II.

De Patrefamilias.

Quid est Paterfamilias.

Paterfamilias est caput familiæ, ejusque nutu atque arbitrio omnia familiæ membra conjunguntur, atque reguntur.

Quæ sunt Requisita Patrisfamilias?

Requisita Patrisfamilias sunt: 1. ut ipse sit vir bonus, & Domesticis suis virtutem diligenter commendet. 2. Ut omnes Domesticos obsequentes sibi habeat, atque morigeros. 3. Singulis Domesticis præscribere debet, quid agendum sit; debetq; operi adesse, illud impellere, suoque consilio, & auxilio, promovere. 4. Convenit, ut malos, & officio non fungentes puniat; bonos, ac diligentes, laude, & præmiis afficiat. 5. Omnia Domesticis parare debet, quæ usibus illorum inserviunt; eaque prudenter inter ipsos distribuenda sunt. 6. Industrium se præstare debet in acquirendis opibus, quæ ad felicitatem familiæ necessaria sunt, iisque non prodige, sed liberaliter utendum est. 7. Omnia referre debet in tabulas, ut de acceptorum atque expensarum ratione perpetuo constet. 8. Denique necesse est, ut

Domus suæ regimen dirigat ad utilitatem publicam.

CAPVT III.

De Societate Coniugali.

Quot sunt Societates in Familia perfecta?

IN Familia perfecta tres sunt Societates: *Vna* inter Maritum, & Vxorem, quæ dicitur *Societas Coniugalis*: *Altera*, inter Parentes, & Liberos, quæ dicitur *Societas Paterna*: *Tertia*, inter Dominum & Seruos, quæ dicitur *Societas Herilis*.

Vnde oritur Societas Coniugalis?

Societas Coniugalis oritur ex Coniugio.

Quid est Coniugium?

Coniugium est Societas naturalis, maris ac feminae, in humano genere, ad liberorum procreationem, mutuum auxilium, & vagæ libidinis coercitionem, legitime instituta.

Quare Coniugium dicitur Societas naturalis?

Omnis quidem humana Societas a natura est: est enim homo natura animal sociabile, ob eamque causam illi datus est sermo. Omnium tamen Societatum maxime naturalis, est Societas coniugalis. Et enim procedit a naturali desiderio genus suum per posteros propagandi, & ab interitu vindicandi. Nam, cum viventia, propter fragilitatem materiae, non possint æternum vivere, effecit Natura, ut perpetua successione sese renovarent. Atque ob eam rem, sexus discrimen Natura quoque ordinavit.

Qua-

*Quanam sunt observanda in Conjugio
contrahendo?*

Quamvis Conjugium sit a natura; modus tamen Conjugii certis legibus a cultioribus gentibus est circumscriptus, ne sit vagus, ac belluarum more promiscuus concubitus. Sunt autem Leges, vel communes utrique sexui, vel unicuique peculiare.

*Quæ sunt Leges Conjugii utriq. sexui
communes?*

Leges Conjugii utrique sexui communes, sunt:
1. ut Conjugium non ineatur nisi inter duos, marem, & fœminam, eosque non nimis arcto sanguinis, aut affinitatis vinculo junctos. 2. ut Conjugium sit castum, atque perenne; ita ut nonnisi ob atrocissima scelera dissolvatur. 3. ut conjugium sit concors, & tranquillum,

Quæ sunt Leges Speciales Mariti?

Maritus, in eligenda Vxore, majorem pietatis, ac probitatis, quam formæ, & dotis rationem habere debet. In Vxore regenda, se quidem superiorem, sed tamen fœminam sibi sociam esse cogitare debet. Proinde prudenti potius persuasione, lenique admonitione, quam vel verborum acrimonia, vel verberum sævitia, in officio Vxor continenda est.

Quæ sunt Leges Speciales Vxoris?

Vxor maritum, tanquam superiorem, & prudentiorem, suspicere, atque ad ejus voluntatem, quantum per pietatem licet, se, moresque suos componere debet.

Estne Polygamia licita?

Polygamia Successiva, & per analogiam sic dicta, qua scilicet quis, priore uxore demortua, vel legitime separata, aliam sibi copulat, concessa est; idque demonstrant tum natura Conjugii, tum verba Apostoli, 1. Cor. VII. 39. *Mulier alligata est legi, quanto tempore vir ejus vivit. Quod si dormierit vir ejus, liberata est: cui vult nubat: tantum in Domino.* Item 1. Tim. V. 14. *Volo ergo juniores (viduas) nubere, filios procreare, matres familias esse, nullam occasionem dare adversario maledicti gratia.* Cæterum, *Simultanea Polygamia*, sive duarum, vel plurium uxorū & virorum, uno eodemque tempore, in thoro conjugali cohabitatio, omnino est prohibita. Hæc enim pugnat cum primæva conjugii institutione, Gen. II. 22. quæ, secundum Christi interpretationem, Matth. XIX. 5. Marc. X. 8. requirit, ut duo sint in carne una. Deinde, cum lege nature quoque pugnat hæc Polygamia, quæ non patitur, ut, quod unius est, rapiatur, & alteri tribuatur: corpus autem Mariti uxoris est; alteri ergo tradi nequit.

CAPVT IV.

De Societate Paterna.

Quid est Societas Paterna?

EX Societate Conjugali pronascitur Societas Paterna, tanquam fructus, quæ est inter parentes, & liberos; ut sibi invicem prodesse, liberi autem bene educati, ad civilem vitam apti evadere queant.

Quæ

*Quæ sunt Parentum Generalia Officia
erga Liberos?*

Parentum erga Liberos Officia generalia sunt tria: Liberos procreare; deinde eosdem educare; tandemque eos ad honestum vitæ genus applicare.

Quid est Patria Potestas?

Patria Potestas consistit in eo, ut 1. liberi sui juris non sint. 2. Vt pater castigandi liberos potestatem habeat, ita tamen, ut intra terminos paternæ castigationis illa subsistat, nec ad jus vitæ, & necis se extendat: cum liberi dicantur partes parentum, non tam fictione juris civilis, quam natura, & rei veritate. 3. Vt, quodcunque acquirit filius, acquirat patri, nisi hujus voluntas aliud statuatur. 4. De jure civili veteri, fuit potestas patria sita in abdicatione liberorum, h. e. in ejectione e domo, & familia. 5. Competit quoque parenti exhereditatio; ad quam Justinianus Nov. 115. ingratitude, si probata fuerit, sufficere declarat.

*Quanam sunt Liberosum erga Parentes
Officia?*

Liberorum erga Parentes Officium in eo consistit, ut 1. Parentes ament, & obsequium illis præstent. 2. Vt eosdem juvent, &, si necesse fuerit, illos sustentent.

Quamdiu durat Patria Potestas?

Imperium paternum non est perpetuum, sed finem consequitur, quando liberi similes Parentum evadunt: quod tum fit, cum ipsi, & se, & familiam suam in legitimo conjugio, cum consensu parentum inito, regere possint, & e patria potestate dimissi sunt.

CAPVT V.

De Societate Herili.

Quid est Societas Herilis?

Societas Herilis est, quæ intercedit inter Dominum & Servum, bene vivendi causa instituta.

Quid est Servus?

Servus est homo, alterius potestati subjectus, vim habens instrumenti activi, ad ea ministerio corporis exequenda, quæ Dominus imperat, quique, quia ipse in possessione est, nihil habere, aut possidere potest; sed, quicquid acquirit, Domino acquirit suo.

Quot modis fiunt Servi?

Natura sæpe homines procreat tam bardos stupidosque, ut sibi ipsis de victu, & salute prospicere non possint; atque hos Philosophi vocant Natura Servos. Alias Servi fiunt 1. *Captivitate*. Jure enim victos hostes, utpote mortem quærentes, victores necare poterant. Sed hoc strictum jus, æquitate quadam, olim in servitutem permutarunt, quæ iterum redemptione pecuniaria apud Christianos sublata. 2. Fiunt servi *Necessitate*, qua coacti, in servitutem sese vendere coguntur homines, Gen. XLVII. 3. *Nativitate*, & quidem illi jure civili, qui matre serva editi. 4. *Pœna*.

Qua est Potestas Dominorum in Servos?

Servorum apud Veteres miserrima erat conditio, & potestas Domino in infinitum concedebatur, ita ut ad jus vitæ & necis sese porrigeret. Inspectione tamen curaque Magistratum, paulatim mitigatum est.

est hoc jus , & ad æquitatem naturalem redactum. Sub Christianis denique Imperatoribus , Seculo , ut Bodinus putat , XIII. plane evanuit. Nunc enim fere tantum servi ex contractu reperiuntur , qui liberi existentes , pacta mercede , alterius imperio ad certum tempus se subjiciunt.

*Quanam Domini sunt Officia erga
Servos?*

Domini Officia sunt , Servos bene eligere ; iis operas prudenter , & pro cujusque viribus , partiri ; disciplina nec laxa , nec nimis adstricta eos regere ; promissam illis mercedem exsolvere ; necessitates & commoda eorum non negligere ; adeoque non metu tantum , sed & amore herilis imperii eos imbuere.

*Quanam Servorum sunt Officia erga
Dominos?*

Servorum Officia sunt , ut Dominis pareant , omniaque , quæ illis à Dominis honeste injunguntur , diligenter & fideliter exequantur , inque omnibus suis actionibus respiciant commodum , & honorem Dominorum.

CAPVT VI.

De Familia Imperfecta.

Quid est Familia Imperfecta?

Familia Imperfecta est , in qua una aut plures Societates desiderantur.

Quæ sunt Species Familia Imperfecta?

Familia Imperfectæ Species Una est , in qua deest Paterfamilias ; atque hæc omnium maxime mutila cen-

consenda, & est quasi quædam Anarchia. Difficulter enim Vidua eam potest habere auctoritatem, ut omnia familiæ membra contineat in officio. *Altera Species est*, ubi Viduus imperat: hic enim non magna ratio haberi potest liberorum non adulatorum, nec earum rerum, quæ ad internum Domus regimen pertinent. *Tertia imperfectio est in familia sterili.* Nam liberi conjugalis amoris pignora sunt, heredes domesticæ possessionis, & maximum senectutis solatium. *Quarta imperfectio est in ea familia, in qua præ paupertate desiderantur servi, & ubi quisque sibi pro servo est.* *Quinta imperfectio familiæ est, cum cælibes Domum instruunt, omniaque munera domestica aut per se exequuntur, aut ad eam rem utuntur Servorum ac Ancillarum ministerio.*

CAPVT VII.

De Variis generibus Possessionum, & acquirenda Possessione.

Quot sunt Genera Possessionum?

Possessiones, quæ ad degendum commode in domestica societate sunt necessariae, dividuntur in Animatas, & Inanimatas. *Animatae*, sunt pecudes, & veteri jure etiam servi, quorum simulacra in adscriptitiis glebæ, hominibus propriis, & iis, quos Galli Manus mortuas vocant, alicubi reperiuntur. *Inanimis* possessio, est vel Naturalis, vel Artificialis. Inter *Naturales* possessiones primas tenent, Fundi, Agri, Vineæ, Piscinæ, Lacus, Fodiinæ metallica: Et secundas tenent fructus, qui hinc percipiuntur, nempe Frumentum, Legumina, Poma, Pisces, &c. Inter pos-

possessiones *Artificiales*, primum locum tenet *Domus*; secundum, varia supellectilis genera, quæ vel ad necessitatem faciunt, vel ad commoditatem, vel ad splendorem. His accedunt *Arma*, *Libri*, *Pecunia*.

Quotuplex est modus Possessiones legitime acquirendi?

Modus Possessiones legitime acquirendi, est triplex: Naturalis, Artificialis, & Neuter.

Quanam est Acquisitio Naturalis?

Acquisitio Naturalis est, quam natura urgente necessitate, ad victum acquirendum docuit; quales sunt, Pastoritia, Venatio, Agricultura, Metallica, Lignaria, & Permutatio.

Quanam est Acquisitio Artificialis?

Acquisitio Artificialis est, quæ ad arbitrium, & industriam hominum propius accedit, quam ad naturæ providentiam. Atque hæc est, vel Privata, vel Publica. Acquisitio privata dicitur, qua aliquid acquiritur ex privatis rebus, estque vel Mercatura, vel Numularia, vel Operaria, vel Cauponaria. Ex publico acquirunt, qui operam suam publico locant, uti Milites in bello; in pace Consilarii, Professores, Personæ Ecclesiasticæ.

Quanam est Acquisitio Neutra?

Acquisitio Neutra est, quæ neque Naturalis est, neque Artificialis, sed aliunde a fortuna provenit. Huc pertinet hereditas, donatio, inventio thesauri: item certamen de rebus dubiis, deposito pignore; ac deniq; lusus.

CAPVT VIII.

De Vsu Possessionis.

Quomodo Rebus quasitis utendum est?


Rebus quasitis utendum est, primo ad necessitatem; deinde ad delectationem; deniq; ad splendorem. Caveat interim paterfamilias, ne impensæ majores sint, quam redditus, & videat, ut sumptibus quid detrahi possit, sine incommodo rei domesticæ.

Annon consultum foret, communionem & Vxorum, & Bonorum in Republ. introducere?

Minime consultum foret, communionem & Vxorum, & bonorum in Republ. introducere. Communio enim Vxorum storgas, quas hominibus impressit natura, delet, & tollit; quia omne parentum & liberorum discrimen aufert. Communio vero bonorum pugnat cum utili seu commodo; siquidem fieri non potest, posita generis humani corruptione, ut pacifice, ordinate & diligenter res administrantur, nisi unusquisque rerum suarum curam suscipiat. Jure quidem creationis, & naturæ, bona actu non fuerunt divisa: sed tamen, quia jus illud est indifferens ad communionem, & divisionem, permissum erat, ut dividerentur, si id ipsum generi humano videretur expediens.



SYNOPSIS
POLITICÆ.



SYNOPSIS POLITICÆ.

CAPVT I.

De Politica in Genere.

Vnde Politica Nomen habet?

Politica Nomen habet ἀπὸ τῆς πόλεως, a Civitate, quia in ea instituenda, regenda, & conservanda est occupata.

Quid est Politica?

Politica est prudentia, bene instituendi, & regendi Reip. ad obtinendam communem civium salutem,

Quibus Mediis paratur Prudentia Politica?

Media, quibus Prudentia Politica paratur, sunt præcipue quinque: 1. Usus, sive notitia humanarum rerum, ex visu, vel tractatu. 2. Historiarum cognitio. 3. Peregrinatio. 4. Conversatio cum Prudentibus, & Sapientibus. 5. Præcepta fideliter tradita & explicata. Ornant Politicum Eloquentia, studium exoticarum Linguarum, & peritia Geographiæ, ac Genealogiarum.

Quodnam est Objectum Politica?

Objectum Politicæ est Civitas, quæ, prout sine ordine consideratur, est objectum Politicæ materiale; prout vero consideratur, ut ordinem habet, seu ut ordinata est, objectum est formale, diciturque Respublica.

Quis

RI RI RI
RI RI RI
RI RI RI
RI RI RI

Quis est Finis Politica?

Finis Politicæ est beata civium vita: ut opibus firma, copiis locuples, gloria ampla, & virtute honesta sit.

Quanam sunt Media ad hunc finem ducentia?

Media ad hunc finem ducentia duo sunt: Recta Reipublicæ constitutio, & bona ejusdem administratio.

CAPVT II.

De Civitate & Cive.

Quid est Civitas?

Civitas, est hominum multitudo, qui congregiuntur, boni civilis consequendi causa.

Quomodo differunt Civitas & Respublica?

Civitas notat ipsum cœtum, juris fruendi causa sociatur. At, Respublica, cœtus illius ordinem, legibus descriptum, innuit.

Qua est Causa efficiens Civitatis?

Pendet Respublica a Deo imprimis: quia 1. inclinationem ad Civilem Societatem hominum naturæ inlevit: & 2. honestos cœtus protegit ac defendit. Proxime pendet a voluntate, & consensu mutuo hominum, in unam Civitatem coeuntium.

Quis est Finis Civitatis?

Finis Civitatis est, commode, & honeste vivere. Est autem commode vivere, eorum, quæ ad neces-

sarium vitæ usum requiruntur , rerum copiam habere. Honestè vero, seu bene vivere, est secundum virtutem vivere.

Quid est Civis?

Civis, secundum Aristotelem, est Socius multitudinis, qui particeps est suffragiorum, & juris de Republ. statuendi. Vel potius: Civis est, qui participat jus in ea Civitate, in qua est Civis, juxta cujusque Civitatis descriptionem & formulam, seu Legem, qua constituitur, quaque Civibus jura sua definiuntur. Proinde dicitur Civis secundum magis, & minus: neque enim ad omnes in una Civitate æqualiter omnia, multo minus ad omnes diversæ Civitatis, accommodari possunt, quæ de singulis Civium juribus dicuntur, de quibus scilicet alii plura, alii pauciora, & minora, omnes tamen aliqua participant.

Differuntne Civis bonus, & Vir bonus?

Absolute loquendo, Civis bonus, & Vir bonus omnino differunt. Civis enim bonus is dicitur, qui Civitatem suam conservare intendit, illis mediis, quæ ad propositum finem faciunt. Sed, Vir bonus est, qui firmum habet propositum agendi juxta rectæ rationis normam, & exercendi actiones, quas honestas, & virtus moralis exigunt. Hinc patet, quod Civis bonus consideretur in ordine ad Rempublicam; Vir bonus vero definiatur ex perfectione virtutis moralis. Cum autem Respublicæ sint bonæ & malæ, inde fit, ut alicubi quis possit esse bonus Civis, qui tamen non est Vir bonus. In optima autem Republica, Virum bonum, & Civem bonum non differre, caret dubio.

Qui-

Quibus modis Civitas obtinetur?

Civis non fit Loco, aut Domicilio; potest enim fieri, ut Civis non sit, qui in hac Civitate habitat, qui *Inquilinus* dicitur. Sic Servi in Civitate quondam erant; nec tamen Cives fuerunt. Similiter, potest quis in Civitate versari, ut ne domicilium quidem habeat; quales sunt Peregrini. Quin nec communio fori, aut cujuscunque juris, Civem efficit: potest enim aliquid tale ex pacto inter fœderatos fieri. Proinde tribus maxime modis jus Civitatis obtineri potest. 1. *Nativitate*: Nam Liberi jus Civitatis a Parentibus consequuntur. Isque modus quibusdam populis tantopere placuit, ut nullos, nisi e Civibus natos, pro Civibus agnoscerent. 2. Fit Civis *Cooptatione*, quando peregrinus, jus Civitatis, vel certo quodam pretio redimit, vel titulo donationis consequitur. Addunt 3. aliqui *Manumissionem*, qua Servi, e potestate Dominorum dimissi, olim Civitatem consequiebantur. Interim manumissio non constituit proprie jus Civitatis. Dominus enim non potest plus conferre servo per manumissionem, quam ut liberum eum faciat: Civem autem illum constituere, ejus relictum est arbitrio, qui in Civitate Imperium tenet.

Quinam sunt Cives Honorarii?

Præter Originarios, vel Assumptos Cives, dantur etiam Honorarii. His jus Civitatis honoris causa tributum est, ita, ut nullius teneantur imperio, nec obligati sint ad perferenda onera. Sic Rex Galliarum Civis est Honorarius Venetorum, & Helvetiorum.

*Potestne quis simul esse Civis duarum
Civitatum?*

Quemadmodum difficile est, duas inhabitare simul domos, ita nec commode fieri potest, ut quis duarum Civitatum sit Civis. Vnicuique enim Civitati Civis debet omnia sua, quod quia duabus simul Civitatibus præstari nequit, ideo nec duarum Civitatum civis bonus esse potest. Accidit tamen nonnunquam inter Fœderatos, Socios, Amicosque, ut aliud quid Lege statuatur. Sic Genevenses sunt Cives Bernates, & vicissim Bernates sunt Cives Genevenses. Similiter Toruninenses & Dantiscani habent mutua Civitatis jura.

Quale Jus obtinet Civitas in Cives?

Civitas obtinet Jus in corpus & bona Civium. Etenim quilibet Civis obligatus est salutis publicæ succurrere, tam vitæ, quam fortunæ & facultatibus suis. Hinc, si salus Civitatis postulet, & ea aliter conservari nequeat, Civis alienari, & hosti tradi potest. Sic quoque Civitas, exigente id publica utilitate, Civium bona pignori obligare, vel distrahere, nec non illorum actiones ad communem salutem dirigere potest, insuper habito, quod unus, vel alter damnum inde patiatur.

Quomodo differunt Civitas & Vrbs?

Civitas ad Societatem & cœtum, Vrbs præcipue ad locum & ædificia pertinet. Vocabulum autem Vrbs ab eadem est origine, unde & orbis. Urbare enim, sive orbare, est circulo circumscribere: quippe olim ambitus Urbis aratro designabatur in orbem. Hinc Romani, cum promississent Carthaginensibus, salvam eorum Civitatem fore & jura, postea emigrare

grare jussis Civibus, excisaque Vrbe, Civitatem non in tectis, & mœnibus, sed in Civibus esse, causati sunt.

Quæ sunt observanda condituro Urbem?

Vrbi condendæ deligendus est locus salubris, planus, Civibus egressu facilis, hostibusq; accessu difficilis: aquis salubribus abundans, non nimis amplus, non nimis mari magnæque flumini vicinus, nec tamen nimis ab eo remotus; denique fertilis.

CAPVT III.

De Republica.

Quid est Respublica?

Respublica, est societas plurium familiarum, sub eodem Magistratu, iisdemque Legibus degentium.

Quæ est Origo Rerumpublicarum?

Falsum est, quod quidam Politici docent, Imperia & Respublicas, vi primum coaluisse, & ex bello ortam esse summam imperandi potestatem. Nimirum, postquam homines, naturali instinctu, ad vitam commodè degendam, in societates coiverunt, & de colendo naturæ jure, ad Societatem conservandam, pactum quasi inter se iniverunt, nondum tamen securitati singulorum, aut firmitati concordie civilis consultum fuit, quamdiu nihil erat, quod violatores naturæ, & pacti vindicaret, & vi coërceret. Ut enim justitia fiat a singulis, Legesque naturæ sponte observentur, depravata hominum natura non patitur. Opus ergo fuit vi cogente, & potestate coërcente, in qua resideret publica & com-

munis iustitia, tanquam custode & vindice juris cuiusque singulorum; cui se propterea singulos subiecisse apparet, ut Societatis majori & communi bono, ac suo quisque jure perfruerentur, viverentque adeo, & securius, & affluentius. Ab hoc jure majoris partis, omnis imperandi parendique ratio profluxit. Sed, quia non omnibus satis commodum visum fuit, ad aliquod negotium expediendum, totam multitudinem congregari, igitur ipsa multitudo, hanc suam potestatem, vel uni, vel paucis tradidit, iisque præstitit obsequium.

Quis est Finis Reipublicæ?

Finis Reipublicæ esse debebat communis utilitas, & omnium Civium Salus. Quod non ita est intelligendum, quasi eademum sit Respublica, in qua Civium Salus semper ex æquo spectatur. Nam & illi Societati, denominatio Reipublicæ non est deneganda, in qua quocunque modo negotium publicum administratur, five id cum populi commodo, vel ejus incommodo fiat. Utilitas namque & Salus populi, non est æqualis omnium Rerumpublicarum norma & mensura, sed illarum tantum, quæ dicuntur Rectæ & Laudabiles: hæ enim populi salutem demum respiciunt.

CAPVT IV.

De Divisione Rerumpublicarum.

Quot sunt Rerumpubl. Genera?

Rerumpublicarum Genera sunt duo: Nam, in quibusdam primario, & per se utilitas Civium quaeritur, Imperantium vero salus per accidens: & hæc dicun-

dicuntur *Respublicæ Rectæ, & Laudabiles*. In aliis contra per se intenditur Imperantium utilitas, Civium vero salus ex accidente spectatur: & hæ dicuntur *Corruptæ, Vitiosæ, & aberrantes Respublicæ*. Hoc tamen non ita accipiendum est, quasi illæ Respubl. in quibus primario Imperantium salus quaritur, sint simpliciter injustæ. Nam, si dominium hominis privati in mancipium naturali & gentium jure permissum est, quare injustum sit, si integer populus, aut magna aliqua multitudo, serviat Principi alicui?

Quæ sunt Rerumpubl. Species?

Quia Reipubl. administratio vel est penes unum, vel penes paucos, vel penes omnes, inde utriusque tam rectæ, quam depravatæ Reipublicæ, tres dantur Species.

Quæ sunt Species Rectæ Reipublicæ?

Species Rectæ Reipubl. sunt: 1. *Regnum*, quod est Imperium unius, in salutem Subditorum directum. 2. *Aristocratia*, in qua pauci quidem, sed optimi imperant, ob salutem publicam. 3. *Politia*, seu Respubl. popularis, quæ est totius multitudinis imperium æquale, ad salutem & commodum omnium Civium ordinatum.

Quæ sunt Species Depravatæ Reipublicæ?

Species depravatæ Reipublicæ sunt similiter tres: 1. *Tyrannis*, Regno contraria, & est imperium unius, in proprium ipsius imperantis commodum directum primario. Ei accensetur *Dominatus*. 2. *Oligarchia*, quæ repugnat Aristocratia, & est species Reipublicæ, in qua pauci quidem, sed divites imperant, ob privatum commodum. 3. *Democratia*,

quæ adversatur Politicæ, & est Imperium promiscuæ multitudinis, in quo omnia ad pauperum utilitatem referuntur.

CAPVT V.

De Regno.

Quæ sunt Species Regni apud Aristotelem?

Regni, quod præstantissima, & antiquissima censetur Reipublicæ forma, quinque ab Aristotele enumerantur Species. 1. *Laconicum*, ita dictum, quod apud Lacedæmonas fuerit in usu, estque talis Respublica, ubi unus quidem imperat, sed secundum Leges, quibus jurejurando adstrictus est, ita ut ultra Leges nihil facere audeat. 2. *Barbaricum*, Barbaris, v. gr. Persis, & Babylonis usitatum, in quo unus, omnium dominus factus, subditis volentibus, juxta consuetudinem patriam, imperat. 3. *Æsymneticum*, quod est Regnum extraordinarium, ubi, rerum necessitate ita exigente, libero populi suffragio, extra ordinem, alicui omnimoda potestas concedebatur, & quidem vel perpetuo, vel ad certum tempus. Quales Reges, *Æsymnetæ*, quasi Reipublicæ Curatores, & *τὰ αἰσχυρὰ νοστῆς*, i. e. salutaria cogitantes, vocabantur. 4. *Heroicum*, quando propter illustre aliquod beneficium, aut virtutis eminentiam, uni delatum est imperium. 5. *Regnum proprie dictum*.

Quid est Regnum proprie dictum?

Regnum proprie dictum, est summum, & absolutum imperium unius, ad communem subditorum utilitatem directum. Rex enim omnes subditos pater-
terno

terno amore complectitur, illorumque curam habet ad exemplum boni patrisfamilias.

Estne Princeps Legibus solutus?

Princeps 1. non est solutus *Legibus Divinis*; cum his enim non confertur ut Rex, sed ut Christianus. Neque 2. solutus est *Legibus Naturalibus*; hæ enim inscriptæ sunt cordibus omnium hominum, Rom. II. 14. atque huc revocandæ quoque sunt *Leges juris gentium*, quarum sacra & sancta est apud omnes gentes autoritas. Neque 3. solutus est *Legibus fundamentalibus*; has enim in ingressu Regni, antequam confirmatur, mutua cum proceribus conventionem, & jurejurando interposito, servare promittit; eaq; conventio mutuam habet obligationem. Nec 4. solutus est *Legibus Civilibus*, quoad vim directivam. Est autem vis directiva, quando Lex agenda præscribit, & ad agendum obligat, non per rigorem & interminationem pœnarum, sed potius per suam in jure naturali, & recta ratione foundationem; atque ad observationem civiliter invitat, non serviliter cogit. Interim, 5. solutus est Legibus, quoad vim coactivam, quæ est, quando rigore, & metu pœnarum, faciendâ imperantur, ita ut, nisi quis obtemperet, gravem incurrat animadversionem. Nimirum Lex coërcet tantum instrumentaliter, prout est signum voluntatis in Rege; Rex autem ipse coërcet principaliter, ut agens primarium. Quare, si Lex Civilis cogeret principem, agens pateretur a suo instrumento, & idem coërceret seipsum; quod est absurdum.

Quanam sunt Causæ evertentes Regnum?

Causæ evertentes Regnum sunt: 1. Si illi, quorum in manu Regnum est, inter se dissideant, & agnati,

ac heredes, de successione non possint convenire, aut ipsi ex alia causa in diversas partes abeant. 2. Si Reges, a gubernatione regia, paulatim ad tyrannidem se convertant, & omnia pro libidine administrant, subditorumq; privilegia imminuant.

Quæ sunt Causæ conservantes Regnum?

Conservari Regnum potest, si Rex subditis vicinisq; suis sit terrori: quod fit, 1. *Virtute*, quales sunt Fortitudo, Prudentia, & Ars militaris. 2. *Potentia*, quæ consistit partim in Concordia, partim in Militia, partim quoq; in munitione civitatum & arcium. 3. *Fortuna*. Putant namq; alii, singulari Divini Numinis providentia illius Regis actiones dirigi, cui omnia feliciter & ad votum succedunt.

Quenam sunt Arcana Regni?

Regni Arcana concernunt Regnum vel Successivum, vel Electivum. *In Regno Successivo* plurimum prodest, si 1. Rex Majorum servet instituta. 2. Si Consiliarios Antecessoris non temere dimittat, nec paternos Amicos repudiet. *In Regno Electivo, contra Patricios*, sequentia Arcana sunt observanda: 1. Ut is, qui Regnum affectat, si sit terræ filius, ex splendida familia se ortum comminiscatur, aut ex ejusmodi familia ortam matrimonio sibi jungat. 2. Ut imperium oblatum non protinus suscipiat, sed deliberando tergiversetur, quo subditorum animos expiscari, sibi que magis confirmare valeat. 3. Cognomina, & titulos Principi convenientes debitosque, non statim a populo sibi tribui concedat. 4. Aliis Senatoribus similem se quovis tempore profiteatur. 5. Magistratus ipse creet, sibi & imperio faventes; eos, qui pristinae libertatis memores sunt, & magna pol-

pollent autoritate, vel non eligat, vel, si præterire eos non possit, annuos illorum Magistratus constituat. 6. Prohibeat, ne Viri Illustres abeant peregre, aut ad exercitum mittantur. 7. Certum imperii heredem ac successorem constituat, quo illud ad posteros transferat, & Patriciis eripiat. *Adversus plebem observandum:* 1. Ut paulatim populi libertas infringatur. 2. Ut obsequiosi e plebe, honoribus & præmiis afficiantur. 3. Reliqui, qui præsentem statum oderunt, eumque oppugnare satagunt, vel in bellum mittantur, vel aliis negotiis onerentur, ut nunquam ipsis otium de libertate cogitandi relinquatur.

CAPVT VI.

De Tyrannide, & Dominatu.

Quid est Tyrannis?

Tyrannis, est summum & absolutum imperium unius, quod in subditos invitos, qui imperanti vel similes, vel eo meliores sunt, cum oppressione libertatis, ad propriam utilitatem, exercetur.

Quotuplices sunt Tyranni?

Tyranni sunt in triplici differentia. 1. Quidam sunt tales tantum *Titulo*, qui imperium illegitimis modis, nulloque iusto titulo, h. e. causa, sibi acquirunt. 2. Quidam sunt Tyranni *Exercitio*, qui legitimis mediis acquisitum imperium violenter administrant, suosque subditos crudeliter tractant. 3. Quidam sunt Tyranni *titulo & exercitio simul*, qui imperium improbis artibus acquisiverunt, illudque postea nequiter administrant.

Quæ

Quae observanda sunt, ut quis, num aliquis Tyrannus sit, pronunciare queat?

In Tyranno distinguenda sunt vitia privata a publicis. Nec enim Tyrannus est, 1. qui in administranda Republica negligens est, illiusque curam committit aliis, dum ipse interim otio, & voluptatibus indulget. Nec 2. Tyrannus dici potest, qui pacta non servat, aut unum, vel alterum rigidius tractat. Quia saepe necessitas jubet a pacto recedere; saepe subditi alicujus delictum duriores poenae efflagitat. Porro, nec 3. unus vel alter actus tyrannicus tyrannum efficit, modo tyrannice non agat, nec semper in subditos ultra modum crudeliter saeviat.

Quanam Signa sunt Tyranni?

Signa Tyranni inter alia sunt, Virtutum, maxime Justitiae, fraudulenta simulatio; Insignium Virorum e medio sublatio; odium erga virtutes; amor erga vitia, & qui his se mancipant; Saevities.

Quibus modis Tyrannis conservatur?

Modi Tyrannidem conservandi sunt: 1. Viros virtute excellentes, tanquam statui tyrannico adversos, deprimere. 2. Convivia publica, conventus, & collegia tollere: amicitiam inter Cives impedire: Scholas, & educationem juvenilem prohibere. 3. Subditis interdicare studium peregrinandi, quo semper maneant domi, & servilibus muneribus assuescant. 4. Accurate subditorum actiones cognoscere, & eum in finem habere emissarios, & delatores, qui omnia observent & referant. 5. Inter subditos odium & inimicitiam disseminare, ne contra se conspirare queant. 6. Cives tributis, stipendiis militum, impensis in opera publica construenda, ad inopiam redigere, ne quid arduum

ardui moliri queant. 7. Perpetuo bellum gerere, subditis vero pacem & otium non concedere. 8. Nemi-
mini fidere, & imprimis virorum honestorum aver-
sari conversationem. 9. Peregrinorum potius, quam
Civium, ministerio uti, illisque vitam & salutem suam
credere. 10. Simulare magnam Reipubl. curam.
Quo pertinet, si egregia, & splendida ædificia excitet
Tyrannus; Vrbes templis, muris, propugnaculis, aliis-
que, quæ splendorem conciliare possunt, ædificiis, ex-
ornet.

Quid est Dominatus?

Dominatus est Respubl. in qua unus summum &
absolutum, vel jure belli, aut fœdere, vel etiam succes-
sione hereditaria acquisitum obtinet imperium, pri-
mario ad proprium ipsius Dominantis, secundario au-
tem ad subditorum serviliter parentium salutem di-
rectum. Nimirum, cum Rex omnia conferat ad sa-
lutem publicam, Tyrannus omnia agat contra ean-
dem, media via incedit Dominus, qui nec refert omnia
ad commoda civium, nec tamen illa negligit, sed se-
cundario curat, postquam suis rebus ante omnia pro-
spexit. Sic paterfamilias servos non intendit pessun-
dare, nec tamen eos primaria intentione curat. Et hoc
genus Monarchiæ Barbaris Aristoteles tribuit.

Anne ii, qui in Monarchia parentium loco sunt, Cives dici possunt?

Veteres, omnes, quibus in quacunque Republica
obsequii gloria, & parendi conditio relicta erat, Cives
appellabant: quin, in latiore significatu, sæpe imperan-
tes parentesque simul hac voce complectebantur.

Juniores, Subditorum appellatione nuncupant,
qui Imperantibus opponuntur.

CAPVT VII.

De Aristocratia.

Vnde Nomen habet Aristocratia?

Aristocratia Nomen habet ἀρις & ἀκρα, i. e. ab optimo : dicitur enim Respublica Optimum.

Quid est Aristocratia?

Aristocratia est Respublica, in qua pauci, iique optimi, summum & absolutum habent imperium, ad communem Civitatis Salutem directum.

Quinam hic designantur Optimi?

Optimi hoc loco intelligendi sunt, non qui absolute tales, sed qui aliorum comparatione minus mali sunt, aut in quibus plura, quam in plebe, virtutum argumenta reperiuntur. Cum vero electio virorum simpliciter optimorum admodum sit difficilis, (facillime enim, per simulationem probitatis, nequissimus quisque gubernacula Reipublicæ ad se trahit:) non est ut vitiosa reprehendenda administratio, si nobiles divitesque frequenter, præteritis e plebe melioribus, Magistratum capessunt. Nam, quamdiu ratio boni communis habetur, manet Reipublicæ legitima forma. Nobilium vero & Divitum ratio habenda est maxime: quippe genere, institutione, indole, & potentia prævalent: major igitur illis animus est, ad hostes arcendos; acrior ad patriam defendendam stimulus, in qua fortunas, & honores habent; unde & in publico periculo privatim perdere plus timent: neque enim oppressa patria alibi tam esse possunt honorati: pauperes vero, qui suo labore victitant, ubivis facile sustentare possunt.

Quot

Quot Personæ requiruntur ad Aristocratiam?

Quot Personæ ad Aristocratiam requirantur, non facile est explicatu: cum ab uno, donec ad universam multitudinem perveniatur, infinita intervalla decurrant; nec ubique eadem sit Civium multitudo. Pharsaliorum Respubl. viginti habuit Optimates; Epidaurii CLXXX. imperantes; Vetus Masiliensium Respubl. sexcentos summo præfecit imperio. Quotquot ergo sint, qui rerum summam habent, modo plures uno fuerint, nec maiorem populi partem constituent, Aristocratiae nomen præbent. Interim, quo pauciores regnant; eo diuturnior est gubernatio: quia concordia, quam Aristoteles præcipuam diuturnitatis Aristocratiae ponit causam, melius inter paucos conservatur.

Quanam sunt Causæ corrumpentes Aristocratiam?

Prima Causa mutandi Aristocratiam, est Honor: dum, ob imperandi cupiditatem, multi imperium affectant. 2. Est Ignominia; quando viri fortes, virtute, prudentia; ac dignitate præditi, injuriis afficiuntur. 3. Nimium incrementum honoris, & potentiae alicujus Civis. 4. Bonorum inæqualitas; cum quidam sunt nimis divites, quidam vero nimis pauperes; his enim nunquam inter se convenit.

Quanam sunt Arcana Aristocratiae contra Reges?

Arcana Aristocratiae contra Reges sunt: 1. Cavere, ne unus Optimatum autoritate, & potentia nimium crescat. 2. Nemini Optimatum concedere, ut arcēs munitas habeat in iis locis, in quibus momen-

tum aliquod rerum est. 3. Nulli diu summum imperium, præsertim bellicum, concedendum. 4. Si quis viribus nimium creverit, vel laboribus onerandus est, vel in bellum mittendus, vel ostracismo e Republica segregandus.

Quanam sunt Arcana Aristocratia contra Plebem?

Arcana Aristocratia contra Plebem sunt: 1. Conjugia Optimatum cum Plebejjs prohibere. 2. Plebi non permittere, ut conventus publicos celebret. 3. Ea, quorum administratio magnam dignitatem non habet, sed potius laborem, civibus industriis concedere. 4. Civium opera, in villis aliisque curandis, uti, eosq; liberali prosequi stipendio, & mensæ interdum admove. 5. Varios ordines, & discrimina Civium constituere, ne facile conspirent.

CAPVT VIII.

De Oligarchia.

Quid est Oligarchia?

Oligarchia est Respublica, quando pauci e Proceribus, per injuriam, violentiam, aliosq; modos, imperium ad se transferunt, reliquis, penes quos pariter esse debebat, exclusis, totaque multitudine oppressa, proprio lubitu dominantes, & potestate in suam abutentes utilitatem. Talis Respubl. Atheniensium erat, cum a Lyfandro XXX. nomine quidem Administratores, revera autem Tyranni, constituerentur. Vocatur hoc genus Reipublicæ aliquando *Dynastia*.

CAPVT IX.

De Politia.

Quid est Politia?

Politix vocabulum interdum latissime sumitur, pro omnibus Rerumpublicarum formis: interdum proprie sumitur, pro statu populari iusto, & recto. Hoc sensu, Politia est Respublica, in qua penes populum summa est potestas, in publicam totius Civitatis salutem directa. In hac igitur Rep. universus populus, vel pars ejus maxima, seu viritim, seu centuriatim, seu tributim suffragia ferunt, & jura Majestatis exercent.

Quanam sunt Requisita Politix?

Requisita Politix sunt: 1. ut Magistratus ab ipso constituatur populo, atque ab eodem auctoritatem suamumat. Cum enim plebs per se, ad jus dicendum sedere non potest, debet alios constituere, nomine qui id faciant suo. 2. Ut a Magistratu in rebus gravioribus ad judicium populi appelletur. 3. Ut leges, quibus Resp. est gubernanda, a Magistratu quidem proponantur, sed a populo jubeantur. 4. Ut Magistratus apud populum accusari, vel etiam morte mulctari queant.

Quanam sunt Causæ conservantes Politiam?

Politia videtur Reip. species diuturna & stabilis, cum propter æqualem ordinem civium libera sit a seditione, quæ Respublicas turbare, imo perdere solet. Facit ad eam conservandam: 1. Si virtus militaris ibi floreat, & cives arma tractare didicerint:

per virtutem enim militarem, maxime libertas conservatur. 2. Si Dux Bellicus constituendus sit, videndum, ne ejus potentia sit aut nimia, aut absoluta vel perpetua, sed restricta, & pro arbitrio Imperantium revocabilis. 3. Haud uni facile summus, vel etiam diuturnus, concedendus est Magistratus. 4. Cavendum, ne Cives externa admirentur, exterisque principibus adulentur. 5. Cavenda sunt bella intestina; vix enim componi possunt, nisi imperio ad unum devoluto; atque sic Augustus Remp. Romanam, discordiis civilibus fessam, nomine Principis, sub imperium accepit.

CAPVT X.

De Democratia.

Quid est Democratia?

VOcabulum Democratia^æ alias accipitur *Generaliter*, pro imperio populari; quo sensu, & Politia venit nomine Democratia^æ. *Specialiter*, notat statum popularem corruptum, quem *Ochlocratiam* quoque nominare solent. Est autem Democratia, siue Ochlocratia, populi Regimen vitiosum, quod ad libidinem multitudinis, in qua utilitatem sui status ipsi constituunt, refertur.

Quæ sunt Proprietates Democratia^æ seu Ochlocratia^æ?

Proprietates Democratia^æ seu Ochlocratia^æ sunt, ut multitudo affectu potius, & impetu animi, quam ratione ducatur, neque ad decus & commodum publicum respiciat, sed suæ libidini satisfactum cupiat; ex hac regula Leges & Comitia moderetur, libertatem

tatem contentiose, licenter, præfracte & superbe exerceat; inimica omni temperamento. In tali multitudine plurimum possunt Demagogi.

Quid sunt Demagogi?

Demagogi sunt, vulgi, & multitudinis Duces, qui plebem in varias partes flectere noverunt.

CAPVT XI.

De Comparatione Rerumpublicarum Rectarum ad se invicem.

Quanam inter Rectas Reipublicæ formas censenda est optima?

Generatim ea censenda est optima Reip. forma, quæ ad ingenia suorum Civium & commoda, maxime est comparata: neque enim in tanta morum, locorum, & temporum diversitate, omnibus omnia conveniunt. Quod si vero Rerump. formæ inter se mutuo comparentur, plerique *Monarchiam* cæteris formis præferunt. Finis enim gubernationis, est Civium inter se conjunctio, & pax. Quæ conjunctio in eo potissimum esse videtur sita, ut omnes idem sentiant, velintque. Hoc vero multo certius & facilius obtinetur, si uni parendum sit, quam si multis. Vix enim fieri potest, ut multi, quorum unus ab alio non dependet, de rebus iisdem eodem modo judicent. Itaque si multi sint, qui multitudinem regunt, & alius aliud imperet, aut alicui non parebitur, aut in varia studia populum scindi necesse erit. Accedit & illud incommodum, quod, quem-

admodum in amplis familiis, ubi multis servis idem ministerium assignatur, negligenter negotia procurantur, ita, ubi multi sunt Rempublicam administrantes, unus alium respicit, &, dum unusquisque onus in Collegam rejicit, nemo satis diligentem curam adhibet. *Est quoque Monarchia forma Reipublicæ maxime durabilis*: id enim minus facile dividitur, quod est magis unum; magis autem unum est ipsum simplex unum, quam multitudo in unum conspirans.

CAPVT XII.

De Forma Veteris Reipublicæ Judaicæ.

Quanam fuit Forma Veteris Reip. Judaicæ?

Formam Veteris Reipublicæ Judaicæ, Josephus, eleganti, & apto vocabulo, *θιονογία* appellavit, Dei imperium, vel Rempublicam, ea voce designans. Quanquam enim Judæi, Ductores primoque suos, dein Judices, tandem Reges habuerunt, non tamen Monarchiam, aut Aristocratiam in ea gente licet appellare. Nam, in omnes illos, & Rectores & Judices, fuit imperium Dei, qui Hebræis singulari quodam modo semper assedit, &, inusitata in aliis gentibus ratione, tenuit Rempublicam Hebræorum. Ex hujus enim præscripto, Magistratus constituti, & conditæ Leges; ex hujus oraculis, in dubiis sunt responsa petita; in ejus sinu erant arcana hujus imperii; idemque, admirandis modis, eam Rempublicam tutatus est. Adeoque inter Divini mandati limites constricta omnis Hebræorum Imperantium potestas,
nec

nec Legum novarum latores erant Hebræi Magistratus, sed earum tantum, quas cœlitus acceperant, custodes.

CAPVT XIII. De Gynæcocratia.

Æquumne, ut Fœminæ imperent?

SI rem in se spectemus, Fœminæ ab imperiis procul arcendæ sunt. Nam 1. Sacra Scriptura exigit, ut mulier sit sub dominio & potestate viri, huicque subiecta, Genes. III. 1. Cor. XI. & XIV. Neq; restringendum hoc præceptum cum *Tholos. l. 7. de Rep. cap. 11.* ad conjugium, & erga maritos; quippe Apostolus, 1. Cor. XIV, 34. 35. etiam conventus publicos includit, quando fœminas in Ecclesia tacere jubet. 2. Jure plerarumque gentium fœminis sceptra capessere nefas fuit, quod ad parendum natæ crederentur. 3. Jus quoque civile, *l. 2. de Reg. Jur.* jubet, ut fœminæ ab officiis civilibus, vel publicis, removeantur. Quin & Jus Canonicum cap. mulierum. C. 33. q. 5. decernit: *Mulierem constat subiectam dominio viri esse, & nullam auctoritatem habere; nec docere enim potest, nec testis esse, neque fidem dare, neque judicare: quanto magis non potest imperare?* 4. Deest plerunque mulieribus prudentia, constantia, aliæque ad imperandum necessariae virtutes.

*Quanam incommoda oriuntur ex Successione
Fœminarum in Regnis?*

Fœmina succedens, aut nubit, aut innupta moritur. Si non nubit, stirps emoritur, una cum ipsa.

Si nubit, transit in familiam viri, ejusque sanguinem substituit pro suo. Porro, aut femina, quæ succedit, potestatem Regni cogitur transferre in manus mariti, aut non: Si hoc, jus divinum, naturæ, & civile, vim quodammodo patiuntur. Sin illud, ægre patitur Regina, potestatem sibi extorqueri. Quin, matrimonia quoque ejusmodi Reginarum, inter ipsas, & populum, contentiones suscitant, utrum videlicet ex sua potius, quam totius Reipublicæ sententia, nubere illæ debeant.

CAPVT XIV.

De Mixta Republica.

Quid est Mixta Respublica?

Mixta Respublica est, in qua ordo imperandi, ex diversarum Rerumpublicarum institutis, est temperatus, ita, ut in consortium potestatis aliis admissis, jura majestatis per distinctos Civium ordines exercentur. Vti si unus imperet, solus tamen nec Leges universales condere, nec bellum decernere, nec nova tributa indicere queat, sine aliorum Civium consensu.

Quanam requiruntur ad Mixtam Rempublicam?

Ad Mixtam Rempublicam requiritur, 1. Ut penes plures sit summum imperium, quo pacto contradistinguitur Monarchiæ, seu imperio unius. 2. Ut illud imperium sit penes plures divisim: qua ratione discernitur ab illis Rebuspublicis, in quibus summa potestas quidem est penes plures, sed indivisim. 3. Ut diversi Civium ordines de summa potestate participant.

Vnde

Vnde fit Denominatio Reipubl. Mixta?

Denominatio Reipubl. Mixtæ defumitur ab illius Reipubl. institutis, quæ in ea prævalent. Vti si unus quidem imperium habeat, alii tamen pauci, vel plures, ad Comitia vocentur, ibique, cum Principe suo, de publicis negotiis consultant, dici potest Respublica Monarchico-Aristocratica.

Quotuplices sunt Mixta Respublica?

Distinctio Rerump. Mixtarum, pro varietate institutorum, quibus fundatæ sunt, variat, nec certis regulis comprehendi potest, quot modis mixtio fieri queat.

CAPVT XV.

De Republica Media.

Quid est Respublica Media?

Media Respublica est, in qua Cives neque nimium prudentes, neque nimium stupidi, neque nimis divites, neque nimis pauperes, sed mediocriter se habentes, imperant. Hanc copiose explicat Aristoteles; vix tamen est, ut detur.

Quare Reipublica Media exempla non suppetunt?

Reipubl. Media nulla existit: quia 1. exiguus mediocrium Civium est numerus; plerique enim nimia habendi cupiditate laborant, & divitias augere student. 2. Pauperum & divitum contentiones faciunt, ut neuter ordo velit amplecti medium, sed semper extrema desideret. 3. Morum depravatio non patitur, ut alii cum aliis velint pari jure vivere,

Quare Respublica Media vocatur Optima?

Respublica Media vocatur Optima, quia in ea spectatur virtus, quæ captum vulgi non superat, & ad cuius constitutionem non est opus exquisitissima juventutis institutione, nec maximis etiam divitiis. Proinde, ut medium in aliis rebus commendatur, ita idem in Republica quoque laudandum. Accedit, quod medii ordinis Cives, sibi invicem non invident, nec se contemnunt, sed firmam alunt amicitiam, & cuncta ad communem dirigunt utilitatem.

*CAPVT XVI.**De Majestate.**Quid notat Vocabulum Majestatis?*

Majestatis Vocabulum, non habet in aliis linguis aliquid simile; Græca quoque, utut copiosissima, hic deficit. Vulgares linguæ pene omnes, retinent Latinam vocem. Significat autem sæpe dignitatem, sed cum augmento & pondere loquendi, ut *Majestas matronalis*, apud Livium; *Majestas tribunitia*, apud Asconium. Hinc, quæ in privatis hominibus dicitur gloria & autoritas, illa in Imperantibus dicitur Majestas, graviore & ampliore voce. At juniores plerique, Majestatis vocabulo summam potestatem notant, quæ priscis, modo imperium, modo jus imperii, summum rerum arbitrium, summum rerum judicium, denique hoc ipso vocabulo, potestas, dicebatur.

Quid est Majestas, quatenus Imperantis auctoritatem significat?

Majestas, quatenus Imperantis auctoritatem significat, est magnifica, & reverenda opinio, de imperantis

tis dignitate, virtutibus, & omnibus iis, quæ istis virtutibus sunt affinia, subditorum animis impressa.

*Quanam sunt Virtutes, quibus Admiratio, Cultus,
& Amor insuper, Imperantibus
conciliantur?*

Virtutes, quibus *Admiratio, & Cultus* conciliantur, sunt Fortitudo, Prudentia, Magnanimitas, Magnificencia. Illæ autem virtutes, quæ *Amorem* pariunt, sunt Mansuetudo, Temperantia, virtutes Homileticæ, & Justitia. Quæ virtutes inter se junctæ, sua mixtura, in animis subditorum, summam reverentiam conciliant.

Quanam sunt Affinia Virtutum?

Affinia Virtutum sunt: 1. Morum gravitas, 2. Divitiarum abundantia, & subditorum multitudo, 3. Corporis structura egregia, & vocis decencia. 4. Prosperitas fortunæ in expediendis arduis negotiis, & præcipue rebus bellicis. 5. Raritas conspectus. 6. Ministrorum, qui ad officia adhibentur, splendor, & dignitas. 7. Constantia in utraque fortuna.

Quid adversatur Principis Dignitati?

Principis Dignitati adversatur, 1. Adulatores habere, vel pati. Est enim adulatio venenum, quo Principum animi, velut corrupti, sincere judicare nesciunt, 2. Plebejis exercitiis; & sordidæ mercaturæ operam dare. 3. Nimis humilem & abjectum se præbere. 4. Res scurriles, & ineptas tractare. Ex his, similibusque rebus, nascitur contemptus, sive vilis & cum odio junctæ, de Principe ejusq; vitiis opinio; unde denegatio obedientiæ subsequi solet, quam sequitur tandem ruina Imperii. Sic Eliolmus Saccia Rex ni-

mia

mia famulorum familiaritate usus, ab iis ebris in dolum mulso repletum detrusus, interit. Loccen. Hist. Succ. p. 4.

Quid est Majestas, prout summam denotat potestatem?

Majestas, est summa & libera potestas, administrandi societatem civilem, ad finem propositum obtinendum, & conservandum, cujusque actus, alterius voluntatis humanæ arbitrio, non possunt in irritum recidere. Est igitur talis potestas, supra quam, & contra quam, & sine qua, nihil potest lex, aut jus Civitatis.

Quanam sunt Propria Summæ Majestatis?

Propria Summæ Majestatis sunt: 1. ut sit absoluta, &, nihil in terris excelsius habens, subiaceat soli Deo. 2. Ut sit Incommunicabilis. Quod enim absolutum & summum est, non potest cum quoquam in illa Republ. communicari: scilicet, ut plures sint in ea Rep. qui eandem specie summam potestatem contineant, adeoque duo, vel plures sint summi Principes. Nam, alias jura Majestatis in Rep. expediri posse per plures Cives, dubio caret, & tum nihilo minus manet in se summa, & indivisa, licet quidam in consortium Regiminis admittantur. 3. Ut sit libera, nec ullis legibus positivis constricta. Licet enim digna Principe vox sit, legibus alligatum se profiteri, & majus imperio sit, submittere legibus principatum; tamen id non de coactione, sed spontanea submissione capiendum. 4. Ut sit irrevocabilis. Vbi enim semel Majestas, vel electionis, vel successionis jure, in capite quodam constituta est, illa durat perpetuo, & quidem vel ad vitam Imperantis, uti sit in Regnis Electitiis, vel

vel ad heredes transit, ceu contingit in Regnis hereditariis. 5. Vt sit universalis, quæ se in omnes cives extendit. Proinde, non parum peccatur in illa Republica in qua Clerici a potestate civili sunt exempti. Nam isti, vel nulli humano imperio, vel præter Majestatem, alterius potestati subjiciuntur. Prius, nemo sanæ mentis facile dixerit: omnis enim anima, potestatibus sublimioribus subdita esse debet, Rom. XIII. Sed, nec posterius affirmari potest, cum id repugnet summæ potestati, in omnes habenti imperium. Deinde Clerici sunt pars Reip. ergo ipsi tenentur fidem dare Reip. & legibus, a suprema potestate promulgatis, obedire. Hinc Theodoretus, l. 4. c. 7. asseverat, *Probos Episcopos, non solum DEO, sed & Regum legibus debere obtemperare.* Et Gregor. l. 2. ep. 65. fatetur, *Principi datam esse potestatem, non tantum super milites, sed & super sacerdotes.*

Estne Majestas etiam in ea Rep. in qua plures imperant?

Eadem est Majestas, sive in unum collata sit, sive in multis resideat. Vbi enim Civitas, ibi Majestas, quocunque genere Reip. civitas gubernetur. Quod enim Status Aristocratici & Democratici regimini Majestatis vocabulum non solet attribui, ad titulorum formulas pertinet, non ad rerum fundamenta. Fit enim, ut Majestatis titulo compelletur etiam ea dignitas, quæ non habet adjunctam summam & absolutam potestatem. Sicut ex diverso, qui Majestatem revera habent, vocabulo tamen, quatenus in titulum honoris transiit, non gaudent.

Quanam est origo Majestatis?

Origo Majestatis, sive summæ illius potestatis, quæ civitati regendæ unice est necessaria, a Deo pendet, & ab ipsa natura. Quomodo natura homines ad civilem societatem ineundam compulerit, supra explicatum est. Quod ad Deum attinet, notetur locus apud Ecclesiasten VIII. 2. seqq. *Ego os Regis observo, & præcepta juramenti Dei. Ne festines recedere a facie ejus, neque permaneas in opere malo; quia omne quod voluerit, faciet, & sermo illius potestate plenus est: nec dicere ei quisquam potest: quare ita facis?* Ex his verbis intelligitur potestas *αὐτοκράτου*, seu a nemine homine dependens, neminis hominis arbitrio judicioq; subjecta; tum jus vitæ, & necis, quorum utroque sæpe solent omnia Majestatis jura, seu *τὸ πρὸς τὸν βασιλέα ἐξουσία δέχεται*, omnis potestas imperii, comprehendendi, atque significari. Est quoque notabilis locus 1. Petri II. 13. 14. *Subjecti estote omni humane nature, propter Deum, sive Regi, quasi præcellenti; sive ducibus, tanquam ab eo missis, ad vindictam male factorum, laudem vero bonorum.* Hic locus 1. omni potestati, divinitus inter homines, & ab hominibus constitutæ, parendum præcipit. 2. Dividit potestatem in summam seu independentem, & subordinatam, qualis est omnium Magistratuum, Curatorum &c. 3. Divinam voluntatem, ut præcepti hujus causam, refert: & 4. Finem omnis imperii designat.

An juramentum Principis imminuit ejus potestatem?

Et si bono viro etiam injurato credendum, &, cœu dicere solebat Alphonsus Rex Neapolit. tantum ad fide m

fidem valere debet Principis verbum unum, quantum privatorum hominum jusjurandum: nihilo secius quidam subditi, circa initium regiminis, citra juramentum, Principibus suis fidem non habent, permoti sine dubio fraude ac malitia nonnullorum Principum, qui potestate sua fuerunt abusi. Quod si igitur Princeps subditis suis jurat, se juste regnaturum, æquum ac misericordem se omnibus exhibiturum, quale juramentum est Regum Gallicæ, a Bodino l. 1. c. 8. propositum, id jusjurandum Majestatem non infringit; quia hoc cum tantum ad officium suum obligat, illudque præstat Princeps non coactus, sed sponte, ac ut consuetudini, Populique desiderio satisfaciat. Si vero juramentum potestati principum certos ponit limites, uti cum in leges fundamentales ita jurare cogitur, ut non solum immunitates, privilegia, ac leges, se servaturum promittat, sed etiam clausulas addat, per quas legibus ita se subjicit, ut, si quid adversus eas delinquat, subditis fas sit, coram Senatu adversus eum experiri, omnem obedientiam renunciare, vel alia ratione ejus injuriis modum ponere, hætenus detrimentum patitur majestas, & potestate legum ferendarum priva est. Tale fuit juramentum Stephani Batorii Regis Poloniæ, his verbis conceptum: *Justitiam omnibus incolis Regni nostri, jura publica in omnibus Dominiis constituta, absq; omnibus dilationibus, & prorogationibus administrabo, nullo quorumvis respectu habito. Et, si, quod absit, juramentum in aliquibus violavero, nullam mihi Incole Regni, omniumq; Dominiorum uniuscujusq; gentis obedientiam præstare debebunt. Imo ipso facto eos ab omni fide, & obedientia Regi debita, liberos facio:*

facio: absolutionem nullam ab hoc juramento meo a quoquam petam, neq; ultro oblatam suscipiam. Sic me Deus adjuvet. Chytraus l. 23. Saxon.

*Nunquid alterius Honoris prærogativa
imminuit Majestatem?*

Honoris & dignitatis prærogativa, alteri concessa, neutiquam imminuit Majestatem. Majestas enim proprie consideratur non nisi in ipsa Repub. respectu ordinis imperantium, & parentium; minime vero respectu alieni territorii. Nam, hic sane Princeps Principi præfertur; vel 1. ob majorem potentiam, & magis late patens imperium: vel 2. ob antiquitatem, & vetustatem imperii: vel 3. ob inveteratam consuetudinem, aut causas alias.

*Estne vulgaris divisio Majestatis in Personalem
& Realem toleranda?*

Divisio Majestatis in Personalem & Realem tolerari nequit: unde Gerhardus quoque *Loco de Mag. Polit. c. 123.* monet, cavendum, ne hac distinctione abutantur seditiosi Regicidæ, qui existimant, Reges & Principes impune violari posse, absque Majestatis, quæ Regno proprie inhæret, violatione.

Quid vocant vulgo Majestatem Personalem?

Majestatem Personalem vocant eam, quæ Monarchæ personam respicit, in quam collata est, & cum eadem expirat. Vnde & Majestas Imperatoria seu Regia dicitur.

Quid vocant vulgo Majestatem Realem?

Majestas Realis dicitur, quæ ipsi Monarchiæ, seu Regno perpetuo inhæret, & ipsi est coæva, nec cum Monarcha expirat, sed, quamdiu corpus Regni durat, permanet.

Quare

Quare hac divisio rejicienda?

Hanc divisionem rejiciendam esse, constat I. Quia absurdum est, duo summa in aliqua Republica statuere, quorum alterum in ordine fundandi, alterum in ordine regendi collocetur. Quæ absurditas vel exinde magis conspicua fit, quando Majestas Personalis subjicitur Majestati Reali, quæ tamen adhuc summa potestas vocari debet. Etenim summam esse potestatem, & tamen alteri subjici, non potest liberum esse a contradictione. II. Si Majestas Personalis est summa & absoluta potestas in bona & personas civium omniumq; subditorum, quæri non immerito potest, in quæ bona, aut in quas personas, jus summum exerceat Majestas Realis. III. Potestas, quæ a populo Principi conceditur, aut est plenaria, aut limitata. Si limitata fuerit, nullam consequitur Princeps Majestatem. Si plenaria, ergo quoque totalem, realem, & omnem accipit: ita ut nulla penes populum remaneat: nisi in una numero Rep. quis duas Majestates, sive duo summa, absurde statuere velit. Quamobrem, quamdiu imperat Princeps, abest a Repub. Majestas: extincto eo ad Rempubl. revertitur. Atque hoc vult Tacitus, cum l. 3. Ann. c. 6. ait, *Principes mortales, Remp. æternam esse*. Nimirum id docet, mortuis Principibus, Respublicas non statim perire, sed adhuc durare.

Quid sunt Jura Majestatis?

Jura Majestatis sunt, ex quibus summa potestas constituitur. Ea Livio dicuntur *Jura Imperii*, Tacito *Sacra Regni*. De numero horum Jurium, non constat inter Politicos. Plerique tamen dividunt in *Majora*, & *Minora*. *Majora* dicuntur, in quibus

suprema potestas, & dignitas Majestatis consistit. Minora, utilitatem, & Fiscum respiciunt.

Anne communicari possunt Jura Majestatis?

Quoniam Majestas pro subiecto essentiae Civitatem habet, hactenus una & individua intelligitur esse, neque communicabilis alteri civitati. Amitteretur enim & periret, quicquid communicaretur aut divideretur, i. e. non maneret Majestas, quod esse debet. At in eadem civitate, id est in uno eodemque subiecto essentiae, subiectum existentiae diversum esse potest, ut quaedam Majestatis Jura penes unum, quaedam penes plures sint; sed hoc ad formam civitatis referendum est, quae exinde mixta sit, & appellatur. Notandum interim, cum subditorum sive parentium natura pugnare, si Jura Majestatis illis communicari dicantur. Nempe, cum communicatione Jurium Majestatis, adeoque cum assumptione ad Societatem imperandi in eadem civitate, non debent confundi, quae indulgentur privilegia & beneficia, salvo semper ipso imperii jure intelligenda. Haec autem, & partem tantummodo civitatis exiguam spectant, & a Majestate Civitatis dependent, ejusque scopo inservire coguntur. Quod autem Majestatis est, independens sit necesse est. Nam, de Magistratibus, & Curatoribus, ea, quae mandata, & commissa sunt a Majestate, agentibus, res aperta est, quantuscunque sit, vel in objecto actionis, vel in mandatis, & formula splendor; nihil proprium, nihil summum, nihil denique tale est, quod Ministerii modum, & parendi mensuram transcendat.

CAPVT XVII.

De Jure Legum ferendarum.

Competitne Summæ Potestati Jus Legum ferendarum?

SUMMÆ Potestati competit omnino Jus ferendarum Legum. Forma enim Civitatis essentialis consistit in ordine imperandi parendique, sive in imperio: imperium autem, sine jubendi potestate, intelligi nequit. Ex jussione ergo Legis origo repetitur, quæ nihil est aliud, quam summæ potestatis jussum, & quidem ad finem Civitatis relatum: is enim obtineri nequit, nisi jubere aut vetare summæ potestati liceret; quæ vel ad constituendam bene Civitatem, vel ad regendam pertinent. Primum hoc itaque & præcipuum caput Majestatis est, Legem universis & singulis civibus dare posse libere, id est, sine necessario Superiorum, aut æqualium, aut inferiorum consensu.

Atqui, sæpe Sapientes inveniunt, & Magistratus quoque inferiores ferunt Leges.

Quamvis Lex non inveniatur a Majestate, sed alterius consilio suggeratur; tamen auctoritatem, & vim suam a Majestate consequitur. Hic enim non inventio, sed autoritas spectatur, quæ suam facit Legem, cui suam impertivit vim, & robur. Inferiores autem Magistratus; quando in usum Civium suorum condunt statuta, hoc tantum fit Summi Principis permisso, qui potest ea abrogare, confirmare, aut libere circa ea disponere.

Quid est Lex?

Lex est præceptum, a civili Majestate rite promulgatum, obligans omnes subditos ad faciendum id, quod imperatur, & omittendum id, quod interdicitur, prout utilitas Civitatis id exigit.

Estne Promulgatio Legis necessaria?

Promulgatio Legis omnino requiritur, neque obligat Lex naturaliter, nisi ab eo tempore, quo promulgata est. Malus ergo Legislator Caligula fuit, qui vestigalia indixit, neque proposuit. Itaque, cum, per ignorantiam scripturæ, multa commissa fierent, tandem flagitante Pop. Rom. proposuit quidem Legem, sed & minutissimis literis, & angustissimo loco, uti ne cui describere liceret: *Suet. in Calig. c. 4.*

Quodnam est Objectum Legis?

Objectum Legis Civilis sunt res indifferentes, id est tales, quæ a jure naturali certò determinatæ non sunt ad bonum, vel malum, honestum, vel turpe. Nam, quæ se habent indifferenter ad bonum, vel malum, illa ex se vim obligandi non habent; sed illam vim consequuntur per publicam potestatem. Quædemum fit, ut, quod hætenus erat liberum seu indifferens, ad certam juris rationem revocetur, & vim obligandi consequatur. In desuetudinem autem si deducta fuerit Lex naturalis vel Divina, in usum revocari Lege humana potest; quin & determinari ad certum tempus & locum possunt, quæ tantum quoad substantiam Divinitus mandata erant.

Estne Justum de Essentia Legis?

Sane, Lege humana positiva nihil prohibendum erat, quod Lege Divina, aut naturali conceditur, neque

que mandandum, quod iisdem vetatur. Non tamen ideo Justum est de Legis essentia. Lex enim Civilis ex utilitate Reip. est definienda, atque est medium hujus obtinendi finis: media autem suam bonitatem a fine accipiunt. Sicut vero Resp. non est una & eadem, sed alia bona, alia mala: ita & finis erit diversus, & consequenter media, inter quæ & Leges, diversimode se habebunt. Si autem quis nihilominus acriter contendat, Justum esse de Juris, sive Legis essentia, distinguere licebit inter Justum moraliter, & civiliter tale.

Potestas Legislatoria in quibus occupatur?

Potestas Legislatoria occupatur, 1. in Legum sanctione, ut Leges in usum Civitatis condantur, quo sint norma administrationis publicæ, & actionum civilium. 2. In Legum authentica interpretatione. Habent quidem & Jcti facultatem interpretandi Leges, quatenus veram sententiam Legum explicant, ac e consuetudine, & receptis populi moribus, vim earum ostendant, eaque interpretatio *Doctrinalis* dicitur. Sed, si quid ambigui aut obscuri in Legibus occurrat, ad Principem itur, ut earum obscuritatem vera declaratione tollat: quæ interpretatio dicitur *Authentica*, ac vim Legis obtinet, 3. Occupatur quoque Potestas Legislatoria circa Legum abrogationem, & mutationem. *Abrogatur* Lex, cum ipsi penitus vis obligandi adimitur. *Mutatur*, quando ei aliquid additur, vel adimitur, vel etiam auctoritas illius tollitur, & Lex alia in locum surrogatur. Citra necessitatem tamen urgentem Leges semel constitutas mutare non decet; nec enim alia re magis labefactatur status Civitatis, quam legum crebra mutatione.

Quanam sunt Partes Legis?

Lex perfecta tribus partibus absolvitur : 1. *Proœmio*, quod tanquam caput Legi præponitur, quo ejus ratio, æquitas, justitia, utilitas demonstratur, ut eo facilius obsequium inveniat. 2. *Constitutione*, qua illud, quod in Civitate justum, vel injustum esse debet, præcipitur, aut vetatur. 3. *Epilogo*, quo bene merentibus, seu obsequentibus, præmia, immo-rigeris pœnæ decernuntur.

Suntne hæ Partes in omni Lege necessariae?

Potest Lex Proœmio & Epilogo carere, modo certum quid præcipiat : imo Seneca Ep. 94. ex Stoicorum sententia, Proœmium in Lege prorsus damnat, inquit : *Non probo, quod Platonis Legibus adjecta principia sunt : Legem enim brevem esse oportet, quo facilius ab imperitis teneatur, velut divinitus emissa vox sit ; jubeat, non disputet. Nihil videtur mihi frigidius, nihil ineptius, quam Lex cum prologo. Mone, dic, quid me velis fecisse : non discō, sed pareo.* Interim hodie, consensu gentium plerarumque, videmus usurpari hæc proœmia, in novis Legibus ferendis, aut veteribus corrigendis. Quin imo ipse Decalogus, Lex nobilissima & sapientissima, suis proœmiis non caret.

Quomodo Lex debet esse comparata?

Requisita Legis Isidorus lib. 2. Orig. sic expressit : *Lex esse debet honesta, justa, possibilis, secundum naturam, & patriæ consuetudinem, loco temporisq; conveniens, necessaria, utilis, manifesta quoq; ne aliquid per obscuritatem in captionem contineat : nullo privato commodo, sed pro communi Civium utilitate conscripta.* Caterum, quia humana prudentia non potest

potest omnia complecti atque definire, ratiocinatio ex similibus, aut exemplis, aut responsis prudentum, vel placitis curiarum, præcipue autem Principis declaratio, pro remedio sunt.

Quomodo Lex dividitur?

Lex dividitur in Scriptam, & Non-scriptam: Fundamentalem, & non fundamentalem, seu privatam: denique Vniversalem, & Particularem.

Quid est Lex Scripta?

Scripta Lex dicitur, quæ publica autoritate in scriptis est proposita.

Quid est Lex Non-Scripta?

Non-scripta Lex, & quæ alias *Consuetudo* dicitur, est jus, tacito Imperantis consensu, paulatim introductum. Possunt quidem & consuetudines redigi in scripturam, non tamen ideo transeunt in naturam Legum scriptarum; quia hic scriptura tantum accedit, ut memoria iuvetur. Proinde differunt omnino, legem scribi, & legem redigi in scripturam.

Quid est Lex Fundamentalis?

Lex Fundamentalis est, quæ concernit fundamentum Reipubl. & modum Regiminis, seu administrandi imperii respicit.

Quid est Lex Privata?

Privata Lex est, quæ Reip. negotium per se non attingit, sed privatas Civium res & actiones disponit, iisque modum, & rationem præscribit.

Quid est Privilegium?

Privilegium, est lex vel constitutio privata, qua alicui, e singulari ratione, aliquid speciale, contra ju-

ris communis dispositionem, conceditur. Dividitur privilegium in *Personale*, quod cum morte privilegiati extinguitur; uti *Doctoratus*: & *Reale*, seu *Hereditarium*, quod ad posteros transmittitur; uti *Nobilitas*.

Ecquis Fons est omnium bonarum Legum?

Fons omnium bonarum Legum, est Lex naturæ, sive ipsa Natura intelligens, quam Deus homini indidit, & per quam cognoscere & dijudicare potest, quæ sunt honesta, & humanæ dignitati consentanea; tum quæ turpia, & indecora. Connascitur autem hoc lumen, & naturale rationis dictamen, non actu, sed potentia; proxima tamen, quæ scilicet, ut primum ratio se vindicare, & exercere incipit, in actum prodit, applicaturq; ad opera particularia, per dictamen conscientiæ. Comprehendit Lex naturalis prima & universalia principia practica & conclusiones inde deductas. Prima Principia practica, sunt: *Bona esse facienda: Mala non esse facienda*. Atq; hæc non possunt deleri ex hominis mente. Quando autem, per consequentias, ad minus universalia descenditur, fieri potest, ut prava educatione, aut consuetudine, ea, quæ juris naturæ sunt, obscurentur, & oblitterentur.

CAPVT XIIII.

De Potestate circa Sacra.

Competitne Majestati potestas circa Sacra?

Competit omnino Majestati potestas circa Sacra. Competit enim illi omne id, sine quo finis Reipubl. obtineri non potest. Fieri autem nequit, ut felicitas civilis comparetur, vel incolumis servetur, citra curam Religionis, Cultumq; Divinum.

*In quibus consistit Potestas Principis circa
Sacra?*

Gerhardus, in loco de Magistr. Polit. duas hujus juris munerisque facit partes. 1. Recti cultus conservationem: II. Collapsi corruptive restorationem. In Recto cultu conservando, potestati civili permittit commendatque, 1. *Ministrorum idoneorum constitutionem*, non sine cautione, de adhibendo Ecclesiæ judicio, in vocatione Ministrorum. Atque ad hoc caput refert Scholas, sustentationem Ministrorum, ordinem inter eos instituendum, tum & remotiorem flagitiosorum Ministrorum. 2. *Legum Ecclesiasticarum promulgationem*, de externo Cultus Divini exercitio, additis cautionibus, ne tales sint Leges, quæ cum officio Ministrorum pugnant: ne quid temere, aut sine matura deliberatione mutetur, nec sine consilio Ministerii Ecclesiastici Leges ferantur. 3. *Bonorum Ecclesiasticorum legitimam dispensationem*. 4. *Ecclesiæ Inspectionem*: quo Visitationes refert, & Synodorum convocationem. In Recto cultu, si collapsus est, restaurando, ponit 1. Inquisitionem in errantes, præsertim hæreticos, & seductores. 2. Coërcitionem eorum. 3. Idololatriæ cultus abolitionem.

*Suntne Persona Ecclesiastica Potestati
Civili subjecta?*

In Ecclesiasticis personis duo sunt consideranda: 1. Ecclesiasticum, quod gerunt, officium. 2. Politicum, quo civili societati obstrictæ sunt, vinculum. Ad Ecclesiasticum officium quod attinet, id in Verbi Divini prædicatione, & Sacramentorum administratione potissimum occupatur, & hac ratione potestati

ſtati civili non ſunt ſubjectæ. Magiſtratus enim nec poteſt, nec debet illis præſcribere aliam docendi formam, quam eſt in verbo Divino ipsis præſcripta. Reſpectu Politici, quo Eccleſiaſticae perſonæ Reip. obſtrictæ ſunt, vinculi, ſubditi ſunt, cum Magiſtratus non exiſtant. Vnde Levitæ non ſolum Aaroni, ſed & Moſi, qui Princeps Civilis erat totius populi, fuerunt ſubjecti. Salomon, propter crimen læſæ Majeſtatis, Abjatharem Pontificem non tantum ſacerdotio exuit, ſed & neci adjudicavit; etſi gratiam ei fecit, propter merita illius erga Davidem parentem, 1. Reg. II. 26. Hinc Paulus, Act. XXV. 10. a Syne-drio Hieroſolymitano ad Cæſarem appellat: *Ad tribunal Cæſaris ſto, inquit, ubi me oportet judicari.*

Competitne Perſonis Eccleſiaſticis Jurisdictio?

Jurisdictio, proprie ita dicta, perſonis Eccleſiaſticis non competit; etſi apud quasdam gentes ea illis conceditur. Non tamen derogandi iis ſunt tales actus, qui ad jurisdictionem accedere videntur, a jurisdictione tamen proprie dicta longius abſunt. Vti eſt uſus Clavium; Denegatio Sacramentorum; prohibitio ingrediendi Eccleſiam; Excommunicatio. Licet ad cognitionem Majeſtatis pertineat, an quis, præcipue in dignitate conſtitutus, juſte excommunicetur.

Suntne plures Religiones in Republ. tolerandæ?

Flagitat quandoque neceſſitas, plures in Republ. tolerare Religiones. Nam, non poteſt Majeſtas ea, quæ perfecte optima ſunt, omnibus ſemper imperare; ſed eam oportet interdum minus bona permittere
sub-

subditis, five vitandi majoris incommodi gratia, five quod virtutis illius præstantia superet Civium captum. Distinguenda tamen est singulorum, privatim diversa, citra turbas, sentientium, tolerantia, ab exercitii publici concessione: sicut & tranquillus Reipublicæ Status, a perturbato discerni debet. Religionis item diversitas a blasphemiiis publicis plurimum differt. Aliud quoque est tolerare religiones diversas, aliud approbare: unde nec syncretismus locum habet, sed pax, & concordia publica.

Anne licet Subditos ad Religionem amplectendam cogere?

Vis homines ad religiones cogendi in Sacris Literis non est fundata; quin potius in iis reperitur, quod Servator nullum alium modum propagandi Doctrinam fidei Apostolis injunxerit, quam docendo, & quidem in lenitate spiritus. Deinde, Christus requirit spontaneam fidem, citra violentiam. Nec favet dictum Domini, apud Lucam XIV. 23. *compelle intrare*: quia eo non significatur violenta quædam coactio, sed sedula diligentia in invitando, & rogando. Præterea, in Ecclesia primitiva inauditum fuit, licitum esse Regibus & Principibus, Christianam Religionem vi obtrudere populis: quin, id Patres docent, Deum sponte colendum esse, & a Religione omnem abesse debere coactionem. Canon Concilii Toletani cap. de Judæis dist. 45. *Præcipit sancta Synodus; nemini deinceps ad credendum vim inferre. Cui enim vult Deus, miseretur, & quem vult, indurat.* Tertulliani dictum notum est: *Lex nova non se vindicat ultore gladio.* In libro antiquo, cui nomen Constitutiones Clementis, de Christo dicitur: *Liberam*
reli-

reliquit hominibus arbitrii potestatem , non morte temporali eos puniens, sed in altero seculo ad reddendam rationem vocans. Procopius, in arcana historię parte, docet, a Sapientibus culpatum fuisse Justiniani consilium, quod Samaritas vi, ac minis, ad Christianam fidem compulerit; addit & incommoda inde secuta.

C A P V T XIX.

De Jurisdictione & Provocationis Jure.

Competitne Majestati Juris reddendi potestas?

Competit omnino Majestati potestas juris reddendi: quippe etiamsi illa omnia constituat quę Reip. utilitati inserviunt, inanis tamen erit omnium Legum tenor, nisi de genere facti positę Leges, singularibus applicentur, & quod cuique potentia competit, id actu, seu effectu tribuatur. Hinc reddendi juris nata potestas, quę factis singulis in specie statuta accommodat. Atque hæc Potestas Jurisdictio dicitur, & Criminalia non minus quam Civilia spectat; etsi, usu hodierno, Criminalium potestas hoc vocabulo non notatur.

Quodnam est Subjectum Jurisdictionis?

Potestas administrandę Justitię, formaliter & primo, est in Majestate, sive penes unum, sive penes plures sit Majestas: per participationem est in Magistratibus,

Competitne Majestati Jus Provocationis?

Quia Jurisdictio primo & formaliter penes Majestatem est, satis intelligitur, a Majestate ipsa non posse appellari, sive provocari; ad Majestatem autem, tanquam ad fontem omnis Jurisdictionis, ab omnibus Magistratibus provocari posse, (id quod jus extremæ provocationis vocant,) caret controversia, & hoc jus a Majestate est inseparabile.

Quid est extrema Provocatio?

Extrema Provocatio, est jurisdictionis inferioris judicis, per legitimam invocationem supremi, in eodem judicio factam, suspensio. Semper enim cum ordine Magistratuum ascendit jurisdictio, donec in summa terminetur potestate: nisi ab eadem ad se ipsam putet quis appellandum esse; quomodo Græcorum quidam, a Philippo Macedoniæ Rege poto, ad eundem sobrium appellavit, Val. Max. l. 6. c. 2. & ab Imperatore male informato, ad eundem melius informandum, appellationem permissam esse, tradunt Interpretes, per l. 1. C. de relation. & l. 1. §. *quæsitum de Appellationib.* Hanc tamen appellationem, sive provocationem, rectius irregularem dixeris.

Potestne Jus extrema Provocationis aliis communicari?

Nihil prohibet, quo minus Majestas jus suum mandet alteri, ut ab ejus sententiis, vel simpliciter, vel in certa causa, non appelletur; modo id non fiat *abdicative*: sic enim possessio, & superioritas Principi, tanquam mandanti, reservatur. Sic olim Caligula Magistratus omnes extra provocationem judicare jussit: quod, cum in desuetudinem ierat, Hadrianus

nus Augustus renovavit, &, ne a Senatu provocaretur, vetuit. ff. a quib. appell. non licet. Ex Aurca Bulla quoq; c. 11. Electores eo jure utuntur, ut nulli Comiti, Baroni, Nobili, Vasallo, Civi, vel Rustico, Electorum tam Secularium quam Ecclesiasticorum, a sententiis eorum, aut etiam Judicum suorum, appellare liceat.

CAPVT XX.

De Jure Magistratum constituendorum.

Competitne Majestati Jus Magistratum constituendorum?

EX Jurisdictione, quæ competit Majestati, fluit Magistratum creatio, & constitutio, quæ nihil est aliud, quam concessio Jurisdictionis particularis, certis limitibus, ac modo circumscriptæ, Superioritatis jure semper salvo, vel ad Remp. gerendam, vel ad Jus privatis dicendum. Cum enim Majestas omnibus in locis Reip. adesse, aut cuncta istius negotia immediate procurare nequeat, ideoque indigeat aliorum opera in regenda civitate, eapropter Magistratus constituit, quorum subsidio facilius & melius Resp. administrari possit.

Quot modis accipitur Vocabulum Magistratus?

Latinis veteribus Magistratus semper sunt ii, quibus a Majestate certa imperia sunt commissa. Juniores, præsertim Theologorum consuetudinem secuti, pro Imperantibus in universum sumunt, & ma-

xime

xime pro iis, qui *Majestatem habent*; ita, de Magistratu Politico agentes, quicquid est Imperii in Rep. & præsertim summum, intelliguat. Prior significatio est hujus loci.

Quæ observanda sunt in eligendis & constituendis Magistratibus?

Observet Princeps, sive Resp. 1. Ne illi ad Magistratus dignitatem promiscue evehantur, qui eam ultro ambiunt: nam, *se ingerentes pro suspectis habentur*, ex pronunciato Ulpiani, l. 25. ff. de procurat. & defens. 2. Nec nimis juvenes, ob imperitiam, nec nimis senes, quia horum prudentia evanuit, sunt eligendi. 3. Non brevi tempore mutandus est Magistratus. Rerum enim gerendarum cognitio longo tantum usu acquiritur: tum vero parum est in iis autoritatis, qui jam ad clavum sedent, &, intra paucos menses, cives, vel subditi iterum futuri sunt. Quin, nec multum diligentiae adhibent in rebus gerendis, qui sciunt se brevi populo fore æquales. Neque tamen etiam perpetuos Magistratus esse convenit; ne, qui iis funguntur, nimis potentes, aut sævi reddantur. 4. Remotissimis regionibus optimi gubernatores imponendi sunt: ipsa enim longinquitas, ut subditis spem auxilii adimit, ita regentibus fiduciam impunitatis præstat. 5. Nemo officio, quamvis exiguo, admoveatur, in quo honor est & dignitas, nisi spes sit, ad majorem dignitatem eum idoneum fore: tales enim, sive evehantur ad honores ulteriores, sive in loco suo relinquuntur, detrimento sunt Reipubl. Nam, priore casu, muneribus indigni præficiuntur; posteriore, ii, quibus juniores præferuntur, vindictam meditantur. Adde, quod in officio

cio sedulos facit spes crescendi. 6. Annua instituenda Magistratus inquisitio : nullius enim virtuti ita credendum, ut non Principi, sive Reip. constet ratio administrationis ; cum honores mores subinde mutare soleant.

*Quid fluit ex Jure Magistratum
constituendorum ?*

Ex Jure Magistratum constituendorum fluit *Jus condende Civitatis*, ut ibi incolæ sint veri Cives, habeantque potestatem, non tantum commercia exercendi, sed & Magistratu fungendi, ac judices de civilibus, & criminalibus constituendi.

CAPVT XXI.

De Jure Belli & Pacis.

Competitne Majestati Jus Belli gerendi ?

QVia Majestatis est, non domi tantum pacem inter Cives conservare, eoque prohibere injurias, judicare, omniaque turbamenta tranquillitatis civilis, sine qua civitas beata esse nequit, e medio tollere ; sed etiam ab omni vi externa cives defendere : itaque satis apparet, neque injurias demi, aut vindicari aliquando posse, nisi bello adversum eos, qui nullum judicem agnoscunt ; neque pacem inviolatam perdurare, nisi bello interdum redimatur ac stabilizetur. Fluit ergo, ex ipsis juris naturæ dictatis, hæc potestas, vim injustam vi justa depellendi, tegendi armis patriam, defendendi aras, focosque. Neque de Jure Divino superest dubitatio.

Quid

Quid est Bellum?

Bellum, est dissidium populorum, per vim concertantium, susceptum, ad propulsandam, vel vindicandam injuriam.

Quomodo dividitur Bellum?

Bellum dividitur in Publicum, & Privatum; Solemne, & minus solemne; Justum denique, & Injustum.

Quid est Bellum Publicum?

Bellum Publicum est, quod ab eo, qui summam habet potestatem, sive eo, cujus actus alterius actui non subsunt, nec ab alterius humanæ voluntatis arbitrio irriti reddi possunt, vel hujus jussu, & auctoritate geritur.

Quid est Bellum Privatum?

Bellum Privatum est, quod privata suscipitur & geritur auctoritate.

Licetne aliquando Subditis Bellum gerere, sine consensu Superioris?

Licet Subditis Bellum gerere, sine consensu Superioris, si nimirum Respubl. absente Principe contra hostem defendenda sit, nec possit Principis voluntas commode explorari. Nam, & homini privato, in subita violentia, sine Magistratus consensu, contra latronem se defendere, est concessum.

Anne Subditis Arma corripere licet adversus Principem?

Observandum hic 1. quod subditi quidam, vel coacte, vel voluntate sua sint tales. 2. Quod quidam mere dicantur subditi, qui scilicet nullam potesta-

tis partem obtinent, sed Superiori simpliciter sunt
 subiecti; quidam vero mixti, qui vel ex legibus fun-
 damentalibus, vel ex pacto, vel consuetudine, in par-
 tem potestatis sunt recepti. 3. Distinguendum in-
 ter delicta Principis publica & privata. His præmis-
 sis, dicendum: 1. Principi Supremo, qua tali, sub-
 diti non debent resistere: resisterent enim aliqui or-
 dinationi Divinæ, & potestatem publicam sibi arro-
 garent; quod iis, qui se mere passive habent, non
 competit. 2. Qui vel sua voluntate, vel iusto bello
 coacti, alteri ita subjiuntur, ut Superior in eos ha-
 beat potestatem vitæ & necis, tales Superiori huic
 resistere non posse, sed solam obsequii gloriam iis re-
 lictam esse, extra controversiæ positum est pericu-
 lum. 3. Principi, Rempublicam data opera evertenti,
 subditi etiam meri sese opponere possunt. Quain-
 primum enim Superior Reip. quærit everisionem, &
 in bona ac corpora subditorum grassatur, non am-
 plius est ordinatio Divina; (quæ requirit, ut sit Dei
 Minister, subditis in bonum, & malis in malum) sed
 potius Reip. hostis: & adversus hunc subditis licebit
 se tueri. Summa enim potestas non faciendi quid-
 libet notat arbitrium, ita, ut rationem nullam, tum
 juris naturæ, tum gentium habere conveniat: Sed
 tantum jurium Majestatis, absolutum, sine approba-
 tione, & consensu aliorum, innuit imperium. Sedu-
 lo tamen tenendum, non cuique hoc casu conceden-
 dam esse potestatem Principem invadendi, sed com-
 munem omnium subditorum consensum requiri: tum
 vero omnia alia remedia prius tentanda sunt, quam
 ad arma deveniatur. 4. Mixti, & non meri, qui di-
 cuntur subditi, violentiæ Superioris sese opponere
 possunt. Ex contractibus enim mutua oritur obli-
 gatio.

gatio. Quod si ergo Princeps a contractu suo discedat, nec jura, libertates, & privilegia subditorum tueatur, Ordinibus licet salutis publicæ habere rationem. §. Moraliter pravo & impio non licet obistere, nisi bonum evertat publicum. Nam Jeroaboamo, qui idololatria sua peccare faciebat Israël, Deus tamen per Prophetam nunciari jubet: *Eris Rex super Israël*, 1. Reg. XI. 37. & Saul, a quo Spiritus Domini recesserat, nihilominus vocatur *Unctus Domini*, 1. Sam. XXIV. 7. Scilicet, Magistratum esse, abstrahit a virtute & vitio morali privato, & tantum bonitatem civilem sive publicam requirit. Ergo, quamdiu vitia Imperantis sunt privata, obedientia, quæ illum ut personam respicit publicam, ei non est deneganda.

Quid est Bellum Solemne?

Ad Bellum Solemne requiritur, 1. ut utrinque geratur ab eo, qui summam habet potestatem. Cum enim Majestas superius tribunal in his terris non agnoscat, necesse est, ad gladium provocet, ac suam causam fortunæ committat. 2. Requiritur, ut Bellum utrinque rite sit indictum. Hæc indictio vocatur *Clarigatio*, a claritate vocis, qua Bellum denunciabatur a Patre Patrato, sive Principe Fecialium.

Quid est Bellum minus Solemne?

Bellum minus Solemne est, quod sine ritibus prædictis geritur, cum scilicet in alterius regionem mittitur exercitus, sine denunciatione prævia.

Quid est Bellum Justum?

Bellum Justum est, quod a legitimis personis, iustis de causis, debito modo, & sine geritur. Non igitur justæ Belli causæ sunt, diversitas Religionis,

libido dominandi, Avaritia, aut imminutio vicinæ potestatis: sed 1. legitima defensio; 2. vindictio ejus quod nostrum est, aut nostri juris. 3. Poena, qua imperii violata Majestas, attritæ subditorum fortunæ, violata gentium jura, aliæque injuriæ vindicantur.

Quid est Bellum Injustum?

Bellum Injustum est, quod ob causas non justas geritur, & nec a personis legitimis, nec modis legitimis peragitur.

In quibus consistit Preparatio ad bellum?

Preparatio ad Bellum occupatur in armis, pecunia, commeatu, & militibus conquirendis.

Quid est Militia?

Militia, est multitudo apta, & composita in armis, ad vim faciendam, vel arcendam, certis legibus ordinata.

Quotuplex est Militia?

Militia triplex est: Lecta, Mercenaria, & Socia.

Quid est Militia Lecta?

Militia Lecta est, quæ colligitur ex indigenis, seu ex illis, qui in ea Civitate & provincia sunt nati.

Quid est Militia Mercenaria?

Militia Mercenaria est, quæ certis stipendiis tam domi, quam foris conducitur.

Quid est Militia Socia?

Militia Socia est, quæ, ex pactionibus foederum, populo periclitanti in auxilium mittitur.

Quæ

Quæ observanda sunt in gerendo Bello?

In bello gerendo, sive administrandis iis, quibus vires hostiles infringuntur, observandum, 1. ne quis occasiones, rebus gerendis aptas, elabi patiatur. 2. Loca commoda sunt occupanda, quo hosti occasio præcidatur, prædas agendi, aut auxilia evocandi. 3. Cavendum, ne unius prælii fortunæ aut casui, qui adversus esse potest, tota vis Reipubl. committatur. 4. Iis, qui alienam provinciam invadunt, in id incumbendum, ut ab initio locum aliquem tutum occupent, eumque probe muniant, quo ibi pedem figere, refugium habere, commeatus & prædas deponere, & supplementa militiæ servare queant. 5. Eligendi sunt periti belli Duces, autoritate, & prudentia instructi. 6. Miles continendus est in officio, ut promte pareat, strenue certet, ab injuriis abstineat.

Licetne Militi Bellum sectari, si de justitia causa dubitet?

In Dubia Causa, milites, qui Subditi sunt, castra sequi possunt: in Dubio enim, patriæ potius, quam inimicis favendum. Alia tamen ratio Ducum est: hi enim, quoniam ut Consilarii vocantur, serio illis de Justitia Belli judicandum. Qui milites Subditi non sunt, in dubia causa militare non debent; quia ad eos bellum non pertinet, nec illis licet rei dubiæ se immiscere.

Quid est Bellum Offensivum?

Bellum Offensivum est, cum, extra limites nostræ regionis, castra promoventur, & ita hostis impugnatur.

Quid est Bellum Defensivum?

Bellum Defensivum est, cum intra limites nostros hostem avertimus, & ipsius insultus propulsamus.

Quis est Finis Belli?

Finis Belli intermedius est Victoria; ultimus est Pax: ideo enim belligerantes certant, ut tandem, sedatis motibus, pax obtineri queat.

Quæ sunt observanda circa Victoriam?

Circa Victoriam observetur, 1. quod ea serio utendum: hoc est urgendi sunt successus, & trepidis instandum, ne potissima pars vires colligat. 2. Victus benigne habendus. 3. Victoria auxiliantibus grata, & nec innocentibus gravis, nec finitimis onerosa esse debet. 4. Victoria non superbe, aut crudeliter utendum.

Quid est Pax?

Pax est sollemnis & publica conventio, qua, deposita inimicitia, vel simpliciter, vel certis pactitionibus, ab hostili armorum usu cessatur, & finis Bello hactenus gesto imponitur.

Quid circa Pacem concludendam observandum est?

Negotium concludendæ Pacis prudenter tractandum est, ne ex ea plus detrimenti, quam commodi, sentiat Civitas. Interdum enim magis expedit, Bellum animoso consilio gerere, quam abjecto animo turpem pacem inire.

Quid faciendum Pace jam firmata?

Quando Pax firmata est, oportet, 1. Oblivisci omnium eorum, quæ tempore publicæ hostilitatis facta sunt ab utroque exercitu. quod *Amnestiam*, seu

Legem

Legem oblivionis, vocant. 2. Contractam Pacem sancte servare oportet, & non tantum perfidiam evitare, sed & sibi cavere ab omni eo, quod alteram paciscentium partem potest exasperare. Hinc, ut conclusa pax eo firmior sit, solent paciscentes sibi mutuo dare *Obsides*, qui sunt tanquam fidejussores, de pace perpetuo & inviolabiliter servanda, ita ut, in casu non servatæ fidei, etiam in illorum vitam sævire liceat.

Qua re Pax violatur?

Pax violatur, quando conditiones pacis rumpuntur, & vel aliquid fit, quod iis est adversum, vel non peragitur illud, quod vigore pacis omnino fieri debebat. Non tamen, ob violatam quomodocunq; pacem, illico ad arma profiliendum, sed præmittendæ sunt admonitiones de servanda pace.

Quid sunt Inducia?

Induciæ sunt conventio, per quam, bello adhuc manente, bellici tantum actus aliquantisper cessant.

Quid circa Inducias observandum?

Dum Induciæ fiunt, cavendum, 1. Ne per eas amittantur rerum occasiones. 2. Ne interea vires accedant hosti. 3. Ut tempore induciarum miles nihilo secius sit in armis. Non semper enim fidem servant homines, cum primis, si perfidia in suum uti possint commodum. In pactis autem induciarum interpretandis, abesse debent dolus & calumnia, & id, quod vere senserunt, aut sentire potuerunt paciscentes, sequendum erit.

CAPVT XXII.

De Jure Tributorum & Vectigalium.

Referendumne est Jus Tributorum indicendorum inter Jura Majestatis?

POtestas indicendi Tributa pertinet omnino ad Jura Majestatis. Cum enim nemo jure obligetur, de bonis suis aliquid largiri, nisi id cedat in commodum & utilitatem publicam, igitur is, qui Reip. præest, subditis imperare potest, ut tributa conferant in usum boni publici, ne pecunia necessaria desit.

Licetne Principi a Subditis exigere tributa?

Licet utiq; Principi a subditis exigere tributa: idq; Christus ipse Matth. XXII. confirmat, dum jubet *Cæsari dare, quæ sunt Cæsaris*. Quemadmodum enim totum corpus, alimentis ventriculo denegatis, ad talem redigi necesse est; ita, tributis Magistratui denegatis, extrema Reipubl. perniciies impendet: *nec quies gentium sine armis, nec arma sine stipendiis, nec stipendia sine tributis haberi possunt*; ut ait Tac. l. 4. Hist.

Quæ sunt observanda in Tributis indicendis?

In Tributis indicendis observandum, 1. ut illorum exigendorum necessitas populo exponatur. 2. In iis exigendis servanda est æqualitas, ne quidam immunes sint, alii nimis onere graventur. 3. Tributa moderate imperanda sunt, secundum facultates & lucrum

crum, quod quisq; e Republ. captare potest. 4. Tributa in usum publicum convertenda sunt, non vero in privatam Imperantium utilitatem, multo minus luxum. 5. Tributa non sunt exigenda e rebus ad victum & amictum quotidianum pertinentibus. Nam, qui Cives suos privat rebus necessariis, iis animam eripere videtur.

Quomodo dividitur Tributum?

Tributum dividitur in Ordinarium, & Extraordinarium.

Quodnam est Tributum Ordinarium?

Ordinarium tributum est, quod statto tempore recurrit. Hoc tamen non eodem modo, nec in eadem quantitate, semper persolvi potest, verum mutandum, prout Civium facultates vel augentur, vel decrescunt.

Quodnam est Tributum extraordinarium?

Tributum Extraordinarium est, quod statum suum tempus non habet, & tantum in casu necessitatis imperatur. Ab hoc tributi genere, nec Ecclesiastici, nec Nobiles, pro more tamen regionis, se excusare possunt.

Quid est Vectigal?

Vectigal, est pecunia, quæ ab indigenis pariter & peregrinis, in usum viæ publicæ, solvitur ex iis rebus, quæ vel importantur, vel exportantur.

Æquumne est, ut Vectigal solvatur?

Omnino æquum est, ut vectigal solvatur, 1. ut viæ, per euntium & redeuntium vecturas detritæ, reficiantur. 2. Quia securitas præstatum transeuntibus.

Quæ observanda sunt circa Vectigalia?

Circa Vectigalia observandum est, 1. mediocritatem ea excedere non debere. Quando enim nimis magna mercibus imponuntur Vectigalia, non tantum seditiones oriuntur, sed & Mercatores insuper prohibentur ea apportare, quibus carere non possumus, & exportare, quibus abundamus. 2. E rebus turpibus & sordidis vectigal, capere indecorum. 3. Nec rebus ad victum necessariis imponere decet vectigal. 4. Illis rebus, quæ cum Civitatis incommodo, vel importantur, vel exportantur, majora sunt imponenda vectigalia. 5. Vectigalium præfectura non committenda malæ fidei hominibus, nec talibus locanda. 6. Qui immunitate non gaudent, nec tamen vectigalia solvunt, aut minorem bonorum partem professi fuerint, res suas penitus amittunt, illarumque dominium ad vectigalis Dominum transfertur, seu fisco committitur; quod *Pœna commissi* vocari solet.

*CAPVT XXIII.**De Jure Fœderum.**Quid est Fœdus?*

Fœdus, est conventio publica, autoritate Imperantium facta, inter duos populos, ad societatem, & amicitiam colendam, & ad mutuam utilitatem promovendam.

Quomodo dividuntur Fœdera?

Fœdus dividitur in *Æquale*, & *Inæquale*, *Defensivum*, & *Offensivum*; nec non *Defensivum* ac *Offensivum* simul; item in *Temporarium*, & *Perpetuum*.

Quid

Quid est Fœdus Æquale?

Fœdus Æquale est, quod utrinque se habet eodem modo, & in quo socii ab utraque parte obligantur ad paria.

Quid est Fœdus Inæquale?

Fœdus Inæquale est, quod non se habet eodem modo, & in quo una pars ad majora, & plura, altera vero ad minora & pauciora tenetur.

Quid est Fœdus Defensivum?

Fœdus Defensivum est, quod ob mutuum defensionis auxilium initur, ut, si unus ex sociis bello impetatur, alter eidem succurrat, eumq; defendat.

Quid est Fœdus Offensivum?

Fœdus Offensivum est, quod initur ita, ut, si unus hostem habeat, is & alteri sociorum sit hostis, quo sic ambo paciscentes mutuis viribus communem hostem invadere cogantur.

Quodnam est Fœdus Defensivum & Offensivum simul?

Fœdus Defensivum & Offensivum simul est, quod defendendi, & offendendi causa contrahitur.

Quid est Fœdus Temporarium?

Fœdus Temporarium est, quod ad certum tempus contrahitur, quo elapso illud expirat, nisi iterum renovetur.

Quid est Fœdus Perpetuum?

Fœdus Perpetuum est, quod ad contrahentium vitam, aut aliud angustius tempus, non restringitur, sed ad paciscentium successores extenditur.

Quid

*Quid observandum est in pangendis
Fœderibus?*

In Fœderibus pangendis, magna opus est prudentia. Etenim, 1. cum plures in unum fœdus conveniunt, oportet, ut id omnibus sit utile ac necessarium; alioqui enim non erit diuturnum. 2. Fœdera inter diversos Reipubl. Status non facile ineunda; sunt enim in his diversa studia, diversi quoq; fines. 3. Fœdus non pangendum est cum iis, qui non sunt potentes; hi enim auxilio esse nequeunt. 4. Non contrahendum est Fœdus cum iis, quorum suspecta potentia; ne occasionem ad opprimendum socium arripiant. 5. Non facile contrahendum fœdus cum nimis remotis. Nam, quod ait Tacit. l. 3. Ann. *Ex distantibus terrarum spatiis, consilia post res afferuntur.* 6. Fœdera semel contracta, sanctissime sunt servanda; plerunque enim juramento firmanur: tum vero graves poenæ solent manere fœdifragos. 7. Si una paciscentium pars fœdus violaverit, licitum est alteri quoque ab eodem recedere.

Licetne cum Infidelibus Fœdus pangere?

Si *Jus Naturæ* consulatur, licet utique cum Infidelibus fœdus pangere, præcipue si non contrahatur animo nocendi. Jus enim Naturæ discrimen Religionis non attendit, sed potius permittit cuique defensionem, & eo fine alterius, quicunque is fuerit, auxilium. Sed nec *Juri Divino* repugnant ejusmodi fœdera: quod Fœdus Labanis & Jacobi, Genes. XXXI. Salomonis & Hiram Tyrriorum Regis, 1. Reg. V. testantur. Interim, non temere, nec nisi ob causam urgentissimam, ejusmodi fœdera sunt contrahenda. Unde Franciscus I. Rex Galliarum, ob Fœdus cum Turca initum

initum, Anno 1544. in Comitibus Spirensibus communis Christianorum hostis fuit declaratus.

Quid est Neutralitas?

Neutralitas, est status, quo Princeps, vel Respubl. finitimis inter se bellum gerentibus, non tantum a societate belligerantium abstinet, & neutram partem juvat, verum etiam illorum causæ se non admiscet; sed potius prudenter & caute inter illos se gerit medio modo, ob tranquillitatem, & salutem boni publici.

Estne consultum Neutralitatem arripere?

Machiavellus c. 21. de Principe, Neutralitatem disuadet, & satius esse putat, vel vere amicum vel inimicum se ostendere: cum Neutralis cedat in rapinam victoris, & ea sit belli natura, ut is judicetur communis hostis, qui non fert suppetias. Hinc Neutrales quidam comparant grano inter duos molares lapides interjecto; alii iis, qui mediam domus partem incolunt. Enim vero, est tamen aliquando utile, neutras partes sequi. Nam, ut ait Sen. ep. 106. *Odium evitabis, neminem laceffendo*: testaturq; experientia, Neutralitatem sæpe Rebusp. magnæ fuisse utilitati.

CAPVT XXIV.

De Legationibus.

Opusne est Principi Legatis?

OMnino opus est Principi Legatis. Sæpe enim incidunt tempora, in quibus inter Summos Principes quædam tractanda sunt, quæ tamen ipsi, partim ob periculum, partim ob causas alias, per sese expedire

dire nequeunt. Hinc necessitas induxit, ut ejusmodi negotia publica per alios, nomine Superiorum, tractentur, iique, quoniam ad alios ablegantur & mittuntur, Legati dicuntur. His autem Majestas Principis personam imponit, eosque illustri dignitate & potestate exornat: unde etiam illi, qui munus Legati sustinent, mittentis personam referunt.

Quid est Legatus?

Legatus est publicus mandatarius, missus ab eo, qui potestate mittendi præditus est, ad sui similem, ob publicum aliquod negotium perficiendum.

Quæ respicienda sunt in eligendo

Legato?

In Legato eligendo, respicere oportet ad Ingenii pariter & Corporis dotes.

Quæ sunt Ingenii Dotes, Legato

necessariæ?

Ad Dotes Ingenii, Legato necessarias, pertinet:

1. *Varia Eruditio*, ut is multarum rerum sibi paraverit scientiam.
2. *Felicis memoria promptitudo*, ut teneat, quæ ab aliis fuere prolata, quæque ipse dixit.
3. *Prudentia*, quo in actionibus se circumspectum & providum præbeat.
4. *Judicii Rectitudo*, ut de iis, quæ objiciuntur, recte judicare valeat.
5. *Experientia*, quæ prudentiam auget, ac judicium recte firmat.
6. *Constantia animi* in rebus magnis, ne se patiatur dimoveri a justo proposito, licet adversi quid acciderit.
7. *Eloquentia*, quæ non tam consistit in prompto eloquio, quam in gravitate sententiarum, quæ facundo sermone exprimuntur.
8. *Probitas*,

per

per quam intelligitur animi & vitæ integritas, ne donis se corrumpi patiatur, ac semper & ubique Superioris sui commodum unice respiciat.

Quæ sunt Corporis Dotes, Legato necessaria?

Ad Corporis Dotes in Legato requiritur: 1. *Sanitas*: corpus enim morbis obnoxium, ad labores perferendos, & longum iter sustinendum, ineptum est. 2. *Corporis Decor*, & gravitas. 3. *Iusta Ætas*: nam, nec adolescentibus, nec senibus munus hoc imponi debet. Huc referunt quoque aliqui *Bona Fortuna*: nimirum, natalium honestatem, dignitatem officiorum, & divitiarum copiam.

Quibus rebus muniendus est Legatus?

Legatus muniendus est Mandato, & Instructione, quin & literis Creditivis, ac Sumtibus.

Quid est Mandatum?

Mandatum continet mandantis iussum, cum potestate illud perficiendi.

Quid est Instructio?

Instructio consistit in mandati interpretatione, qua Legato certa præscribitur forma, & modus exequendi mandatum.

Quid sunt Literæ Creditivæ?

Literæ Creditivæ sunt, quibus Legatus commendatur ei, ad quem mittitur, & fides illi fit. Vocantur hæ Literæ alio nomine *Credentiales*.

Quare Sumtibus muniendus est Legatus?

Sumtibus muniendus est Legatus, ut dignitatem sui Principis tueri queat.

In quibus consistit Legati officium?

Legatus, suscepta Legationis provincia, 1. actum se itineri accingere debet. 2. Transiturus per alienas Regiones, Dominum territorii de adventu suo reddat certiore. 3. Via solita & Regia illi tenenda. 4. Adventus e propinquo ei significandus, ad quem mittitur, ut debito suscipiatur modo. 5. Introitus in Urbem, ordine decenti, & convenienti distributione equitum, curruum, famulorum, instituendus. 6. Post adventum petere debet Legatus, ut audiatur; ac literæ credentiales ab eo offerendæ sunt. 7. Mandatum, cum admissus fuerit, claris & perspicuis verbis proponendum est. 8. Mandato proposito, responsum modeste exigendum est. 9. Non immisceat se Legatus rebus alienis, & ad se nihil pertinentibus. 10. Mandati fines diligenter observandi sunt: quod si vero aliquid præter spem de novo emergat, novum mandatum exigat. Clausula enim communis, *Cætera tuæ prudentiæ & fidei committimus*, non attinet ad ipsum Legationis actum, sed tantum ad articulos, & modos speciales rei gerendæ. 11. In graviorum rerum tractatione, petendum, ut responsi formula literis consignetur.

Quanam sunt Privilegia Legatorum?

Legatorum Privilegia varia sunt: Vti 1. quod, dum absunt, si domi conveniantur, non coguntur mittere procuratorem. 2. Vacationem a muneribus Reipubl. obtinent, non modo in ipsa Legatione, sed & biennio post, l. 8. §. 1. ff. de Legation. 3. Communi omnium gentium consensu, Legati sacri sunt, & inviolabiles.

Quæ sunt Legationum Genera?

Legationes variant, pro varietate causarum, quæ Legationem postulant, & pro arbitrio mittentium. Hinc aliæ Legationes sunt *Negotiosæ*, quæ ob Bellum, vel Fœdus, vel Sponsalia, vel res alias ejusmodi discernuntur. Aliæ sunt *Officiosæ*, quæ fiunt ad gratulandum, aut testandum dolorem.

CAPVT XXV.

De Moneta.

Quid est Moneta?

Moneta, est materia ut plurimum metallaris, & autoritate Principis caractere aliquo notata, habensque legitimum pondus, ut sit emtionis, & venditionis, aliorumque contractuum perficiendorum legitimum instrumentum.

Quæ sunt Monetae necessaria Requisite?

Monetæ necessaria Requisite sunt tria: Materia, Forma, & Valor.

Quid est Materia Monetæ?

Materia Monetæ, est qualitas & bonitas intrinseca, *Schrot und Korn / Gehalt und Gewicht*: estque vel Aurea, vel Argentea, vel Ærea. Non tamen ex puro auro & argento hodie cuduntur Nummi, sed plerumque alia materia, certi ponderis, addi solet. In hac Temperatura ne fraus committatur, certi auro, argento, & æri flando constituti præfecti, & ponderatores, qui olim *Zygoſtatae*, l. 2. C. de *Ponderatoribus*, dicti, nunc vocantur, *die Wardeine*.

Quid est Forma Moneta?

Forma Monetæ, est nota sive signum publicum, ipsi numo impressum, unde ejus publica autoritas, & valor cognoscitur.

Quid est Valor Moneta?

Valor Monetæ, est ejus publica æstimatio, per quam difficultatibus permutationum subvenitur, der Werth oder Wardirung. Debet autem, in Numis probis, extrinseca æstimatio intrinsecæ bonitati respondere.

CAPVT XXVI.

De Dominio Eminente.

Quid est Dominium Eminens?

Dominium Eminens, quo vocabulo primum Grotius in libro de Jure Belli & Pacis usus fuit, est summa potestas Principis, vel alterius Reipubl. in possessiones, & bona Civium, ob utilitatem publicam, libere de iis disponendi. Potest igitur summus imperans, necessitate, vel bono publico id flagitantibus, bona, & opes Civium deponere, aut eorum aedes destruere, vel circumjacentes hortos, & agros vastare, ut Civitas eo firmitus possit muniri.

Estne Compensatio in ejusmodi casu necessaria?

Æquitas suadet compensationem, nullum vero strictum jus eam urget, ita ut, si damnum compensari nequeat, æquo animo illud ferendum sit. In omni enim societate, etiam maxime civili, quilibet salutis publicæ est obstrictus re, quin & corpore. Sarcit quidem acceptum damnum, si potest, Respubl. at magis

in præmium, quam ex debito; itaq; si non potest, necessum est, ut pars quæque ferat, quod mutari non potest, ob reliqui corporis salutem.

CAPVT XXVII.

De Modis perveniendi ad Imperium.

Quot Modis paratur Imperium?

Imperium paratur vel Electione, vel Successione, vel Occupatione.

Quomodo se habet Electio?

Electio, ratione *Causæ*, fit vel ab omni populo, vel ab Optimatibus. Ratione *Modi*, distinguitur in eam, quæ fit per suffragia, vel per sortem. Vota sunt vel plane libera, vel ad certum quendam ordinem, ac certas personas restricta.

Quomodo se habet Successio?

Successio imprimis fit ratione generis & agnationis, quando Liberi in Imperio succedunt Parentibus, vel etiam proximi Agnati. Ad hanc successionis speciem, pertinent *Pacta Gentilitia* in illustribus familiis, per quæ constituitur, ut, alterius stirpe extincta, ad alterum Principatus, certa successionis lege, perveniat. Fit amplius successio ratione Desponsationis, Emptionis, Permutationis, Donationis, itemque Testamentariæ Dispositionis.

Quomodo fit Occupatio Imperiorum?

Occupatio Imperiorum fit per bellum justum & legitimum. Juris enim est naturalis, ut, quæ ex hostibus capiuntur, dominio Victoris subiciantur.

Estne Successio Electioni, an hac illi præferenda?

Quæ melior, ac laudabilior sit, Successio ne, an Electio, inter dubia rationum momenta multis disceptatur, & pro utraque gravissima non desunt argumenta. Nam, in *Electione* plus dissidii est, sed & plus libertatis: in *Successione*, nihil quidem dissidii, sed & nihil libertatis. Præterea, judicia, si ita loqui licet, naturæ, ut aliquando recta, ita sæpe cæca sunt, dum ex optimis Principibus aliquando pessimi nascuntur. Judicia hominum certa magis sunt; sed & hæc sæpe fallunt, ac falluntur, dum haud raro illi eliguntur, qui imperio jam præpositi, indigni Imperio, & impares deprehenduntur. Pro utraque igitur, & contra utramque, militat ratio. Interim de eo inter omnes constat, id in Republ. retinendum esse, quod diuturnus confirmavit usus. Quippe, quæ in suo statu manent, magis Reipubl. conducunt, quam ea, quæ per innovationem inducuntur, si maxime meliora appareant. Bene autem electus est Princeps, qui, nisi electus foret, nasci debuisset: bene natus est, qui, nisi natus esset, debuisset eligi.

CAPVT XXIIIX.

De Jure Primogenituræ.

Anne Jus Primogenituræ æquitate nititur?

EX consuetudine omnium fere gentium, Regna & Principatus ad unum devolvuntur, & quidem Primogenitum; idque eorundem salus postulat. Portionibus enim si dividantur, viribus simul privabuntur. Finge enim, supremum aliquem Principatum inter filios dividi; aut 1. distrahitur in distinctos Principatus, quorum singuli sunt pari potestate: aut

2. divisi Principatus administrantur ab omnibus, pro rata parte, adinstar unius. Si *primus Modus* assumatur, dubium nullum erit, quin nervus virium in tantum diminuatur, in quantum partes illæ divelluntur, in quarum multitudine unita omne robur consistit. *Alterum si assumas modum*, multo gravioribus turbis implicatur Respubl. Quia indivisa illa potestas, ubicunque introducta fuit, semper per contentionum præcipitia delapsa est aut ad *ἀναρχίαν*, aut ad unius dominatum, propter impatientem consortii potestatem. Interim primogenitus, si solus imperat, reliquis fratribus, quin & sororibus, de alimentis, eorum conditioni congruis, prospicere omnino debet; quod *Apanagium* vocant.

Estne Filius primogeniti in successione Patris præferendus?

Æquum esse videtur, ut filius primogeniti in successione patris præferatur. Expediti enim juris est, filium succedere in locum patris. Jam is, qui in locum alterius succedit, eodem jure utitur, quo usus est antor illius, cap. is qui 46. de R. I. in 6. & surrogatum sortitur naturam surrogati, participatque de omnibus illis privilegiis, cui surrogatur. Filius ergo iste, uti in omnia parentis succedit jura, ita & in successione Imperiorum; id quod etiam communis usus comprobatur.

CAPVT XXIX.

De Senatu.

Quid est Senatus?

Senatus, etsi alicubi simul jus decernendi, & sententiæ dicendæ habet, tamen in se spectatus, & pro-

ut ejus objectum consideratur, jurisdictione caret; cum proprie versetur in dandis consiliis, quæ ad totius Reip. finem ducunt. Est igitur Senatus ordo in Rep. qui de rebus ad bonum publicum spectantibus consultat, ad obtinendum finem propositum.

Quæ sunt Consilii Requisita?

Consilii Requisita tripliciter considerantur: 1. *Ratione Objecti.* Res enim, quæ sub consultationem publicam veniunt, oportet esse graves, arduas, & maximi momenti. 2. *Ratione Qualitatis,* consilium esse debet bonum. Bonitas autem consilii non æstimatur ex honestate morali, ac si tum demum bonum sit, cum non nisi id, quod honestum & justum est, suader: sed in ordine ad Remp. in quantum ei potest esse utile. 3. *Ratione Finis.* Semper enim pro oculis habendus est scopus Reipubl. ad quem, tanquam ad metam, cuncta dirigenda sunt Consilia.

Quid est Consiliarius?

Consiliarius est Minister Reipublicæ, qui prudentia, & consiliis Rempublicam juvat, ad obtinendum, vel conservandum finem propositum.

Quæ requiruntur in Consiliario?

In Consiliario requiritur, 1. Ut sit vir bonus. 2. Ut possit dissimulare & reticere, quæ in Republica consultantur. 3. Ut sit instructus prudentia civili, & sciat, quid suæ Civitati conveniat.

CAPVT XXX.

De Judiciis.

Quid sunt Judicia?

Judicia sunt juris, & injuriæ dijudicationes; quia plerique suis in rebus cæcutiunt, & affectibus ducuntur

tur, & ideo verum a falso discernere nequeunt. Hinc instituendus est aliquis, qui careat affectibus in expediendis negotiis, adeoque id quod justum, & æquum est pronunciet.

Quodnam est Judicis Officium?

Judicis Officium est: 1. Actoris querelam facile quidem audire, ita tamen, ut Reo defensionem, quam jus naturæ permittit, non deneget. 2. Causam exacte cognoscere, consideratis facti circumstantiis. 3. In ferenda sententia nihil gratiæ, nihil odio concedere, sed, sepositis affectibus, citra munerum corruptelam, secundum Leges receptas, justum & æquum pronunciare. 4. Pronunciatam sententiam exequi: Elusoria enim redditur autoritas judicis, si sententia lata non tradatur executioni.

CAPVT XXXI.

De Subditis & Parentibus.

Quid est verus Subditus?

Verus Subditus est, qui, in conditione parendi positus, Domino suo, & corpore, & rebus obligatus est. Nimirum sunt aliqui non ratione personæ, sed tantum *Bonorum* obligati Domino; unde illi nihil aliud debent, quam quod de bonis præstare oportet. Alii etiam, præter bona, obligati & subjecti sunt Domino, ratione *Personæ* suæ: & quidem, vel *Immediate*, ita, ut nulli alii prius debeant obsequium: vel *Mediate*, cum prius alii, quam summæ potestati, obedientiam exhibere tenentur.

Ad qua tenetur verus Subditus?

Verus Subditus tenetur, 1. ad *Fidelitatem*, qua se obligat, quod nihil mali de Principe suo loqui, omnem

perniciem ab eo avertere, & si in periculum incidat, ei vita, sanguine, & bonis succurrere velit. 2. Tenetur ad *Obsequium*, quod involvit vim parendi mandatis supremi Principis omnibus, quæ natura, vel moribus fieri possunt.

Suntne Peregrini Subditi?

Peregrini nequaquam veri sunt Subditi, sed tantum subditi temporarii, ratione Legum, quas pro eo tempore, in illo loco, ubi degunt, tenentur observare. Iniquum enim foret, si quis in aliqua degens Civitate, pro arbitrio quidvis agere, & Leges ejus violare vellet.

CAPVT XXXII.

De Interitu Rerumpublicarum.

Quibus modis interit Respublica?

Respublica interit, vel per Eversionem, vel per Conversionem.

Quomodo evertitur Respublica?

Respublica evertitur, quando penitus deletur, devastata civitate, interfectis civibus omnibus, nec non forma Regiminis abolita.

Quomodo convertitur Respublica?

Converti dicitur Respublica, quando, eodem manente populo, forma immutatur: uti, cum ex Monarchia fit Democratia, vel alia quædam mutatio circa regimen occurrit. Fitque mutatio omnis, vel per vim, vel per consensum.

Unde provenit Interitus Rerumpublicarum?

Interitus Rerumpublicarum provenit, vel a causis internis, vel a causis externis. Causæ internæ, sive in ipsa Republ. nascentes, proveniunt vel ab alterutra parte,

parte, h.e. vel a subditis, vel ab imperante tantum, vel a parte utraque simul.

*Quomodo Subditi causa sunt Interitus
Reipublicæ?*

Subditi causa sunt Interitus Reipublicæ, quando, sparsis primarum discordiarum igniculis, mox factionum & seditionum flammam excitant.

*Quomodo Imperans est causa Interitus
Reipublicæ?*

Imperans est causa Interitus Reipublicæ, 1. Quando imperii fasces intempestive deponit. 2. Cum autoritatis suæ aciem hebescere patitur. 3. Cum leges, diuturno usu confirmatas, temere abrogat. 4. Si crudelitatem exercent, & in corpora, aut fortunas subditorum sæviat. 5. Cum suas, perperam conceptas, opinionones, recte sentientium consiliis anteposit. 6. Cum minus necessaria, & viribus majora, temere suscipit.

*Quomodo Subditi & Imperantes simul causa
sunt Interitus Reipublicæ?*

Subditi, & Imperantes, simul mutationum, & eversionum causæ existunt, 1. Si potentia sua superbi, & securi, vel nulla, vel non sana admittunt consilia. 2. Si effœminati, otii que dulcedine molles, rerum necessariarum usum deponunt.

*Quanam sunt causæ externa ruina Rebus-
publicis afferentes?*

Quidam inter causas externas, Rebuspublicis ruina afferentes, palmarium locum tribuunt *Fato*. Per hoc autem si intelligunt Providentiam Divinam, qua disponuntur, & gubernantur res, usque ad præfinitum terminum, haudquaquam errant. Etenim Deus sua

cuique Regno initia, progressus, incrementa, & interitum, iuxta voluntate decrevit. Hinc Ps. XLIV. dicitur: *Manus tua gentes disperdidit, & plantasti eos: afflixisti populos, & expulisti eos. Nec enim in gladio suo possederunt terram, & brachium eorum non salvavit eos: sed dexteratua, & brachium tuum, & illuminatio vultus tui: quoniam complacuisti in eis.* Fatum autem Stoicum omnino hinc removendum est; quod definiunt, sempiternam quandam, & ineluctabilem seriem rerum, & catenam volventem semetipsam, & sese implicantem, per æternos consequentiæ ordines, ex quibus nexa est. Atque ita putant, Rempublicam mutari necessario, ut, quamvis sint, qui laboranti Civitati velint succurrere, & etiam sciant remedia, non possint ea tamen adhibere, fato omnia consilia impediende. Cæterum, præter Providentiam Divinam, cui, uti hominum actiones civiles, ita integræ quoque Respublicæ curæ sunt, reperiuntur quoque causæ humanæ externæ Rebuspublicis exitiales. Quales sunt, 1. Sociorum, vel ad hostes desilientium, vel suppetias nobis non ferentium defectio. 2. Eorum, qui subsunt nostræ potestati, rebellio. 3. Peregrinorum irruptio. 4. Bellorum externorum diuturnitas.

CAPUT XXXIII.

De Remediis adversus causas, quæ interitum Rebuspubl. afferunt.

Quenam sunt Remedia contra seditionem, quæ Subditi Rempubl. evertunt?

Remedia contra seditionem consistunt, 1. in cautione & præmunitione seditionum, ne turbæ excitentur.

citentur. 2. In Emendatione opportuna, priusquam motus incipientes sumserint vires, & ad perniciosioris tumultus effectum proveniant. 3. In pœna & suppliciis, quo alii ab ejusmodi strepitu deterreantur. 4. Si vires egerit seditio, bello, & fortioribus agendum est remediis.

*Quomodo Magistratus tollit causas Rempubl-
cam affligentes?*

Magistratus tollit causas Rempubl. affligentes, 1. Si justo tempore imperii fasces deponat. 2. Autoritas ei conciliatur & conservatur, si prudentia & virtute subditorum animos sibi conciliaverit, & publicæ salutis unicam curam gerat. 3. Prudentium virorum consiliis bonis locus dandus est. 4. Leges veteres, non nisi aut utilitate summa suadente, aut necessitate summa urgente, sunt abrogandæ. 5. Contra crudelitatem, & flagitia Superiorum, necesse est constituere Ephoros, quorum erit, sedulo cavere, ne Magistratus degenerent.

*Quæ sunt Remedia adversus mala Rerumpublicarum, quæ a Subditis & Magistratu simul
proveniunt?*

Contra mala, quæ a Subditis, & Magistratu simul proveniunt, remedium perutile existimatur, ut summi Imperantis potentia quodam quasi fræno coercetur, quin & Inferioris Magistratus potentia obviam ire necesse est. Id quod fiet, 1. Si adversus potentiam unius, vel plurium, alius creetur Magistratus, cui illorum acta interturbandi facultas concessa. 2. Si, præsertim in Aristocratia, & Democratia, imperia non sint perpetua. 3. Si inter plures æqualiter potestas dividatur. Subditorum imminuitur & comprimitur poten-

potentia, cum opes pro arbitratu congerendi, honores ambiendi, aliave, quibus potentia robur & augmenta sumit, parandi, fibula imponitur, Cives quoque præmiis, vel etiam præniis, ad artes & bellica exercitia tractanda adiguntur.

Qua sunt Remedia adversus causas externas, quæ ruinam Rebus publicis afferunt?

Remedia adversus causas externas, ruinam Rebus publicis afferentes, sunt Pietas erga Deum, & vitæ emendatio. Adde huic fidem & benignitatem erga socios, fœdera cum vicinis, æquas pacis, ad bella finienda, conditiones.

CAPVT XXXIV.

De Ratione Status.

Quid est Ratio Status?

Ratio Status, recenti, & ab Italis inventa appellatione, dicitur prudentia extraordinaria regendi Rempublicam, & dirigendi media ad salutem Imperii & Imperantis; ita ut, si incidant tempora, ubi non licet secundum ordinarias Regulas imperium exercere, ad extraordinaria media confugere liceat. Quicquid igitur sit ex Ratione Status, seu utilitate Reipublicæ, quod in se non adeo justum videtur, id excusationem meretur, ita ut, licet in se non sit justum, spectato fine Reipublicæ, non sit injustum, quia aliter Respublica regi & conservari non potest.



SYNOPSIS
PHYSICÆ.



PHYSICÆ PARS GENERALIS.

CAPVT 1.

De Natura Physicæ.

Quid est Physica?

Phyfica, est scientia corporis naturalis, quatenus est naturale; hoc est: Versatur in corpore naturali cognoscendo, ejus principiis investigandis, & proprietatibus ac operationibus explicandis. Igitur restrictio, *quatenus est naturale*, notat, Physicam non attendere ad ea, quæ corpori præter naturam extrinsecus accedunt; sed ad illa tantum, quæ ad ejus naturam pertinent, vel ex illa fluunt. Physica dicitur alio nomine *Physiologia*, item *Scientia Naturalis*.

Quomodo dividitur Physica?

Physica dividitur in Partem Generalem seu Communiem, & Specialem seu Propriam.

Quid est Pars Generalis?

Pars Generalis seu Communis est, quæ corpus naturale, cum principiis & proprietatibus suis, in genere considerat.

Quid est Pars Specialis?

Pars Specialis est, quæ corporis naturalis species, earumque affectiones & proprietates considerat.

CAPVT II.

De causis corporis naturalis.

Quid est corpus naturale?

Corpus naturale, est talis substantia, in qua motus & quietis inest principium: sive, est substantia extensa in longum, latum, & profundum.

Quæ sunt causæ corporis naturalis?

Causæ Corporis naturalis sunt principia, quæ in esse illius influunt: & dividuntur in Internas, & Externas.

Quæ sunt causæ Internæ?

Causæ Internæ sunt, quæ Corporis Naturalis essentiam ingrediuntur, ut Materia & Forma.

Quæ sunt causæ Externæ?

Causæ externæ sunt, quæ corporis naturalis essentiam non ingrediuntur, sed extrinsecus illud constituunt: ut Efficiens & Finis.

Quid est Materia?

Materia, est causa interna, ex qua corpus naturale constituitur. Vti mixtum ex elementis, est materia auri, hominis.

Quid est Materia Prima?

Materia prima, est primum cuiusq; rei subiectum, ex quo insito, non ex accidente, aliquid oritur, & in quod, si quid interit, ultimo abit. Nimirum, Materia prima nominatur *subiectum*, quia formis subijcitur, & eas in se recipit. Dicitur autem *primum subiectum*, ut a materia secunda secernatur, quæ etiam subijcitur formis, sed non est primum subiectum. Illud ali-

quid.

quid, quod ex materia oritur, corpus est. Ex hoc subiecto *insito* dicitur corpus oriri, ut significetur, materiam per modum partis in corpore dari. Additur, *non ex accidente*, ut removeatur privatio, & ablegentur accidentia. Si quid vero interit, hoc *ultimo* abit in materiam primam; quia res resolvitur in ea, ex quibus constat. Proinde habet materia prima potentiam ad omnes formas successive recipiendas: at vero materia secunda habet tantum potentiam particularem ad recipiendum formam certam, ad quam est disposita.

Quid est Forma?

Forma, est causa interna, per quam corpus naturale, si materiae uniatur, constituitur; vel, Forma est, per quam corpus in certa specie constituitur, & convenienter naturæ suæ operatur. Sic *rationalitas* est forma hominis.

Quid est Privatio?

Privatio, est absentia formæ in subiecto, cum aptitudine materiae ad eam recipiendam. Sic in ovo est carentia formæ, quæ est propria pulli, ita tamen, ut ovi materia ad pulli formam recipiendam habeat aptitudinem.

Quid est Entelechia?

Entelechia, est peculiare Aristotelis nomen, & notat formam seu actum quemcunque, sive substantialem, sive accidentalem, quatenus operationem aliquam in corpore exercere potest.

Quid est Natura?

Natura, est causa interna, qua quodvis corpus naturale suam habet essentiam, affectiones, actiones, & passionēs.

Quid

Quid dicitur esse a natura?

A natura esse dicuntur, 1. quæ sunt congenita: uti avibus a natura competit volare. 2. *A natura* esse dicuntur, quæ non sunt congenita, progressu tamen temporis subjectis habilibus competunt: sic pueris dentes a natura inesse dicuntur. 3. *A natura* inesse dicuntur, quæ neque sunt congenita, neque sua sponte successu temporis proveniunt in subjectis capacibus, sed industria nostra parantur. Hoc modo a natura nobis inesse dicitur notitia primorum principiorum. 4. *A natura* esse dicuntur, ad quæ a natura magis sumus proclives: ut, cum is nasci dicitur poëta, qui majorem ad poësin habet inclinationem. Jam, *Præter Naturam* evenire dicuntur ea, quæ quidem aliter fiunt, ac eorum natura requirit, non tamen simpliciter ei repugnant, nec cum illius rei interitu fiunt: ut, cum lapis movetur in latus. *Contra Naturam* eveniunt, quæ fiunt causis secundis ita inter se luctantibus, ut una earum, virtute scilicet inferior, alterius, tanquam fortioris, virtute subacta & victa, licet reluctetur & contra nitatur, cedere cogatur, cum suo vel interitu, vel magno alio incommodo: uti, cum ignis extinguitur ab aqua; aut lapis in altum projicitur. *Supra Naturam* fieri dicuntur, quæ a nullo agente naturali fieri possunt, sed vires agentium creatorum transcendunt: ut, cum a Christo vinum ex aqua fuit productum.

Quid est Causa Efficiens?

Causa Efficiens, est causa externa, a qua corpus naturale producitur.

Quid est Finis?

Finis, est causa externa, propter quam corpus naturale producitur: v. c. Arbores seruntur, ut fructus edant.

Quid est Fortuna?

Fortuna, est causa per accidens, in actionibus hominum certo consilio susceptis, quando cum effectu per se intento, conjungitur aliud quid, quod non intendebatur: v. g. *Si quis terram fodiens, ut fructus feliciter proveniant, thesaurum invenit.*

Quotuplex est Fortuna?

Fortuna est Duplex: Bona, & Mala.

Quid est Fortuna Bona?

Fortuna Bona est, quando eventus, qui accidit, bonus est: uti, cum *rusticus, terram fodiens, reperit thesaurum.*

Quid est Fortuna Mala?

Fortuna mala est, quando eventus, qui accidit, malus est: uti cum *rusticus, terram fodiens, frangit rutrum.*

Quid est Casus?

Casus, est causa per accidens, quando cum illorum, quæ sine electione agunt, effectu aliquid raro conjungitur: uti cum *tegula, de tecto decidens, prætereuntis caput pertundit.*

Quid est Monstrum?

Monstrum, est effectus naturalis, cum insigni aliqua deformitate, a causa deficiente & aberrante productus: ut *homo biceps, aut monocolus.*

Quotuplex est Miraculum?

Quoniam miraculum est præter naturalem potentiam subjecti, ac tripliciter quid esse potest præter naturalem potentiam, hinc ipsum Miraculum quoque triplex est. Primo modo aliquid præter potentiam naturalem est *secundum se totum*, sive secundum ipsam substantiam facti: ut Solem consistere, sive retrogradi;

cor-

corpus quantum non esse in loco; aut grave non descendere. Secundus modus, est *ex parte Subjecti*, in quod actus introducitur: uti, cum vita redditur mortuo, aut visus restituitur cæco. Nam, licet neque vita, neque visus, actus sint extra potentiam naturæ, & possint naturaliter fieri, non tamen id fit in corpore mortuo, & ad corruptionem disposito; neq; in oculo perfecte privato, aut corrupto. Tertius modus concernit *rationem, sive modum*, quo actus in subiectum introducitur: ut, cum miraculose sanitati restituantur agroti. Leprosum enim, febricitantem, aut paralyticum sanari, non est præter potentiam naturæ, ne quidem in illis subiectis: verum isto modo sanari, scilicet in momento, solo verbo, nihil adjuvantibus ullis medicamentis, præter potentiam naturæ est.

Quid est agens immediatione suppositi?

Agens immediatione suppositi est, quod patiens per proprium suppositum contingit: uti *serra secans lignum*.

Quid est agens immediatione virtutis?

Agens immediatione virtutis est, quod patienti, non per suppositum, sed qualitatem, conjungitur: uti, *cum ignis remotus manum lædit per calorem*.

Quid est Fatum?

Fatum, est ordo in causis naturalibus, effectus suos infallibiliter inferentibus, a Deo præcognitus, & præordinatus.

Quid est Fatum Theologicum?

Fatum Theologicum, est æternum decretum Dei, de omnibus rerum eventibus, in præcipiendo, agendo, permittendo, & determinando consistens.

Quid est Fatum Astrologicum?

Fatum Astrologicum, est astrorum in corpora inferiora influentia, varie ista regens ac dirigens. Sic fato fiunt Eclipses, Tonitrua.

Quid est Fatum Physicum?

Fatum Physicum, est omnium causarum naturalium ordo, effectus necessarios inferens, Deo naturæ autori subjectus: Sic fato fiunt frigora, venti.

Quid est Fatum Stoicum?

Fatum Stoicum, est absoluta rerum necessitas, ex siderum influxu, & aliarum causarum connexu orta, omnes actiones, cum humanas, tum divinas, respiciens: unde Deum quoq; Fato Stoici subijciebant.

CAPVT III.

De Affectionibus Corporis Naturalis.

Quid est Affectio Corporis Naturalis?

Affectio corporis naturalis, est proprium quarti modi, quod ex ejus essentia fluit, omni, & soli corpori naturali semper inest, vel adest, & cum eo reciprocatur: ut, esse quantum, esse locabile, mobile.

Quid est Quantitas?

Quantitas, est affectio intrinseca corporis naturalis, qua illud est extensum, habetque plures partes, quarum una est extra alteram. Sic arbor constat partibus, quarum quælibet ita comparata est, ut sit extra alteram corporis illius partem.

Quid

Quid profluit ex Quantitate?

Ex Quantitate profluit Corporis Naturalis *Mensurabilitas, Divisibilitas, & Impenetrabilitas.*

Quid est Mensurabilitas?

Mensurabilitas, est ea in corpore quanto aptitudo, juxta quam ad certam mensuram, qua ejus magnitudo significatur, applicari potest.

Quid est Divisibilitas?

Divisibilitas, est ea extensi dispositio, a qua partes extra partes habere concipitur, in quas vel cogitatione, vel actuali separatione dividi potest.

Quid est Impenetrabilitas?

Impenetrabilitas, est unius extensi ab alio distinctio, per quam fit, ut unius extensio, ab alterius extensione sit diversa; ita, ut non possint duo extensa esse in uno & eodem loco, sed semper unum excludat alterum: unde verissime dicitur, *fieri non posse, ut dimensionum detur penetratio.*

Quid est Figura?

Figura, est quantitatis determinatio, extrinsecus in superficie corporis apparens: ut *figura hominis, equi.*

Quid est Qualitas?

Qualitas, est affectio intrinseca corporis naturalis, qua illud est potens ad agendum, vel patiendum: ut *lux, calor, frigus.*

Quid est Qualitas Activa?

Qualitas Activa est, qua corpus naturale est potens ad agendum: ut *caliditas ignis.*

Quid est Qualitas Passiva?

Qualitas Passiva est, qua corpus naturale est potens ad patiendum : ut *potentia ad concipiendum ignem in sulphure.*

Quid est Qualitas Manifesta?

Qualitas Manifesta est, quæ in sensus incurrit, proprioque nomine a nobis designatur : ut *caliditas, frigiditas.*

Quid est Qualitas Occulta?

Qualitas Occulta est, quæ sensus fugit, proprioque nomine designari nequit : ut *qualitas magnetis attrahentis ferrum.*

Quid est Magia?

Magia, est habitus rerum abditarum, scientia, & arte operum admirandorum, constans.

Quotuplex est Magia?

Magia est duplex : Naturalis, seu Licita; & Dæmoniaca, seu Illicita.

Quid est Magia Naturalis?

Magia Naturalis, est habitus ex libro naturæ acquisitus : uti, cum paratur *lapis Philosophorum.*

Quid est Magia Dæmoniaca?

Magia Dæmoniaca, est privatio habitus, quem in mancipiis suis supplere conatur Dæmon. Estque vel Divinatoria, vel Præstigiatoria, vel Effectoria.

Quid est Magia Divinatoria?

Magia Divinatoria, est rerum abditarum, ope Dæmonis, parta cognitio : uti sunt *divinationes per Sortes, Pelves, Annulos, Criba.*

Quid

Quid est Magia Præstigiatoria?

Magia Præstigiatoria, est mirandorum operum, sed apparentium, ope Dæmonis, productio. Sic *Magi hominibus cornua apponunt, currus & equos devorare videntur.*

Quid est Magia Effectoria?

Magia Effectoria, est admirandorum operum realium, auxilio Diaboli, productio: uti, cum *Sagæ fruges perdunt, pecora ledunt.*

Quid est Fascinatio?

Fascinatio alia est Naturalis, alia Magica. *Fascinatio Naturalis*, est alteratio corporis, propter spiritus noxios, in ipsum, ab intuentis oculis vel ore, emissos: uti, cum vetulæ suo aspectu infantes ledunt. *Fascinatio Magica*, est infectio corporis, procedens ex malitia intuentis, & a dæmone facta: uti, cum sagæ morbos inferunt.

Quid est Locus?

Locus, est affectio extrinseca corporis naturalis, si-
ve ejusdem superficies ambiens, qua illud occupat
suum spatium, longum, latum, & profundum. Sive:
Locus est corporis, certam magnitudinis suæ mensu-
ram & figuram habentis, respectiva inter corpora am-
bientia collocatio.

Quid est Locus Naturalis?

Locus Naturalis est, ad quem locatum sua natura
fertur, in eoque conservatur: Sic *Aqua locus natura-
lis est piscium, Aër hominum.*

Quid est Locus Violentus?

Locus Violentus est, ad quem locatum vi detru-
ditur, & in quo conservari nequit. Sic, *Aqua est lo-
cus hominis violentus, Aër piscium.*

Quid est Locus Communis?

Locus Communis est, qui multa corpora simul continet: Sic, *Aër communis locus est hominum; Aqua piscium.*

Quid est Locus Proprius?

Locus proprius est, qui tantum unicum corpus continet: Sic, *spatium, quod Petrus occupat, proprius Petri locus est.*

Quid est Vacuum?

Vacuum, est locus carens corpore, ad quod tamen recipiendum est aptus. Natura abhorret a vacuo, quia res naturales amant mutuam cohesionem, ut in se invicem influere queant.

Quid est Tempus?

Tempus, est affectio extrinseca corporis naturalis, qua duratio illius, in se indistincta, distinguitur secundum motum corporum coelestium. Sic, duratio Petri, quæ continuatus vitæ tractus est, secundum motum Solis & Lunæ, in Annos, Menses, Dies & Horas dispescitur. Proinde, accurate loquendo, Mundus non in tempore, sed cum tempore, in principio fieri cœpit, & inde sex dierum lapsu, ad consummatam perfectionis perductus est fastigium.

Quomodo dividitur Tempus?

Tempus dividitur in Præteritum, quod fuit: In Præsens, quod est: In Futurum, quod erit.

Quid est Motus?

Motus est quævis mutatio, qua dissimilitudo ali- in corpore naturali oritur.

Quid

Quid est Motus Localis?

Motus Localis, est affectio disjuncta corporis naturalis, qua illud alium atque alium acquirit locum. Sive, Motus localis, est translatio corporis definiti, ex vicinia corporum immediate illud contingentium, in viciniam corporum, aliorum. Vnum autem corpus alteri prementi cedit, & cedens contiguum propellit. Sic movetur Petrus, cum de loco in locum se confert.

Quid est Motus Naturalis?

Motus Naturalis est, qui a causa interna oritur: uti, cum lapis tendit deorsum, homo ambulat.

Quid est Motus Violentus?

Motus Violentus est, qui a causa externa oritur: ut, cum quis lapidem in alium projicit.

Quotuplex est Motus Localis?

Motus Localis est vel *Rectus*, qui fit per lineam rectam: vel *Circularis*, qui fit per circulum, vel circa centrum: vel *Vagus*, qui ex Recto & Circulari simul constat, & lineas simplices non observat.

Quid est Generatio?

Generatio, est mutatio a non esse ad esse.

Quid est Corruptio?

Corruptio, est mutatio ab esse, ad non esse. Atque fiunt tam Generatio quam Corruptio per motum instantaneum. In *instanti* enim *introduci* dicitur forma per generationem in totam materiam, pro ejus susceptione dispositam; sicut in *instanti* ab ea dicitur separari per corruptionem: non autem hic excluduntur præviæ dispositiones.

Quid est Augmentatio?

Augmentatio, est mutatio minoris quantitatis in maiorem, usque ad terminum a natura præfinitum: uti, *cum puer crescit.*

Quid est Diminutio?

Diminutio, est motus, quo res naturalis, salva sua essentia, a maiore quantitate ad minorem abit.

Quid est Quies?

Quies, est affectio disjuncta corporis naturalis, qua illud locum non mutat, sed fixum ac firmum perstat: Sic *terra quiescit.*

PARS SPECIALIS.

CAPVT I.

De Mundo & Cœlo.

Quid est Mundus?

Mundus, est systema, ordinatum ex cœlo & terra, reliquisque corporibus, quæ his continentur.

Quotuplex est Corpus Naturale?

Corpus Naturale aut est Simplex, aut Compositum, siue Mixtum.

Quid est Corpus Simplex?

Corpus Simplex est, quod ex aliis corporibus, elementis nimirum, non constat, nec in ea resolvi potest: uti *Cœlum, & Elementa.*

Quid est Corpus Mixtum?

Corpus Mixtum est, in quo alia corpora insunt, in quæ etiam resolvi potest: uti *Arbor, Lapis, Aurum*

Quid

Quid est Cælum?

Cælum, est corpus simplex, supremum & primum, amplissimum, subtilissimum, pellucidum, permeabile, omnia corpora inferiora ambiens, & stellas, quæ in ipso moventur, in se continens.

Quid est Stella?

Stella, est corpus simplex, cæleste, globosum, lucidum, &, vi sibi divinitus indita, in orbem mobile.

Quomodo dividuntur Stellæ?

Stellæ dividuntur in Fixas, & Erraticas.

Quid sunt Stellæ Fixæ?

Fixæ stellæ dicuntur, non quod in cælo sint omnino immobiles; omnes enim Stellæ moventur: sed ideo nomen hoc habent, quia, in extrema cæli regione consistentes, fixam atque invariata a se invicem retinent distantiam.

Quot sunt Stellæ Fixæ?

De Numero Stellarum Fixarum accurate non constat. Vulgo mille viginti duæ numerantur: sed Recentiores, in solo Orione bis mille stellas numerant.

Qui sunt Asterismi?

Asterisimi, qui etiam Astra, Sidera, Constellationes, Signa, vocantur, sunt plurium vicinarum & insigniorum stellarum configurationes; memoriæ & distinctionis causa, variarum rerum, vel Imagines, vel Nomina gerentes. Harum Imaginum Veteres XLVIII. constituerunt, ac divisere eas in Asterismos Boreales, Australes, & Intermedios. Atq; Boreales complectuntur versus:

Ad Boreæ partes ter septem sidera cernes:

Vrsa

Ursa minor : *Major* : *Custos* : *a* *Draco* :
Gemma : *b* *Genug*

Prolapsus : *c* *Lyra* : *Olor* : *Cepheus*, & *Cas-*
siopea :

Perseus : *Andromede* : *Deltotum* : *d* *Auri-*
ga : *e* *Caballus* : *f*

Rictus Equi : *g* *Delphin* : *Telum* : *h* *binc A-*
quila : *i* *Anguifer* : *k* *Anguis*. *l*

a *Arctophylax*, sive *Bootes*. *b* *Corona Borealis*. *c* *Hercu-*
les congenularus. *d* *Triangulum*. *e* *Heniochus*. *f* *Pega-*
sus. *g* *Rictus Equi*. *h* *Sagitta*. *i* *Vultur volans*. *k* *Ser-*
pentarius, vel *Ophiuchus*. *l* *Serpens Ophiuchi*.

Asterismorum Australium symbolum sunt versus :

Post ter quinq; tibi Signa hac vertuntur in
Austrum : (*Orion* :

Cetus, & *Eridanus* : *a* *Lepus*, & *nimbosus*
Sirius, *b* & *Procyon* : *c* *Argo ratis* : *Hy-*
drag : *Crater* :

Corvus : *Centaurus* : *Lupus* : *Ara* : *d* *Co-*
ronag : *e* *Piscis*. *f*

a *Fluvius*. *b* *Canis major*. *c* *Canis minor*. *d* *Thuribulum*.
e *Corona australis*. *f* *Piscis austrinus*.

Asterismos Intermedios, in circulo Zodiaco vel Signi-
fero, comprehendunt versus :

Signifer inde subest, bis sex qui sidera tor-
quet :

Suntq; *Aries* : *Taurus* : *Gemini* : *Cancer* :

Leo : *Virgo* :

Libraq;

$\underline{\Omega}$ \mathfrak{M} \rightarrow ζ
Libra : *Scorpius* : *Arcitenens* : *Caper* :

\approx \times
Amphora : *Pisces* :

Asterismos in cœlo Australi novos, nobis minime visos, enarrant versus:

Phoenix : *Grus* : *Indus* : *Xipbias* : *Pavo* :
Anser, & *Hydrus* :

Passer : *Apus* : *Triquetrum* : *Musca* :
Chamaeleon.

Quid sunt Stella Erraticæ?

Stellæ Erraticæ, Græcis Planetæ dictæ, non ita vocantur, quasi vago motu moveantur; sed ideo, quia non semper a se invicem eandem servant distantiam: sicut Sol & Luna interdum conjunguntur, ut in Eclipsi Solis; interdum opponuntur, uti in Eclipsi Lunari.

Quot sunt Stella Erraticæ?

Stellas Erraticas, five Planetas, Vulgus cum Antiquis septem numerat. Ii sunt: *Saturnus*, *Jupiter*, *Mars*, *Sol*, *Venus*, *Mercurius*, *Luna*. Quos complectitur versus:

Post SIM SVM sequitur, pallida Luna subest.

Sed Recentiores Astronomi plures deprehenderunt: quales sunt Stellæ Medicæ, seu Joviales, quæ Jovem ambiunt.

Quis est Motus Stellarum?

Motus Stellarum duplex est. Primo enim Stellæ, tam Fixæ quam Erraticæ, moventur ab Ortu versus Occasum, viginti quatuor horarum spatio, qui motus vocatur *Primus*, & creditur velocissimus. Secundo moventur Stellæ ab Occasu versus Ortum, qui mo-

tus facilius deprehenditur in Planetis, quam in Stellis fixis, cum hæ, ad motum hunc absolvendum, multa annorum millia requirant. Nam Ptolemæus existimat, Stellas fixas singulis centenis annis singulos tantum gradus conficere.

Quando absolvunt Planetae cursum suum?

Saturnus cursum suum absolvit annis circiter 30. Jupiter annis 12. Mars annis 2. Sol diebus 365. & 6. fere horis. Venus & Mercurius fere cum Sole. Luna 27. diebus, & 8. fere horis.

Quæ observanda sunt de Sole?

Sol Zodiacum diebus 365. horis quinq; , minutis 48. percurrit: quod tempus dicitur *Annus Tropicus*, distinctus a *Politico* in eo , quod hic horas & minuta negligit, ac reservat in quartum quemque annum; qui postea constat diebus 366. completis , diciturq; *Bissextilis*, vel *Intercalaris*. Amplius, cum Sol in Ariete , Tauro , & Geminis versatur, facit, ut dies apud nos incrementum capiat: quod tempus, *Veris* nomine appellatur. Cum pergit ad Cancrum, Leonem , Virginem , & in hisce Signis commoratur, apud nos efficit *Æstatem*. Per Libram, Scorpionem, & Sagittarium decurrens, facit *Autumnus*: & denique *Hyemem*, quando peragrat signa Aquarii, Capricorni, & Piscium. Similiter, in Cancro, apud nos *Diem longissimum* efficit; in Libra, facit *Æquinoctium*; in Signo Capricorni, reddit *diem brevissimum*; in Signo Arietis, inducit *Æquinoctium Vernum*.

Quæ observanda sunt de Luna?

Luna lumen mutuatur a Sole, & prout huic propinquior est, vel ab eo remotior, varias habet effigies, quarum VIII. Eruditi observarunt, quas *Phases* vocant.

Prima

Prima Phasis est Novilunium, cum Luna, Soli supposita, prorsus latet, & nullum terris lumen præbet: sola enim pars, quæ a conspectu nostro est averfa, illuminatur. *Secunda Phasis est Lunæ crescentis*, cum die a conjunctione 4. exiguam partem illuminatam ex-
erit, & quasi Corniculata aut Falcata conspicitur. *Tertia Phasis est Lunæ Dimidiatæ*, quando die a conjunctione 7. dimidiam partem illuminatam visui nostro ostendit. *Quarta Phasis est Gibbosa*, cum die a conjunctione 11. plus de parte illuminata, quam de obscura, visui nostro objectat. *Quinta Phasis Lunæ est Plenilunium*, cum die a conjunctione 15. totam medietatem illuminatam terræ ostendit. Post Plenilunium, Luna easdem luminis decrescantis vicissitudines nobis ostendit, quas ante crescens habuerat. Quatriduo ergo post plenilunium, vel die a conjunctione 19. denuo apparet *Gibbosa*, dum luminosam partem paulatim a nobis avertit, & de obscura aliquid nobis ostendit: Atque hæc est *Sexta Lunæ Phasis*. *Septima Lunæ Phasis est*, quando a conjunctione die 21. iterum dimidiata apparet. *Octava Lunæ Phasis est*, quando die 26. a conjunctione, Solis radios subitura, paulo ante Novilunium, rursus falcata conspicitur, donec, cum Sole conjuncta, rursus ex oculis quasi evanescit: id quod fieri solet die a conjunctione 30. Porro, Luna crescente, crescere dicuntur in ossibus, medullæ; in capitibus, cerebella; in corporibus, humores: Luna decrescente, ista diminuuntur. Similiter, Luna plena vel crescente, cæsa ligna cariem sentiunt, & ad ædificandum evadunt inepta. Quin & huic sideri causa æstus Oceani, ejusque reciprocationis tribuitur. Præterea, Luna crescente, Cancrorum, Ostrearum,
con-

Conchyliorumq; carnes suaviores magisq; succulentæ sunt; decreſcunt vero, decreſcente Luna, & omnem gratiam perdunt. Denique, Lunæ ætatem, inferendis leguminibus, obſervant etiam agricolæ; nec tempore interlunii gallinis ova ſupponunt, cum ſic vel non excludantur pulli, vel imbecilliores ſint. Catarrhis vexari & gravedine capitis, qui in Lunæ lumine dormiunt, ſimiliter epilepſiam in plenilunio exaſperari, hydropicosq; plerunq; circa plenilunium mortem obire, crebræ docent obſervationes.

Quid eſt Lux?

Lux, eſt qualitas corporis lucidi, per ſe viſu perceptibilis, qua ipſum lucidum eſt, & alia illuminat.

Quid eſt Lumen?

Lumen, eſt repræſentatio lucis in corpore perſpicuo, a luce Solis & Stellarum emanans: ut, cum a Sole illuminatus eſt ær.

Quid eſt Radius?

Radius, eſt qualitas a luce exiliens, in rectum & in acutum. *Differt Radius a Lumine*, quod radio præſente ſemper præſens ſit lumen, non vero præſente lumine ſemper præſens ſit radius. Nam, in conclavi verſus Septentrionem poſito, lumen quidem eſt in meridie, nulli tamen ibi ſunt radii.

Quid eſt Umbra?

Umbra, eſt privatio luminis, ob interpoſitionem opaci, facta in parte luci oppoſita.

Quid ſunt Tenebræ?

Tenebræ, ſunt privatio luminis, ab omnimoda corporis lucidi negatione ortæ.

Quid

Quid est Eclipsis Solis?

Eclipsis Solis est, in qua Sol lumine suo non privatur, sed lumen & radii ejus ob Lunæ interpositionem tantum avertuntur, ne ad nos pertingant. Idque fit in *Novilunio*.

Quid est Eclipsis Lunæ?

Eclipsis Lunæ, est privatio luminis in Luna, proveniens ex diametrali oppositione terræ inter Solem & Lunam. Idque fit in *Plenilunio*.

Quid est Stella Nova?

Stella nova est, quæ orta est ex materia quadam vibrata & condensata stellarum fixarum usitatarum. Talis stella apparuit anno 1572. prope Cassiopeæ stellam, quæ, post annum & trientem, disparuit. Alia conspiciendam se præbuit an. 1601. in pectore Cygni, quæ sensim decrevit, & anno 1661. non major fuit stella sextæ magnitudinis.

Quid est Cometa?

Cometa, est Stella nova, quæ materiam suam accipit ex Planetis. Estque Cometa alius *Crinitus*, alius *Caudatus*, alius *Barbatus*.

Quid est Cometa Crinitus?

Cometa Crinitus est, cujus partes exteriores sunt rariores, & crinium instar circumfusæ.

Quid est Cometa Caudatus?

Cometa Caudatus est, qui versus unam partem longius extenditur; unde caudam habere videtur. Credunt autem plerique, eam caudam formari transitu radiorum Solis per caput seu corpus Cometæ.

Quid est Cometa Barbatus?

Cometa Barbatus est, quando materia versus unam partem modice extenditur. Atque barba ista generatur ex materia opacior, Soli adversum jacente.

CAPVT II.**De Elementis.***Quid sunt Elementa?*

Elementa, sunt corpora naturalia simplicia, sub cœlo contenta, ad universi integritatem, & mixtorum constitutionem, a Deo Creatore facta. Vel, Elementa sunt corpora simplicia, ex quibus mixta oriuntur, & in quæ iterum resolvuntur.

Quot sunt Elementa?

Elementa sunt Quatuor : Ignis, Aër, Aquâ, Terra.

Quid est Ignis?

Ignis est elementum subtilissimum, levissimum, calidissimum, & siccissimum. Subjicitur proxime globo Lunæ, & a cœlorum motu in orbem celerrime rapitur. Levissimo enim Elemento debetur locus supremus in regione elementari.

Quid est Aër?

Aër est elementum subtile & leve, infra Ignem, ac supra Aquam Terramque existens.

Quot sunt Aëris Regiones?

Aëris Regiones sunt tres : Suprema, Media, & Infima.

Quæ

Quæ est Suprema Aëris Regio?

Suprema Aëris regio est, quæ incipit a superficie Ignis, & extendit se usque ad medium aërem, ubi vapores condensantur: estque, ob ignis vicinitatem, & cœli motum, calidissima.

Quæ est Media Aëris Regio?

Media Aëris regio est, quæ inter supremam & infimam interjacet, & eo usque deorsum se protendit, quousque sursum radiorum solarium refractione se extendit. Hinc æstivo tempore minor est quam hyeme; existitque frigida, tum propter defectum reflexorum radiorum solarium, tum propter copiam, qui illuc deferuntur, vaporum.

Quæ est Infima Aëris Regio?

Infima Aëris regio est, quæ sumit initium a superficie terræ; & eo protenditur, quousque radii Solis reflectuntur: estque, pro vario Solis accessu & recessu, modo calida, modo frigida.

Quid est Aqua?

Aqua est Elementum crassum & grave, frigidissimum ac humidissimum, unum cum terra globum constituens.

Quid est Mare?

Mare, est aquarum salinarum, maxima multitudine congregatarum, receptaculum, perpetuo æstu fluens ac refluens intra alveum suum.

Quid est Flumen?

Flumen, est fluxus aquarum, ex plurium fontium concursu, in certo terræ loco congregatarum.

Quid est Amnis?

Amnis, est flumen, arboribus aut fruticibus circumdatum.

Quid est Rivus?

Rivus, est aqua, e fluvio manans.

Quid est Torrens?

Torrens est, qui ex pluvialibus aquis, aut nivibus in aquam resolutis, colligitur.

Quid est Fons?

Fons, est aqua e terra scaturiens, & intra sinus certos se continens. Origo fontium a variis dependet causis: quales sunt, aqua marina per meatus percolata, aquae pluviales & nivales, vapores, itemque aquae sub terra latentes, quas multas dari, puteorum effusionem, ac interdum subitae illarum prorupciones evincunt. Aristoteles censuit, omnes fontes tantum ex aëre vaporibusque in aquam solutis originem trahere. Quam sententiam incommodat, quod tanta regularitas in vaporibus concedi non potest, qualis in fontibus conspicitur. Tum vero nimis multis vaporibus opus esset, ad eam aquarum ubertatem, quae ex fontibus saepe ebullit, producendam.

Quid est Lacus?

Lacus, est aqua stagnans, perpetuoque durans.

Quid est Terra?

Terra, est elementum frigidum & siccum, firmissimum, crassissimum & gravissimum.

CAPVT III.**De Qualitatibus Elementorum.***Quid sunt Qualitates Elementorum?*

Qualitates elementorum, sunt accidentia, a formis illorum emanantia, & actionibus ac passionibus inservientia.

Que-

Quenam sunt illæ Qualitates Elementorum?

Qualitates Elementorum sunt Gravitas & Levitas: Subtilitas & Crassities: Caliditas & Frigiditas: Humiditas & Siccitas. Ex his, posteriores quatuor dicuntur *Qualitates Primæ*.

Quid sunt Qualitates primæ?

Qualitates primæ sunt, quæ nec ex se invicem, nec ex aliis qualitatibus Elementorum fiunt, & ex quibus sunt cæteræ, tum Elementis, tum corporibus sublunaribus propriæ.

Quid est Gravitas?

Gravitas, est qualitas, secundum quam elementum deorsum ad centrum fertur: Vt *gravitas terre & aquæ*.

Quid est Levitas?

Levitas, est qualitas, secundum quam elementum sursum a centro fertur: Vt *levitas ignis*.

Quid est Subtilitas?

Subtilitas, est qualitas, secundum quam elementum transitum aliis corporibus concedit, & ipsum etiam alia facile transit: Vti *subtilitas aëris & ignis*.

Quid est Crassities?

Crassities, est qualitas, secundum quam elementum transitum aliis corporibus negat, & ipsum etiam alia facile non transit: Vti *crassities terre & aquæ*.

Quid est Caliditas?

Caliditas, est qualitas, secundum quam elementum alia corpora calefacit, attenuat, solvit, digerit, coquit: Vt *caliditas ignis*.

Quid est Frigiditas?

Frigiditas, est qualitas, secundum quam elementum alia corpora frigefacit, densat, adstringit, & obstruit: Vt *frigiditas aquæ.*

Quid est Humiditas?

Humiditas, est qualitas, secundum quam elementum alia corpora humectat, emollit, & fluida reddit: Vt *humiditas aquæ.*

Quid est Siccitas?

Siccitas, est qualitas, secundum quam elementum, alia corpora exsiccat, indurat, & firmiora reddit: Vt *siccitas terræ.*

Quid est Temperamentum?

Temperamentum, est complexio primarum qualitatum, certo modo temperatarum.

CAPVT IV.

De Mixtione.

Quid est Mixtio?

Mixtio, est miscibilium, hoc est elementorum alteratorum, unio. Ex Elementis enim, vel illis, quæ ad generationem corporis mixti concurrunt, nihil potest generari, nisi prius sint alterata, & ad generationem probe præparata. Amplius, ut mixtio fiat, requiritur, ut Elementa, seu miscibilia, in se mutuo agant, & ut unum alterius qualitates debilitet. Mixtio ergo hic accipitur, non pro diversorum corporum accumulatione, seu confusione, sine omni mutatione substantiali: v. c. cum grana tritici & hordei dicuntur misceri; quæ est tantum cumulatio: vel cum aqua vino miscetur, quæ est confusio

fusio: sed pro mixtione Elementorum, sive generatione corporis mixti.

Quomodo Elementa ingrediuntur corpus mixtum?

Quomodo Elementa ingrediantur corpus mixtum, acriter inter se contendunt Philosophi. Communis sententia est, Elementa in mixtione ita alterari & mutari, ut tantum qualitates remaneant refractæ, ipsas autem formas substantiales Elementorum exspirare; & sic in mixto tantum esse materiam Elementorum cum qualitatibus refractis: quippe cum qualitatibus Elementorum refractis, formas Elementorum substantiales consistere non posse, v. c. cum calore remisso vel refracto, simul non consistere formam ignis, quæ summum requirit calorem.

Quid est Mixtio Perfecta?

Mixtio perfecta est, qua miscibilia perfecte miscentur, mistumq; perfectum constituunt.

Quid est Putredo?

Putredo, est corruptio proprii & naturalis caloris, in unoquoque humido, a calore ambientis.

CAPVT V.

De Corporibus imperfecte mixtis.

Quid est Corpus imperfecte mixtum?

CORPUS Imperfecte mixtum est, quod ex infirma & instabili elementorum concretionem oritur: ut Exhalatio.

Quid est Effluvium?

Effluvium, est corpus naturale, e terris & aquis potissimum

tissimum virtute fiderum extractum, varias sustinens impressiones.

Quid sunt Atom?

Atom, sunt effluvia minutissima, ob summam parvitatem individua, variarum actionum & passionum causæ: Suntque Ignis, Aëris, Aquæ, Terræ, Mistorum, Plantarum, & Animalium.

Quid est Fumus?

Fumus, est effluuium mixtum, calidum & siccum, levius & subtilius, e terra locisque aridis virtute fiderum extractum.

Quid est Vapor?

Vapor, est effluuium mixtum, frigidum & humidum, gravius & crassius, ex aqua locisque humidis virtute fiderum extractum.

CAPVT VI.

De Meteoris in genere, & in specie de Ignitis.

Quid est Meteorum?

Meteorum, est corpus imperfecte mixtum, ex halitibus e terra & aqua, calore Solis stellarumque virtute, excitatis, in aëre genitum.

Quomodo dividuntur Meteora?

Meteora, secundum prædominium alicujus Elementi, quod in ipsis magis sensibile est, dividuntur in Ignita, Aërea, & Aquea: quibus accedunt Emphatica.

Quid sunt Meteora Ignita?

Meteora Ignita sunt, quæ ex fumo pingui aut sulphureo accenso oriuntur.

Quid

Quid est Ignis fatuus?

Ignis fatuus, est meteoron ignitum, ardentis candelæ vel facis huc illuc errantis speciem referens. In terra si appareat hoc meteoron, *Ignis fatuus* dicitur; in mari vero, cum geminum, *Castor & Pollux*, aut, si simplex fuerit, *Helena*.

Quid est Ignis Lambens?

Ignis Lambens, sic dictus, quod res non urere, sed lambere videatur, est, cum inflammatur exhalatio tenuis sulphurea, ex calidioribus animalibus expirans, & plerunque crinitis animalium partibus, imo & vestibus adhærens.

Quid est Draco Volans?

Draco Volans, est exhalatio pinguis & copiosa, accensa, quæ deorsum oblique cadit e nubibus, similitudinem habens veri draconis, in aëre circumvolantis.

Quid est Tonitru?

Tonitru, est sonus a nube ortus, a discussione exhalationis calidæ & siccæ, exitum quærentis, & latera nubis undiquaque pulsantis.

Quid est Fulmen?

Fulmen, est meteoron, quando exhalatio calida & sicca magno impetu e nube excutitur. Laurum, Ficum, Hyacinthum florem, Vitulum marinum, & Aquilam, a fulmine minime tangi, a quibusdam proditum est.

Quotuplex est Fulmen?

Fulmen est triplex: Terebrans, Discutiens, & Vrens.

Quid est Fulmen Terebrans?

Fulmen Terebrans est, quod ob virtutem potentem, in subtili spiritu fundatam, etiam angustissima transit. Hoc conflare dicitur argentum, salvo & illo marfupio.

Quid est Fulmen Discutiens?

Fulmen Discutiens est, quod conglobatum, spiritus sulphurei & nitrosi, coacti & procellosi, commixtam vim habet, adeoque ista dirumpit. Hoc est illud fulmen, quo quercus scinduntur, turres franguntur.

Quid est Fulmen Vrens?

Fulmen Vrens est, quod omnia in flammam vertit, ob sulphuris tenacis, quod admixtum habet, copiam. Hoc est illud fulmen, quo urbes, pagi, domus accenduntur.

Quid est Lapis Fulminaris?

Lapis Fulminaris, est corpus durum & solidum, in nubibus generatum, & cum frigore in terram projectum.

Quid est Fulgur?

Fulgur, est flammæ micatio, ab exhalationibus sulphureis accensis orta, lumen de se spargens, lateque tractum terrenum illustrans. Vulgo distinguunt Fulgur in id, quod fit sine tonitru, & id, quod fit cum eo. Sed verisimile est, nullam fulguris eruptionem sine sonitu fieri; tametsi, quod sit procul editus, ad aures nostras non pertingit. Quanquam vero simul contingunt Tonitru & Fulgur; semper tamen prius conspicitur Fulgur, quam auditur Tonitru. Ratio, quia, ut formetur sonus, necessaria est aëris fractio, quæ

quæ aliquod temporis spatium requirit: necessaria etiam est species audibilis, quæ per varias circumgyrationes, multasque ambages, auditui obfertur. Talia autem circa visum non obtinent; ideo celerius percipit objectum, nempe coruscationem. Simile quid contingit in globulis e sclopo emissis: & cum ligna cæduntur, eminus constituti, prius videmus lignum securi tangi, quam auditu sonum percipimus.

Quid est Ecnephias?

Ecnephias, est exhalatio copiosa, tota simul e nubibus, magna vi, deorsum, sine gyro & inflammatione, excussa.

Quid est Typho?

Typho seu Turbo, est exhalatio copiosa, explosa e nubibus, sine inflammatione, sed cum gyro, deorsum.

Quid est Prestere?

Prestere, est Typho inflammatus. Longa enim vertigine, qua partes inter se confricantur, typho concipit flammam, & transit in presterem. Hinc Lucretius l. 6.

*Fit quoq;, ut interdum venti vis, missa sine igne,
Ignescat tamen in spatio, longoq;, meatu.*

Quid est Lancea Ardens?

Lancea Ardens, est meteoron ignitum, genitum ex materia rara & non bene compacta, longa quidem, sed parum lata, cujus postquam una pars accensa est, facile & aliæ ejus partes accenduntur, & instar jaculi, ab una parte in aliam transcurrit.

Quid

Quid est Clypeus ardens?

Clypeus ardens, est meteoron ignitum, generatum ex exhalatione, quam circumstant duæ nubes diversæ, calida & frigida, quarum una eam pellit a se, altera eam trahit.

Quid est Stella Cadens?

Stella cadens, est meteoron ignitum, genitum, dum exhalatio mediocriter calida, nec densa admodum, nec compacta, in longum continuata & accensa, a mediæ regionis, vel nubis occurrentis frigore expellitur, ac stellæ e cœlo cadentis formam refert.

Quid sunt Stipulae ardentes?

Stipulae ardentes, sunt ignitum meteoron, genitum ex non adeo densa exhalatione, cujus partes omnes non æque facile accenduntur, & similes sunt scintillis, ex camino evolantibus.

Quid est Ignis Perpendicularis?

Ignis Perpendicularis, est ignitum meteoron, ortum ex figurata exhalatione in suprema aëris regione accensa, & similis est perpendiculo, plumbeo instrumento, dum latior est in basi, sursum autem in conum abit.

Quid sunt Capræ Saltantes?

Capræ Saltantes, sunt meteoron ignitum, ex grandioribus exhalationibus disjunctis accensis, & more caprarum saltantibus.

CAPVT VII.

De Meteoris Aëreis.

Quid est Meteoron Aëreum?

Meteoron Aëreum est, quod ex vapore & fumo simul fit: ut Ventus.

Quid est Ventus?

Ventus, est meteoron aëreum, genitum ex exhalatione calida & sicca, virtute astrorum euecta, non inflammata, sed lateraliter mota, cui quandoque vapores sunt admixti. Nimirum, exhalationes & vapores in sublime ad mediam aëris regionem elati, inde ab aëre frigido & denso protrusi, refracto impetu resiliunt, &, quia pulsu deorsum aguntur, oblique fluunt.

Quæ est Ventorum Utilitas?

Utilitas Ventorum est multiplex. Namq; 1. aërem contra situm & putredinem exercent, & hinc causas morborum & pestem discutiunt. 2. Respirationem animalium refrigerant. 3. Jactatione sua juvant plantarum radices, ut defigantur altius, & liberius ac laxius eliciant alimentum. 4. Oceanum faciunt pervium.

Quomodo dividuntur Venti?

Venti dividuntur in Cardinales & Collaterales. Cardinales sunt illi, qui a quatuor mundi cardinibus spirant. Suntque 1. *Aquilo* sive *Boreas*, qui a Septentrione spirat, der Nordwind. 2. *Subsolanus* sive *Eurus*, qui spirat ab Ortu, der Ostwind. 3. *Auster* sive *Notus*, qui spirat a Meridie, der Sudwind. 4. *Zephyrus* sive *Favonius*, qui ab Occasu spirat, der West.

Westwind. Inter utrumq; Cardinalem olim Athenienses unum posuerunt collateralem, sed postea numerus crevit. At nautæ, quorum valde interest, quo præcise flatu sua impleant vela, in pyxide sua notant ventos XXXII. atque sic inter duos quosque cardinales septem collaterales interjiciunt.

Quod est Ventorum discrimen?

Venti Septentrionales dicuntur esse frigidi & sicci, quia frigida loca permeant; & inde vini habent serenitatem inducendi. *Venti Meridionales*, calidi & humidi sunt: Calidi, quia ex locis Zonæ torridæ propinquioribus spirant: Humidi, quia ex multo vapore e mari mediterraneo, & aliis locis aquosis elevato, constant. *Venti Orientales* sunt calidi & sicci. *Venti Occidentales* sunt frigidi & humidi, quod habent à marino vapore, cujus magnam secum trahunt copiam.

Quid sunt Auræ?

Auræ, sunt molles quidam & humentes ventuli; e mari, lacubus, aut fluminibus evaporati, & in vicinum refluentes. Hujusmodi venti mane potissimum oriuntur.

Quid sunt Etesia?

Etesia, quasi anniversarii, sic dicti, quod singulis annis biduo post exortum stellæ caninæ XL. diebus spirare, & æstum frangere, ac hominibus pecudibusq; grati & salutare esse solent. Oriuntur, secundum Aristotelem, ex liquatione nivium & glaciæ sub ultimo Septentrione.

Quid est Terræ Motus?

Terræ Motus, est partium terræ concussio, ab exhalatione calida & sicca, præter naturam intra terræ

cavitatem conclusa, & vi maxima exitum quærente, cum tremore stupendo orta. Secundum alios, Terræ motus provenit ab ignibus subterraneis, qui sæpe profunde latent, subsunt maris fundo; & montium insularumque radicibus. Ab iis ergo exhalat spiritus sulphureus & igneus, qui maximas & plurimas longe lateque concutit regiones, unde & subinde dehiscente terra, ignes emicant: Hinc apparet ratio, quare in locis Septentrionalibus rariores sint terræ motus: ob intensum enim earum regionum frigus, non facile concitantur exhalationes in gremio terræ.

Quæ sunt Species Terræ motus?

Species Terræ motus vulgo constituuntur Tremor & Pulsus. Atque Tremor, est agitatio terræ in latera, cum modo in hanc, modo in illam movetur partem. Pulsus, est agitatio terræ ex imo, cum scilicet terra sursum & deorsum movetur, & ingenti hiatu dehiscit, ut vorago appareat.

CAPVT VIII.

De Meteoris Aqueis.

Quid est Meteoron Aqueum?

Meteoron aqueum est, quod generatur ex vapore:

Quid est Nubes?

Nubes est vapor copiosus, in media aëris regione concretus & suspensus. Causa igitur Nubium, est frigus mediæ aëris regionis, vapores condensans, & ventus, qui vaporum particulas dispersas colligat, & comprimit, aut in nubem jam formatam impellit.

Quan-

Quantum distant Nubes a terra?

Vossius opinatur, tum, cum nubes gravissimæ sunt, & in pluviam se jam resolvunt, concavum earum vix distare a terra passibus quingentis, sive spatio miliaris Italici dimidii: convexum autem nubium, plus minus Italicis miliaribus quatuor. Fortasse dicendum, inæqualem esse Nubium distantiam, atque densas, humiliores; tenues vero, altiores deprehendi; insuper in calidis regionibus, altissimo, in frigidis, humillimo, in temperatis, medio eas hæere loco.

Quomodo dividitur Nubes?

Nubes dividitur in Sterilem & Fœcundam.

Quid est Nubes Sterilis?

Nubes Sterilis est, quæ ex vapore tenuiori & subtiliori compacta est, & facile a calore Solis vel consumitur, vel dissipatur, vel in ventum aut aërem abit.

Quid est Nubes Fœcunda?

Nubes Fœcunda est, quæ ex crassiori vapore est compacta, & in pluviam facile resolvitur.

Quid est Pluvia?

Pluvia, est fluxus nubis fœcundæ, in destillantēs aquæ guttas, a calore Solis resolutæ, quæ guttæ suo pondere depressæ, in terram decidunt, & eam, ceu Seneca vult, ad X. pedes humectant.

Quid est Imber?

Imber, est pluvia plenioribus guttis decidens.

Quid est Nimbus?

Nimbus, est pluvia, omnium maximis & decumanis guttis decidens.

Quæ

Qua sunt Signa Pluvia?

Signa pluvix, secundum Cartesium, sunt, cum ros noctu non decidit, & nebula mane sursum recedens, terram omnem siccam relinquit: item, cum aër est nubibus obductus, & Sol nihilominus in ortu lucide splendet.

Quid est Stillicidium?

Stillicidium, est minutissima, & quasi pulverulenta pluvia, ubi rariores sunt guttæ cadentes, nec tanta celeritate se invicem sequuntur.

Quid est Pluvia Sanguinea?

Pluvia Sanguinea est, quando vapor exhalat, vel ex locis rubrica aut minio abundantibus, vel ex locis sanguinolentis:

Quid est Pluvia Lactea?

Pluvia lactea est, quando vapor vel e locis cretaceis educitur, vel e moderato Solis calore, ita aquam excoquente, alborem acquirit.

Quid est Pluvia Lapidea?

Pluvia Lapidea est, quæ oritur ex elevato vapore crasso & viscoso, Solisque calore indurato.

Quid est Nebula?

Nebula, est vapor copiosus & densus, infimam aëris regionem occupans, quæ est vel residuum præcedentis nubis, vel initium sequentis.

Quid est Nix?

Nix, est nubes, vel meteoron, ortum ex nube, magno frigore vel vento in floccos albos & teneros coacta. Etsi vero tota & continua nubes frigore congelatur, frangit se tamen in lapsu, & ut pluvia guttatim, sic nix per floccos decedit. Albedo nivis, par-

tim est a frigore, partim a spiritu aëreo, copiose admixto.

Quid est Grando?

Grando, est meteoron aqueum, a guttis pluvialibus, in descensu, a frigore congelatis, ortum.

Quid est Ros?

Ros, est meteoron aqueum, genitum ex vapore tenui, non procul a terra elevato; qui noctis temperatae frigiditate densatus, & in aquae tenuissimas guttas resolutus, in terram sparsim decedit. Ros interdum ovibus & capris noxam affert: alvum enim ciet, augetque bilem, necisque causa est; atque animalium ejusmodi, si aperiantur viscera, crocei coloris apparent. Hinc prudentes opiliones non summo mane per roscida educunt gregem, sed expectant, donec Sol rorem resorbuerit. Venatores quoque observant, odorem canum nimia roratione obtundi.

Quid est Pruina?

Pruina, est meteoron aqueum, quod e vapore tenui, a terra in proximum aërem virtute Solis elevato, & a frigore in salis quasi formam constricto, ut nix exigua super terram effunditur. Plurimum pruina non nisi in firmas terrae afficit partes, unde Vineae interdum in locis humilioribus perduntur, in altioribus salvae manent & intactae. Exurit nempe pruina vehemens verno tempore segetes, plantas lactescentes, germinum oculos, & vitium gemmas, ita ut una saepe nocte spes omnis colonis praecidatur. Levis pruina, exterius tantum nascentia afficit, &, poros restringendo, succum vitalem conservat, autumnos quoque uvarum maturitati inservit.

Quotuplex est Pruina?

Pruina varia est. Interdum enim per herbas instar raræ cujusdam nivis dispergitur; interdum filatim ab arboribus dependet, quando scilicet multæ vaporis & exhalationis guttulæ, in longum catenatim nexæ, frigore concrescunt; vocatur alias Pruina Capillata.

Quid sunt Fila Divæ Virginis?

Fila Divæ Virginis, pruina capillatæ quodammodo affinia sunt, & autumnno maxime, per agros, instar telarum araneorum, volant. Non sunt autem, ceu quibusdam visum, retia araneorum vento abrupta: hæc enim vix valido vento rumpi possunt; fila autem illa Divæ Virginis, sine ullo vento nascuntur & volant. Quin potius ex vapore percocto, & terrestribus ac viscosis exhalationibus contemperato, maxime Verè & Autumnno, concrescunt.

Quid est Glacies?

Glacies, est aqua vel liquor congelatus, ab excellenti frigore. Materia igitur Glaciei est aqua, cum admixtis partibus terrestribus: hæc enim congelationem magnopere juvant. Unde, quo purior est aqua, eo difficilius in glaciem concrescit. Magnas autem Glacies secum affert utilitates: nam, & fruges altas radices agere facit, & vermes, reliquaq; insecta, de medio tollit.

Quid est Mel?

Mel, est Meteoron, ex vapore terrestrium excocto & temperato, & roris modo plantis adjacente, nec non ex admixtis exhalationibus plantarum. Atque hinc apes mel suum conficiunt.

Quid est Manna?

Manna, est succus dulcis, pinguior & densior melle, ex rore & exhalatione percoctus, & in infima æris regione, nocturno frigore concretus.

CAPVT IX.**De Meteoris Emphaticis seu Apparentibus.***Quid sunt Meteora Emphatica?*

Meteora Emphatica sunt, quæ sicut non sunt figmenta cerebri nostri, ita neque qualitates sunt fixæ, sed species apparentes, ex lucis & umbrarum mixtura ortæ.

Quid est Iris?

Iris est arcus multicolor, in nube rorida & opaca, itemque aëre rorido, ex radiorum Solis oppositi refractione, apparens oculis spectantium. Conspiciuntur aliquando etiam Irides Lunares, quæ ex Lunæ radiis ortum habent, verum rarius. Figura Iridis est semicircularis, quia omnes partes nubis roridæ æqualiter ab oculo distant, & in semicirculum disponuntur. Quod si vero oculi nostri in tantum elevarentur ac oculi gruis altivolantis, non dimidium, sed integrum cerneremus circulum. *Iris Solaris* naturaliter significat pluviam, quia apparet in nube rorida, quæ in pluviam resolvi potest. Significat etiam quandoque serenitatem, cum scilicet post imbrem conspicitur; creditur enim, nubes tum aptas ad recipiendum lumen Solis, exoneratas esse aquarum crassitie. *Iris Lunaris* significat pluvias diuturnas, & cælum valde instabile, quia non generatur hæc Iris, nisi
cum

cum plurimum materiæ pluviosæ est collectum, & cum Luna valde est Australis.

Quid est Halo?

Halo, est Circulus circa Solem, Lunam, aut aliam aliquam majorem stellam apparens, ex radiorum in nubibus refractione effectus. Frequentius autem sub Luna apparet Halo, quam sub Sole, quia hujus fervor halitus dissipat, nec facile eos ita finit coagmentari, ut Halo in iis appareat.

Quid est Parelus?

Parelus, est imago Solis, a latere ejus, in nube densa, plana, quiescente & aquosa, per radiorum Solis refractionem expressa. Est interdum multiplex, atque etsi Plinius testatur, non plures simul, ad suum ævum, visos Soles quam tres, tamen Scheinerus Romæ Anno 1629. quinque, & anno sequente septem observavit: ac Gasendus nihil prohibere putat, quo minus XI. simul apparere possint.

Quid est Paraselene?

Paraselene, est imago Lunæ, ex refractione radiorum lunarium, in nube lævi & humida repræsentata. Hevelius testatur se An. 1660. tres Pseudolunas, una cum genuina, Gedani conspexisse.

Quid sunt Virgæ?

Virgæ, quæ alias Bacilli, Columellæ, & Funes tentorii dicuntur, sunt lineæ rectæ, quas Solis radii, directe in nubem aquosam, dissimiliter tamen raram, incidentes & refracti, efficiunt. Vulgus dicit, die Sonne siehet Wasser.

Quid est Fovea?

Fovea, est meteoron, exhibens speciem dehiscantis cœli. Generatur, cum serena nocte, multi halitus in sublime euecti & constipati, in medio densiores, & extremis partibus rariores, constituuntur inter astrorum lumen & nostrum aspectum, ut foveæ similitudinem exhibeant.

Quid est Via Lactea?

Via Lactea, sive Galacia, quam Aristoteles, telescopiis destitutus, inter meteora retulit, est innumerable multitudo stellarum, debili sua luce, illam effusi lactis speciem, cœlo sereno exhibentium.

CAPVT X.

De Mineralibus in Genere, & Lapidibus.

Quotuplicia sunt Corpora perfecte mixta?

Corpora perfecte mixta sunt duplicia: Animata & Inanimata. Per Inanimata autem non intelliguntur mortua, sed illa, quæ nullo modo vitam involvunt: uti Mineralia.

Quomodo dividuntur Mineralia?

Mineralia dividuntur in Lapides, Metalla, & Mineralia media, hoc est ea, quæ mediâ quandam, inter Lapides & Metalla, naturam habent.

Quid sunt Lapides?

Lapides, sunt corpora perfecte mixta, inanimata, dura, ex sicca terrestri exhalatione, unctuositate quadam aquosa permixta, per temporis diuturnitatem,

vi caloris & frigoris, atque virtute minerali, conglutinata.

Quot sunt Genera Lapidum?

Genera Lapidum sunt quinque. *Primo* Lapides quidam sunt factitii. *Secundum* genus est Lapidum eorum, qui facti sunt ex aliqua substantia, quæ prius non erat lapidea, uti qui fiunt ex ligno putrefacto & cochleis. *Tertium* genus, est eorum, qui oriuntur ex plantis, ut Corallus. *Quartum* genus, est lapidum, qui in animalibus generantur. *Quintum*, est eorum, qui sub terra fiunt, & montes ipsos lapideos constituunt.

Quomodo dividuntur Lapides?

Lapides, secundum diversitatem materiæ, sunt vel Vulgares, vel Pretiosi.

Quid sunt Lapides Vulgares?

Lapides Vulgares sunt, qui ex materia crassiore & impuriore constant, formamque habent ignobiliorrem: uti *Tophus*, *Pumex*, *Marmor*, *Magnes*.

Quid sunt Lapides Pretiosi?

Lapides Pretiosi sunt, qui constant ex materia subtiliore & puriore, formamque habent nobiliorem: uti *Adamas*, *Smaragdus*.

Quid sunt Margaritæ?

Margaritæ quidam lapidibus pretiosis accensent, voluntq; eas concrefcere ex succulento humore, per coagmentationem & appositionem; ut, postquam ex humore primum rudimentum acceperunt, adjecto sæpius novo humore, eoque exsiccat, nova quasi cute ac cortice superinjecto augeantur ac crescant, non secus ac in fellis vesicula, & urinæ vesti-

ca generantur lapides, a lapis Bezoar in capris Indicis concrefcit. Sed Gassendus exiftimavit, conchis Margaritarum interius politiffimis nitidiffimisq; , adnafci plerunque tumores quofdam quafi verrucas, ex eadem conchæ materia, qui excreti, uniones fint, unamque cum concha vitam participant, donec ab ipfa feparentur.

CAPVT XI.

De Metallis.

Quid eft Metallum?

Metallum, eft corpus perfecte mixtum, inanimatum, ex fulphure & argento vivo mixtis ac temperatis, in terræ venis natum, fofile, durum, igne liquabile, malleo in omnem formam ductile.

Quid eft Sulphur?

Sulphur, eft materia metallaris, ex subtiliori exhalatione, pingui & unctuoſa, venis terræ inclufa, conſtans.

Quid eft Argentum Vivum?

Argentum Vivum, eft materia metallaris, conſtans ex vapore subtiliore aqueo; qui cum terra congelatur, & per calorem fulphuris decoquitur, inſtar aquæ fluens, nec tamen madefaciens. Dicitur *Argentum Vivum* per metaphoram, item *Mercurius*, quia huius inſtar verſatile.

Quomodo dividuntur Metalla?

Metalla dividuntur in Pura & Impura.

Quid

Quid sunt Metalla Pura?

Metalla pura sunt, quæ ex puriore Sulphure & Mercurio, exquisite decoctis, constant; ut Aurum & Argentum.

Quid sunt Metalla Impura?

Metalla Impura sunt, quæ ex impuriore Sulphure & Mercurio constant; ut Plumbum, Stannum, Æs, Ferrum.

Quid est Aurum?

Aurum, est metallum perfectum, ex Mercurio, vel exhalatione mercuriali sulphurea & salina, perfectissime excoctis, confectum: a Chymicis *Sol* vocatur.

Quid est Argentum?

Argentum, est metallum perfectum, auro tamen inferius; constans Mercurio & Sulphure albo, pæne fixis: a Chymicis *Luna* vocatur.

Quid est Plumbum?

Plumbum, est metallum imperfectum, molle, ex Mercurio multo impuro, ac Sulphure pauco, itidem impuro ac foetido, genitum. Cum Plumbo convenit *Stannum*, quod Plumbum candidum dicitur. Chymici, Plumbum, *Saturnum* vocant, Stannum vero *Jovem*.

Quid est Æs?

Æs, sive Cuprum, est metallum imperfectum, durum, rubrum, ignibile, sub malleo extensibile, confectum ex minera, in terræ visceribus ex vapore impuro, spadiceo, sulphureo, salino, rubro & flavo Mercuriali nata. Chymici *Venerem* appellant.

Quid est Ferrum?

Ferrum, est Metallum imperfectum, durum, plurimum habens exhalationis sulphureæ & salinæ fixæ, minimum Mercurii; fusile, ductile, & extensibile. Chymici *Martem* appellant.

CAPVT XII.

De Mineralibus Mediis.

Quid sunt Mineralia Media?

Mineralia media, sunt corpora perfecte mixta, inanimata; quæ inter metalla & lapides interjacent, ita ut quadantenus naturam eorum participant, quadantenus vero ab eadem recedant.

Quid est Terra?

Terra, hoc loco, est corpus fossile, naturæ mineralis particeps, quod injecta aqua solvitur & lutum fit. Ejus species sunt variæ, pro diversitate particularum, ex quibus terra mineralis constat, aut succi, quo connectitur, aut regionum, in quibus reperitur. Si enim materia sit valde tenax, lenta & pinguis, *Argilla*; si tenax, alba, & in Insula Creta effodiatur, *Creta*; si vero in Insula Samo, *Samia*; si lutei & pallidi coloris, *Oebra*; si valde rubens, & in Insula Lemno inveniatur, *Terra Lemnia*, item *Sigillata*, quod sigillo obsignetur; si tantum subrubicunda, & in Armenia effodiatur, *Terra Armena*, vel *Bolus Armenus* nominatur.

Quid est Sal?

Sal, est succus concretus, acer, qui e succo aqueo & terreo mistis, generatur: atque si sit volatile & amarissimum, *Armoniacum*; si pinguius, muris, petris-

trisque adnascens, *Nitrum*, item Sal petræ, si in mineris & aquis mineralibus reperiatur, *Alumen*; si cum materia metallica & mercuriali, succo quodam acerrimo & subtilissimo, connectatur, *Vitriolum* appellatur. Dividitur etiam in Sal Artificiale & Naturale.

Quid est Sulphur?

Sulphur est succus mineralis, constans parte una inflammabili & pingui, grauemque odorem de se præbente, altera terrea, crassa, fixa, succum chalcantiosum admistum habente.

Quid est Bitumen?

Bitumen est aliqua terræ pinguedo, aquis supernatans, quæ ad litus disiecta, concrescit, densatur, ac dura tenacissimaque redditur, ac facile concipit flammam.

Quid est Naphtha?

Naphtha, est bitumen liquidum, calidum & ficum, naturam habens plane spirituosam & igneam; cui tanta est cum igne cognatio, ut etiam ex intervallo flamma in illud transfiliat, imo calore etiam Solis facile accendatur.

Quid est Petreolum?

Petreolum, sic dictum quasi Petræ oleum, est oleum bituminosum, non ita subtile, minusque spirituosum quam naphtha, e petris exstillans.

Quid est Succinum?

Succinum, est bitumen, quod eruitur e mineris terræ, foris coagulatum, intus vero naturam naphthæ vel petreoli habens, cum spiritu aluminoso, nitroso, & vitriolato. Frequentius reperitur in litore Borussiæ, estque interdum purum, interdum herbis, lignis,

lignis, bestiolis, aliisque sordibus mixtum. Cum panno fricatur, paleas, fcoebesque ad se attrahit.

Quid est Antimonium?

Antimonium, est corpus minerale, natum in terræ visceribus & cavernis, ex hydrargyro terreo multo, sulphure & arsenico crudo, omnibus his volatilibus, constans: plumbum quidem æmulatur, sed est admodum fragile.

CAPVT XIII.

De Animato in genere, itemque Vita & Morte.

Quid est Animatum?

Animatum, est corpus naturale mixtum, anima & corpore organico constans, vitæque præditum; & dividitur in Partes & Species.

Quæ sunt Partes Animati?

Partes animati, sunt Anima, & Corpus organicum.

Quid est Anima?

Anima, est forma corporis naturalis organici, vitam & operationes vitales ei communicans.

Quotuplex est Anima?

Anima est triplex: Vegetativa, ut in Plantis; Sensitiva, ut in Brutis; Rationalis, quæ soli inest Homini. Omnium imperfectissima est Anima Vegetativa; nullius enim cognitionis aut libertatis est particeps. Perfectior aliquo modo est Sensitiva Anima, quæ aliquam admittit cognitionem, inferioris tamen conditionis; nempe sensuum cognitionem, ut &

ali-

aliquam libertatem, cujus particeps fit, quatenus rationi in homine subjicitur. Perfectissima omnium est Rationalis: tum ratione substantiæ, quia est spiritus, & a corpore separata potest existere; cum sensitiva & vegetativa a materia separatae intereant: tum etiam ratione operationum, uti sunt Cognitio, Electio, Consultatio.

Quid est Corpus Organicum?

Corpus organicum, est materia, eleganter & artificiose, in varia organa, ad certas operationes edendas, divisa: estque vel Plantarum, vel Brutorum, vel Hominis.

Quid est Vita?

Vita, est actus corporis naturalis viventis, esse, & operationes vitales, huic communicans.

Quid est Mors?

Mors, est privatio vitæ, in vivente, a solutione animæ & corporis, facta.

Quomodo dividitur Mors?

Mors dividitur in Naturalem & Violentam.

Quid est Mors Naturalis?

Mors naturalis est, quæ a naturali humidi resolutione oritur.

Quid est Mors Violenta?

Mors violenta est, quæ a præternaturali & externa quadam violentia oritur.

Quæ sunt Species Animati?

Species Animati, sunt Planta, & Animal.

CAPVT XIV.

De Plantis.

Quid est Planta?

PLanta, est corpus perfecte mixtum, vegetante tantum anima præditum; quæ e terra nascitur, alitur, augetur, & simile sibi generat.

Quid est Anima Vegetativa?

Anima Vegetativa est, qua vivens nutritur, crescit, & sibi simile generat.

Quæ sunt Facultates Animæ Vegetativæ?

Facultates Animæ Vegetativæ sunt tres: Altrix, Auclrix, & Procreatrix.

Quid est Facultas Altrix?

Altrix, est facultas animæ vegetativæ, qua id, quod quotidie de partibus viventis effluit, ex alimento extrinsecus assumpto, & in substantiam corporis viventis converso, restauratur.

Quid est Facultas Auclrix?

Auclrix, est facultas animæ vegetativæ, qua vivens, ex assumpto alimento, secundum omnes dimensiones extenditur, justamque quantitatem consequitur, ad edendum operationes debitas.

Quid est Facultas Procreatrix?

Procreatrix, est facultas animæ vegetativæ, qua vivens, ex semine prolifico, sibi simile generat.

Quid est Semen?

Semen Plantarum in se habet virtutem formatricem, quæ corpus plantæ effingit, efficitque, ut debitam formam consequatur. Semen in animali, est substantia

stantia humida, calida, spumosa, alba, ex reliquiis sanguinis, vi testium excocta & elaborata, ad animalis generationem.

Quæ sunt partes Plantæ?

Partes Plantæ, sunt vel Principales, vel minus Principales.

Quæ sunt Plantæ partes principales?

Principales Plantæ partes sunt, quibus anima vegetans nutritionem præcipue perficit, plantarumq; vitam conservat: ut *Succus, Radix, Rami, Caulis.*

Quæ sunt Plantæ partes minus principales?

Plantæ partes minus principales sunt, quæ ad plantam, nec in individuo nec in specie conservandam, multum faciunt: ut *Folia.*

Quæ sunt Species Plantæ?

Species Plantæ sunt, *Arbor, Frutex, Herba, Olus.*

Quid est Arbor?

Arbor, est planta, e cujus radice stipes nascitur, qui sese in multos effundit ramos: ut *Pomus, Pirus.*

Quid est Frutex?

Frutex, est planta, quæ ramos tantum habet sine stipite, a radice progenitos: ut *Avellana, Sambucus.*

Quid est Herba?

Herba, est planta minor, de se emittens caulem, vel solum folia: ut *Absinthium, Artemisia.*

Quid est Olus?

Olus, est planta sativa, cui apta: ut *Lactuca, Brassica.*

Quomodo Plantæ generantur ?

Plantæ generantur modo vario. Aliæ enim ex *Semine* (quod nihil est quam plantula, sive ramusculus, pulpa quadam, velut capsula, inclusus,) in terram coniecto; aliæ ex *Radice* aut *Bulbo* in terram depresso, vel *Surculo* aut *Ramo* terræ infixo; aliæ denique ex *Gemma*, vel *Surculo*, alteri plantæ inserto, propagantur.

Quæ causa, est quod non omnes Plantæ in omni loco aque feliciter proveniunt ?

Non omnes Plantæ in omni loco æque feliciter proveniunt, quia, pro diversitate caloris, qui in variis regionibus varius est; fermenti, quod non idem semper solum amat; & succi alimentarii, qui in aliis terris alius, Plantæ diversam terram requirunt.

CAPVT XV.

De Animalibus.

Quid est Animal ?

Animal est corpus animatum, sentiens, & loco se movens.

Quæ sunt Species Animalis ?

Species Animalis sunt Homo & Brutum.

Quid est Brutum ?

Brutum est animal irrationale, & dividitur in *Volatile*; *Natatile*, *Gressile*, & *Reptile*.

Quid est Anima Sensitiva ?

Anima Sensitiva est forma brutorum, qua objecta sensibilia cognoscunt, salutaria appetunt, & loco moventur.

Quæ

Quæ sunt Facultates Animæ Sensitiva?

Facultates Animæ Sensitivæ, sunt Cognoscens, Appetens, & Loco movens.

Quid est Facultas Cognoscens?

Facultas cognoscens est, quæ, mediante certo corporis organo, objecta sensibilia percipit. Atque hæc comprehendit Sensus Externos & Internos.

Qui sunt Sensus Externi?

Sensus Externi sunt, qui speciem, ab objecto immediate productam, in exteriori corporis parte recipiunt, & ad internos sensus transmittunt.

Quot sunt Sensus Externi?

Sensus Externi sunt quinque: *Visus*, *Auditus*, *Olfactus*, *Gustus* & *Tactus*.

Quid est Visus?

Visus, est sensus externus, oculi beneficio, lucis & coloris species recipiens & cognoscens.

Quid est Auditus?

Auditus, est sensus externus, auris beneficio, soni species recipiens & cognoscens. Est vero *Sonus* qualitas sensibilis, orta ex fractione aëris vel aquæ, cum percutiuntur aut impelluntur.

Quomodo formatur Echo?

Echo formatur, quando sonus a corpore duro, solido, concavo, reciproca aëris vibratione repercutitur; quæ repercussio, si denuo, in alio corpore, similiter disposito, fiat, Echo iteratur & multiplicatur.

Quid est Olfactus?

Olfactus, est sensus externus, nasi & processuum mamillarum beneficio, odoris species recipiens &

cognoscens. Hinc coryza laborantes, quod in iis abundans humor poros processuum mamillarium occupat, nec halitum odoratum ad nervulos agitando admittit, odores minime sentiunt.

Quid est Gustus?

Gustus, est sensus externus, linguæ beneficio, saporis species recipiens & cognoscens. Organum igitur Gustus primo est *lingua*, quæ carne sua molli & spongiosa, ad saporis, humore quodam vectos, imbibendos, ut spongia ad liquorem recipiendum, aptissima est. Dein est *superior gulæ pars*, sive spongiosus palati tractus, quem alii *gurgulionem* appellant. Potissimum denique sunt *nervi gustatorii*, qui ex cerebro in palatum derivantur. Ii, cum in linguæ cuspidē coeant, hinc illa linguæ pars gustu quam maxime pollet.

Quid est Tactus?

Tactus, est sensus externus, membranæ & nervorum beneficio, qualitatum tactilium species recipiens & cognoscens. Medium Tactus, est caro vel cutis, inter qualitatem tactilem, & nervum eam percipientem. Per carnem enim, & cutim interjectam, species objecti tactilis ad nervos deferuntur.

Quæ sunt illa, quæ Tactu sentiuntur?

Tactu sentiuntur Qualitates Tactiles, quales sunt: *Caliditas, Frigiditas, Gravitas, Levitas, Asperitas, Levitas, Mollities & Durities.*

Quid sunt Sensus Interni?

Sensus Interni sunt, qui speciem, per sensus externos allatam, in cranio recipiunt, censent & dijudicant. Nempe, Interni Sensus ab Externis pendent, nihilque cognoscunt, nisi prius fuerit cognitum per sen-

sensus externos, communicantes ipsis species rerum perceptarum. Sensus Interni tres sunt: *Sensus Communis, Phantasia, & Memoria.*

Quid est Sensus Communis?

Sensus Communis, est sensus internus, species sensuum externorum recipiens, & sensibilia propria a se invicem & communibus discernens. Sive, Sensus Communis, est sensus internus, per quem omnia sensuum externorum objecta, in cerebri medio, tanquam communi omnium impressionum centro, uniuntur.

Quid est Phantasia?

Phantasia, est sensus internus, species a sensu communi ad se delatas, diutius retinens, & diligentius examinans. Sive, Phantasia est sensus internus, per quem sensuum externorum objecta, etiam absentia, ex olim facto impressionis vestigio, præsentia quasi sistuntur.

Quid est Memoria?

Memoria, est Phantasie famula & ministra, quæ species receptas & dijudicatas retinet, & conservat, ac præsentis sistit.

Quæ accidunt Sensibus?

Sensibus accidunt Somnus & Vigilia.

Quid est Somnus?

Somnus, est privatio actionum Sensus Communis, sensuumque externorum, & facultatis loco motivæ, a spirituum animalium in organis negatione, ob salutem animalium facta. Conciliant autem Somnum ea, quæ spirituum copiam minuunt, vel motum eorum retardant. Restaurat interim Somnus spiritus

animales , quatenus in animali dormiente , ex ciborum concoctione , novi surgunt , qui quiescente animali non facile dissipantur . Unde animalia , somno fota , vigorem suum recipiunt . Quamobrem , deficientibus spiritibus Somnus obrepit , & tam diu durat , donec spiritus denuo collecti , in organa sensuum , prono quasi alveo , se rursus diffundunt , & torporem animali excutiunt .

Quid est Insomnium ?

Insomnium , est quædam , in somno , diversorum objectorum , facta repræsentatio . Varietasque Insomniorum oritur a diversitate 1. *Vestigiorum cerebro impressorum* . Sic ,

*Pleraq; quæ sensu volvuntur vota diurno ,
Tempore nocturno reddit amica quies .*

2. a diversitate *Temperamenti* , *Ciborum* item & *Potus* , quibus spiritus aliter atque aliter figurantur , vel moventur . Sic biliosi , de rixis , pugnis , incendiis ; phlegmatici , de eluvionibus aquarum , navigationibus , submersione &c. somniant . 3. Etiam *Consuetudinis* hic magna vis est , quæ , cum altera quasi sit natura , nec in somno expelli potest , sed sui vestigia relinquit . Unde Claudianus :

*Venator defessa thoro cum membra reponit ,
Mens tamen ad sylvas , & sua castra redit .
Judicibus lites , aurigæ somnia currus .*

Quid est Vigilia ?

Vigilia , est operatio sensus communis , & sensuum externorum , facultatisque locomotivæ , a spirituum animalium in organis præsentia excitata . Hinc , quæ spiritus animales augment , & fortius excitant , vigiliam inducunt .

Quid

Quid est Facultas Appetens ?

Facultas Appetens est, secundum quam animal ad bonum sensu perceptum inclinatur. Sive, est facultas, qua animal in ea, quæ nutritioni & speciei propagationi inserviunt, naturali quodam instinctu fertur. Dicitur alias Appetitus Sensitivus.

Quotuplex est Appetitus Sensitivus ?

Appetitus Sensitivus triplex est : *Appetitus Cibi, sive Fames ; Appetitus Potus, sive Sitis ; & Appetitus Veneris.*

Quid est Fames ?

Fames, est appetitio cibi seu alimenti solidioris, orta ex suctione sensu percepta in ore ventriculi, pro restauratione partium, quæ in animali fuerunt absumptæ. Scilicet, cum animalis stomachus vacuus est, ab humore quodam acri, ex arteriis in illum defluente, & cibis diluendis, macerandis & fermentandis destinato, vellicatur, sicque nervi inde ad cerebrum protensi, concutiuntur, ad cibi necessitatem animali significandam.

Quid est Sitis ?

Sitis, est appetitus, quo animal ad potum, naturæ suæ convenientem, fertur. Oritur Sitis in animali, quando in faucibus, palato, vel lingua ipsius, ab ardore ventriculi, & vapore quodam calidiore, ex inferioribus corporis partibus exsudante, a cibis item salis & amaris, similibusque causis, excitatur quædam ariditas, a qua nervuli aliquo modo corrugantur, ad potus necessitatem animali ostendendam.

Quid est Appetitus Veneris?

Appetitus Veneris est, quo animal in conjunctionem cum simili, ad speciei propagationem, vehementi quodam impetu fertur. Existit autem impetus hic animalium inde, quod, iuxta illorum ætate, semen in vasis generationi & receptioni illius dicatis auctum, accedente quodam ex spirituum affluxu calore, libidinem proficit; quæ in masculis, ex fœminæ, & contra in fœminis, ex masculorum præsentia, multum agitatæ spiritibus animalibus, animalia in mutuum conjunctionem furore quodam impellit.

Quid est Facultas Locomotiva?

Facultas Locomotiva est, secundum quam animal fertur de loco in locum, ad objectum vel prosequendum, vel fugiendum.

Quotuplicia sunt Bruta?

Bruta sunt duplicia: Imperfecta, vel Perfecta.

Quid sunt Bruta Imperfecta?

Bruta Imperfecta, sunt animalia ex putredine orta, sanguine carentia, & incisuris distinctum corpus habentia.

Quid sunt Bruta Perfecta?

Bruta Perfecta sunt, quæ corpus habent integrum, & cæsura carent, quæque sanguine, quem intra se gi-gnunt, sunt prædita.

Quotuplicia sunt Bruta Perfecta?

Bruta Perfecta sunt vel *Amphibia*, quæ in utroque elemento, aqua & aëre, vivunt: ut *Rana*, *Natrix*. Vel *Heterobia*, quæ in uno tantum elemento vivunt: ut *Pisces* in aqua, *Aves* in aëre.

Quid

Quid est Humor?

Humor, est pars corporis liquida & fluida, in vasis certis contenta, & ad conservationem corporis faciens.

Quotuplex est Humor?

Humor est duplex: *Insitus, vel Acquisitus.*

Quid est Humor Insitus?

Humor insitus est, qui corpori ab ipsa formatione inest, & nativi caloris pabulum est atque vehiculum. Dicitur alias *Humidum Radicale.*

Quid est Humor Acquisitus?

Humor Acquisitus est, qui, insiti reparandi causa, ab utiliore alimentorum parte proficiscitur, ut *Sanguis* & *Pituita*, qui utiles sunt humores, & maxime ad nutritionem faciunt: nam inutiles sunt, *Cholera* & *Melancholia*, item *Sudor*, *Lacryma*.

Quid est Sanguis?

Sanguis, est humor calidus, temperatus, dulcis, rubicundus, ex partibus chyli temperatioribus, pinguioribus, & aëreis confectus.

Quid est Pituita?

Pituita est humor frigidus, liquidus, albus, & insipidus, ex frigidiore chyli portione in epate genitus, ut, per ulteriorem preparationem, in sanguinem redigatur.

Quid est Bilis Flava?

Bilis flava, est humor calidus, crassus & amarus, & calidioribus chyli partibus procreatus, & in vesica fellea collectus.

Quid est Bilis Atra?

Bilis Atra, est humor frigidus & siccus, crassus, nigricans, acerbus & acidus, e frigidioribus chyli partibus procreatus, & in splenem collectus.

Quid est Spiritus?

Spiritus, est substantia pertenuis, aërea ac vaporosa, primum animæ instrumentum ad functiones obcundas.

Quotuplex est Spiritus?

Spiritus est duplex: *Insitus*, & *Influens*.

Quid est Spiritus Insitus?

Spiritus Insitus est, qui singulis membris solidis innascitur, & ex semine genitali procreatur, prima caloris nativi sedes.

Quid est Spiritus Influens?

Spiritus Influens est, qui in insiti, ne exsolvatur & evanescat, subsidium emanat.

Quotuplex est Spiritus Influens?

Spiritus Influens est triplex: *Naturalis*, *Vitalis*, & *Animalis*.

Quid est Spiritus Naturalis?

Spiritus Naturalis est, qui in epate generatur ex puriore sanguine, ad naturales operationes perficiendas.

Quid est Spiritus Vitalis?

Spiritus vitalis est, qui in corde gignitur ex naturali spiritu, & per arterias diffunditur in totum corpus.

Quid est Spiritus Animalis?

Spiritus Animalis est, qui in cerebro ex vitali spiritu gignitur, ad operationes sensuum perficiendas.

Quid

Quid est Avis?

Avis, est brutum volans, sanguineum, rostratum & pennatum: ut Aquila, Pavo,

Quid est Piscis?

Piscis, est brutum natans, branchiis, pinnis, spinis ac vesica constans. Suntque alii squamosi, alii plani.

Quid est Quadrupes?

Quadrupes, est brutum gressile, caput, collum, dorsum, ventrem, pedesque quatuor habens.

CAPVT XVI.

De Homine.

Quid est Homo?

Homo, est animal rationale. Sive, ut Recentiores definiunt, Homo, est substantia, ex mente finita, & corpore organico composita.

Quomodo dividitur Homo?

Homo dividitur in Animam Rationalem, & Corpus humanum.

Quid est Anima Rationalis?

Anima Rationalis, est forma hominis, qua est, intelligit, & vult, quæque corpori organico mutuo quasi fœdere jungitur.

Quanam sunt Facultates Animæ Rationalis?

Facultates Animæ Rationalis sunt vel Primariæ, vel Secundariæ. Primariæ sunt, Intellectus & Voluntas: Secundariæ sunt, Imaginatio, Risus, & Sermo.

Quid est Intellectus ?

Intellectus, est facultas animæ rationalis, ad verum cognoscendum ordinata.

Quid est Voluntas ?

Voluntas, est facultas animæ rationalis, ad bonum appetendum, & malum fugiendum ordinata.

Quid est Imaginatio ?

Imaginatio, est facultas animæ rationalis, qua vel percipiuntur objecta a sensibus externis percepta, vel intellectui repræsentantur.

Quid est Risus ?

Risus, est facultas animæ rationalis, ad lætitiæ repræsentandam ordinata.

Quid est Sermo ?

Sermo, est facultas animæ rationalis, ad res mente conceptas enunciatione manifestandas ordinata.

Quid sunt Affectus Animi ?

Affectus Animi, sunt motus appetitus sensitivi : vel, uti Recentiores exponunt, sunt Animi commotiones, quæ per spirituum animalium motum, cordis alterationem subsequenter, in animo ita producantur, conservantur & corroborantur, ut non corpori, vel objectis excitantibus, sed menti passio ascribatur. Namque, commovetur animus a peculiari motu spirituum, qui cordis alterationem sequitur, & per nervulos, a præcordiis in cerebrum ascendentibus, in animi sedem diffunditur, eumque valide concutit : tum igitur oritur quædam perturbatio, sive præceptus quædam iudicii & voluntatis inclinatio, aut
aver-

aversio. Tales Affectus sunt: Amor, Odium, Tristitia, Lætitia &c.

Quid est Corpus Humanum ?

Corpus humanum, est subjectum animæ rationalis, artificiosissime & elegantissime ad varias operationes edendas constructum.

Quotuplices sunt partes Corporis Humani ?

Partes corporis humani sunt vel *Similares*, vel *Dissimilares*.

Quid sunt Partes Similares ?

Partes Similares sunt, quæ undique in similes secundum sensum particulas, ejusdemque speciei, dividi possunt. Uti Ossa, Cartilagines, Fibræ, Venæ, Arteriæ, Nervi, Membranæ, Tendines, Caro, Ligamenta, Cutis, Pinguedo, Pili, Ungues.

Quomodo dividitur Corpus Humanum ?

Corpus Humanum dividitur in Ventres, & Artus,

Quid est Venter ?

Venter est insignis corporis cavitas, in qua viscus aliquod primum reconditum est.

Quot sunt Ventres ?

Ventres sunt tres: Supremus, Medius, & Infimus.

Quid est Venter Supremus ?

Venter Supremus est, in quo Cerebrum, cum reliquis partibus animalibus, suum habet situm. Dicitur Caput.

Quid est Venter Medius ?

Venter Medius est, in quo Cor, cum reliquis partibus vitalibus, suum habet situm. Dicitur Thorax.

Quid

Quid est Venter Infimus ?

Venter Infimus est, in quo Hepar, cum reliquis partibus naturalibus, suum habet situm. Dicitur in specie Venter, aut Abdomen,

Quid sunt Artus ?

Artus, sunt partes extremæ, trunco, ramorum instar, adnatæ; & sunt Manus & Pedes.

Quid sunt Partes Corporis Dissimilares ?

Partes Corporis Dissimilares sunt, quæ, ex dissimilibus compositæ, diversæ sunt substantiæ & nominis: ut Manus, Pes, Caput,

Quid sunt OSSA ?

Ossa, sunt partes corporis durissimæ, siccissimæ, frigidissimæ, a seminis crassamento per exustionem genitæ, ad totius stabilimentum & fulcrum. Sed & processioni inserviunt ossa, quod liquet in cruribus. Hinc Serpentes, Vermes, & alia reptilia, quæ cruribus carent, serpere coguntur,

Quot sunt Ossa ?

Numerus Ossium apud Anatomicos est incertus, Galenus 242. Vesalius. 307. numerant, Schola Salernitana sic censet:

*Ossibus ex denis bis centenisq; novenis,
Constat homo; denis bis dentibus & duodenis;
Et ter centenis decies sex quinqueque venis.*

Quæ sunt Partes Ossium ?

Partes Ossium sunt vel Solidæ, vel Cavæ. Cavitates iterum vel sunt intus, ubi Medulla; cujusmodi tamen cavitates non sunt ubique conspicuæ: vel
extra;

extra ; quæ , si sint profundæ , Acetabula , Græcis *κεφάλαι* dicuntur.

Quomodo dividitur Compages Ossium in Corpore humano ?

Compages Ossium in Corpore humano dividitur in Caput , Truncum , & Artus.

Quid est Caput ?

Caput , est pars supra collum posita , cerebri domicilium : & dividitur in Cranium , & Faciem.

Quid est Cranium ?

Cranium , est os capitis rotundum , & crassum , ossibus & futuris distinctum , ac membrana circumdatum , cerebri imprimis muniendi & custodiendi causa paratum , pilosæ capitis parti proxime adhærens.

Quæ sunt Ossa Cranii ?

Ossa Cranii sunt vel Communia , vel Propria. Communia Ossa Cranii sunt , quæ cum superiori maxilla participant. Nempe *Cuneiforme* , ita dictum quia cæteris ossibus cranii & maxillæ superioris , cunei instar , se insinuat ; & *Spongiosum* seu *Cribriforme*. Propria Ossa Cranii sunt , unum *Frontis* , quod sicut in adultis tam viris quam foeminis est unicum , ita in recens natis geminum datur , & habet figuram imperfecte circularem. Sequuntur duo ossa *Sincipitis* , quæ in puerulis primum videntur membranacea , post cartilaginea , denique ossæ evadunt. Proximum est os unum *Occipitis* , quod in infantibus est multiplex , & nunc tribus , nunc quatuor , nunc quinque constat ossibus. Denique se offerunt Ossa duo

duo *Temporum* durissima, quorum vulnera, ob musculos temporales, censentur lethalia.

Quanam sunt Sutura Cranii?

Suturae Cranii sunt, quae, instar ferrae dentatae coeundo, ossa cranii invicem connectunt. Suntque tres praecipuae: Una anterior, in sincipite, quae dicitur *Coronalis*; vel, quod antiqui ea parte capitis coronas gestabant; vel quia coronam seu circulum aliquo modo repraesentat. Huic opponitur altera in occipite, a figura Graecae literae Λ , *Lambdoidea* dicta, quae, a basi occipitis, ad utramque aurem oblique ascendit, & in angulum coit. Tertia est *Sagittalis*, quia per lineam rectam, instar sagittae, per longituditudinem capitis, inter Coronalem & Lambdoideam, extenditur.

Quid comprehendit altera Capitis pars, nimirum Facies?

Facies comprehendit duas Maxillas, Superiorem, & Inferiorem. *Superior*, est faciei pars ossea, comprehendens inferiorem partem orbitae oculorum, & nares, malas, palatum, ac dentium superiorem ordinem. *Maxilla Inferior* in adultis unicum est os; in puerulis, usque ad annum septimum, constat ossibus duobus. Figura sua refert Arcum, habetque substantiam valde duram, ut ad mordendum & manducandum sit aptior, intus vero cavitatem, qua medulla continetur, tum ad sui, tum ad dentium nutritionem. In margine utriusque maxillae occurrunt cavitates, sive alveoli, quibus Dentes infixi.

Quid sunt Dentes?

Dentes, sunt partes omnium durissimae, intus cavae, venulis, arteriis & nervis praeditae, molliendis,
& pra-

& præparandis ventriculo cibis, vocique formandæ, destinatæ. Duritie vix cedunt lapidibus, nec facile cremari possunt: unde Tertullianus in illis semina futuræ resurrectionis latere credidit. Communiter vero est unus ordo dentium in quavis maxilla: & in universum 32. interdum 30. vel 28. numerantur.

Quomodo dividuntur Dentes?

Dentes dividuntur in Incisores, Caninos, & Molares. *Incisores*, in anteriore utriusque maxillæ parte, cibum ori ingestum incidunt, inque partes minutiores dividunt, suntque VII. *Canini*, extremis incisoribus, tanquam focii, appositi, cibum magis conterunt, suntque IV. nimirum in quavis maxilla duo. *Molares*, postremum obtinent locum, &, molæ instar, in minimas particulas cibum dividunt; suntque XX. decem scilicet in quavis maxilla.

Ex quibus componitur Truncus Ossium Compagis?

Truncus Ossium Compagis componitur ex Spina & Thorace: quibus aliqui addunt Os Innominatum.

Quid est Spina?

Spina, sic dicta, quia piscis VII. refert, est totum id, quod a prima cervicis vertebra, usque ad os coccygis se porrigit; & dividitur in Cervicem, Dorsum, Lumbos, & Os sacrum.

Quid constituit Cervicem?

Cervicem constituunt septem vertebræ superiores. Sunt autem omnes vertebræ excavatæ, pro spinali medulla continenda: pluresque factæ sunt, tum ob motum, qui antrorsum & retrorsum fieri debuit,
tum,

tum, ne unius læsio, totam spinam traheret in consensum.

Quid constituit Dorsum ?

Dorsum constituunt vertebræ XII. quæ omnino inter se sunt similes, excepta duodecima vel undecima, quæ differentem habet articulationem ab aliis: unde totius spinæ motus, flexio nimirum, extensio, obliquatio, super ea vertebrâ perficitur.

Quid constituit Lumbos ?

Lumbos constituunt vertebræ V. maximæ & crassissimæ, foraminibus crebris perviæ, quarum motus laxior quam dorsi, ut facilius ad terram possimus inclinare.

Quid est Os sacrum ?

Os sacrum est, quod lumbis subicitur, & dicitur *sacrum*, quia est omnium in spina maximum; Antiquis enim, magnum, vocabatur sacrum. Latum est hoc Os, immobile, dorsi que basin constituit; figurâ ei fere triangularis. Extremo ossis sacri aliud os cartilaginosum adhæret, quod vocatur *Coccyx*; ossibus tribus, vel interdum quatuor constat.

Quid est Thorax ?

Thorax, est ambitus osseus, partium vitalium receptaculum: atque constat Sterno, Costis, Scapulis, & Claviculis.

Quid est Sternum ?

Sternum, est os pectoris, anticam ejus partem constituens, in qua costæ conveniunt. Dicitur Sternum, quia costis incumbit & insternitur; habetque formam Pugionis. Substantia ejus est partim ossea, partim cartilaginea: estque in infantibus

bus fere totum cartilagineum. Usus ejus, tum ut ab externis injuriis, instar clypei, cor defendat, tum ut inter se costas connectat.

Quid sunt Costæ?

Costæ, sunt laterales pectoris partes, ossæ, ex feminali superfluitate, e spina dorsali prognatæ, in octava spinæ dorsii vertebra initium sumentes, suntque utrinque XII. quarum VII. superiores *Veræ* dicuntur, quia cum Sterno committuntur: reliquæ quinque inferiores, *Adulterinæ* sunt, quia non pertingunt ad os pectoris, sed inchoatæ & quasi mutilæ, in cartilagineum desinunt, ut viscerum, præcipue Hepatis & Lienis, tumoribus facile cedant & obsequantur. Usus Costarum, imprimis Verarum, est, ut faciant ad pectoris, & viscerum ibi contentorum defensionem.

Quid sunt Scapulae?

Scapulæ, sunt duo ossa, in dorso sita, Claviculis, & Brachio inarticulatæ, ad costarum robur, & musculorum implantationem.

Quid sunt Claviculae?

Claviculæ, sunt gemina ossa, collo proxime subiecta, quæ humerum efformant. Dicuntur Claviculæ, quod thoracem claudant. Situs earum est transversim sub imo collo. Figura repræsentat duos semicirculos ex adverso junctos: inque viris magis incurvantur, ut minus impediatur brachii motus; in mulieribus minus: conferuntque ad varios brachii motus.

Quid est Os Innominatum?

Os Innominatum, sic dictum, quia tempore Galeni nomine carebat, constat tribus ossibus, Ilio, Osse Pubis, & Ischio.

Quid est Os Ilium?

Os Ilium, sic dictum, quod Ilium Intestinum continet, est prima pars Ossis Innominati, quæ superior & latissima, per ligamentum commune membranaceum, Ossi Sacro connectitur. Hoc os in muliere est amplius, & spina ejus magis in latera educitur: ut gravidæ uterus melius ei innitatur.

Quid est Os Pubis?

Os Pubis vel pectinis, est secunda pars Ossis Innominati, media & interior, quod os, cum alterius lateris osse, necitur per mediam cartilaginem.

Quid est Os Ischion?

Os Ischion vel Coxendicis, est tertia Ossis Sacri pars, quæ inferior & exterior, in qua est ampla & profunda cavitas, pro femoris capite insigni excipiendo; quo si excidat, sive ab humore interno sive externo, luxatio oritur.

Quomodo dividuntur Artus?

Artus dividuntur in Manus & Pedes.

Quæ sunt Ossa Manus?

Ossa Manus dividuntur in Brachium, Cubitum, & Extremam Manum.

Quale est Os Brachii?

Os Brachii, est unicum, magnum, validum, & inæquale, quod parte superiore habet caput magnum, cum Scapula articulatam; parte autem inferiore articulatur cum Cubito & Radio.

Quid est Cubitus?

Cubitus constat duobus ossibus, quorum alterum est inferius & longius, quod *Ulnam* & *Cubitum* vocant,

tant, alterum est Superius, quod *Radium* appellant. Atque *Ulna* parte superiore cum Osse brachii articulatur; parte inferiore cum *Carpo*: eademque *Radii* ratio.

Quæ est Extrema Manus?

Extrema Manus dividitur in *Carpum*, *Metacarpium*, & *Phalangem* *Digitorum*. *Carpus* proxime attingit *Radium*, & VIII. constat ossibus, quæ, vel nullo modo inter se moventur, vel languide. *Metacarpium* constat ossibus V, quæ cum *Carpo* cohærent, suntque intus cava, foris gibbosa, medullam continentia. *Digitorum* ossa sunt XV. connumerato primo osse pollicis: ut in quovis digito sint tria; ea foris sunt gibbosa, intus vero cava & plana ad apprehensionem; differuntque quoad magnitudinem: primum enim, *Metacarpio* proximum, est majus secundo; secundum majus est tertio.

Quæ sunt Ossa Pedis?

Ossa Pedis dividuntur in *Femur*, *Tibiam*, & *Extremum Pedem*.

Quid est Femur?

Femur, est os corporis maximum & longissimum, ejusque superior pars in coxendicis acetabulum inseritur, inferior cum *tibia* articulatur. Atque huic articulationi femoris & tibæ imponitur *Mola*, os rotundum & latum, quod alii *Patellam* vocant: id *Genu* constituit, & articulum firmat, ne femur ad anteriora labatur & luxetur, atque ita homo cadat, præsertim per declivia ambulans, aut genu multum flectens.

Quid est Tibia?

Tibia, est pars, quæ inter *Genu* & *Talum* intercedit, constatque ossibus duobus, sicut & *Cubitus*.

Primum os majus appellatur nomine totius, *Tibia* nimirum, vel *Canna major*; alterum minus, *tibiæ extrinsecus accedens*, dicitur *Sura*, aut *Canna minor*,

Quæ sunt Ossa Pedis Extremi?

Ossa Pedis Extremi dividuntur in partes tres, *Tarsum* scilicet, *Metatarsum*, & *Digitos*. *Tarsi* ossa sunt VII. Primum dicitur *Talus*, seu *Os Balistæ*, quod ossibus *Tibiæ* subjicitur, tanquam basis. Alterum crassissimum, faciens ad pedis firmationem, dicitur *Calx*, sive *Calcaneum*. Tertium, est *Os Naviculare*, a cymbæ similitudine: id connectitur cum talo; reliqua tria articulantur naviculari. *Ossa Metatarsi* vel *Plantæ* numerantur V. quæ cum ossibus *Tarsi* habent connexionem. *Digitorum* ossa sunt XIV. Pollex enim tantum ex duobus ossibus constat: Cætera ossa se habent ut in manu. In Manuum & Pedum internodiis reperiuntur ossicula quædam valde exigua, *Sesamoidea* dicta, quia sesami semini forma & parvitate æquiparantur. Numerus est incertus: XII. vulgo in singulis Manibus & Pedibus numerantur, ususque eorum est firmare articulum, avertere luxationem, & replere intervalla vacua.

Quid est CARTILAGO?

Cartilago, est pars similis, quodammodo dura, flexilis tamen, ad custodiendas partes motui destinatas. Habet magnam cum *Ossæ* convenientiam, ac in illis animalibus, quæ ossibus carent, ossium vicem gerit. Differt tamen ab Ossibus, quod *Cartilago* est absque medulla, cavitatibus & cavernulis.

Quis est Usus Cartilaginum?

Usus *Cartilaginum* est I. motum lævitate sua reddere faciliorem: unde fit, ut mobiles omnes articuli,

car-

cartilagine incrustentur. 2. Reddunt quoque motum diuturniorem; quia ossium extrema, cum sint durissima, mutuo contactu contererentur, & sic aliquando cessaret motus, nisi cartilagine molliore obducerentur. 3. Injurias & impetus, extrinsecus occurrentes, molliter cedendo arcent.

Quomodo dividuntur Cartilagines?

Cartilagines dividuntur in Capitis, Trunci, & Artuum.

Quæ sunt Cartilagines Capitis?

Cartilagines Capitis sunt Oculorum, Nasi, Maxillæ inferioris, & Aurium. *Palpebras* oportuit esse cartilagineas, ob faciliorem motum oculorum. *Trochlea*, est cartilago exigua & teres, canalis modo excavata, in oculi angulo majore sita. *Cartilagines Nasi* sunt quinque, duæ superiores ossibus asperis nasi adnatæ, & tres inferiores, duæ scilicet laterales, inter respirandum mobiles, & septum aut diaphragma, quod est immobile. *Cartilago Maxillæ Inferioris* in medio mento, in infantibus, duo maxillæ ossa conjungit, in adultis vero in osseam tandem substantiam degenerat. *Aurium Cartilago*, est corpus continuum, orbiculare, in principio exortus sui durius & crassius, in fine mollius & tenuius, variis circumvolutionibus, sinubus & gibbis constans. Oportuit Aures esse cartilagineas: si enim essent osseæ, levi de causa frangerentur, & dormienti essent impedimento.

Quæ sunt Cartilagines Trunci?

Cartilagines Trunci, sunt vel Spinæ, vel Thoracis, vel Ossis Innominati. Inter Spinæ Cartilagines eminet *Arteria Aspera*, quæ instar fistulæ aërem in pul-

mones deducit, & fumosos vapores e pulmonibus reducit, constructa e plurimis cartilaginibus, membranarum opera coherentibus, annulique figuram referentibus, circulum tamen integrum non absolventibus: ubi enim dorsum spectant ac œsophagum tangunt, quarta quasi sui parte deficiunt. Caput Arteriae Asperæ *Larynx* vocatur, ex quatuor constans cartilaginibus. *Laryngis* operculum *Epiglottis* dicitur, quæ est cartilago, ex ampliore basi definens in mucronem.

Quid sunt FIBRÆ?

Fibræ, sunt partes similes, albæ, solidæ, siccæ, & oblongæ, exiguum filamentorum instar, ad motum & carnis custodiam destinatæ. Dividuntur ratione situs, in Rectas, Transversas, & Obliquas. *Rectæ*, secundum longitudinem feruntur, & attractioni inserviunt. *Transversæ*, secundum latitudinem feruntur, & retentioni inserviunt. *Obliquæ*, medium situm obtinent, & retentioni inserviunt.

Quid est VENA?

Vena, est pars similis, rotunda, fistulæ instar excavata, ab epate orta, una constans tunica, fibris triplicibus contexta, spiritum naturalem, & sanguinem, pro nutrimento, ad singulas partes devehens. Magnitudinis sunt diversæ, & habent intus valvulas, quæ robur venis conciliant, & impetum gravis ac fluidi sanguinis sistunt ac morantur.

Quæ sunt Vena præcipuæ?

Venæ in toto corpore referuntur ad duas veluti matres, Portam nimirum, & Venam Cavam: quibus ab Asellio adduntur Venæ Lactææ.

Quid

Quid est Vena Porta?

Vena Porta, est insignis quædam vena, ex cava hepatis parte prodiens, & per infimum ventrem propagines suas dispergens. Dividitur in Radices, Truncum, Ramos, & Surculos. *Radices*, sunt exiguæ quædam venulæ, in cava hepatis parte paulatim in majores ramos abeuntes, ex quibus tandem magnus Truncus oritur. *Truncus*, est magnum illud vas, ab hepate secedens, & oblique versus lævam tendens.

Quid est Vena Cava?

Vena Cava, est vena maxima & amplissima, ex gibba seu convexa hepatis parte prodiens, & per universum corpus propagines suas dispergens. Dividitur, instar Venæ Portæ, in Radices, Truncum, Ramos, & Surculos. Ac Axillaris quidem in initio brachii sejungit sese in duos ramos insignes, quorum superior & minor *Cephalica* dicitur, quia in capitis affectibus secatur, isque inter digitum annularem & minimum *Salvatellam* gignit. Alter inferior & minor, *Basilica* item Epatica, quia in jecoris affectibus secari solet, vocatur: atque hic iterum in duos ramos dispescitur, Profundum scilicet, & Subcutaneum.

Quid sunt Vena Lactea?

Venæ Lactææ, a lacte, cujus similitudinem candore referunt, sic dictæ, & quas Caspar Ascellius, Anatomicus Ticinensis, A. 1622. primus detexit, per mesenterium, ab intestinis, obliquo ductu, inter duas ejus tunicas, in pancreas perferuntur: inde, per latera Portæ, in hepar illatæ, in fibras minutissimas scissæ, disseminantur, donec evanescent. Vehunt autem illæ

chylum, & distribuunt, eumque reddunt aptiorem ad sanguinis formam induendam.

Quid sunt ARTERIÆ?

Arteriæ, sunt vasa concava, oblonga, duplici crassissima tunica constantia, deducendo vitali spiritui, nec non temperando & expurgando cordis ac singularum partium calori, dicata.

Quomodo distinguitur Arteria a Vena?

Vena ab Arteria tribus potissimum modis distinguitur: Structura nempe, Motu, & Usu. Structura quidem, quia Vena tunicam habet tenuem; Arteria crassissimam. Motu vero, quia Arteria perenni & conspicuo diastoles & systoles motu agitur; Vena autem immobilis est. Usu denique, quia Arteria vitalem deferret spiritum cum tenuissimo sanguine; Vena crassiorem sanguinem & spiritum. Venis insita est facultas alterandi & coquendi sanguinem; Arteriis nulla. Arteria sanguinem exportat a corde ad partes; Vena reportat.

Quomodo dividuntur Arteriæ?

Arteriæ præcipue binæ sunt, Aorta sive Magna, & Pulmonalis. Aorta, sive Arteria Magna, sanguinem spiritu vitali turgidum, e cordis sinistro ventriculo coarctato, cum impulsu excipit, eundemque per totum corpus, mediantibus ramis ac propaginibus, deferret. Dividitur in duos truncos insignes, Ascendentem, & Descendentem. Pulmonalis, sanguinem e cordis dextro ventriculo coarctato excipit, & per amplum pulmonum parenchyma distribuit, unde & in dextrum sinistramque ramum, ad dextram sinistramque pulmonis partem excurrentes, dispescitur.

Quid

Quid sunt Nervi.

Nervi, sunt partes corporis similes, spermaticæ, a cerebro aut spinali medulla exortæ, interiori parte medullares, exteriori membranaceæ, spiritum animale deferentes ad sensum & motum. Usus iste nervorum præcipue ex læsione eorundem patescit: quod si enim obstruantur, vel totaliter sensus motusque pereunt, uti in apoplexia; vel ex parte sensus ac motus fit privatio. Si dissecentur, perit similiter motus ejus partis, in quem inferebantur. Numerantur vulgo XXXVII. paria, quorum VII. a Cerebro, XXX. a Spina ortum ducunt.

Quid est MEMBRANA?

Membrana, est pars similis, ex semine genita, tenera, lata, plana, alba, singulas alias partes tegens, sensus gratia. Sicut autem triplex statuitur Corporis regio, Suprema, Media, & Infima; ita Supremam, cerebrum nempe, velant duæ meninges. Mediam regionem omni ex parte cingit aliqua membrana, quæ subtensa est costis. In imo denique ventre, Peritonæum, instar sacci, partes omnes in eo contentas, complectitur. Habent præterea singulæ corporis partes peculiare suas membranas, ut Lingua, Lien &c.

Quid est TENDO?

Tendo, est extrema pars illorum musculorum, qui validum & vehementem aut continuum edunt motum, eo faciens, ut ad arbitrium nostrum partes moveri possint.

Quid est CARO?

Caro, est pars similis, mollis, rubicunda, ex sanguinis coagulo concreta. Dividitur in Musculosam, Viscerosam, Membranosam, & Glandulosam.

Tuetur Caro corpus contra frigus, aliaque foris incommodum allatura.

Quid est LIGAMENTVM?

Ligamentum, est pars corporis similis, genita ex semine, aliquatenus dura, ossa instar funiculi inter se connectens, & reliquas partes ossibus, ne fiat luxatio.

Quid est CVTIS?

Cutis, est pars similis, frigore, ex lento quodam humore, concreta, carni tegenda, & tactui inferviens. Perforata est cutis variis locis, & quidem foramina ejus quædam sunt conspicua, ut Os, Aures, Nares: alia inconspicua & insensibilia, ut pori: qui tamen hiberno tempore Conspiciuntur, cum corpus derepente denudatur. Ratione Connexionis, quædam cutis a partibus subjectis facile separatur, ut in Ventre, Brachiis; ab aliis difficulter, ob membranam carnosam, cui nectitur, ut in Plantis pedum, Volis manuum, Fronte, & Facie.

Quid est Cuticula?

Cuticula, est summa seu ultima cutis, seu pellicula tenuis, ex oleosa, crassa, viscida materia genita, ad cutim tegendam. Perspicua est, ac fit callosa ob labores in manibus & pedibus.

Quid est PINGVEDO?

Pinguedo, est corpus simile, expers vitæ, ex sanguine unctuosum membranarum frigiditate concrefcens, ad totius tutamen. Fovet enim pinguedo calorem nativum, juvat concoctionem ventriculi, motum reddit faciliorem, in inedia vertitur in alimentum, denique spatia vacua implet inter musculos, vasa, & cutim, adeoque corpus reddit æquale, album, mol-

molle, pulchrum, formosum. Hinc tabidi & vetulæ deformes sunt.

Quid sunt PILI?

Pili, sunt corpora similia, ex fuliginosis & excrementitiis vaporibus, crassis, terreis, & nonnihil glutinosis enata, & calore moderato foras protrusa. Possunt pili per totam cutim, quia porosa est, generari, & habet quilibet porus infixam radicem pilosam, si excipiatur vola manus, & planta pedis, quæ partes, ob motum & perpetuam attritionem, pilis carent. Ex cicatrice etiam nulli exsurgunt pili, cum poris destituatur. Suntque Pili vel Congeniti, vel Postgeniti. *Congeniti* sunt, qui in utero nobiscum nascuntur, ut pili Capitis, Superciliorum, & Palpebrarum. *Postgeniti* nascuntur in homine extra uterum, ut sub Alis, in Barba. Porro, in calidis & siccis hominibus pili nascuntur crispī, & nigri, in iis vero qui humore abundant, albi, & recti. *Calvitiei* causa est cutis ficitas: *Canitiem* vero efficit nativi caloris inopia. *Usus* pilorum est, ut sint partium tegumentum, caput & faciem exornent, & corpus a superfluis fuliginibus expurgent.

Quid sunt VNGVES?

Ungues, sunt corpora similia, ex crassioribus excrementis, quæ ab ossibus & cartilaginibus proveniunt, enata; ut digitos tueantur, apprehensionem faciliorem reddant, & ad fricandum ac scalpendum conferant.

Quid sunt Partes Corporis Dissimilares?

Partes Corporis Dissimilares sunt, quæ ex aliis constant partibus diversarum naturarum, & dividuntur in Ventres & Artus.

Quid

Quid significat hoc loco Venter ?

Venter, est pars corporis humani dissimularis, maxima, insignem habens cavitatem, & nobile aliquod Viscus continens : & dividitur in Supremum, Medium, & Infimum.

Quis est VENTER SUPREMVVS ?

Venter Supremus, est ipsum Caput, in quo Cerebrum, cum reliquis partibus animalibus, situm suum habet, ac dividitur in Partes Externas, & Internas.

Quenam sunt Partes Capitis Externæ ?

Partes Capitis Externæ sunt Calvaria, Facies, & Aures.

Quæ est Calvaria ?

Calvaria dividitur in partes, anticam, posticam, laterales, & centrum : Antica vocatur Sinciput ; Postica, Occiput ; Laterales, Tempora ; Centrum, Vertex : quæ omnes partes pilis teguntur, qui dicuntur *Capilli*, quasi Capitis pili.

Quæ est Facies ?

Facies incipit in sincipite, ubi capilli desinunt, & ad mentum porrecta, complectitur Frontem, Nasum, Oculos, Genas, Labia, Os, & Mentum.

Quid est Frons ?

Frons, est superior faciei pars, supra sincipite, inferius superciliis, ad latera vero temporibus terminata. Habet musculos, quibus cutis movetur, & supercilia elevantur.

Quid est Nasus ?

Nasus est sub glabella : (Glabella autem est illud interstitium inter duo supercilia, quod pilis caret)
& dua-

& duabus constat partibus, superiori, quæ est ossæa & immobilis, & inferiori quæ cartilaginea est & mobilis. Pars superior, dicitur Dorsum nasi; pars ejus acuminata, Spina; inferior dicitur nasi globulus, seu orbiculus. Vfus Nasi est, 1. ut per eum intret aër usque ad cerebrum pro spiritibus animalibus. 2. Ut per eum intret aër in pulmones, pro cordis refrigerio. 3. Ut per eum odores deferantur ad processus mamillares. 4. Ut per eum effluant ejectamenta cerebri. 5. Ut aliquid quoque ad vocem conferat.

Quid sunt Oculi?

Oculi, sunt partes faciei, sub frontem & supercilia positæ, potentia visivæ organa. Quisque duplex habet tegumentum, superius puta & inferius, quæ Palpebræ vocantur, & quorum extremitates pilis cinguntur, quos *Cilia* appellant.

Qualis est Oculi structura?

Oculi structura, ex variis tunicis humoribusque, prorsus est mirabilis. Atque *Tunica* quidem vulgo numerantur sex. 1. *Adnata*, quæ cæteras comprehendit. 2. *Cornea*, sic dicta, quia parte anteriori, cornu rasi ac politi instar, pellucet. 3. *Uvea*, quia uvæ cæruleæ acinum refert, cui avulsus sit petiolus. 4. *Aranea*, quæ tenuitate sua telis aranearum haud ablimilis. 5. *Vitrea*, quæ humorem vitreum continet, eumque ab aqueo discernit, ne confundantur. 6. *Retiformis*, sic dicta, non quasi retis instar cancellata sit, sed quod referat rete contractum. *Humores* tres sunt, Aqueus, Crystallinus, & Vitreus. *Aqueus*, est extimus humorum, per eumque species sensibiles ad crystallinum deferuntur. *Cry-*
stall-

stallinus, sic vocatus, quia crystallum seu glaciem refert, est pellucidus. Denique *Vitreus*, a similitudine vitri nomen habet, estque a tergo crystallini. Præter humores & tunicas, inserviunt quoque oculo *Nervi Visorii*, vel *Optici*, qui spiritus visivos ad oculum deferunt.

Symbolum Tunicarum, & Humorum :

ACV s AVRea, est ACV s.

Quomodo Visio peragitur ?

Visio sic peragitur : A luce vel objecto illuminato, per medium, transfertur species seu imago ad oculum, tunicæque reticulari imprimitur, ibique objectum tanquam in speculo representat, ut a visu cognoscatur.

Quid sunt Genæ ?

Genæ, sunt pars faciei, quæ inter nasum, aures, & os velut circumscriptæ continentur.

Quid sunt Labia ?

Labia, quæ bina sunt, Superius, & Inferius, sunt oris & dentium opercula.

Quid est Os ?

Os, est pars faciei, quæ, diductis labris, ad imas usque fauces interjacet.

Quid est Mentum ?

Mentum, est ima pars maxillæ inferioris.

Quid sunt Aures ?

Aures, sunt partes capitis, ubi frons ad tempora porrigitur, sitæ, membrana admodum sensili constantes, auditus instrumentum, & cerebri tutela, ne lædatur ab aëre subito irruente. Datæ sunt homini aures non carneæ, mollitie enim sua facile conciderent; nec osseæ, facile enim frangerentur, & in sono im-

pedi-

pedimento forent; sed cartilagineæ & exsangues, ut eandem semper retineant fornicis figuram, ad sonum commode excipiendum.

Quomodo Auditio in homine peragitur?

Auditio in homine sic peragitur: In aure interiori, quæ est verum organum auditus, occurrit 1. *Meatus angustus & rotundus*; ideo angustus, ne aer exterior, subito & confertim irruens, membranam, hunc meatum terminantem, lædat. Præstat insuper id quoque, ne ingressus pateat insectis noxiis, vel pulveri; si vero quid inciderit, decidet facile, quia hic meatus est obliquus, & sursum ducit. 2. Occurrit *Membrana* exigua, instar pellis in tympano tenta, unde vulgo *Tympani* nomine venire solet; atque tenuis est hæc membrana, ut externum sonum facilius recipiat: sed tamen densa quoque est, ne tam facile frangatur, si sonus sit vehementior. Est præterea etiam sicca, ut interius sonum reddat majorem. In quibus nimis est crassa, sunt surdi: quibus vero humor viscidus ad hanc pelliculam adfluxit, ægre audiunt. Membranam hanc 3. sequitur alter meatus, ob figuram *Cocbleæ* dictus: ibi aer est, qui vulgo internus & innatus dici solet. Aer ergo iste, ab interno percussus, efformat soni imaginem, ut sonus percipiatur; quod fit tum tribus ossiculis, quæ continet, *Malleolo* nimirum, *Incude*, & *Stapede*; tum *Chorda* tenui, tympano obtenta, cum musculo perexiguo. Atque ossicula illa eandem dicuntur habere magnitudinem per omnem vitam, ut infanti non minora sint, quam seni. Medium igitur, per quod sonus defertur, est *Aër exterior*, quandoque etiam *Aqua*; nam in aqua audiri, testes sunt urinatores. Hinc Pisces etiam cum silentio capiuntur; consue-

suetudine etiam quidam in vivariis ad cibum congregantur cum plausu. Ac Plinius l. 10. H. N. c. 70. prodidit, in piscinis Cæsaris genera piscium ad nomen venisse, quosdam singulos.

Quæ sunt Partes Capitis Internæ?

Partes Capitis Internæ dividuntur in Continentes, & Contentas. Continentes, sunt Pericranium, Cranium, & duæ Meninges.

Quid est Pericranium?

Pericranium, est membrana solida & alba, cranii os extrinsecus tegens.

Quid est Cranium?

Cranium, est os crassum, variis foraminibus pervium, continens & defendens cerebrum.

Quid sunt Meninges?

Meninges, sunt solidæ membranæ, interpositæ inter cerebrum molle, & durum cranium: suntque duæ: una, cranio propior, quæ *Dura Mater*, altera cerebro propior, quæ *Pia Mater*, vocantur. Matris nomen utrique tribuitur, vel quod matrum morē cerebro ejusque incolumitati prospiciant; vel, quia quondam creditum, has membranas reliquarum membranarum matres & principia esse.

Quæ sunt Internæ capitis Partes Contentæ?

Internæ capitis partes Contentæ, sunt Cerebrum, Gingivæ, Lingua, Palatum, Gurgulio, Fauces, Amygdalæ.

Quid est Cerebrum?

Cerebrum, est pars maxime frigida, mollis, alba, & medullaris, ex purissima seminis & spirituum portione fabricata, in cranii cavitate sita, facultatis ani-

animalis principium. Superficies ejus externa est anfractuosa, & varios habet gyros, ut per illos vasa cerebri ducerentur tutius. Usus Cerebri est, producere, continere, & conservare spiritum animale.

Quomodo dividitur Cerebrum?

Cerebrum dividitur in tres partes, Cerebrum propriè dictum; Cerebellum; & principium Spinalis medullæ. *Cerebrum*, est pars anterior, longè major cerebello. *Cerebellum*, est pars posterior, cerebro velut appendix adhærens, ususque ejus idem, qui ipsius cerebri. *Spinalis medulla*, per occipitii foramen, tanquam cerebrum oblongatum, egreditur, ac in totam vertebrarum seriem, usque ad locum coccygis progreditur; ut tamen, quo longius procedit, eo magis decrescat. Usus ejus est, ut ab illa omnes nervi procedant.

Quid sunt Gingivæ?

Gingivæ, sunt carnes duriores & immobiles, quæ cingunt & includunt Dentes.

Quid est Lingua?

Lingua, est pars carnea, rara, & laxa, spongiæ instar, in medio ore posita, gustus & sermocinationis organum. Est autem *Sermo* vox articulata, & syllabis distincta, conceptum mentis, & animi propositum significans.

Quid est Palatum?

Palatum est pars oris superior, modice concava, foraminibus pertusa, quibus e cerebro pituita in os descendit.

Quid est Gurgulio?

Gurgulio, alias Uvula, item Columella dictus, est caro fungosa, oblonga, a palato, juxta meatus

narium in os propendens, ac vocis articulatae in homine modulationem conferens.

Quid sunt Fauces?

Fauces, sunt posterior & inferior oris pars, quae non nisi ore aperto, & lingua depressa, conspicitur.

Quid sunt Amygdalae?

Amygdalae sive Tonsillae, sunt carnes duae, ab utraque faucium parte locatae, glandulosae, porosae, & spongiosae, figurae etiam ratione glandibus rotundis, cum quadam longitudine, persimiles, a natura, pro excipiendis superfluis humoribus, proque principio fistulae arterialis coarctando, constitutae; faucesque, os, & linguam perpetua irrigant saliva.

Quis est VENTER MEDIUS?

Venter Medius, est totum id, quod circumscribitur parte superiore, a claviculis; inferiore, a diaphragmate; parte antica, a sternone; postica, ab ossibus dorso; lateralibus, a costis. Dicitur alias *Thorax*, continetque partes vitales, Cor scilicet, & reliquas.

*Quomodo dividitur Venter Medius
seu Thorax?*

Venter Medius seu Thorax dividitur in Partes Externas & Internas; atque Externae, sunt Anterior, Posterior, & Laterales.

Quae est Anterior Thoracis pars?

Anterior Thoracis pars incipit a collo, & desinit in mucronata cartilagine, nomine alio vocatur *Pectus*. Medium ejus *Sternum* dicitur, estque in aliquibus hirsutum. Ad latera Sterni enascuntur in foeminis Mammæ, in viris mamillæ.

Quid

Quid sunt Mammæ?

Mammæ, sunt partes glandulosæ, carnosæ, in pectore ad utrumque latus protuberantes, membrana, pinguedine, & papillis constantes: ad corporis ornatum, cordis tutelam, & infantis per lac, cujus receptaculum sunt, nutritionem factæ. Duæ sunt, ut, una lacta, altera faciat officium, atque parsearum in centro eminens dicitur *Papilla*; circuitus, *Areola* vocatur. Mammarum glandula major est sub papilla, quam cæteræ minores circumstant. Materia lactis est sanguis, cui Recentiores quidam, quos inter Prosper Martianus & Petrus Castellus, addunt chylum, Bartholino tamen contradicente. Efficiens, est caro glandulosa.

Quid sunt Mamilla?

Mamillæ, in viris muliebrum mammarum locum suppleant; glandulas autem vix habent, sed ex cutē & papillis componuntur, nec etiam ita attolluntur, cum non ad lactis procreationem, sed decorem, & cordis tuitionem sint concessæ.

Quæ est Posterior Thoracis pars?

Posterior Thoracis pars extenditur a cervice usque ad finem costarum, & vocatur alias Dorsum, seu Tergum, habetque partes, Scapulas & Spinam. *Scapulae*, sunt superiores eminentiæ, quæ in macilentis imprimis sunt conspicuæ. *Spina*, est acuta illa protuberantia, per longitudinem dorsi protensa, Tergum in dextram & sinistram partem dividens.

Quæ sunt Laterales Thoracis partes?

Laterales Thoracis partes, sunt inter anteriorem & posteriorem, ac vocantur Latera. Latus, est vel dextrum, vel, sinistrum, & utrumque costis ac carne intercostali constat.

Qua sunt Thoracis partes Internæ?

Thoracis partes Internæ, sunt Cor, Pericardium, Pulmones, Diaphragma, Pleura, Mediastinum, & Musculi.

Quid est Cor?

Cor, est pars principalissima, ex dura, densa, & solida carne constans, figuræ pyramidali non abssimilis, vitæ fons, & vitalis facultatis domicilium, in quo spiritus vitales elaborantur, & per arterias, a corde ortas, distribuuntur in totum corpus. Cor in medio thoracis situm est; ejus tamen motus magis percipitur in latere sinistro, quod mucro ejus respicit.

Qua sunt Partes Cordis?

Partes Cordis sunt Auriculæ, Ventriculi, Septum, & Valvulæ. *Auriculæ*, sunt processus quidam, vel appendices, in basi cordis. *Ventriculi* sunt duo, dexter & sinister, qui dividuntur *Septo* seu interstitio. Circa caput Cordis inseruntur dextro ventriculo duæ venæ, Cava, & Arteriosa; sinistro autem Arteria venosa, & Arteria magna; quibus intus apponuntur *Valvulæ*, seu XI. ostiola.

Quomodo a Corde fit distributio Sanguinis?

Distributio Sanguinis fit pulsu, per Systolen & Diastolen. *Systole*, est Contractio cordis in angustum, ut sanguis e dextro ventriculo per venam arterialem in pulmones effundatur, & ex sinistro per aortam in universum corpus. Hic motus est cordis proprius & naturalis, quem habet a facultate sua pulsifica. *Diastole*, est dilatatio Cordis, ut hauriatur sanguis per venam cavam in dextrum ventriculum, & per arteriam venosam in sinistram. Motus hic

Cordi

Cordi est accidentarius. Quando igitur Cor ita movetur, arteriæ quoque moventur & pulsant; Cor quidem primario, arteriæ autem, quia implentur, & quando Cor constringitur, dilatantur. Fiunt autem pulsationes unius horæ spatio 4500. circiter, atque tota massa sanguinea, quæ in homine decentis staturæ ad 24. libras ascendit, intra paucas horas per Cor circulatur.

Quid est Pericardium?

Pericardium, est membrana amplior & crassior, quæ totum cor involvit & conservat, prohibetque, ne in motu tangat duriores partes. Tantum igitur a Corde distat, quantum satis est pro illius motu, & continet humorem quendam serosum, qui cor humectat & refrigerat, motumque ejus faciliorem reddit.

Quid est Pulmo?

Pulmo est pars rara, levis, spongiosa, ac velut ex spumoso sanguine concreta, testudini, aut ungulæ bubulæ similis, in dextra thoracis parte locata, ejusque totam cavitatem implens, respirationis & vocis instrumentum, ac cor refrigerans. Ad pulmonem autem tendunt tria vasa, duo a Corde, Vena scilicet arterialis, & Arteria venalis: tertium, est proprium, Arteria nimirum aspera, sive Trachea.

Quid est Diaphragma?

Diaphragma, est panniculus rotundus, ex carne, nervis, & membranis constans, undique lateribus transversim, & dorso circa duodecimam vertebra alligatus, membra naturalia a vitalibus dividens, & promovens respirationem.

Quid est Pleura?

Pleura, est membrana, dura & alba, intrinsecus thoracis cavitatem succingens, eamque aequali reddens, & prohibens, ne pulmones in motu lædantur.

Quid est Mediastinum?

Mediastinum, est duplex membrana, a jugulo protensa ad diaphragma, dextram thoracis cavitatem a sinistra discernens, & Cor cum pericardio annexo suspendens, ne ad aliquam partem allidat.

Quid sunt Musculi?

Musculi, sunt partes ex tendine & carne, ad motum thoracis arbitrarium, & partium contentarum, formatae.

Quis est VENTER INFIMUS?

Venter Infimus est, qui a cartilagine ensiformi, (quæ ab extremo sterni dependet,) ac pubis, coxendicis, & sacro ossibus; lumborum item vertebri, & costis utrinque nothis circumscribitur. Latinis dicitur *Abdomen*, item *Venter* absolute, habetque partes Externas & Internas, ac, illarum respectu, dividitur in partem Anteriorem & Posteriolem.

Quæ est Ventris pars Anterior?

Anterior Ventris infimi pars vocatur Epigastrium, ac a pectore ad pubem usque protenditur, & rursus in tres regiones dividitur, quarum suprema, ab imo pectore ad umbilicum fere sese porrigens, dicitur *Hypochondrium*: Media, a fine supremæ, ultra umbilicum tendit, diciturque *Umbilicalis*: Infima, a fine mediæ excurrit ad pubem, ac *Hypogastrium*, quasi subventrale, seu imus venter appellatur.

Quæ

Quæ est Ventris pars Posterior ?

Posterior Ventris infimi pars, ab externis costis incipit, & terminatur in natibus, diciturque *Diazo-*
ma, seu *Cinctum*.

Quid sunt Nates ?

Nates, sunt pars corporis posterior, quæ maxime carnosæ, infra lumbos prominent, pro requie totius corporis captanda.

Quæ sunt Ventris partes Internæ ?

Ventris Partes Internæ aliæ Nutritioni, aliæ Generationi inserviunt, atque utrasque ambiunt Musculi, & Peritonæum. *Musculus*, est pars organica, motus voluntarii instrumentum. *Peritonæum*, est membrana, totam abdominis cavitatem succingens, facta, ut ventrem infimum cum suis partibus tegat & alliget. Membrana hæc est satis tenuis & mollis, ne oneri sit, valida tamen.

Quæ sunt partes Ventris Nutritioni inservientes ?

Partes Ventris Nutritioni inservientes, sunt Oesophagus, Ventriculus, Intestina, Omentum, Mesenterium, Pancreas, Hepar, Vesicula Fellea, Lien, Renes, Vreteres, & Vesica urinaria.

Quid est Oesophagus ?

Oesophagus seu Gula, est pars membranosa & cava, cibum in ore præparatum, cum potu, ad Ventriculum deferens. Initium a faucibus sumit, & tendit ad Ventriculi orificium sinistrum.

Quid est Ventriculus?

Ventriculus, est pars membranosa, sphaerica, duabus propriis tunicis constans, sub diaphragmate in medio pane corpore sita, primæ concoctionis officina; alimentum ad se delatum orificio sinistro recipiens, & convertens in chylum, eundemque ad intestina, per orificium dextrum sive inferius transferens.

Quid sunt Intestina?

Intestina, sunt partes membranosæ & concavæ, cum ventriculi orificio dextro variis gyris continuatæ, & ad podicem usque productæ, chylum e ventriculo excipientes, magisque perficientes, nec non faeces e corpore educentes.

Quomodo in Homine peragitur Concoctio?

Concoctio alia Prima est, alia Secunda. *Concoctio Prima* est, qua cibus & potus a facultate chylica, beneficio humoris fermentalis, calorisque tum proprii, tum partium vicinarum, ipsorumque alimentorum, in succum ptisanæ cremori similem, pro futura sanguinis generatione mutatur. Tempus, quo in ventriculo elaboratur chylus, est spatium quinque vel sex horarum; quod tamen perpetuum esse nequit, cum, pro diversitate ciborum, ætatis, temperamenti, partium anni, regionum &c. variet etiam tempus concoctionis & præparationis chyli. Chylus, ita in ventriculo coctus & præparatus, emittitur per orificium dextrum ventriculi seu pylorum in intestina, ut concoctio in iis continuetur, & chylus in ventriculo elaboratus in iis expoliatur, atque sic faeces seu excrementa, vel ea, quæ ad nutritionem inepta sunt, a facultate expultrice per intestina & alvum egeruntur.

Hæc

Hæc fœtorem contrahunt in intestino laxiori, quod Colon dicitur, eo quod ibi calor, qui erat in cibo & potu, per chylum maximam partem est exhaustus; unde putredo sequitur, ejusque comes fœtor.

Concoctio secunda, est ipsa sanguificatio, dum chylus, in ventriculo coctus, & in intestinis perfectus, trahitur a venis lacteis, non secus ac plantæ radicibus suis alimentum & succum e terra attrahunt, ut ita perveniat tandem chylus per venam cavam in dextrum ventriculum cordis, ubi secunda hæc concoctio seu sanguificatio inchoari dicitur. E dextro abit per venam arteriosam ad pulmones, ex iis per arteriam venosam ad sinistrum cordis ventriculum, ex sinistro per aortam in universum corpus. Veteres rem ita explicabant, ut dicerent, peracta prima concoctione, chylum ad Epas deferri; ibi ulterius elaborari, perfici, & mutari in massam sanguineam, chymum dictam, & ibi quatuor humores emergere: nimirum ex frigida & cruda chyli portione oriri pituitam; ex calida & tenui bilem; ex mediocri sanguinem; ex frigida & terrestri, humorem melancholicum: atque bilem flavam ablegari dein in propriam vesiculam; melancholiam, in lienem; sanguinem vero, debito modo expurgatum, una cum pituita, ex hepate, per venas distribui, deferrique ad singulas corporis partes, ut in iis tertia concoctione ulterius elaboretur, & convenienti modo præparatus, tandem in viventis substantiam convertatur.

Quomodo dividuntur Intestina?

Intestina, licet videantur esse unum & continuum, ratione tamen consistentiæ, dividuntur in Tenuia & Crassa. *Tenuia* sunt tria, Duodenum, Jejunum, & Ileum. *Duodenum* sic dicitur, quod XII. digitos

longum sit, & cohæret, mediante pyloro sive orificio dextro, ipsi ventriculo. A Duodeno incipit *Iejunum*, quia plurimum, magis quam reliqua, vacuum est, ob copiam scilicet & magnitudinem mesaraicarum, quæ ibi quasi infinitæ sunt, majorem chyli partem statim exsugentes. Iejunum excipit *Ileum*, *ειλεον*, a circumvolvendo sic dictum, ob plurimas circumvolutiones, quas habet, ut cibis tanto magis ibi moretur. Hoc Intestinum omnium est longissimum, & XXI. palmos exæquat.

Quæ sunt Intestina Crassa ?

Intestina Crassa sunt tria: Cæcum, Colon, & Rectum. *Intestinum Cæcum*, est appendicula quædam parva, instar vermis oblongi, quæ orta ex fine ilei, & initio Coli; diciturque Cæcum, ob usum obscurum, quem in adultis habet: ajunt tamen, illud excrementa recipere, ne cum impetu ad Colon delabantur, & dolores generent; ac impedire, ne semper homo cogatur excernere. *Colon* desinit in Rectum, pluribusque anfractibus seu cellulis constat, & in eo crassiores fæces diutius commorantur, donec excernendi tempus appetit, simulq; efficit, ut excrementa non simul, sed una atque altera ejectione excernantur. Ultimum intestinum crassum dicitur *Rectum*, ob rectum ductum, pergit enim recta deorsum, a summo osse sacro, usque ad extremum coccygis, estque musculus sphincter ad illius extremitatem.

Quid est Omentum ?

Omentum, quod alias etiam Epiploon, & Rete ac Reticulum vocari solet, est pars membranosa & tenuis, arteriis, venisque & paucis nervulis intertextata, intestinis veluti innatando incumbens, fovensque

ventriculi & intestinorum calorem , & concoctionem juvans.

Quid est Mesenterium ?

Mesenterium, est pars membranosa & adiposa, per quam varia vasa, arteriæ nimirum, venæ lacteæ, & vasa lymphatica, nervi quoque una cum multis glandulis feruntur, intestinis annexa. Est igitur usus ejus, ut sit commune intestinorum vinculum, quo cum lumborum vertebri colligentur.

Quid est Pancreas ?

Pancreas, est pars carnosâ vel potius glandulosa, informis, sub parte posteriore ventriculi sita, coctioni ac chyli distributioni inserviens. Exsugit quoque sanguinem præterlabentem serosum, & beneficio glandularum expurgat.

Quid est Hepar ?

Hepar sive Jecur, est pars organica infimi ventris, magnitudinis insignis, constans carne rubra, sanguini nuper coagulato simillima, proxime in dextro hypochondrio sita, venarum principium.

Quid est Vesicula Fellea ?

Vesicula Fellea, est pars membranacea, unicam & simplicem habens tunicam, sed validam, triplici fidorum genere textam, oblonga, rotundaque, cavæ jecoris parti connexa, bilem ex illo attrahens, & in intestina propellens.

Quid est Lien ?

Lien, est pars rara, fungosa, carne obscura constans, sub diaphragmate in sinistro hypochondrio sita, ex adverso jecoris, atque ex illo atram bilem attrahens.

Quid

Quid sunt Renes ?

Renes, sunt partes carnosæ, densæ, & maxime solidæ, pinguedine obductæ, quæ sub diaphragmate in utroque latere situm habent, & ab humore seroso sanguinem repurgant,

Quid sunt Vreteres ?

Vreteres, seu urinæ ductores, sunt partes membranaceæ, ex renibus tendentes ad vesicam urinariam, & urinam a renibus in vesicam ferentes.

Quid est Vesica urinaria ?

Vesica urinaria, est pars nervosa, duabus tunicis constans, triplici fibrarum genere intertexta, rotunda, & aliquantulum oblonga, sita in hypogastrio, urinam ab ureteribus advectam excipiens, aliquandiu retinens, justoque tempore foras excernens.

Quæ sunt partes imi Ventrîs Generationi inservientes ?

Partes imi Ventrîs Generationi inservientes, sunt vel Communes, vel Propriæ. *Communes*, sunt *Vasa præparantia*, venæ scilicet & arteriæ spermaticæ, quæ sanguinem & spiritum ad testes deducunt, & in variis istis plexibus præparant. *Testes*, sunt partes glandulosæ, raræ, & molles, ad seminis coctionem destinatæ. His adhærent vasa deferentia, quæ semen ex testibus transumunt, & ad prostatas deferunt. *Partes propriæ*, discrimen aliquod constituunt inter marem & fœminam: ut sunt Prostata, Uterus &c.

Quid

Quid sunt ARTVS?

Artus, sunt partes dissimilares, magnæ, & extremæ, quæ adnascuntur trunco: & sunt Manus, ac Pedes.

Quid est Manus?

Manus, est pars corporis, quæ a scapulis ad digitos usque protenditur, Brachio, Cubito, & Manu extrema constans, ad res apprehendendas ordinata.

Quid est Brachium?

Brachium est, quod ab humero ad cubitum pergit: & constat uno osse magno, & musculis multiplicibus, quorum septem regunt motum brachii, quaterni vero, qui dicuntur lacerti, regunt cubiti motum: & venis etiam constat tribus insignibus, Humeraria, Axillari, & Mediana.

Quid est Cubitus?

Cubitus, est illa pars, a flexura cubiti usque ad carpum, sive juncturam manus, protensa. Constat duobus ossibus, quorum majus & inferius dicitur Ulna, minus & superius Radius. Constat etiam Musculis XXXIII. ad Carpi, & Manus motum comparatis.

Quid est Manus Extrema?

Manus Extrema est, quæ a carpo usque ad extremos ungues protenditur.

Quid est Pes?

Pes, est pars corporis, coxæ inserta, quæ a natibus usque ad plantas porrigitur, Femore, Crure, & Pede parvo constans, ambulandi & standi organum.

Quid

Quid est Femur?

Femur est, quod a coxa usque ad genu porrigitur, constans osse omnium maximo, musculis & carne glandulosa, ad inguina sive latera pubis consistente, ubi bubones generantur.


Quid est Crus?

Crus, est pars, a genu ad pedem parvum protenta, constans duobus ossibus longis, quorum interiorius & majus Tibia, exterius & minus, Fibula vocatur.

Quid est Pes Parvus?

Pes parvus sub ipso talo incipit, & ad extremitatem digitorum excurrit, constans ossibus XXVIII: & musculis XXII. quibus digiti extenduntur & flectuntur.

DEO GLORIA.




SYNOPSIS
ARTIS VALETU-
DINIS.

SYNOPSIS

ARTS & CRAFTS

PRINTING



PROOEMIUM.

Afflixerat aliquando Filium languor, & virium imbecillitas. Ibi, postquam de invaletudine sua apud me questus esse, coepit, quasi secum stomachabundus, percontari, quæ causa esse possit; quod, tam multa, nullum aut levem olim usum habitura, vulgo discere necesse sit; cum contra, quæ semper prodesse possunt, & sine quibus haud commode vivitur, penitus negligantur? Mittere se alia, aliosque, seque unum respiciendo, illud male factum videri, hactenus diu multumq; labore difficili; & non sine periculo, apud Palæstritam in eo tempus terendum fuisse, quomodo corpus adversus foris ingruentia mala tueri, & ense, aliisque telis, ictus inferre aut declinare conveniat: cum interim ignoret, qua ratione iis inimicis, qui secum habitant, qui intus & in cute delitescunt, sanitatiq; perpetuo insidiantur; occurrendum sit; & adeo ne id quidem perspectum habeat, quibus nominibus censeantur. Haud carere sane pugillandi artem suo usu, & facere non ad defensionem tantum, sed & bonam corporis habitudinem: atenim futuram, si DEUS vitam concedat, ætatem, quæ, hæc & cætera, quibus operam dederit, exercitamenta, ut linquantur, postulabit ac coget: tum vero aliis insuper sanitatem egere præsidii, quam sola agitatione. Addebat, penitus sibi per-

suasum esse, illud, quod cœlo delapsum, *καὶ τοῖς αὐτοῖς*, non hoc tantum, prout communiter omnes accipiunt, imperare, ut in nos descendamus, & nostræ tenuitatis conscii, nunquam aliis nos præponamus, priusq; semitam nobis ipsis sapiamus, quam aliis viam monstrare instituimus: quin vero illud amplius præcipi, scire, qui sint corporis morbi, unde proveniant, quæ ad eos aliquo modo arcendos faciant, quæq; fulturam illam animi, quam compages hæc membrorum præstat, corroborarent. Dixi ego, non insubide ipsum locutum esse; differre interim haud leviter eas artes, quibus corpus compositum reddimus, & homines contra hominum insultus nos communimus, a valetudinis arte: cum, iis si pollere velimus, nemo nobis possit auxiliarier, nostrisque manibus, pedibus, lacertisque omnia peragenda sint; at, in morbis, nos ad Medicos confugere, & consilium opemque ab iis petere. Itaque ergo necessitatem nobis imponi, artes priores discendi; posteriorem non item. Nequaquam satisfaciebat Filio responsio, quod existimaret, omnes homines summa ope niti debere, ut sciant, non tantum, quo adjumento sanitas, si amissa fuerit, recuperetur, sed & quomodo parta conservanda sit: profitebatur simul, stare sententiam, missis rebus, qualemcunq; istorum sibi notitiam parandi, ne semper præter propter vitam vivere cogatur; rogare igitur, ut subveniam. Æqua petenti morem gerere visum fuit, eique Jani Cæcili Frey, Parisiensis Medici, Medicinæ Compendium, quod Guido Patinus, Celebris Vir, Manes Collegæ colendo, ab interitu vindicavit, tum Scholam Salernitanam, quin & Joh. Jonstoni Ideam universæ Medicinæ practicæ, qui

qui se forte offerebant libri, non ad legendum, sed lectitandum commisi, jussique simul, ut ea, quæ maxime placerent, exciperet. Ille, cum cupide omnes istos libellos perlustrasset, eos reddens, magnæ voluptati hos sibi fuisse testabatur, ita ut ex eorundem lectione convaluerit. Enim vero, cum de Excerptis simul exhibendis moneretur, *Æschini* apud Terentium verbis, *tibi, Pater, permittimus*, inquiebat, *plus scis quid facto opus est*. *Honestæ oratio erat, qua facile obtinuit, expectationi ejus ut satisfacerem, congereremque, ex optimorum Artis Valetudinis Magistrorum scitis, illam, quæ nunc succedit, Physicæ doctrinæ sive partem, sive auctarium.*



SYNOPSIS ARTIS VALE- TUDINIS.

CAPVT I.

De Artis Valetudinis Definitione , Origine, ipsaque Sanitate, & Temperamento.

Ars Valetudinis, uti Cicero vocavit, quæque Græcis *Ἰατρικὴ* dicitur, ea est, quæ hominem quemque illam, quæ fruitur, sanitatem conservare tuerique, edocet. Hæc, illius artis, quam vulgo Medicinam vocamus, alteram partem constituit: una enim, quæque alterius considerationis est, in remediis, quibus amissa sanitas restituenda, sese occupat.

Artem Valetudinis *Deus Adamo protoplasto infudit*; quippe Medicum creavit Altissimus: atque habebat Adamus, plantarum & animalium vires probe cognitæ, quia, secundum naturam illorum, nomina iis imposuit: unde consequitur, perspectum Adamo fuisse, quantum ad conservandam hominis sanitatem valerent. Tradidit deinde hanc artem, etsi per lapsum vehementer depravatam, Adamus posteris suis, quæ postmodum indies magis fuit exulta: atque constat de Ægyptiis, eos cuique parti humani corporis, suum assignasse medicum.

Sanitas, est bona corporis dispositio, quæ in temperamento legitimo, debita partium efformatione, eorumq; apta unione consistit: facitq;, ut omnia membra munus suum prompte, & citra impedimentum, ob-
eant. Habet igitur Corpus Humanum pro Subiecto.

Tem-

Temperamentum, est complexio primarum qualitatum, Caloris nimirum & Frigoris, Humiditatis & Siccitatis, ad certam temperiem redactarum. Quemadmodum enim primæ qualitates diversis modis inter se temperantur: ita diversa quoque sunt temperamenta.

Dividitur Temperamentum in Uniforme, & Difforme.

Uniforme est, cum omnes qualitates primæ æqualiter coeunt; ut nimirum tantus sit calor, quantum frigus, nec humiditas siccitati præponderet. Dicitur alias *Temperamentum æquale*; item, *Æquale ad pondus*. Vix autem est, ut detur Temperamentum Uniforme in mixto animato. Viventia enim requirunt partes heterogeneas, quæ, pro functionum diversitate, diversa requirunt temperamenta, ut ita in toto illo mixto, æquale temperamentum esse non possit: in una autem aliqua mixti animati parte quin detur, nihil fortasse repugnat: atque in mixtis inanimatis illud reperiri, omnino evadit verisimile.

Temperamentum Difforme est, cum quatuor qualitates inæqualiter coeunt: ac *dividitur*, in Simplex, & Compositum.

Simplex Difforme temperamentum est, in quo una tantum qualitas prædominatur. Vti, si Calor sit sex graduum, Frigus duorum, Humiditas & Siccitas quatuor, prædominatur Calor, & sic est simplex temperamentum. Proinde, pro numero quatuor primarum qualitatum, & sicut unaquæque ex illis dominium obtinere potest in mixto, ita quoque quadruplex est Simplex temperamentum: Calidum, in quo calor; Frigidum, in quo frigus; Humidum, ubi humiditas; & Siccum, ubi siccitas prædominantur.

Compositum Difforme temperamentum est, in quo duæ qualitates, uti v. c. Calor & Siccitas, aut Calor & Humiditas, &c. prædominantur. Dicitur, *Duæ*: plures enim qualitates in mixto prædominari & excedere non possunt, quia sic duo contraria essent in eodem subjecto, in gradibus excellentioribus; quod absurdum. Nempe, si in mixto prædominaretur non tantum Calor & Siccitas, sed & Frigus aut Humiditas, contraria duo, Calor scilicet & Frigus, vel Siccitas & Humiditas reperirentur in eodem subjecto in gradibus excellentibus; quod fieri nequit.

Quemadmodum quatuor modis fieri potest, ut duæ qualitates in gradibus excellentioribus combinentur: sic quoque Temperamentum Compositum *Quadruplex* solet constitui. Unum *Ignæum*, in quo prædominantur Calor & Siccitas, idque in homine dicitur *Cholericum* seu *Biliosum*. Alterum *Aëreum*, in quo prædominantur Calor & Humiditas, quod vulgo Sanguineum appellant. Tertium *Aqueum*, in quo prædominantur Calor & Humiditas, quod *Phlegmaticum* seu *Pituitosum* vocatur. Quartum denique *Terreum*, in quo prædominantur Frigus & Siccitas, alio nomine *Melancholicum* dictum. Atque habent hæc Temperamenta ideo sua nomina ab Elementis, quia talis combinatio qualitatum in Elementis existit. In Igne enim Calor & Siccitas; in Aëre, Calor & Humiditas; in Aqua, Frigus & Humiditas; in Terra denique, Frigus & Siccitas conjunguntur.

Cæterum, *Cholera* seu *Bilis*, hoc loco, non accipienda de bile illa excrementitia, quæ jam in vesicula felle collecta est; sed de hujus materia, portionibus puta sanguinis sulphureo-salinis. Sic *Phleg-*
ma

ma seu *Pituita*, non notat illos humores, qui in ventriculis cerebri, aut in naribus colliguntur, ac per eas, & ductus salivales, excernuntur; sed innuit humorem aqueum, in corpore genitum & collectum.

Cholericæ Temperamenti signa sunt: Color faciei, oculorum, totiusque corporis pallidus, aut flavus; corporis habitus siccus, macer & gracilis; venæ & arteriæ amplæ; in iracundiam, audaciam & vindictam propensio; somnus levis nec profundus, magna corporis jactatione inquietus; insomnia, belli, furoris, iracundiæque plena; urina flava, acris, & pauci sedimenti; pulsus vehemens, velox, & frequens; denique frigidorum appetentia.

Scholæ Salernitanæ de hoc Temperamento versus sunt:

*Est humor Cholera, qui competit impetuosis;
Hoc genus est hominum, cupiens præcellere cunctis.
Hi leviter discunt, multum comedunt, cito
crescunt:*

*Inde & magnanimi, sunt largi, summa petentes.
Hirsutus, fallax, irascens, prodigus, audax,
Astutus, gracilis, siccus, croceique coloris.*

Bilem flavam adaugent lecoris Cordisque temperamentum calidum & siccum; aër fervidus, cibus potusque calidus & siccus, suppressa bilis, exercitatio vehemens, vigiliæ immoderatæ, ira, curæ graves, mœror.

Sanguinei Temperamenti signa sunt: Color faciei corporisve rubicundus, & quasi ex albo rubroque mixtus; habitudo corporis carnosâ, sine multa adipē; animi mores tranquilli, hilares, & jucundi; somnus placidus, in quo res lætæ exhibentur; uri-

na copiosa, colore mediocri; injuriarum tolerantia; pulsus fortis & plenus.

Schola Salernitana Sanguineos ita describit:

*Natura pingues isti sunt atque jocantes,
Rumoresque novos cupiunt audire frequenter:
Hos Venus & Bacchus delectant, fercula, risus,
Et facit hos hilares & dulcia verba loquentes.
Omnibus hi studiis habiles sunt, & magis apti.
Qualibet ex causa non hos facile excitat ira.
Largus, amans, hilaris, ridens, rubeique coloris,
Cantans, carnosus, satis audax, atque benignus.*

Phlegmatici Temperamenti signa sunt: Color faciei corporisque albicans; moles corporis ampla & obesa; animi mores, omnesque corporis motus, tardi, cum gravitate & segnitie: sensus obtusi; mens hebes; somnus profundus atque gravis; aquarum, pluviae, nivis aut submersionis plena insomnia; urina alba vel pallida, nunc tenuis, nunc crassa, & turbida multo sedimento; corpus marcore saepe diffluens; pulsus parvus, tardus & mollis; cibi potusque calidi appetentia.

Schola Salernitana sic extulit:

Phlegma dabit vires modicas, latosque, brevesque,

Phlegma facit pingves, sanguis reddit mediocres.

Otia non studio tradunt, sed corpora somno,

Sensus hebes, tardus motus, pigritia, somnus,

Hic somnolentus, piger & sputo crebriore,

Est huic sensus hebes, pinguis, facie color albus.

Pituitam adaugent, Cordis, Jecoris, & Ventriculi frigidum humidumque temperamentum; aeris conditio frigida & humida; frigidorum humidiorum-

rumque alimentorum immoderatus usus; pituitæ per os aut per alvum evacuatio suppressa; vita sedentaria; somnus longus ac profundus; vita sine curis aut studiis.

Melancholici Temperamenti signa sunt: Color faciei totiusque corporis fuscus, obscurus & nigricans; corporis habitus ficeus & macilentus; aspectus inconitans, horridus ac mœstus; proclivitas in metum, mœstitiam, & taciturnitatem; amor solitudinis; somnus turbulentus, horrendis insomniis interruptus; urina nunc tenuis & alba, nunc crassa & livida; pulsus parvus, tardus, & rarus; appetentia sæpe corrupta. Schola Salernitana temperamenti melancholici signa talibus versibus inculcat:

*Restat adhuc tristis cholera substantia nigra,
Quæ reddit pravos, pertristes, pauca loquentes,
Hi vigilant studiis, nec mens est dedita somno:
Servant propositum, sibi nil reputant fore tutum.
Invidus & tristis, cupidus, dextraque tenacis,
Non expers fraudis, timidus, luteique coloris.*

Melancholiam adaugent, jecur & cor frigidum siccumque, lien obstructus, aëris constitutio frigida, alimenta crassa & terrena, labores immodici, vigiliæ, vitæ conditio tristis, contemplationi & literarum studiis dedita, atræ bilis evacuatio suppressa.

Humores, quantitate peccantes, *Plethoræ* nomine veniunt, eaque oritur, ex jecoris cordisque intemperie, ciborum copia, consuetis evacuationibus suppressis, & vita otiosa. *Plethoræ* affinis est *Cacochymia*, sive vitiositas humoris, qua is a justa mediocritate deficit. Sed *Plethoræ* sedes fere est in venis tantum; at *Cacochymia*, etiam extra venas, vel in toto corpore, vel in ejus parte aliqua, & præcipue

visceribus, consistere potest. *Signa sunt*: Lassitudo, Respiratio gravis ex minimo labore, Venarum turgescencia, Musculorum distensio, Habitus carnositas, Somni profunditas, Faciei rubedo.

CAPVT II.

De Causis Efficientibus Bonam Valetudinem.

BONÆ Valetudinis *Causa Efficiens*, est vel Propinqua, vel Remota.

Propinquam Valetudinis causam constituunt Humores & Spiritus, cum in quantitate, qualitate, & motu rite se habent.

HUMORES sunt duplices: *Utiles*, qui ad vitam & nutritionem faciunt: *Inutiles* vel *Excrementitii*, qui remotionem e corpore naturali efflagitant.

Inter *Utiles Humores* primatus debetur *Sanguini*, qui est humor vitalis, rubicundus, primum in conceptu, ex colliquamento seminali productus, & successive virtute spiritus vitalis multiplicatus, & ex chylo continuatus, individui conservationi, & speciei propagationi inserviens. Is, e sinistro Cordis ventriculo coarctato, profluens, per arteriam magnam, seu aortam, ejusque ramos, ad omnes corporis partes distribuitur; & rursus e partibus, per venæ cavæ ramos, ad cordis dextram auriculam, & dextrum ventriculum refluit, perpetua circulatione.

Ad *Utiles Humores* porro referre oportet *Semen*, quod ad propagationem humani generis necessarium; ac cui sanguis, spiritibus animalibus permixtus, materiem præbet: item *Serum*, quod est pars sanguinis
aquo-

aquosa, & ejusdem *χρυσά* ac vehiculum; *Chylus*, qui est succus ex assumtis cibis, vi caloris nativi, & fermenti in ventriculo contenti, elaboratus. Amplius huc pertinent, *Lac*, quatenus est materia chylosa, ad alterius individui nutritionem faciens: *Fermentum Ventriculi*, &, secundum aliquos, *Intestinorum quoque*; *Medulla ossium*.

Inutiles Humores corporis sunt, *Fæces alvi*, *Urina*, *Mucus narium*, *Lachrymæ oculorum*, *Cerumen aurium*, *Saliva sive Sputum Oris*, *Sanguis hæmorrhoidalis*, & *sanguis*, quem *fæmina*, si non sint gravidæ, nutrices, steriles, vel morbo affectæ, ab anno 14. ætatis, usque ad 50. lunari purgatione excernunt.

SPIRITVS, sunt duplices, *Vitales*, & *Animales*.

Vitalis Spiritus, est exhalatio ignea, a sanguine per fermentationis & circulationis naturalis continuum motum incalescente, exorta, & per indefinenter subsequentes portiones inflammabiles & volatiles, veluti per pabulum, multiplicata; ut sit verum & immediatum animæ instrumentum, & actionum in corpore perficiendarum principium.

Animalis Spiritus, est liquida tenuissimaque substantia, in cerebro & cerebello, ex optimis sanguinis arteriosi portionibus, ipsoque vitali spiritu, per quandam fixationem, elaborata, ad principium nervorum collecta, & abhinc, per nervos, ad totum corpus distributa, in sensus & motus communicationem.

Remotam Valetudinis causam, constituunt *Aër*; *Cibus* & *Potus*; *Somnus* & *Vigiliæ*; *Motus* & *Quies*; *Excreta* & *Retenta*; ac denique *Animi affectus*.

CAPVT III.

De Aëre.

Aërem multum, imo plus omni alia re naturali, ad sanitatem conferre, dubio caret. Nam, corpus humanum ambit, & ei per certos meatus se insinuat: præcipue ab aspera arteria attractus, primum in pulmone, deinde in corde, ac novissime in cerebri ventriculis spiritus progenerat. Idem, calorem cordis attemperat, nec sine eo vitam, vel ad breve spatium, producere quis potest.

Aëre fruendum sereno, puro, & claro; non crasso, impuro, ac foetido: talis enim morbos malignos, ac contagiosos progenerat. Sed, nec nimium calere debet aer, aut fervere; nec montibus inclusus esse. Quin, nec subito mutare aërem oportet. Namque peregrinatio, item ex coarctato conclusoque aëre, in liberum, etiam salubrem, traductio, & convalescentis primus egressus, sæpe ægrimoniam conciliant: quia aeris ista mutatione, corpus humoresque vehementius agitantur.

Inquinant aërem vapores ex lacubus, stagnis, & fodinis metallicis exhalantes. Si vitium contraxerit aer, per res odoriferas & suffitum corrigendus. Schola Salernitana suadet:

*Lucidus ac mundus sit rite habitabilis aer:
Infectus neque sit, nec olens foetore cloacæ.*

Habitatio eligenda, quæ Septentrionem aut Ortum respicit.

CAPVT IV.

De Cibo & Potu.

Cibo, quicquid siccioris substantiæ assidue effluit, & in aërem expirat, quicquid item virium decedit, quotidie restituitur. Boni autem succi cibus, sanguinem bonum, perversi, contrarium progenerat. Ergo, ad valetudinem conservandam, cibos ei convenientes seligere oportet. Fames enim diutule tolerata, ventriculum pravis humoribus replet, dum a vicinis partibus, quicquid ibi latet, attrahitur.

Si hora cibationis consueta appetitus sese non exerat, vel prior digestio male peracta, vel vitiosi humores eum impediunt.

Munda debent esse omnia, quibus pro alimento fruendum, nitida, culta, probe apparata, & suo ordine posita. Hæc enim, ad appetentiam, tum in sanis, tum in ægris excitandam plurimum faciunt.

Pro tempore anni paranda mensa: Hyeme, in locis calidis & clausis: Æstate, frigidis & apertis. Vere, floribus; Æstate, frondibus; Autumno, fructibus odoriferis triclinium ornandum; Hyeme, suffitus faciendus.

Albæ sunt mappæ, candida mantilia, vasa tum potoria tum escaria nitida. Cultros habeat mensa minime hebetes, terfosque, Salinumque in ea splendeat, secundum tritum illud:

Sal primo poni debet, primoque reponi;

Non bene mensa tibi ponitur absque sale.

Ante & post assumptum cibum, lavare manus conveni-
Namque, si Scholam Salernitanam audimus:

Lotio post mensam tibi confert munera bina,

Mundificat palmas, & lumina reddit acuta.

Si fore vis sanus, ablue sepe manus.

Uten-

Utendum plurimum *Simplici victu*: nam varius, uti est diversæ substantiæ, diversarumq; qualitatum, ita nec ab eodem calore, nec eodem tempore concoqui potest.

Habentes calorem fortem, membra dura, ac laboribus se defatigantes, cibis indigent crassioribus: at iis, quorum membra sunt mollia, & humida, calor vero debilis, subtilis cibus convenit.

Panis, commendatur mundus ex tritico, quod e terra minime corrupta provenit, qui sale & fermento probe conditus, nec ex vetustate vitium contraxit. Usus calidi ac recentis panis officit.

Ex *Piscibus* eligantur parvi, saxatiles, squamigeri, multum natantes, minimeque viscosi, in fluminibus rapidis & puris aquis nati captique. Abstinentium ergo ab iis, qui lacunis delectantur, aut qui agunt in aquis, in quas cloacæ derivantur. Marini quoque pisces præstant in aquis dulcibus editis; alimentum enim quod præstant, minus excrementitium est, & carniæ naturæ propinquius. Spinarum & Squamarum multitudo substantiæ puritatem arguit. Pisces hominum alimento commodos, Schola Salernitana X. enumerat:

Lucius & *Perca*, & *Saxatilis*, *Albica*, *Tinca*,
Gornus, *Plagitia*, & cum *Carpa*, *Galbio*, *Truta*.

Inter *Aves*, præcipua laus debetur sylvestribus. Iis accensere oportet Pullos gallinaceos, Perdices, Columbas, Turdos, Alaudas.

Schola Salernitana XIV. Avium species commendat:

Sunt bona *Gallina*, & *Capo*, *Turtur*, *Sturno*, *Columba*,

Quiscula, *Phasiades*, *Merula*, simul *Orthogometra*,

Perdix, *Frigellusq;* *Otis*, *Tremulusq;* *Amarellus*.

Eorum similiter, *quæ in sylvis degunt*, *terrestrium animalium caro*, domesticorum carni præferenda; feræ enim multis cursitationibus se fatigant, & in aëre sicciore versantur; unde & illorum caro, diu a putrefactione manet incorrupta. Vitulina tamen, Agnina, Hœdina, & Vervecina caro, salutaribus etiam alimentis accensentur.

Lac & Ova, omnium opinione, probatissimi succi habentur, atque muliebre lac primas sibi vendicat; proximum est asininum, postea caprinum, tandemque vaccinum, & ovinum. Sed oportet, ut animal, ex quo lac sumitur, sit boni habitus, in lautis pascuis nutritum. Immiscendum lacti sacchari vel salis aliquid, ne in stomacho coaguletur. *Ova* parvula, oblonga, ad mediocritatem cocta, cæteris præferuntur. Schola Salernitana præcipit:

Si sumas ovum, molle sit atque novum.

Fruktibus crudis abstinere oportet, imprimis iis, qui facile putrescunt, & diu servari non possunt: ut Mora, Fungi, Pepones. In universum monet Schola Salernitana:

Autumni fructus caveas, ne sint tibi luctus.

Olera, sanguinem aquosum generant, & putrefactioni aptum.

Noxii sunt hominibus cibi, qui excellentem qualitatibus virtutem obtinent, sive in calido, sive in frigido, sive in humido, sive in sicco. Calidiores enim cibi, sanguinem inflammant; Frigidiores & Humidiores, corpus pituitosa & humida temperie afficiunt; Sicciore, succum sanguinis depascunt.

Difficilis concoctionis sunt: Panis azymus, Faba, Lenticula, Cicer, Poma cydonia, Avellanæ, Castanæ, Olivæ, Cucumeres, Rapæ; Caro hircina, & bubu-

bubula; Anates, Anseres, Cancrī; Caseus tam recens quam vetus; item peculiare quædam partes avium, Guttur, Hepar, Splen, Renes, Stomachus & Intestina. Schola Salernitana X. ciborum genera recenset, a quibus sibi temperare quis debet: aitque:

*Persica, Poma, Pyra, & Lac, Caseus, & Caro
salsa,*

*Et Caro Cervina, & Leporina, Bovina, Ca-
prina:*

Atra hæc bile nocent, suntque infirmis inimica.

De Porcina carne speciatiim monet:

*Est Porcina caro, sine vino, pejor ovina,
Si tribuas vinum, fuerit cibus ac medicina.*

Pravum nutrimentum, quamvis illud sumenti non protinus nocet, idque vel ob consuetudinem, vel vim concoctricis facultatis; tamen in futurum morbos creabit, præsertim si labor absit, & exercitatio.

Mensura cibi ea esto, ut ne quid nimis: & tantum assumendum, ut reficiantur vires, non ut opprimantur. Imprimis cæna frugalis esse debet, nam, Scholæ Salernitanæ indicio:

*Ex magna cæna, stomacho fit maxima pœna:
Ut sis nocte levis, sit tibi cæna brevis.*

Ordo quoque servandus in cibis assumendis. Subtiles enim, liquidi, humidi, ac facili concoctionis, præmittendi solidis & aridis, ne cæteroqui hi illis meatus præcludant, & corruptio fiat; secundum tritum illud:

Præmittas calidum frigidis, & mollia duris.

Inter comedendum sæpe ac parce bibendum; nec jumenta imitari oportet, quæ tum demum bibunt, cum cibo extaturantur: sed potio subinde interpo-
nen-

nenda, quoniam cibus, permistione potionis mollior redditus, per membra, nutritioni servientia, facilius transit: ideoque & Schola Salernitana præcipit:

Inter prandendum sit sæpe, parumque bibendum.

Sitis autem sedativus potus, circa prandii aut cœnæ finem, naturæ magis congruere videtur; tunc enim ob calidi siccique cibi æstuationem, vera sitis urget. Scilicet vix verisimile est, eodem, ac brevi temporis momento, infestari naturam esurie simul ac siti, cum hæc a calore interno, illa a frigore stimuletur. Inchoata digestionem non est multum superbibendum, ne ebullitio digestionis interrumpatur.

Iejuno stomacho potus vitandus, quia nervos tentat. Exceptionem tamen affert Schola Salernitana, sed fortasse vix omnibus eam probatura. Verba illius sunt:

Si nocturna tibi noceat potatio vini,

Hoc tu mane bibas iterum, & fuerit medicina.

A labore aut motu sudanti, detrimentum magnum affert frigida potio. Quin nec in gravi siti illico bibendum, sed satius fuerit assumere syrupum acidiusculum, vel os gargarizare aqua frigida, vel fructus quosdam masticare.

Diversam qualitatem & quantitatem potus, cibi diversa qualitas & quantitas exigit: cibus quippe siccior & crassior, majore copia potus opus habet, præ subtili & humidior.

Optimus potus *Vinum*, si moderate sumatur. At vero, ceu Schola Salernitana docet,

Vina probantur odore, sapore, nitore, calore.

Si bona vina cupis, quinque hæc laudantur in illis

Fortia, formosa, & fragrantia, frigida, frigida.

Accipiunt præterea Vina ab ætate commendationem. Sed haustum nimis Vinum valde humectat, corpus calefacit, caput halitu implet, ad iram & libidinem præcipientes facit, & divinæ particulam auræ obfuscet.

Quamobrem raro pueris concedendum, ne humidum radicale in iis corrumpatur; adultis, non nisi modice.

Vinum factum debile per admixtionem aquæ, laudabilius est, quam quod est sua natura imbecille: tale enim facile corrumpitur; quod secus se habet in iis, quæ aqua affusa infirmantur.

Vino generoso ad stomachum roborandum utentes, cum pane tosto illo frui debent, ne virtus diffluat, sed fixa evadat.

Homines multo vino, vel natura, vel consuetudine, utentes, minori cibo indigent: vinum enim non potus tantum, sed & cibi vicem præstat. Hinc potatoribus paucus victus sufficit, nam & natura non potest copiosum cibum, copiosumque vinum simul digerere.

Vina medicata non pro potu vulgari ingerenda, sed perparce in epularum initiis iis fruendum: impediunt enim cæteroqui ciborum suavitatem & gratiam. Si somnus conciliandus, Absinthiati vini in fine coenæ aliquid hauriendum. Ex omnibus autem medicatis vinis illi, quod Salviam habet admixtam, pretium ponendum, quippe Salernitana Schola, eam beneficant herbam sic nobis deprædicat:

Cur moriatur homo, cui Salvia crescit in horto?

Salvia confortat nervos, manuumque tremorem

Tollit, & ejus ope febris acuta fugit.

Salvia salvatrix, naturæ conciliatrix.

Cerevisia non insalubris est, si bene cocta, clara, non nimis recens, nec nimis vetus, imprimis æstivo tempore.

Aqua laudatur fontana recens, quæ ex terra pura promanat; quæ insipida est, & nec gustu nec odore percipitur; quæ cito calefit, & mox revertitur ad frigus. Sed ea inter epulas utendum non est. Namque, si Scholæ Salernitanæ credimus,

Potus aque sumtus comedenti incommoda præstat;

Hinc friget stomachus, crudus & inde cibus.

Tempus sumendi cibi congruum est, cum prioris cibi onere allevati, ventriculoque exonerato, concessisse nos priorem novum percipimus, fameque ad expetendum novum commovemur. Nunquam autem inter utramque comestionem minus quam sex horarum spatium interponendum.

Post assumptum cibum proderit stare, aut modica deambulatione corpus exercere, ut alimenta eo rectius in intestina descendant. Præcipue a studiis & meditatione statim a cibo temperare oportet, ne calor a ventriculo avocetur, & cerebrum vaporibus impleatur. Notum est dictum:

Post pastum stabis, passu mollive meabis.

Iis, quorum calor fortis ad digerendum, item corporibus macilentis, & ad siccitatem proclivibus, aut iis, qui cibo facili utuntur, non sufficit in die naturali una comestio, imo interdum ne bina quidem. Senibus quoque, & convalescentibus, si una vice copiosum offerretur alimentum, calor suffocaretur, & vires opprimerentur; ideo sæpe illos, & frugaliter, cibare oportet.

CAPVT V.

De Somno & Vigilia.

Somnus ad sanitatem necessarius est, ut & membra corporis humani lassæ refocillentur, & spiritus, quibus anima in perficiendis actionibus utitur, restaurentur. Per eum calor ad interiora revocatur, unde alimentorum, crudorumque humorum concoctio feliciter perficitur, totum corpus, & imprimis viscera, suaviter humectantur, calor augetur, & omnia membra validiora fiunt. Amplius, somni beneficio curæ tolluntur, ira sedatur, animusque tranquillior evadit; senibus imprimis maxime est salutaris.

Vigilia, spiritus ac sensus excitant, & vegetiores reddunt, spiritus & calorem in omnes corporis partes dispertiuntur, alimenti distributionem adjuvant, excrementorum propulsionem promovent.

Somnus æque ac Vigilia, si modum excedant, humano corpori nocumentum afferunt. Quemadmodum enim somnus immodicus cerebrum plus æquo refrigerat, & humectat, mentique & memoriæ stuporem quasi conciliat; ita vigiliæ nimix, cerebri bonam temperaturam corrumpunt, spiritus animales absumunt & dissipant, bilem augent, acuunt, & inflammant, sensus debilitant, cruditatem pariunt, ac impediunt concoctionem.

Interdiu vigilare, noctu dormire, ratio jubet; ac proinde lucubrationes vitandæ. Non statim vero a cœna corpus sopori dandum, sed duabus prius horis vigilare, ad sanitatem conducit: quippe ingestus cibus, quem statim somnus excipit, in suprema

ventriculi parte supernatans , probe concoqui non potest. *Meridianum somnum plerique damnant , & sic quoque Schola Salernitana:*

*Sit brevis , aut nullus tibi somnus meridianus ,
Febres , pigrities , capitis dolor , atque catarrhus ,
Hæc tibi proveniunt ex somno meridiano.*

Cum vestibus simul omnes curæ exuendæ. Cervicali utendum elevato , ut caput in sublimi positum sit, & cibus, ad os ventriculi regurgitans, concoctionem non impediat. Pronus decubitus, ventriculo cumprimis , oculisque vehementer officit. Pejor est supina cubatio, multorum morborum procreatrix. Corpus, pro ambientis aëris constitutione, decenter tegendum, ne, calore & spiritibus circa interiora detentis, externæ corporis partes a frigore lædantur. Caput quoque vitta operiendum.

Somnus a dextro latere inchoandus, ut cibus eo melius in imum ventriculi descendat. Postea volvendum corpus, & super sinistro latere dormiendum, ut, haud aliter ac gallina pullos foveat, a jecore, ventriculo incumbente, ejus calor augeatur, & adjuvetur concoctio. Dehinc rursus in dextro latere, usque ad consuetum surgendi tempus, somnum continuare juvat, ut chylus ex ventriculo in intestina eo facilius permeet.

Duratio Somni, ex alimentorum perfecta concoctione æstimanda: quæ colligitur, ex stomachi contractione, ventrisque, ob ciborum descensum, mollitie, ructuum paucitate, & capitis totiusque corporis levitate ac agilitate; denique ex urinæ flavedine. Communiter volunt, haud minus septem, nec amplius octo horas, durare debere.

Excrementa quia noctu cumulata fuere, ideo mox a somno, alvi fæces dejici debent; eaque evacuatio, si natura non obsequatur, lenientibus promovenda.

CAPUT VI.

De Motu & Quiete.

Motum ad sanitatem esse necessarium, exinde patet, quod, calorem nativum augendo, nutritionem promovet, vapores & excrementa discutit, membris soliditatem & duritiem, ex mutua attritione, conciliat.

Immoderatus corporis motus, spiritus & nativum calorem dissipat; musculorum, nervorum, & tendinum robur dissolvit; membranas laxat aut dividit; viscera concutiens, tenues venas disrumpit; sanguinem in venis diffundit & exagitat; febres procreat; corruptos humores, qui conclusi & conscripti tenebantur, quique a natura subigi & blande expurgari poterant, irritat, unde vomitiones morbiq; multiplices sequuntur.

Ex his, iisque, quæ de somni moderati commodis dicta fuere, de utilitate *Quietis* judicium facere licet, quæ nihil est aliud, quam motus & exercitiorum corporis intermissio. Ea vero, si nimia & desidiosa fuerit; inertem calorem, spiritus inertes, minusque ad mentis naturæque functiones aptos procreat; unde cruditates obstructionsque oriri necesse est. Insuper corpus universum otii nimietas prægravat, idque languidum, molle, ac infirmum reddit.

Motus & præcedere cibum & sequi debet, sed levis. Si ante cibum corpus nimis moveatur, calor dissipabitur, & humores pravi ad ventriculum de-

deducentur : si post illum assumptum , alimentum nondum elaboratum & crudum visceribus infertur.

Graciles moderate , robusti validius moveri decent , habita consuetudinis ratione.

Exercitiis in corpore suffusus color , & sudor promanans finem imponere jubent.

Deambulatio mediocris corpora pura reddit. Sed, quæ sit per acclivia , corpus quasi onere premit , fatigat, sudorem movet, spiritum cohibet, & genibus infirmis valde adversatur : per declivia, femora reddit invalida, & caput præcipitat. Mane, secus montes, vesperi, juxta fontes & amnes itare magis volupe est, sensusque magis afficit.

Moderatis laboribus corpus , studiis liberalibus animus roboratur.

Præstat corpus moderate quotidie exercere, ne superfluitates colligantur, quam purgationibus vel aliis medicamentis uti. Quod enim Celsus monet, cavendum, ne in secunda valetudine, adversæ præsidia consumantur.

CAPVT VII.

De Excretis & Retentis.

CORPORIS retrimenta, si rite & tempestive excernantur, multum id confert ad sanitatem conservandam. Deficiens excretio, sive retentio, nativum calorem premit, & obruit, putredinem, aliasque naturæ graves & noxias qualitates producit, viasque & canales corporis obstruit.

Immodica excretio, spiritus, & nativum calorem dissipat & exhaurit : unde naturales animalesque fun-

Etiones languescunt, & tabes, cruditas, hydrops, alique frigidi morbi emergunt.

Evacuatio fit vel sponte & a natura, vel arte promovetur.

Singulis diebus mane, sensuum instrumenta, linguam, dentes, oculos, nares, aures, frigida abluere, & a sordibus liberare, capillosque pectere oportet.

Cum honeste licet, nec flatus ventris, nec urina retinenda.

Vomitus frequens, sanitatis est indicium; nam bilem, & pituitam, ventriculum molestantes, educit. Utilis praesertim est iis, qui cibo & potu se nimium implevere, vel parum recte concoxerunt. Ex praecepto Hippocratis, singulis mensibus bis vomendum, idque biduo continuo, ut secundus dies prioris reliquias extrudat.

Sudor, humorem redundantem aqueum frigidumque excoquit, elicit, & consumit. Ejus provocatio utilis. Quocunque autem modo provocatus fuerit, sive exercitio, sive frictione, sive aliter, probe abstergendus est. Cavendum quoque, ne ex calore subito ad frigus transeat.

Hæmorrhoides, venarum, quæ anum ambiunt, sunt explicationes; per quas natura faculentum ac melancholicum sanguinem, statis temporum intervallis, expurgat. Istud profluvium multos morbos arcet, ajuntq; iis, qui illud patiuntur, nec a pleuritide, nec a pulmonum vitio, nec a lepra aut vitiligine esse periculum. Melancholicis quoq; & renum dolore laborantibus, hæmorrhoidum apertura salutaris est.

Vena Sectio, ex arte proveniens evacuandi corporis medium, morbos dispellit, corpus gravi sanguinis onere levat, illudque ad functiones obeun-

obeundas reddit alacrius. Hinc phlebotomia neglecta, scabiem, paralyfin, apoplexiam, febrim, & adeo subitam mortem progenerat. At, si nimis frequens quoque fuerit, malignas obstructions efficit, stomachum, cor, & epar debilitat, ac senectutem accelerat. *Corpus simpliciter sanum* phlebotomia non indiget. *Senibus*, ob virium & caloris defectum, non adhibenda.

Vernum tempus Sanguinis missioni maxime accommodatum; quia tum spiracula cutis laxantur, & sanguis in exteriores partes magis diffunditur.

Non est vena secanda, corpore a cibo repleto, ne crudi succi in sanguinis exhausti locum succedant; *nec aëre nebuloso vel turbido*, ventoque australi spirante, ne aër noxius venam subintret.

Phlebotomia maxime fit in *Brachiis*, in quibus venæ tres se offerunt insigniores; una superior, quæ vocatur *Cephalica*; altera inferior, *Epatis* in brachio dextro, & *Splenis* in sinistro; media inter illas vocatur *Mediana*, quam alio nomine *Venam Communem*, item *Venam Cordis* vocant. Circa *Cephalicæ* venæ incisionem minus periculi metuendum, quia sub ea non est Nervus, nec Arteria notabilis. At, sub *Epatica* sive *Basilica*, Arteria, sub *Vena Comuni*, Nervus delitescunt.

Ante phlebotomiam proderit corpus nonnihil exercitare, quo sanguis fiat mobilior, & ad fluxum pronior, unde & membrum, in quo sectio fieri debet, interdum frictione & calefactione sollicitasse juvabit.

Sanguis excipiendus tribus aut quatuor pelviculis mundis, terrenis, aut vitreis; non æneis, ne qualitatis conversionem subeat, & iudicium de eo per-

vertatur. *Exceptus sanguis*, seponendus in loco mundo, quo nec pulvis, nec fumus, nec ventus, nec Solis radii pertingunt.

Quæ post *Phlebotomiam* observanda sint, docet Schola Salernitana, & talia fatur:

*Sanguine subtrahito, sex horis est vigilandum,
Ne somni fumus ledat tibi sensile corpus.
Sanguine purgatus, ne carpas protinus escas.
Omnia de lacte vitabit rite minutus,
Et vitet potum phlebotomatus homo:
Frigida vitabit, quia sunt inimica minutis,
Interdictus eritque minutis nubilus aër.
Omnibus apta quies, & motus saepe nocivus.*

Quantum ad *Judicium* de Sanguine emisso (ad quod faciendum, non nisi post horam a phlebotomia elapsam, se quis accingere debet,) attinet, sciendum: Si *primus sanguis sit peior secundo*, secundus tertio, & sic deinceps, ultimus vero bonus & naturalis fuerit, signum id haberi sufficientis phlebotomiae. Primo Sanguine bono, secundo pravo existente, id signum, ulteriori phlebotomia, & medicamentis opus esse; nisi phlebotomia facta fuerit *ad divertendum*, tum enim in principio promanat sanguis e parte salubri, postea ex affecta.

Sanguis Melancholicus, pelliculæ fundum petit, est niger, crassus, densus, saporis acidi, multas fibras habet, facileque concrevit. Is obstructionum, aliorumque morborum autor erit, nisi occurratur.

Sanguis Phlegmaticus, comparatur albugini ovi, estque albicans, mucilaginosus; tardius effluit, & glutinis instar digitis adhæret. Hic quoque obstructions progenerat; unde medicamentis exsiccantibus

bus opus est, ne superflua humiditas, æreum & radicale humidum suffocet.

Sanguis Cholericus, est rubedinis scintillantis, aut crocei coloris, saporis amari, habetque spumam innatantem; & bilis copiam significat.

Sanguinis Puri, qualis Sanguineorum, color est purpureus, subruffus, sapor dulcis; bonæque temperaturæ indicium facit.

Diversitas Coloris in sanguine, collum columbæ variegatæ referens, significat pravorum humorum varietatem. *Albus color*, interdum ex optima coctione proficiscitur. Sanguis enim in venis incipit dealbari, quo, ulteriore digestionē superveniente, convertatur in substantiam membrorum, quæ, quia sunt albi coloris, necesse est, ut illa digestio dealbando procedat; quæ quidem incipit in venis magnis, & in minoribus terminatur, donec ad membra digestionis tertiæ pervadit.

In summa parte sanguinis innatat interdum pingue quiddam, & adiposum, telæ aranei non absimile; quod maxime corporibus obesius accidit.

Graveolentia Sanguinis, putredinem & corruptionem arguit.

Serum, sive substantia quædam aquosa, sanguini coagulato supernatat, sicut serum in lacte. Eo si abundet Sanguis, aut potum liberaliorem, aut jecur infirmum, aut renes imbecilles vel obstructos prodit. Hoc tamen humore non prorsus destitui debet sanguis, requiritur enim ad illum humectandum, quo liberius venas angustas permeare possit. Notatur autem seri privatio, in multum jejulantibus ac vigilantibus, iis, qui utuntur cibis siccis & calidis, iisque, qui multum exercentur corpore & animo.

Sub-

Subtilitas aut *Crassities sanguinis* maxime deprehenditur, si massæ illius cum cultello aut ligillo fiat *Scissio* & divisio. Nam, si non resistat, sed divisioni obediat, laudabilis sanguis habetur. Si difficulter incidatur, id viscositatem & crassitiem ejus designat. Si sanguis nullo modo admittat incisionem, quamvis facile dividatur, (sicut apparet in aqua & oleo, cæterisque liquoribus, qui divisioni quidem non reluctantur, sed tamen non inciduntur,) is sanguis nimis subtilis est, & imperfectam digestionem commonstrat.

Scarificatio per cucurbitulas, adhibetur ad sanguinem e minutis venulis exsugendum, aut in alium locum derivandum: vel, ut membrum incalescat, & sanguis eo trahatur; item, ut dolor sedetur. Speciatim cucurbitulæ scapulis applicitæ, gravedinem tollunt, vel mitigant, caput alleviant, & doloribus dentium medentur. Renibus admotæ, scabiem, & pectoris ægritudines sanant. Pro cucurbitulis adhibentur interdum *Hirudines*, quæ sunt insecta palustria, oblonga, instar lumbricorum,

Cauteris quoque humores attrahuntur, exsiccanturque, ne, hinc inde dispersi, partes primarias offendant.

Cauteria non adhibenda infantibus, pueris, nec valde senibus. Et haud quidem pueris ac infantibus, ob nimiam mollitiem membrorum, in quibus inflammatio facile excitari posset: in senibus vero, propter siccitatem: itaque obesis & pinguibus maxime conveniunt.

Cauterium, si evacuationis gratia paretur, tenendum est apertum, ut humor attractus in sufficienti qualitate possit effluere: cæteroqui repellitur materia, & in alium locum convertitur.

Cau-

Cauteria sub genubus, reliquis præferuntur, cum ratione situs corpus melius expurgent, & humiditates corruptas, a partibus nobilioribus, ad ignobiliores deducant.

Purgatio, est humorum qualitate peccantium, concoctorum tamen & bene præparatorum, ex corpore, per inferiora, medicamentis purgantibus procurata, convenienseductio.

Medicamenta purgantia totam massam sanguineam conturbant, & semper aliquid virium exhauriunt.

Ea minime adhibenda sunt, si humorum adsit paucitas; si corpus sit sanum, & bonæ temperaturæ; si vires sint postratæ; si ventriculus imbecillis.

Semper potius in parva quam magna dosi purgandum, & tempore paroxysmorum, abstinendum a purgatione.

CAPVT VIII.

De Animi Affectibus.

Corporis, cum anima, individua est sympathia: quamobrem hujus quoque perturbationes vitandæ sunt. Nempe, Mœstitia, exsiccat ossa; Ira, brevis insania est; Amor inordinatus, ipsum animum captivum detinet, & corpori magnum detrimentum infert. Etiam nimium Gaudium multos extinxit. Ergo dominari affectibus oportet, non servire. Huc facit Scholæ Salernitanæ primordium, his omnino conceptum verbis:

Anglorum Regi scribit Schola tota Salerni:

Si vis incolumem, si vis te reddere sanum,

Curas tolle graves, irasce crede profanum,

Parce mero, cœnato parum, non sit tibi vanum

Sur-

*Surgere post epulas, somnum fuge meridianum :
Ne mictum retine, nec comprime fortiter anum.
Hæc bene si serves, tu longo tempore vives.*

CAPVT IX.

De Morbis in genere.

M*Orbus*, est partium viventium corporis humani, ad actiones naturales exercendas, ex præternaturali earum constitutione, exorta impotentia.

Tempora morbi sunt quatuor: *Principium*, in quo crudus est morbus. *Incrementum*, in quo symptomata ingravescunt. *Status*, in quo inter morbum & naturam maxima est pugna, & signa tam salutis, quam mortis manifesto se exhibent. Denique *Declinatio*, in qua morbus, a natura victus, mitescit.

Morborum *differentie* multæ sunt & variæ. Juvat notare præcipuas.

Morbus Unus est, qui unam partem, vel plures, verum sine ulla interruptione, occupat.

Morbus Compositus est, qui ex pluribus morbis, in eadem parte concurrentibus, constat.

Morbi Disjuncti sunt, qui, in sejunctis partibus hærentes, nec eidem actioni nocent, nec ad mutuam generationem quicquam conferunt.

Morbi Acuti sunt, qui decimo quarto; *Peracuti*, qui septimo; *Perperacuti*, qui quarto; *Acuti ex decidentia*, qui quadragesimo die terminantur. Morborum Acutorum id proprium est, ut, statim a principio, gravis symptomata secum afferant.

Morbi Lethales sunt, qui semper, aut magna ex parte, perimunt, quia focus illorum tam longe abest,

ut

ut illuc medicamenta integris viribus pervenire nequeant.

Morbi Dubii sunt, a quibus multi sanantur, & multi intereunt.

Morbi Critici sunt, qui mutatione magna, per evacuationem vel translationem, finiuntur. Est enim *Crisis*, repentina in morbo mutatio, ad salutem, aut ad mortem. *Crisin solent precedere*, capitis dolor ingens, jactatio corporis & anxietas, sitis inexplebilis, difficultas respirandi, pulsus inæqualitas, & alia symptomata.

Morbi non critici sunt, qui paulatim diminuendo solvuntur.

Morbi Ordinati sunt, qui typum suum servant.

Morbi Erratici sunt, qui, typum suum negligunt.

Morbi Recidivi sunt, qui cum putabantur esse penitus finiti, denuo revertuntur.

Morbi Universales sunt, qui totum corpus afficiunt.

Morbi Particulares sunt, qui partem unam vel plures afficiunt.

Morbi Organici sunt, qui instrumenti rationem & symmetriam infringunt.

Morbi Hereditarii sunt, qui vitio seminis, aut sanguinis materni, propullulant.

Morbi Endemii sunt, qui unam tantum regionem aut locum, semper, vel potissimum infestant.

Morbi Epidemii seu Vulgares sunt, qui certo quodam tempore, nunc in una, nunc in pluribus regionibus, multos simul infestant, & plerunque pestilentes sunt.

Figure Morbus est, quando figura partis a naturali statu ita recedit, ut ob eum actio partis vitietur, & recte

recte exerceri non possit; quod fit, ubi ea, quæ recta sunt, curvantur, aut, quæ curva, recta evadunt.

Meatuum & Cavitatum Morbus est, quando cavitates & meatus contra naturam sunt dispositi, & vel nimium patent, vel nimia angustia laborant. Angustia vero illa vel est *Coalescentia*, vel *Constipatio*, vel *Obstructio*, vel *Subsidentia*, vel *Contractio*, vel *Compressio*. *Coalescentia* est, quando particulae & tunicæ uniuntur. *Constipatio* est, quando a carne cavitati annata, aut tumore in ipso meatu genito, vel angustior redditur, vel plane occluditur cavitas. *Obstructio* est, quando meatus, ab incidente, intusq; hærente materia, quasi infarcti, angustiores fiunt. *Subsidentia* est, cum meatus quasi subsident. *Contractio* seu *Constrictio* est, cum meatus constringuntur: quod accidit ob spiraculorum cutis densitatem, aut siccitatem. *Compressio* est, cum a re aliqua externa incumbente, & comprimente, meatus angustior redditur, vel plane occluditur.

Morbi Connexi sunt, quorum prior est posterioris causa, ob societatem & cognationem. Talis cognatio est inter Ventriculum & Cerebrum.

Morbus Benignus est, qui nihil gravium symptomatum contra propriam naturam habet.

Morbus Malignus est, qui pejora, quam pro suæ naturæ ratione, habet symptomata. Itaque in morbo maligno æger est inquietus, sine causa horret, incalcescit, sanguinem stillat.

CAPVT X.

De Morbi signis Diagnosticis.

MORBUS cognoscitur, ab essentialiter inhærentibus; a causis, quæ adsunt, vel præcessere; a cor-
po-

poris dispositione, ejusque qualitatibus, Colore, Odore, &c. mutatis; ab actionibus naturalibus vel vitalibus læsis; denique a Sangvine, Pulsu, Urina, Fæcibus, Sudore, Sputo.

Quod ad *Sanguinem* attinet, de eo jam modo pictum est.

Pulsus Æqualis, naturæ firmitatem; *Inæqualis*, vasorum obstructions, vel humorum abundantiam; *Velox*, aut *Validus*, vires adhuc fortes, certe non admodum debiles; *Tardus*, itemque *Debilis*, contraria omnia, & spirituum oppressionem significant.

Medici, pulsum explorare volentis, manus temperata esse debet, nec nimis calida, aut frigida. Ingressoque ad ægrum, non statim arteria tangenda, sed prius exspectandum, quoad ægrum animo tranquillo & pacato esse animadvertit.

Manus tangenda, esto quieta, & modice inflexa; non depressa, non vinculo constricta; nec prona involam, aut resupina.

Temperamento calido præditi, pulsum celerem, crebrum, & vehementem edunt: frigidi, contrarium.

In Infantibus puerisque pulsus est celerrimus, & creberrimus: in Senibus, rarus ac tardus.

Post cibum assumptum, post exercitationes & somnium, item ex animi affectibus, pulsus alterationem patitur.

Corporis temperati pulsus prius est cognoscendus, ut ad illum, quasi normam, reliqui pulsus conferantur, & æstimentur.

Urina, sive serum sanguinis, renum vi secretum, multas exhibet significationes.

Tenuis Urina, significat immoderatum potum, renum & ureterum obstructionem, & imminutam concoctionem.

Crassa Urina, significat solutam aliquam obstructionem, vel ruptum abscessum, vel alterius materię crassę permissionem.

Perspicua seu Clara Urina, cui nubecula inest, significat integram perfectamque concoctionem, & humorum bonitatem.

Rubra Urina, significat calorem jecoris, vel febrem.

Crocea Urina, significat rhabarbari, croci, vel fœniculi usum.

Turbida Urina, significat crassorum humorum copiam in venis, renum aut vesicę affectum, vel obstructionis solutionem.

Nigra Urina, significat summum incendium, & bilis atrę permissionem.

Moderata Urina, significat moderatam seri abundantiam.

Copiosa Urina, significat immoderatum potum, aut renum vitium.

Pauca Urina, significat potus penuriam, meatuum urinę, uti renum, ureterum, vesicę obstructionem, aut crassum & viscidum humorem, qui difficulter excernitur.

Odora Urina, significat moschi aut terebinthinę usum.

Fœtida Urina, significat esum putris casei, alii, aut ulcus renum.

Cruenta Urina, significat renum & lumborum ulcus, aut contusionem.

Furfuracea aut squamosa Urinę corpuscula, significant vesicę scabiem, aut exulcerationem.

Filamenta, albis capillis similia, a renibus proveniunt, vel vasis spermaticis; atque in iis plurimum apparent, qui gonorrhæa fuere correpti.

Pinguedo, telis aranearum similis, hominem tabe consumi, indicium facit.

Arenulae rubrae & flavæ, arenibus, albæ, a vesica proficiscuntur, illarumq; partium calculum minantur.

Caruncula exigua, in urina crassa, ab exulceratis renibus proveniunt.

Sanguinis grumi in arena conspiciuntur, cum vel ex ulcere, vel ex læso, rupto aut hiantе vase, in partes, per quas arena transit, sanguis emittitur.

Pus, indicat partium etiam superiorum, præcipue vero urinæ meatuum, ulcus.

Pituita crassior, instar mucī narium, matulae fundo inhærescens, cum dolore emissā, vesicæ calculum, aut ulcus innuit.

Vermes, corruptam, putridam & sordidam materiam arguunt.

Corona, quæ supremam faciem in vitro ambitu cingit, qualis in vasis majoribus sit sanguis, ostendit. Ergo tenuis & alba, sanguinis diluti, & sero tenui perfusi; crassa & alba, pituitosi; citrina, naturalis; crocea, biliosi; rubra & ardens, fervidi & accensi; cærulea & livida melancholiæ index est.

Spuma multa urinæ citra agitationem innatans, flatibus plurimos in corpore vagari, & cholicum dolorem, ex fructuum vel leguminum immoderato esu, aut insiti caloris imbecillitate, imminere, designat.

Bulle magnæ perversos & crassos humores, *parvæ*, capitis dolores connotant.

Inspectio Urinæ quo rite peragi queat, opus est, ut in vase puro, pellucido, & oblongo, a somno,

prima concoctione expleta, excipiat; quanquam in morbis acutis, quavis dici parte, recte excipitur. Excipienda autem unica vice, neque per vices emissio commiscenda.

Conservanda est Urina in vase obturato, procul a Sole, & loco immuni a nimio calore aut frigore, nec movere aut agitare illam convenit. At, si forte vel frigoris vi, vel sponte sua crassescat turbeturque, igne levi, aut aqua calente, citra commotionem, dissolvenda.

De Urina judicium facturis, in loco nec obscuro, nec nimium lucido, post unam ab emissionem horam, eam considerare debet, nec ultra sex horas inspectio differenda.

Feces corporis, si spumosa & flatulenta fuerint, nisi id fiat a cibis flatulentis, ebullitionem significant.

Sanguinea feces, mala sunt, nisi id fiat ab hæmorrhoidibus. Similiter mala sunt Pituitosa, Chylosa, quæ Vermes habent admixtos, quæ nimis graveolentes sunt, quin & ea, quæ omnino non foetent, quia, nullam alterationem factam, ostendunt.

Liquida feces, alimenti liquidi, cruditatis, obstructionis, aut capitis imbecillitatis; *Dura & Sicca*, sicci alimenti, aut caloris exuberantis argumentum præbent. *Molles* ergo laudabiles.

Sudor omnis significat vel humorum copiam, vel retentricis facultatis imbecillitatem. *Crassus*, pituitæ crassæ, aut obstructionis; *Tenuis*, pororum & venarum angustia est demonstrator.

Multus Sudor in sanis præsignificat morbum: aliàs cutis raritatem & laxitatem; interdum potus nimietatem declarat. *Paucus sudor*, est propter humorum in-

inopiam, uti in senibus, quorum membra arefacta humorem omnem ebibunt.

Color Sudoris pallidus esse debet; cui nempe aliquid bilis miscetur, sicut in urina.

Graveolentus Sudor, nisi ex alimentis, uti porro, cæpis, allio, ruta, proveniat, putredinem patefacit: unde scabiosi & leprosi sudor foetet, & sudor sub axillis male olet, quia non dispellitur.

Sapor in sudore falsus, naturalis status, *Amarus*, bilis admixtæ indicatio est.

Frigidus sudor, in acutis morbis mortem, ob superatum calorem nativum, in chronicis, morbi diuturnitatem declarat.

Sudores, qui in morbis cœperunt, & statim desinunt, sunt mali; sudor totius corporis, bonus. Si una pars tantum sudet, id malum portendit: nisi quod *Faciem* excipere oportet, in qua propter cerebri humiditatem facile sudamus. *Sudor nocturnus* significat alimenti copiam.

Sputum, ex ore excreatur; *Saliva*, ex ore sine tussi ejicitur.

Ex Sputo & Saliva, de iis partibus, quæ ad respirationem pertinent, fit judicium.

Crassescit Saliva, cum pituita crassa, a cerebro defluens, ei miscetur.

Spumosa Saliva, aërem aut spiritus commixtos, loquutionem item aut motum vehementiorem comprobatur; unde in Equis saliva spumosa est.

Multa Saliva, humiditatem & frigus cerebri, vel imbecillitatem aut humiditatem ventriculi, vel calorem tenuantem, vel cibi aut potus abundantiam declarat. *Pauca*, est propter calorem glandularum & faucium.

Nigra Saliva, nisi sit eorum, qui ad lucernam vigilant, lethalis censetur. Ejusdem census est *viridis*. *Flava*, & *pallida*, cruditatem, *rubra*, pleuritidem indicant. *Salsa* & *Amara*, a nimia pituita provenit. *Dulcis*, est optima.

Huc revocatur *Mucus*, qui ex naribus emanat, cerebri excrementum. Is si copiosus & tenuis sit, frigoris; si paucus, siccae beneque temperatae naturae signum est. *Albus*, est a pituita sincera; *pallidus*, ex bile. *Acris*, gravedinem futuram; *fætidus*, ulcus capitis; sponte effluens, ut in pueris & senibus, humorum copiam, indicant. Est quoque mucorum multitudo, ingenii stupiditatis, & memoriae debilitatis, character.

Sordes Aurium etiam significativæ sunt: & dulces quidem mortem portendunt; *tenuës*, cruditatis; *paucæ* & *siccæ*, sanitatis augurium exhibent; *multæ* & *frequentes*, cerebrum laborare revelant. *Subflavæ* & *albæ*, optimæ judicantur.

CAPVT IX.

De Morbi Eventu.

Eventus Morbi, terminationem ejus præcipue respicit, quæ est vel ad Salutem, vel ad Mortem.

Morbus terminatur vel per *Solutionem*, quando sensum per coctionem & alterationem sanitas redit: vel per *Marasimum*, quando paulatim ad mortem convertitur: vel per *Crisin*, quando subito & perfecte morbus solvitur; eamque mutationem vel sanitas, vel mors consequitur.

Dies Critici, sunt septimus & nonus quisque, atque in iis mutationes insignes fieri creduntur, ob

Lunæ

Lunæ progressum, ad Signa quadrata & opposita, tum ad Sextilem vel Trigonum: & ob motum & dispositionem humorum, qui, ab humoribus Lunæ ejusque motu concitati, pugnam cum materia morbifica ineunt, eam expellant, & crisin, sive subitam in melius aut pejus mutationem efficiunt.

Symptoma, generaliter omne id notat, quicquid præter naturam homini accidit; sive morbus, sive causa morbifica, sive superveniens accidens præternaturale fuerit. Atque quo minora & pauciora sunt symptomata, eo debilior morbus existit.

Terminatio Morbi, & utrum is futurus sit salutaris, an lethalis, ex actionibus naturalibus, vitalibus & animalibus, excretis item, & qualitatibus mutatis colligitur. Non, quod ista statim salutem vel mortem indicent, sed, quod aut spem salutis promittant, aut metum mortis incutiant.

Ratione Actionum Naturalium bonam spem facit, si bene se æger ad ea quæ offeruntur, habet: si ea, quibus per sanitatem delectabatur, comedit.

Malum eventum minatur, si, exsolutis viribus, cibos æger appetit: id enim moribundis accidit, vel ob humorem acidum, ad ventriculum delabentem; vel ob maximam corporis a morbo resolutionem. Huc refertur, si æger in morbis acutis cibos fastidit, &, lingua arida existente, non sitit.

Ratione Actionum Vitalium bonam spem facit, si pulsus a naturali symmetria non multum recedit; si respiratio secundum naturam se habet; si nulla adest cordis palpitatio. *Malum eventum minatur*, si pulsus sit languidus, tardus, rarus: si respiratio nimis magna & velox, aut parva & obscura; vel cum stercore conjuncta.

Ratione Actionum Animalium bonam spem facit, mentis constantia, decubitus haud irrequietus, & naturali similis. *Malum eventum* minantur, Delirium; Somnus & Vigiliæ, si modum excedant; Auditus læsio; Stupor, quia vel humoris vitiosi ad cerebrum delati, vel caloris nativi extincti, indicium est; Convulsio, Singultus, Tremor, Horror, Rigor, & Torpor; Vox clangosa, aut nulla.

Ratione Excretorum & Retentorum, quæ bonam aut malam spem faciant, dictum est capite præcedente.

Ratione Qualitatum mutatarum bonam spem facit, totus corporis habitus, si non multum sano dissimilis redditur: si Hypochondria dolore vacent, & fuerint mollia. *Malum eventum* minantur, habitus corporis, qui nihil in morbo mutatur, ejus diurnitatis index; nasus acutus, & pruriens præter morem; oculi concavi, aut tumidi & prominentes; vel, si alter altero minor sit, aut si venulas habeant lividas & nigras; item, si sponte lacrymentur, aut non plane clausi sint. Amplius huc revocantur, adstricta tempora, aures frigida & contractæ, cutis circa frontem dura; color totius vultus viridis aut niger; dentes stridentes; lingua arida, dura, nigra; hypochondria dolore aut inflammatione vexata; ungues lividi & nigri, si corpus simul ægrum sit; nam, in melius habentibus signum eos morbi discedentis accipere oportet.

CAPVT XII.

De Morborum Differentiis, & speciatim de Morbis Externis.

MOrbi sunt vel Interni, vel Externi. *Externi*, superficiem corporis afficiunt. Species sequuntur.

Corpulentia nimia, est molis corporeæ, ex carnis & adipis augmento, nimium incrementum.

Gracilitas nimia est, quando corpus aut ejus partes minus carne & pinguedine opplentur, quam æquum erat, unde & deformitas oritur, & ad munera obeunda imbecillitas.

Luxatio, est articuli, e sua sede, in alienam, cum motus arbitrarii impedimento, prolapsus, ex tensione vel impulsione violenta, aut humore nimio ortus. Luxati articuli hoc indicium est, quod ab una parte articulus extuberat, ab altera sinum habet, membrique figura pervertitur.

Abscessus, est purulentæ materiæ, ex humore tumorem excitante, ortæ, in partis alicujus cavitate collectio.

Ulcus, est continui, cum imminuta magnitudine, in parte molli, a materia erodente, exorta solutio.

Fistula, est ulcus sinum habens angustum & longum; caro vero, quæ fistulam circumdat, est alba, sicca, & durior. Oritur ab humorum pravorum copia.

Ulcus corruptum seu exsudans, das Gliedwasser/est, cum caro corrupta, lardi instar alba, mollis tumidaque apparet, & ab ea serosus ichor, aquam limpidam referens, exsudat. Ex vulnere, in articulorum regione membranæ & nervosa inflicto, prodire

solet, & dolorem summum sæpe, ac contractionem membri vel gangrænam infert.

Vulnus, est unitatis in parte molli, a re secante, & acuta, vel cæsim, vel punctim, facta solutio. Curatur labiorum ejus conjunctione.

Fractura, est ossis, a causa externa, violenter irridente, divisio.

Inflammatiō, est partium carnosarum præter naturam tumor, a sanguine ibidem affluente exortus.

Bubo, est inflammatiō glandularum, sub axillis vel inguinibus exorta: cujus causa est sanguis, in glandulas cum humore vitioso illapsus.

Phygethlon seu Panus, est tumor durus, sine suppuratione ad glandulas subcutaneas obortus, cum dolore insigni urente & mordicante, ab ichore sive humiditate sanguinis, ibidem stagnante, proveniens.

Ruga est, cum cutis, quæ antea magis distenta erat, collabitur, & flaccida evadit, idque senibus accidit, ob corpus exsuccum.

Furunculus, est tuberculum in acutum tendens, ovum columbinum magnitudine non excedens, rubore & dolore, dum in pus vertitur, notabile. Oritur a sanguine crasso, nec multum exusto.

Parotis, est glandularum circa aures inflammatiō, a sanguine puro, vel vitiosis humoribus mixto, perfecta.

Paronychia, *Wurm am Finger* / est tumor in extremis digitis, ad latera unguium exortus. Causa est sanguis adustus, interdum malignus, quem natura eo detrudit.

Macule Unguium sunt, cum ungues maculis albis exilibus notantur; quæ, circa radicem primum exor-

tæ, una cum ungue crescunt, donec cum eo amputentur. Eas notas, si in adultis & senibus appareant, pro vivacitatis signo vulgus accipit. Oriuntur a nutrimento, si in eo portiuncula aliqua sit, ab ea, quæ pellucidam unguium substantiam reparare debebat, aliena; aliunde, uti ab ossium vicinorum nutrimento crassiore, decedens, & lucidiori unguium alimonia permista.

Ecchymoma, est sanguinis in spatia vicina, unde pars lividum colorem accipit, transfusio. Causæ sunt variæ, uti Anastomosis, quando oscula vasorum nimium aperiuntur & dilatantur; item Diapedesis sive transsudatio, Diæresis, ac Contusio.

Carbunculus, est tumor, ex sanguine adusto, crasso, ferventissimo, in atram bilem degenerante, quique partem corrumpit, exortus.

Erysipelas seu *Ignis Sacer*, *Rothlauf* / est affectus, a sanguine bilioso, in aliquam partem subcutaneam confluyente, cum macula rubra, lata, dispersa, citra extuberantiam manifestam exortus. Oritur igitur Erysipelas, cum sanguis biliosus e venis tenuioribus propulsus, nequaquam in carne subsistit, sed sua tenuitate, in cutem fertur & evolat, quæ densior & compactior hunc retinet cohibetque. Apparet plurimum in imo tibiæ, interdum in collo, facie, locisque aliis, rubore plus minusve expanso; quæ rubedo ex compressione refugit, mox vero redit, tandem flavescere incipit, deinde pallere, donec penitus evanescit. Coniunctum habet Erysipelas ardorem ac pruritum, acceditque sæpe febris.

Herpes, seu *Formica*, est tumor, a bile flava, sincera, & ab aliis humoribus secreta, in superficie partis alicujus excitatus, & ad vicina serpens.

Her-

Herpes exedens, der *Burm* / est, cum quædam pustulæ parvæ, siccæ, altiusque cuti immerisæ prodeunt, illisque ruptis cutis exulceratur, nec saniem tamen aut pus reddit; & licet illic rursus sanetur, tamen aliis denuo pustulis erumpentibus, nova ulcera arida emergunt.

Fissura simplex, *Rima*, *Schrunden* / *Risse* / est, quando cutis secundum fere lineas & plicas, prout illæ feruntur, vel in longum, latum, aut transversum finditur, & pro ratione profunditatis, plus minusve hiat, unde dolor lancinans oritur. Tales fissuræ in manuum volis, plantis pedum, labiisque oris frequenter accidunt; causamque habent exsiccationem nimiam, quæ ab humore acrisalfoque, aut calore vel frigore provenit.

Pernio, *Erfrorne Fersen* / est ad ulcus tendens fissura, cum scilicet fissuræ altius descendentes, ob cutis crassitiem, labiis duris & prætumidis hiant, ulcerumque instar saniem reddunt, atque in ulcera perversa tandem desinunt. Id vitium, a frigore summo, in pedum plantarum crassa cute evenit.

Excoriatio, *Abrasio*, est, quando cuticula vel illius portio aliqua superficialis, a vicina cute separatur & abscedit, unde dolor lancinans, ex contactu præsertim, oritur.

Ustio, *Brandt* / est, quando cuticula, vel cutis, nonnunquam & subjecta caro, a rebus ferventibus læditur, quandoq; etiam aufertur. Interdum enim superficies tantum inflammatur, unde dolor ardens & molestus succedit: interdum cuticula gravius afficitur, ita ut a cute elevata in vesicam abscedat; interdum caro simul absumitur, & tunc ardores, punctionesque graviores oriuntur.

Oedema, est tumor, a materia pituitosa, in partes a facultate expultrice detrusa, exortus.

Scirrhus, est tumor, sine dolore durus, ab humore melancholico, crasso, viscido & lento exortus.

Cancer, est tumor rotundus, lividus, aut subniger, venis circum circa turgidis & repletis pedes canceri referens, a bile atra exortus. In qualibet corporis parte nasci solet, sed maxime in scæminarum mammis: atque ex eo sanies putris, foetida, subflava promanare solet.

Scabies, est tumor, a sanguine corrupto exortus, cum cutis intemperie, & exulceratione affligens.

Scabies maligna capitis, der Erbgrind/ est, quæ capitis cutem, capillis consitam, infestat, & multis foraminibus ad calvariam usque perforat, promanante inde sanie glutinosa, cujus portio siccata crustam parit. Differt a simplici scabie, quod ea summam duntaxat cutem obsidet, ejusque nota est, quod evulсорum capillorum radices, crassæ, albæ, & lento humore obsitæ conspiciuntur. Parit, radices capillorum corrumpendo, eorum defluvium, unde & in sanatis areas nudas relinquit. Oritur a falso & pravo humore, inter crassam capitis cutem, & calvariam congesto, diutiusque retento & putrescente, qui radices capillorum rodit, cutemque perforat.

Pblyctenæ, sunt vesiculæ, in cute, ab humoribus acerrimis excitatæ.

Sudamina, sunt exanthemata, granis, milii similia, quæ cutem ulcerosam exasperant. Oriuntur a nimis sudoribus sub cute coërcitis.

Sirones, vel *Chirones*, sunt pustulæ, in volis manuum, vel plantis pedum, vermiculos intus habentes.

Vari, sunt tumores duri & parvi, in faciei cute, a crasso succo congregati.

Epinyctides, *Nachtblattern* / sunt ulcuscula, sua sponte, noctu præsertim; in eminentibus partibus erumpentia, bullis similia, quibus disruptis cruenta sanies effluit.

Alphus aut *Morphea*, sunt maculæ magnæ, cuti, cujus colorem mutant, sparsim, cum asperitate quadam, insidentes. Oriuntur a sanguine male nutriente.

Leuce, est macula continua, & cutis & carnis colorem & substantiam mutans. Oritur a pituitoso sanguine.

Impetigo seu *Lichen*, *Zittermahl* / vocatur, cum pustulæ in cute duræ, & ad vicina serpentes, siccæque, cum asperitate & pruritu magno conjunctæ, oriuntur. Oritur a tenui, acri, seroso, & cum humore terrestri mixto succo.

Gutta Rosacea, est tuberosus, pustulosus interdum, & guttas rosaceas referens, faciei rubor. Oritur ex sanguine crasso & fervido, ad faciem delato, & ibi hærente.

Strumæ, seu *Scrofulæ*, *Kropf* / sunt scirrhusus glandularum tumor, peculiari membrana conclusus. Oriuntur ab humore pituitoso; melancholico permixto, qui a cruditate ciborum provenit.

Ganglion, est tumor supra os situs, a nervi præternaturam convolutione, qui in unum corpus coahuit, proveniens. Oritur, cum occasione ictus, extensionis, aut laboris, nervus vel tendo extenditur, & quasi rumpitur: inde partis nervosæ humor exsudat, circa fibras & nervosas partes adhærescit, & a facultate illarum formatrice, in hanc substantiam mutatur.

Nodi ossium callosi, *Oberbein*/ sunt in ossibus sedibus tumores durissimi, qui firmiter subjectis ossibus insistent, nec ab illis loco moveri possunt.

Verruca, *Warze*/ est tumor parvus, pisi vel ciceris instar e cute prominens, insensibilis. Oritur a materia crassa & pituitosa, vel ex succo cuti & cuticulæ alendæ destinato.

Callus cutaneus, est obdurata cutis, ex labore in palmis, & inferioribus pedum plantis succrescens, doloris expers.

Clavus, *Hüneraug*/ *Leichdorn*/ est verruca callosa, parte summa clavorum capiti similis, in digitis plantisque pedum, ex calcei pressu, aut intertrigine pronascens.

Vari, *Pfennen*/ sunt pustulæ duræ, nonnunquam & callosæ, interdum humorem aliquem exsudantes, ac occupantes faciem.

Psyracia, sunt pustulæ, quæ capillosam capitis, aut barbatam in mento sedem occupant. Oriuntur ex succo crassiore, ad poros redundante.

Varix, *Krampfader*/ est venæ dilatatio. Fit præcipue in cruribus, interdum & sub umbilico. Oritur a crasso sanguine, illuc vel pondere delapso, vel a causa violenta detruso.

Lepra, est tumor totius corporis canerosus, ex atrabile, venenata qualitate infecta, & in totum habitum corporis effusa, exortus, multa symptomata inferens.

Lentigines, sunt maculæ, lentis magnitudine, modo faciem, modo pectus, modo manus descædantes, plurimum fusco colore præditæ. Oriuntur a sanguine, ab internis causis, aut a Solis ardore adusto, cuticulam, frontis imprimis, quia ea densior, atque sic vapores diutius retinet, occupante.

Nevi Materni, sunt maculæ, ab imaginatione materna foetui impressæ: eas infans in lucem editus mox secum ab utero adfert.

Ephelides, sunt maculæ in gravidis fuscae, frontem imprimis, tempora, vel genas occupantes, sæpe æquantes palmi longitudinem.

Macula Hepaticæ, sunt maculæ fuscae, interdum evanescentes, mox emergentes, cum levi quadam cutis asperitate, & squamarum emissionem.

Pruritus, est dolor, desiderium scalpendi excitans, sine cutis asperitate & exulceratione.

Malus Odor interdum ex toto corpore, interdum ex partibus, ut alis, pedibus, expirat. Oritur ob affluxum humorum excrementitiorum in corporibus humidis, qui, cum libere exhalare non possunt, putredinem & foetorem concipiunt.

Defluvium capillorum est, cum capilli hinc & inde decidunt. Oritur ab alimenti defectu, qui est in tabidis, aut feбри maligna laborantibus; aut ab humoris, radices capillorum exedentis, pravitate.

Calvities est, quando pili in sincipite, ob cerebri siccitatem, vel per ætatem, decidunt.

Tinea est, quando capilli frustillatim, a vermibus quibusdam, in extremitatibus eorundem hærentibus, erosi, decidunt, & inæquales redduntur. Oritur ab excrementitio humore, cum alimento pilorum in capillos penetrante, & in iis a calore in vermiculos abeunte.

Lanuginosi pili sunt, cum post defluxum, ex defectu succi nutrientis, tenues brevesque pili, meram lanuginem referentes, recrescunt.

Porrigo, sive *Furfuratio* est, cum scalpentibus furfuribus similia ex capitis cute decidunt. Oritur

ab

ab humoribus serosis, biliosis, & pituitosis, qui cum alimento pilorum ad caput deferuntur, quorum partibus tenuioribus discussis, crassæ circa pilos hærent, & in materiam furfurum abeunt, ac a cerebro calidiore attrahuntur.

Plica, est capillorum in cirros complicatio, a materia, capillorum nutrimento utili, corpori inutili, exorta: multa symptomata, uti dolores, convulsiones, pediculorum copiam, ungues in pollicibus pedum scabros nigrosque, instar cornu hircini, invadens. Causa sufficienter explicari nequit. Conji-ciunt, esse materiam, alimentum copiosum pilis sup-peditantem, corpori vero noxiam, illis ita familiarem, uti materia serosa in arthritide, unde si capilli radantur, sanguinem fundunt. Vulgus superstitiosum existimat, Plicam a nocturno spectro, capillos fugente & conglutinante, proficisci. Curatio perfecta nulla, quia causæ latent.

Phtiriasis, est pediculorum proventus, qui frequenter in infantibus, mendicis, & immundis hominibus, raro in iis, qui ab immunditie abhorrent, accidit. Nascuntur ex sordibus cuti adhærentibus, quas exhalationes & sudores progenerant. Suntque Pediculi varii generis, alii enim vocantur Vulgares, alii Lendes, alii Inguinales. *Vulgares*, in capitis capillis, palpebrarum ciliis, barba, & sub axillis, aut alibi, proveniunt. *Lendes*, sunt pediculi nascentes; vulgus Ova pediculorum appellat. *Inguinales pediculi* sunt, qui circa inguina pilosæ cuti pertinacissime adhærent, & vehementer lancinant. Nascuntur, cum humor excrementitius, communium pediculorum materies, etiam vitium aliquod in se continet; quale est virus illorum, qui lue venerea labo-

rant. Ex occasione notandum, *Pulices* ex corpore non nasci, ut pediculos, sed aliunde provenientes, saltu vestibus se ingerere, atque inde corpori nudo se affigere: ex hoc vero, aculeo intruso, sanguinem sugunt, donec impleantur.

Dracunculi, *Miteffer* / *dürre Maden* / *zehrende Würme* / sunt vermiculi subcutanei, infantes affligentes, quibus affecti tandem, citra anorexiam sive ciborum fastidium, vermiculis humorem alimentarium depopulantibus, in eam atrophiam & maciem incidunt, ut, cuncta deperdita carne, vix ossibus hæreant, cum tanta artuum titubatione, ut vix pedibus inniti possint, & tunc den *alten Wasser* nominant. Oriuntur vermes hi ex materia viscosa: tolluntur vero, si infantes linimento ex farina triticea & melle confecto illinantur, & capitella, quæ vermiculi per poros mox exserunt, novacula abscindantur.

Gangræna, seu *Ignis S. Antonii* & *Marcelli*, der *salte Brand* / est partium imprimis molliorum, ad mortificationem tendens, corruptio, a caloris nativi in parte corruptione, suffocatione, dissipatione, vel extinctione procedens. Oritur interdum a frigore nimio, calorem partis opprimente, ac morsu venenatorum animalium.

Sphacelus, est perfecta partis mortificatio, ipsa ossa invadens, cujus signa, carnis frigiditas, flacciditas, nigredo, graveolentia, cutisque a subjecta carne digitis separatio.

CAPVT XIII.

De Morbis internis, & speciatim
de Universalibus.

Morbi Interni corpus intime afficiunt, suntque vel *Universales*, quibus totum corpus, vel *Particulares*, quibus aliqua ejus pars affligitur. Sequuntur Morbi Universales.

Febris in genere, est intemperies totius calida, quæ a calore præter naturam in corde accenso, ac mediantibus spiritibus & sanguine, per venas & arterias in totum corpus diffuso, oritur, & actiones naturales symptomatum congerie lædit. *Pars affecta* igitur est Cor, in quo primum calor accenditur, mox totum corpus, saltem ratione nobiliorum partium. *Causa* est, quicquid calorem in corpore accendit. Qualia sunt Motus; Putrefactio; Contactus; & vicina rei calidæ; imprimis vero Constrictio pororum, si acriores fuligines intercipientur, & corpus sit minus sanum. *Symptomata* sunt, Sitis, Singultus, Vomitus, Alvi profluvium, Linguae ariditas, nigredo & asperitas, Lipothymia sive Syncope, Dolor capitis, Vigilæ, & Convulsiones epilepticæ.

Species febris variæ sunt.

Febris Ephemera est, quæ a spirituum vitalium in corde incendio oritur, & spatio unius diei durat. Curatur, Venæsectione aut Purgatione. Signa ejus sunt, Lassitudo spontanea, citra corporis exercitium; Gravitas circa frontem & tempora; Narium pruritus; Pulsus magnus, frequens, celer; Respiratio difficilis; Urina solito crassior & rubicundior.

Febris Synocha simplex, seu *Ephemera plurium dierum*, est febris sine putredine, a spirituum & tenuioris sanguinis effervescencia, in corpore plethorico, ex prohibita transpiratione, sine remissione, tres, quatuor, vel plures dies perdurans.

Febris Putrida est, quæ a vaporibus calidis, acribusque, e putredine humorum excitatis, & cor præter naturam calefacientibus, exoritur. Invasio ejus fit cum horrore & rigore; Pulsus ab initio parvus; Urinam gignit crudam. Sanatur sudore, vel aliqua excretionem.

Causus seu *Febris ardens*, est febris continua, a sanguinis in vasis majoribus putredine exorta, cum ingenti siti, & calore urgente, continue affligens. Accedunt *Signa pathognomica* alia. Nimirum, Corporis jactatio, a magno fervore, tenuiumque vaporum, corpus undique lacescente, acrimonia; Urina pauca, ob sudoris, & caloris urinam absumentis, copiam, eaque interdum cruda & turbida, interdum biliosa & flammea; Dejectio, nisi fæces ab ardore febris indurescant, liquida & crocea; Pulsus celer & inæqualis; Respiratio difficilis; Oris amaritudo, quia bilis tunicam ventriculi internam, ori communem, imbuat; Linguae ariditas, & nigror, quia ardor linguae humiditatem absument, & suas fulgines in lingua relinquit; Desipientia, ob bilis ad caput recursum; somni interdum profunditas.

Febris Periodica in genere spectata, est febris, ab humoribus excrementitiis, in venis inter magnas & capillares mediis, putrescentibus, exorta, certis periodis sine intermissione remittens. Remittit sine intermissione, ob permissionem humoris cum sanguine, qui expelli non potest, nisi coctus. Exacerbatur cer-

tit periodis, tum ob appulsum materiæ inæquali copia ad cor, propter loci distantiam, si exacte eas non observet: tum ob communicationem materiæ novæ, a membris secundæ coctionis, si statas periodos teneat.

Febris Tertianæ continua est, quæ a sanguine bilioso, in venæ cavæ propaginibus putrescente, exorta, continue, sed tertio magis die, affligit. Remissionis causa est, tum distantia loci, ubi vapores generantur; tum minor ipsorum copia.

Febris Quotidiana continua est, quæ ab humore pituitoso, in venæ cavæ propaginibus putrescente, excitata, singulis diebus suas exacerbationes exercet. Fit exacerbatio præcipue circa vesperam, propter pituitæ motum primo mitem, post acriorem.

Febris Quartanæ continua est, quæ a sanguine melancholico, in venæ cavæ propaginibus putrescente, exoritur, ejusque calor semper durat, sed quarto die intenditur.

Febres Symptomaticæ sunt, quæ alios morbos insequuntur, iisque sublatis cessant.

Febris Intermittens in genere est, quæ a vaporibus, ex humoribus in venis mesaraicis genitis, putrescentibus, & in venam cavam subinde emissis, prodeuntibus, exorta, certis periodis invadit, & cum excretionem desinit.

Febris Tertianæ Intermittens est, quæ a bile excrementitia, in venis mesaraicis putrescente, exorta, tertio quoque die, cum rigore, quem calor & alia insequuntur, affligit.

Febris Quotidiana Intermittens est, quæ a pituitæ in venis mesaraicis putredine exorta, singulis diebus invadit.

Febris Quartana Intermittens est, quæ, ab humore melancholico in venis melaëraicis exorta, quarto quoque die ingruit.

Febres Compositæ sunt, quando febris cum febre conjungitur. Conjunctio ista fit varie. Nam, interdum non putrida cum putrida conjungitur: interdum putrida cum putrida: & quidem vel continua cum continua; vel intermittens, cum intermittente; & vice versa. Tales sunt, *Tertiana duplex*, quæ vel singulis diebus semel, vel uno die bis affligit. *Quotidiana duplex*, quæ ægrum 24. horarum spatio bis affligit. *Quartana duplex*, quæ unum quidem diem vacuum relinquit, sed sequentibus duobus molesta est.

Febris Hæctica est, quæ a calore partes corporis ita occupante, ut etiamsi a nulla causa foveatur, nihilominus subsistat, exorta, continue affligit, humidum radicale exsiccat, humores secundarios absument, & omnem in corpore pinguedinem colliquat. Calor ejus nullum dolorem infert, propter alterationem solidarum partium jam factam, & debilis est, propter vaporum paucitatem. Hora tamen una & altera post cibum, propter partium siccarum & solidarum humectationem, augetur, cum pulsu magno & veloci; distributo cibo cessat.

Febres Malignæ in genere sunt, quæ a causis occultis, & ad venenositatem accedente qualitate instructis, exortæ, symptomata solito graviora inferunt, nec tamen multos, nec subito e medio tollunt. Cognoscuntur ex nausea, dolore, æstu, amarore oris, anxietate, & aliis indiçiis. Earum Species sunt, Varioli, Morbilli, Febris Petechialis, Sudor Anglicus, Morbus Hungaricus.

Varioli, sunt pustulæ in summa cute, partibusque cuti proportionē respondentibus, cum febre continua, propter peculiarem sanguinis effervescentiam & ebullitionem, a facultate expultrice excitatæ. *Signa* sunt, capitis cum gravedine, oculorum, colli & dorsi dolor, narium pruritus, respirationis imminutio, tussis siccitas, pedum tremor, sternutatio frequens, cordis palpitatio; *Vrina*, interdum sanorum similis, materia vitiosa ad ambitum corporis protrusa, interdum ob magnam humorum ebullitionem turbida; lacrymarum ex oculis spontanea eruptio; febris ex humorum ebullitione accensio; *Macularum* proventus. *Causa Variolorum*, est materni sanguinis impuritas, quem infans in utero posterioribus mensibus, quia purior non sufficit, attrahit. Hic, in totam substantiam carneam attractus, per aliquot annos insensibiliter occultatur: tandem, cum natura hanc impuritatem amplius ferre non potest, instar musti ebullientis fermentari incipit, atque sic, per ebullitionem, purum ab impuro separatur, impuritas per crisin quandam pellitur, & calor cordi communicatur, ac febris accenditur.

Morbilli, sunt tubercula parva, rubra, in cute erumpentia, cum febre continua, a facultate expultrice, & sanguinis peculiari ebullitione excitata. *Signa* & causæ non differunt multum a Variolis.

Febris Petechialis, est febris maligna, in qua maculæ quædam, pulicum morsibus similes, variorum colorum, rubræ tamen imprimis, in cute apparent. Conspiciuntur potissimum in dorso, brachiis, cruribus, pectore, locis nimirum, per quas insigniores arteriæ & venæ transeunt; in facie raro, propter aëris appulsum, qui materiam facile repellit. Nullum pun-

Æturæ vestigium in earum medio conspicitur, & sic apulicum moribus distinguuntur. *Causa*, est humoris putridi pars tenuior, unde facile evanescunt.

Morbis Hungaricus, est febris continua, maligna, & contagiosa, cum magno humorum circa ventriculum & primas vias apparatu, & insigni capitis dolore conjuncta.

Sudor Anglicus, seu *Febris Sudativa*, in Anglia tempore Henrici VII. cœpit, & ægros cum summo capitis dolore, inquietudine, cordis pulsatione, perpetuis & copiosis sudoribus afficiebat. *Causa* conjiciebatur in aëris constitutionem humidam & venenatam, ac spiritibus & subtiliorum humorum parti inimicam; accedente peculiari aliquo siderum, ad hanc corruptionem, influxu. Curabatur meris sudoriferis.

Febris Pestilens, est febris putrida continua, quæ ex aëre potius & contagio oritur, maximam illorum, quos invasit, partem trucidat, putredinem & calorem ex seminarii contagiosi vi sortitur, & majoribus, quam in febre maligna, symptomatibus, bubonibus insuper, & carbunculis affligit.

Cachexia, est universi corporis, in aquosam & tumidam mollitiem, nutritionis culpa, diffusio. Oritur ex sanguine pituitoso, crudo, & seroso, qui talis generatur, vel propter alimenta impura, vel propter viscera corrupta & male affecta. Consequitur eam tumor, cum gravitate & inertia in pedibus & manibus, interdum & facie, ob humoris serosi copiam.

Hydrops, est tumor corporis vel partis ejus præter naturam, ob humoris aquosi & serosi, vel flatus col-

collectionem exortus. Causa, est nutritionis vitium, ab epatis intemperie frigida profectum.

Anasarca seu *Leucophlegmatia*, est molis corporeæ, præter naturam, per totum corpus æquale incrementum, vitio alimenti exortum.

Icterus vel *Morbus Regius*, dicitur *Geelsucht* vel est *Flavus*, vel *Niger*. *Flavus*, est biliosi humoris flavi, in habitum corporis, effusio. Observatur imprimis in albo oculi, & interno ejus angulo, ob venas ibi majores; oriturque ex iis, quæ bilem copiosam generant, ejusque secretionem, & sanguinis depurationem impediunt: iis item, quæ bilem repente ab interioribus ad circumferentiam corporis expellunt. *Icterus Niger*, est cutis totius corporis in nigrorem mutatio, oriturque ab iisdem causis, a quibus *Icterus flavus*, nisi quod ibi epar, hic lien peccat.

Atrophia, est totius corporis exsiccatio, & extabescencia, ob frustratam ejus nutritionem exorta.

Scorbutus, est cachexia, ab humore melancholico, peculiari modo corrupto orta: cum crurum debilitate, maculis, gingivarum tumore, & sanguinolentia, dentium laxitate, & aliis symptomatibus affligens. Nam & accidunt interdum *Scorbuticis*, difficilis respiratio, ventris, crurum, pedum, circa talos & plantas, capitis ac hypochondriorum dolores; cordis palpitatio, vomitus, sputatio nimia, convulsio, sopor profundus, alvi fluxus, & ulcera.

Arthritis, est partium circa articulos dolor, a defluxu humoris serosi & acris, e venis & arteriis in eas effusi, excitatus, per periodos invadens, & motum impeditum conjunctum habens. *Signa* sunt, quod primo impetu dolor pollicem pedis, & ple-

runque sinistri invadit; post tumor, calor & rubor manifeste percipitur; accedunt motus difficultas, & in diuturna arthritide tophi &c. *Causa*, est solutio unitatis, ab humore seroso, salso, & acri induta, qui ex alimentorum, ut plantarum, vinorum insalubrium assumptione, accedente vitiosa viscerum, ut Epatis & Lienis, constitutione, salis seu tartari illius effeſtrice, exoritur.

Lues Venerea, est virulenta & contagiosa totius corporis cachexia, plerunque cum dyscrasia calida, defluvio capillorum, maculis, tuberculis, ulceribus contumacibus, & dolore immani, nocturno præsertim, sæviens, epati & facultati nutrienti adversa, ab excremento, maligna & venenata qualitate infecto, per contagium, imprimis vero concubitum, illato, exorta, plurimis symptomatibus sæviens. *Signa* sunt, lassitudo omnium membrorum, dolor per universas partes vagus, color faciei immutatus, calor insignis in vestigiis pedum, caries circa pudenda, bubones, uvulæ in faucibus mollificatio & dependentia, quam rauco vocis excipit; tumores glandularum in faucibus, corruptio ossium, ac palati & dentium, ulcera maligna, aurium tinnitus. *Causa*, est excrementum, venenosa malignitate inquinatum, totum corpus, vel aliquas ejus partes occupans, sanguinemque in venis contentum corrumpens, & ad bonam nutritionem ineptum reddens.

Pestilentia, est morbus cordis venenosus, a materia venenata & contagiosa genitus, omnes cordis actiones subito & lethaliter, cum omnis generis symptomatum congerie, lædens. Est morbus epidemicus, propter causam communem, & propter contagium. *Signa* ejus sunt, grassatio in vicinis locis, & prægressus eorum

eorum, quæ aërem inficere possunt, uti sunt: tetri e terra vapores, frugum infectio; item effecta aëris ad corruptionem tendentis, uti sunt: fungorum nimia copia, plantarum marcor, insectorum multitudo, animalium exanimatio, variolorum & morbillorum frequentia. *Causa*, est materia venenata & contagiosa, plurimum ab aëre proveniens. Sunt sæpe imaginatio & terror pestis in aliquo homine causa, dum humores in corpore agitant, seminarium pestilentiale excitant, illudque alte cordi inducunt.

CAPUT XIV.

Ex Morbis Particularibus succedunt speciatim Morbi Supremi Ventris sive Capitis.

Morbi Capitis, sunt vel Cerebri, vel Oculorum, vel Aurium, vel Narium, vel Linguae, vel Labiorum, vel Faciei, vel Oris, vel Dentium, vel Gingivarum, vel Maxillarum, vel Gurgulionis, vel Tonsillarum.

De Morbis Cerebri.

Intemperies Cerebri, est ejusdem a sua temperie, per causas externas, uti aërem, cibum, potum, vigiliam, affectus nimios, incediam, & nimia studia, declinatio.

Meatum Cerebri angustia est, quando cerebri ventriculi, venæ, arteriæ, nervi, & cranii futuræ, a causis suis vel obstruuntur, vel comprimuntur.

Commotio Cerebri, est ejusdem de loco naturali, propter externas & violentas causas, quales sunt bombardarum vel fulgurum fragor &c. dimotio, dum
vel

vel spiritus conturbantur, vel cranii fractura consequitur.

Inflammatio Cerebri, est ejusdem tumor, a sanguine & vasis elapso, & ibidem intercepta transpiratione, putrescente exortus. *Signa* sunt, febris acuta & continua, delirium perpetuum.

Hydrocephalus, est tumor capitis, a serosi aut faeculenti humoris, in aliqua membrorum caput constituentium parte, exortus.

Contusio Capitis, est ejusdem, extrinseco plerumque integro apparente, a re gravi, dura & obtusa collisio.

De Vulneribus Capitis.

Vulnera Capitis in triplici sunt differentia. Vel enim solam cutem & perioranium, Cranio intacto, vel Cranium, intactis membranis, vel etiam membranas attingunt.

Fractura Cranii, est cranii solutio a vi exteriori facta, & fit vel cum meningium latione, vel sine ea.

De Symptomatibus Cerebri.

Cephalalgia, est tactus in partibus capitis membranosis, a solutione continui, facta molestia & corruptio. *Causa* est, quicquid quoquo modo violentam unitatis solutionem infert, sive id faciat occulte, sive manifeste; sive sit externum quid, uti lactis potus, odor rei gravis &c. sive internum.

Vigilia præter naturam, sunt communis sensus, & sensuum externorum præter modum exercitium, propter continuum spirituum in organa, seu propter causas externas, lucem nempe, curas, cogitationes, seu internas, puta intemperiem cerebri calidam, dolorem &c. influxum, exorta.

Somnus cum Obambulatione est, cum dormientes e lecto surgunt, vigilantium opera exercent, tecta conscendunt, per trabes & lacunaria in ædibus oberant, & multa alia negotia expediunt. Hunc affectum volunt provenire ex subtilitate & tenuitate spirituum, & forti vi imaginativa. Itaque potissimum melancholicis accidit, in quibus spirituum subtilitas ac tenuitas deprehenditur.

Somnus cum Stertore est, cum dormientes, naribus sonum admodum dissonum, & aliis molestum edunt. Id vitium maxime in illis deprehenditur, qui resinas habent nares, aut angustas, vel mucos obturatas: & accidit in somno, quia tum dormientes ore clauso tantum per nares aërem attrahunt.

Coma somnolentum, seu *Cataphora*, est sopor gravis, quo sensus communis torpens, nec spiritus animales ad sensus diffundi sinit, nec ab iis accepta objecta agnoscit & dijudicat. *Signa* sunt, si æger, demissa fere inferiore maxilla, & hiant ore dormiat, excitatus oculos aperiat, respondeat; sed mox iterum in somnum prolabatur. *Causa*, est quicquid spirituum animalium ad sensus organa influxum prohibet, eosque ad actiones animales ineptiores reddit.

Coma Vigil, est ad somnum propensio, & ad eundem proclivitas, a cerebri humiditate, aut vaporibus copiosis ad illud delatis, illudque humectantibus, & spiritus aggravantibus, exorta.

Lethargus, est inexplibilis in somnum propensio, cum febre lenta, oblivione & torpore, ex pituitoso sanguine, in posterioribus cerebri sinibus putrescente, exorta.

Carus, est somnus profundus, cum sensus & motus, imaginationisque læsione, oculis perpetuo clausis,

sis. Nec tamen hoc morbo affectis ita periit sensus, ut non, si pungantur, sentiant; haud tamen propterea vel loquuntur, vel oculos aperiunt. Est Carus Lethargo major, Apoplexia paulo minor, huic tamen valde affinis.

Vertigo, est falsa conversionis & circumgyrationis imaginatio, ab inordinato & circulari spiritus animalis in cerebri parte anteriore motu, exorta. Causa est, quicquid vapores ex se suppeditat, uti Allium, Sinapi, Vinum &c. vel humores fundere & agitare solet, quo & purgatio spectat.

Memoriae lesio, est ejusdem, a causis, siccitatem cerebri, cum moderato calore conjunctam, quibus memoria opus habet, lædentibus, & sic spiritus animales vel nimis torpidos, vel nimis mobiles reddentibus, imminutio, vel abolitio.

Delirium, est phantasiæ & ratiocinationis depravatio, a phantasmatis absurdi & inconvenientis oblatione, exorta. *Signa* sunt, in taciturno garrulitas, in mite ferocia, oculorum mobilitas, sermones & actiones inconsuetæ & inconcinnæ.

Phrenitis, est delirium perpetuum & continuum, ab inflammatione membranarum cerebri exortum, cum febre continua affligens.

Melancholia, est delirium, a phantasmate melancholico exortum, qua detentus, uni cogitationi, absque furore & febre, cum tristitia & metu inhæret.

Mania, est mentis diuturna, cum audacia & ferocia, sine febre, ab igneo spirituum fervore exorta, emotio.

Rabies, est delirium, a veneno quodam peculiari, in animali genito, & homini communicato, productum,

Etum, cum vehementi liquidorm omnium, & aquæ potissimum, abominatione.

Lassitudo, est affectio corporis, qua pleræque functiones animales, ob debilitatem quandam succi nervosi, præpedite ac minus alacriter exercentur. Hinc potentia locomotiva vacillat, & ita affecti otium & secessum amant, corporis exercitia & labores deviant, pensa quævis ægre suscipiunt, eaque statim de lassati remittunt. *Distinguitur*, in eam, quæ sanis etiam competit, post corporis exercitia & labores, propter dissipatos spiritus vitales & animales, novo pabulo refarciendos; & eam, quæ præternaturalis est, ac morbos comitatur.

Inquietudo, est corporis & membrorum varia jactatio, a materia, partes sentientes molestante, exorta.

Rigor, est musculorum totius corporis vibratio, cum refrigeratione & dolore quodam conjuncta, a re molesta, sive in ipsis musculis contineatur, sive aliunde transmittatur, partes sentientes in ambitu corporis subito vellicante, & expultricem irritante, exorta. Accidit in primis in febribus.

Horror est, cum levior sit agitatio, & major frigoris sensus corpus pervadit, stantque erectæ comæ, & pori constricti, cutis vero aspera redditur. *Causæ* sunt vel externæ, ut frigus, metus; vel *Internæ*, uti humores acres, biliosi & putridi, partes sensiles & carnem musculorum permeantes, easque veluti pungentes & irritantes; quos quia expultrix facultas expellere nititur, fit concussio illa, & agitatio corporis.

Tremor, est motus voluntarii depravatio, propter quem membrum elevatum in suo situ servari non potest, a debilitate facultatis motricis, quæ vel spirituum animalium, vel nervorum vitio accidit, exor-

1a. Afficit hoc malum caput, manus, pedes, interdum & maxillam inferiorem.

Paralysis, Lähmung est motus in partibus abolitio, sine rationis læsione, ob defectum spirituum animalium, vitio nervorum exorta.

Spasmus seu Convulsio, est nervorum & musculorum dolorifica versus suum initium, præter voluntatem, contractio: unde membrum, in quod muscoli tendo inseritur, violenter tenditur, & vehementissimo torquetur dolore. *Causa*, est materia vel morbus, nervosas partes vellicans aut tendens.

Incubus, est motus, potissimum vero respirationis & vocis, interceptio, cum falso rei gravis, thoraci incumbentis, & suffocantis, in somnio, ob impeditam liberam spirituum, viis obstructis, ad nervos penetrationem.

Epilepsia, est actionum animalium & principum cessatio, cum motu totius corporis convulsivo, a materia acri, peculiari vi cerebro infesta, principium nervorum vellicante, constringente, & ad expulsionem irritante. Dicitur alias morbus Herculeus, Comitialis, Lunaticus, Puerilis, & Caducus. *Signa imminentis epilepsiae* sunt, nervorum trepidatio, vertigo, venarum sub lingua flavedo. *Præsentis*, sunt subitus lapsus, faciei contorsio, mugitus, stridor dentium, digitorum constrictio, urinæ vel fæcum involuntaria emissio, spuma ovi albumini similis &c.

Apoplexia, est repentina omnium functionum animalium abolitio, sola restante, quatenus, licet, afflicta respiratione, ob angustiam & occlusionem meatuum, potissimum circa basin cerebri, per quos spiritus animales ad membra derivantur, exorta. *Signa apoplexiæ imminentis* sunt, vertigo, scotomia live

suffu-

suffusio oculorum, incubus, tremor totius corporis, stridor dentium, in somno muci abundantia, capitis gravedo.

Catalepsis, Catoche seu Congelatio, die Erstarrung, est admirandus effectus cerebri, in quo sensus interni & externi omnes statim abolentur, & corpus eam formam, sive in incedendo, sive in sedendo, retinet, quam habebat; antequam hoc malo corriperetur, & statum repræsentat.

Catarrhus, est humoris pituitosi & excrementitii, ob læsam cerebri concoctionem geniti, e capite in subjectas partes defluxus, ab intemperie, vel nimia repletione, expultricem irritante, procedens. Signa imminētis sunt, capitis gravedo, oculorum hebetudo, sensuum torpor, sternutatio.

De Morbis Oculorum.

Sugillatio sive Hyposphagma, Blau Aug, est obstructio foraminis uveæ seu pupillæ, a sanguine, ab ictu, non tantum in corneam infuso, sed etiam ad spatium inter corneam & uvam inane usque penetrante, illudque omnino, vel ex parte, adimplente, & pupillam obturante: isque sanguis ruber ab initio, deinde lividus, mox nigricans latere ibi conspicitur, visumque vel depravat, vel obfuscet.

Pyosis, est pupillæ obstructio, a pure, circa uveæ foramen collecto, visum impediens.

Hordeolum, est tuberculum in ciliis, quod suppurascens simile est grano hordei, oriturque ab humore pituitoso, crasso, cum sanguine mixto.

Trichiasis est, cum pili inutiles, & oculos pungentes, in palpebris proveniunt.

Fistula lacrymalis, ex humorem continuo affluxu, & oculi perpetuo motu oritur.

Ophthalmia, est tunicae adnatæ inflammatio, a sanguine acri, venulas ipsius distendente, proveniens.

Unguis seu Sagitta, est membranula nervosa, fibrosa, & albicans, quæ ab angulis oculorum prodit, & adnatæ adhærescit, ac sæpe, si nimium increseat, pupillam tegit. Causa, est sanguis humoribus crassus & lentis permixtus, ex partibus inter cranium & cutem contentis, defluens, & scabritiem quandam inferens, quam, dum vis nutrienda æqualem reddere nititur, incrementum membranæ præter naturam producit.

Pannus, est quiddam instar panniculi rubeum, a sanguinis exuberantia, in venis oculi exterioribus exortum.

Suffusio, est pupillæ, ab humore, ea parte in oculo consistente, visionem impediens obstructio. Oritur a muco tenaci pupillæ margini adhærente, illique prætenso, sensimque concrecente. Estque vel *Incipiens*, *Schemmeringe für den Augen* / cum mucus est adhuc pellucidus, & lucem transmittit, visioni tamen, ac si nube obtexta & atomis obscuraretur, hallucinationem parit: vel *Accrescens*, *Wasserstern* / quando mucus ille, magis magisque incrassatus, perspicuitatem amittit: vel *Confirmata*, *Staar* / *Gel in den Augen* / quando mucus, penitus incrassatus dealbatusque, perspicuitate omni destituitur, visionemque penitus aufert.

Glaucoma, est humoris crystallini vitium, quando is in glaucum colorem mutatur.

Atrophia est, quando oculi partes contabescunt. Oritur præcipue ab evacuatione & exsiccatione nimia.

Pro-

Procientia est, quando oculus vel ex sua orbita præter modum eminent; vel etiam ita, ut a palpebris tegi nequeat, excidit. Oritur tum a causis externis, uti ictu, tubarum inflatione &c. tum internis, uti musculorum aut nervorum resolutione.

Strabismus est, quando pupilla a medio declinat, ita, ut in una oculi parte plus appareat, quam in alia. Sive, est oculi contorsio in obliquum, ut nequeat amborum unus aspectus esse. Oritur, vel a mala in primo ortu conformatione, & tum curari nequit: vel a consuetudine, quod in infantibus frequenter accidit.

Hebetudo Visus in Senibus ex eo provenit, quod humor crystallinus a sede naturali, antrosum, versus pupillam, magis inclinatur. Accidit iis potissimum, qui multa lectione, aut rerum subtilium aspectu oculos fatigarunt. In his enim crystallinus humor, ætatis decursu, una cum vitreo, ad anteriora sensim fertur, tandemque, illic subsistens, detrimentum visioni affert.

Myopia, est vitium, quo affecti, res nonnihil remotas minus vident, propinquas autem, & paulo minores, nisi eas oculis omnino adhibeant, & naso attingant, recte discernere nequeunt.

Lippitudo est, cum oculi, eorumque palpebræ madent, lacrymæque emanant; ac interdum purulenta exit materia; cilia vero lentore humoris, præsertim in somno, clausis oculis cohærent, nec aperiri possunt, nisi purgentur.

Visus debilitas, & Cæcitas, causarum tantum magnitudine differunt. Oriuntur, aut Cerebri spiritus animales non suppeditantis, aut ipsorum spirituum animalium vitio.

De Morbis Aurium.

Inflammatio Aurium, est tumor cum rubore ad malas & tempora se extendente : ac interdum febris, deliria, & motus convulsivi accedunt. Oritur a sanguine tenui & bilioso, e venulis cerebri in membranas auris clapso.

Ulcus Aurium est, cum sanies & sanguis ex iis egrediuntur. Oritur, a rebus vel pus fundentibus, vel acrimonia sua erodentibus.

Sordes Aurium, sive *Cerumina*, ni tollantur, eas opulent, &, diutius retentæ, crassescunt, & tandem indurescunt. Oriuntur, ex bilioso humore excrementitio, quod croceus color & amaritudo summa ostendunt : bilis ergo, sero permixta, in aurium cavitatem transfudat, & in ea coacervatur.

Vermes Aurium a diuturna sordium ac saniei suppressione, ac etiam impuro, sordido, putridoque ulcere proveniunt.

Dolor Aurium oritur a causis, membranas, auris cavitatem vestientes, & sensu exquisito præditas, distendentibus.

Surditas, est auditus abolitio, qua homo sonos ex justa distantia difficulter percipit. Oritur ex illorum, quæ ad auditum perficiendum concurrunt, vitio. Qualia sunt, Cerebrum, spiritus animales vel non gignens, vel non transmittens : Nervi auditorii, qui eos non defert, vitium : Spirituum animalium defectus : Meatus auditorii mala conformatio, aut obturatio : Aëris congeniti, ob vulnus vel ulcus, egressus.

Gravis Auditio est, quando ægre sonus percipitur. Oritur, æque ac surditas, vel a cerebri vel auris prava dispositione.

Tin-

Tinnitus, est sonitus in auribus præternaturalis, in instrumento auditus, seu cavitate ossis petrosi, factus & perceptus, a vaporibus interclusis & motis exortus.

Obauditio est, quando auditus confusa percipit. Quod fit vel ab ulcere non probe terfo & consolidato; vel a vaporibus in caput elatis, & in aures effusis.

De Morbis Narium.

Ulcus Narium est, quod interdum ab ictu, contusione, casu, vulnere, interdum ab eorum, quæ præterlabuntur, ut pituitæ salsæ acrimonia, accidit.

Ozæna, est vetustum ac putridum ulcus, graveolentem mucum edens, oriturque ab humoribus acris, &, quod in lue venerea accidit, malignis.

Polypus, est carnosâ in naribus excrescentia, ex radicibus quibusdam tenuibus pendens, & nunc a naribus propendens, nunc etiam in palatum descendens. Oritur ab humoribus viscidis, pituita imprimis sanguini permixta, quæ, e cerebro ad nares exulceratas defluens, ulceribus inhæret.

Hæmorrhagia, est immodica, totoque genere, præter naturam, sanguinis per venas nasi divisas rarefactas, vel apertas, excretio. Causa est, quicquid venas nasi aperire, dividere, vel rarefacere potest.

Olfactus lesio, est ejus imminutio aut abolitio. Fit vel a cerebri intemperie, quæ partem illius anteriorem obsidet; vel a processuum & nervorum, qui olfactus organum statuuntur, vitio. Olfactus interdum totaliter aboletur, cum pituita ad foramina ossis ethmoidos, calore induratur: quod iis accidit, qui gravedine laborantes, balneum incaute ingrediuntur.

Gravedo seu *ῥεπουζα*, est cerebri excrementorum, instar aquæ crudorum ac tenuium primo, deinde crassiusculorum, ad nares defluxio, quam frequens sternutatio comitatur. Oritur ab intemperie calida vel frigida cerebri, eaque caput ingravescit, respiratio difficilior evadit, & vox raucescit. Est interdum gravior, quæ vel sanguine, vel aliorum humorum permissione, candida & acris evadit, ac nares non tantum tumefacit, sed & ardore summo exulcerat.

Sternutatio, est flammosorum spirituum, acriumque vaporum, cerebrum offendentium, violenta & involuntaria per nares expulsio, interdum pluribus, interdum paucioribus vicibus contingens. Excitatur ab eis, quæ sensilem narium tunicam vellicant: qualia sunt, quævis acria naribus adhibita, vel eo vires suas emittentia, ut allium, sinapi, raphanus, piper, helleborus &c. item acris & tenuis humor, a capite ad nares defluens, illasque vellicans. Fit etiam interdum per consensum ventriculi, cum, eo offenso, validiore motu & efflatione ejus molestiam natura nititur excutere. Sanis sæpe levi de causa evenit; si vero sit nimis frequens, catarrhos, & graviores etiam morbos, ut epilepsiam, nonnunquam præfagit.

De Morbis Linguae.

Tumor Linguae, oritur vel ab affluxu materiæ calidioris, sanguinis nempe, vel bilis; vel frigidioris, uti pituitæ; vel etiam venenatæ, uti in lue venerea.

Ranula seu *Batrachus*, est tumor, qui in oris parte molli & laxa, quæ sub lingua est, & cui ea incubat, & quasi vinculo alligatur, ex sanguine viscido & pituitoso colligitur, e quo aperto mucus profilit, ovi albumini perlimilis.

Nigrities Linguae, cum scabritie & scissura aliquando conjuncta, oritur ab igneis vaporibus & exhalationibus, in fauces, os, & palatum sublatis; quod accidit maxime in febribus ardentibus. Provenit interdum a veneno aliquo epoto, vel ex supina, ore aperto, dormitione. Vapor crassescens, aut pituita e ventriculo in os redundans, vi caloris obdurescens, linguam ac dentes totamque gulam sæpe lentore obducunt.

Paralysis, contingit linguæ, vel toti, & tum ejus nervi prorsus impediuntur, & gravis apoplexiæ metus impendet: vel ejus parti, vitio nervorum, seu spirituum.

Balbuties, seu *Difficultas loquendi* est, cum certæ literæ aut syllabæ, eæ præsertim, quæ, ut efferantur, linguæ variam inflexionem requirunt, quales præsertim sunt R. & S. literæ, quæ stridorem & sibilum requirunt, non ita commode efferuntur: quo vitio laborantes *Blesi* dicuntur. Oritur balbuties, ex ebrietate, linguæ mala conformatione, brevitate ejus, nimia crassitie, immodica siccitate, aut humore nimio.

Mutitas, αἰσῶνία est, cum loquela aboletur: quod fit ob nervorum musculorumque, aut linguæ & columellæ vitium. Scilicet, nervi & muscoli linguam moventes, si paralyti afficiantur, loquela interit; si vero tantum vapore aliquo crasso afficiantur, per biduum tantum aut triduum durat obmutescencia. Quibus ab ortu malum inest, muti nascuntur; ac prave affecto eo nervo, qui a nervo auditorio ad linguam ducitur, etiam surditas se exserit.

Gustus diminutio, fit vel nervis mollioribus, qui a cerebro exeunt, perfrigeratis, aut quadantenus obstructis; aut certe ea cerebri parte affecta, unde illi

originem habent; vel lingua palatoque nimium exasperatis, aut limo sive lentore obductis.

Gustus depravatus, est absurdi alienique saporis perceptio. Accidit, cum vel linguæ corpus, vel, quæ ipsum vestit, membrana, vitioso atque tetro humore imbitur, qui vel ex exhalatione, vel liquore eorum, quæ bibuntur edunturque, dilutus, in linguæ corpus mollesq; nervos penetrat, suisque vitiis eos perfundit.

Fissura Labiorum, est continuitatis labiorum, a nimia siccitate & tensione, solutio.

De Morbis Labiorum.

Ulcera Labiorum, ab humoribus acribus, biliosis & serosis, sive ex adustione & putredine oriuntur.

Tremor Labiorum, provenit vel ab Externa causa, nimirum frigore, cum dentium stridore, item ira vel metu, dissipatis aut ad interiora remissis spiritibus; vel ab Interna, uti in cerebri magno affectu, vel ventriculi per consensum membranarum agitatione, aut in nausea, ex humore acri vellicante.

De Morbis Oris.

Oris Apertio est, quando os, quod per naturam claudi debebat, non clauditur. Ea accidit, quando tumores, circa juncturam maxillarum, in inflammationibus maxillæ & tonsillarum exoriuntur, aut quando oris cardo, in quo gena vertitur, obrigescit.

Oris Hiatus est, quando os, quod per naturam, uno labio alteri superinsedente, claudi debebat, hiat. Oritur a mala consuetudine, maxillæ inferioris laxatione, aut narium obstructione.

Oscitatio, est vehemens oris, ab halituosis, & in spatiis muscutorum maxillæ inferioris, & buccarum collectis, & excretricem ad excernendum stimulantibus

tibus vaporibus, distentio. In Oscitatione igitur, ore aperto admodumque diducto, aer primum affatim hauritur, & mox iterum copiose cum sono efflatur. Oritur, cum maxillæ inferioris & buccarum muscoli, halituosis vaporibus sunt gravati: atque ex lassitudine, vel spontanea, vel ex labore profecta, se relaxare cupiunt. Ex imaginatione quoque, si quis alium oscitantem videat, vel de ea cogitet, oscitatio succedit: magis tamen in pigris & somnolentis, seu dispositis, quam aliis.

Pandiculatio, das Recken und Strecken/est, quando concussio quædam fit totius corporis, aut illius partium, cum frigoris quodam sensu, & præter voluntatem.

Oris tortura, est ejusdem ex affectis faciei musculis aut nervis procedens distentio, ita ut oculus alter rite claudi non possit, aut æger, exspuere jussus, altera tantum parte id faciat.

Sardonius Risus est, citra animi affectum & voluntatem perseverans & periculosus risus. A convulsione habet originem.

Ptyalismus, est crebra & involuntaria, sine tussi & screatu, exspuitio, a nimia salivæ copia proveniens.

Aphthæ, Blätterlein im Munde/ sunt quædam in summa oris superficie exulcerationes igneæ, quidpiam caliditatis habentes. Oriuntur ab humoribus pravis, vel ibidem genitis, vel aliunde missis.

Fætor oris, est anhelitus gravitas, a vapore foetido ex ore egresso producta. Causa proxima est vapor, qui progreditur vel ex cibis foetidis, allio, cæpa, &c. ac tum brevi sponte evanescit; vel ex cibis in ventriculo, aut interstitiis dentium corruptis; item ex intestinorum excrementis, cum orificium ventriculi in-

ferius, quo in intestina se aperit, non arcte clauditur;
quod ebriosus accidit,

De Morbis Dentium.

Dentitio, das *Zahnen* / est dolor in infantibus, cum dentes illis provenire incipiunt, (quod fit circa initium septimi mensis,) proveniens. Signa sunt, quod infantes digitos frequenter ori inserunt, nutrum cum papillas fortius stringunt, quodque loci, ubi dentes erumpere conantur, albicant. Dolorem ingentem, qui imprimis exoritur, cum dentes canini eduntur, comitantur fluxus alvi, & convulsiones, non tamen adeo periculosa, ac si ob alias causas accidant.

Dentium corrosio, est magnitudinis eorundem, a causis erodentibus, ut frangantur, & frustillatim excidant, diminutio, fistulas interdum inducens. Causa sunt, fuci mulierum; dulcia, praesertim saccharum; nimium calida aut frigida assumpta; item humores acres, qui ex capite plerumque decurrunt.

Dentium mobilitas, est eorundem a succo pravo, gingivas vel dentium radices erodente, aut nimia humiditate, vel defectu alimenti, profecta vacillatio, quam procidentia illorum interdum insequitur.

Odontalgia, *Zahnwehe* / est tristis dentium sensus, ab destillatione e capitis vertice, per tempora in maxillam aut superiorem, aut inferiorem, ejusque aut membranam, aut dentium nervum, illapsam: & si quis dens excus est, in quem jam via pateat, in eam maxime fluxio insilit. Oboritur quoque dentium dolor, interdum ab inflammatione, interdum a frigidis externis admotis.

Stupor Dentium est, quando, cum inter mordendum dentes premuntur, titillatio quaedam molesta sub-

suboritur, & quidem vel a frigidiorum humorum influxu, vel acerborum crudorumque fructuum esu, vel assumptorum vomitione. Oritur interdum ad limarum strepitum, aut si aliàs acutus valde sit sonus & stridulus.

Nigredo Dentium contrahitur, ex detergendi incuria, dulcium & calidorum usu, expiratione cruditatis & crapulæ, vitioque humorum.

De Morbis Gingivarum, Maxillarum, Gurgulionis, & Tonsillarum.

Autio Gingivarum est, cum eæ præter modum luxuriant & excreſcunt, adeo ut dentes, præſertim molares, prope integant; oritur ob spongiosam gingivarum raritatem, & uberioſam sanguinis affluxum.

Consumtio Gingivarum est, cum eæ flaccescunt & exeduntur, ita ut dentium radices detegantur, ab humoris acrioris & falsi ad hæſione.

Ulcus Gingivarum ex abscessu provenit, nonnunquam a scorbuto originem habet, a quo non tantum tument gingivæ, & cruorem exsudant, sed & ulcerantur, putrescunt, & corrumpuntur.

Parulis, est inflammatio gingivarum, ad dentium radicem intus & foras adeo prominens, ut etiam vicinæ partes distendantur, rubeant, & caleant.

Maxilla inferiori accidit *Immobilitas*, vel propter luxationem aut fracturam, vel propter destillationem e vertice capitis derivatam, quæ in ejus articulum ad radicem auriculæ influit, inſequenti dolore & tumore duro ac conspicuo.

Ma-

Maxilla luxatio, est ejusdem vel altera tantum parte, vel utraque, periculosa depulsio.

Gurgulionis affectus præcipui sunt *Laxatio*, & *Inflammatio*. *Laxatio* est, quando is, præternaturam, citra inflammationem, intumescens, ab humore plerunque pituitoso, a cerebro transmissio, in longum extenditur. Dicitur alias *Columella lapsus*, cum nimirum columella, e palati extremo in fauces & œsophagi caput propendens, titillatione molesta est: qua, qui afficitur, columellam perpetuo vorare frustra nititur. *Inflammatio*, est Gurgulionis, a sanguine bilioso, in eum delapso, cum rubore, ardore, dolore, suffocationis periculo, interdum febre, intumescencia.

Tonsillas quoque affligit *Inflammatio*, quæ est earum ex affluxu humorum genita intumescencia.

CAPVT XV.

De Morbis Medii Ventris.

MOrbi Medii Ventris, sunt vel *Faucium*, vel *Gutturis*, vel *Asperæ Arteriæ*, vel *Pulmonum*, vel *Thoracis*, vel *Mamillarum*, vel *Cordis*.

De Morbis Faucium, Gutturis & Asperæ Arteriæ.

Angina, est summarum gulæ gutturisque partium, per quas tam cibi potusque, tum spiritus introitus est, spirationis & deglutitionis difficultatem inferens, præclusio. Oritur ab inflammatione, quæ cum febre continua connexa esse solet, itemque a pituitosa in fauces & cervicis musculos defluxione.

Gut-

Guttur lædit Bronchocele, five tumor, amplo spatio extuberans, a flatu exortus, & cum tensione conjunctus.

Asperam Arteriam afficit ejus *Asperitas* & *Angustia*. *Asperitas*, est lævitatæ naturalis defectus. Cognoscitur ex raucedine vocis, & oritur vel ab Externis causis, ut oleo rancido, nucibus, pulvere, fumo; vel ab Internis, uti humoribus a capite delapsis, aut vapore, parietes ipsius feriente. *Angustia Arteriæ* *Asperæ* cognoscitur ex respirationis difficultate, & imminente suffocationis metu. Oritur vero a causis comprimentibus, uti luxatione vertebrarum, inflammationibus; aut a causis obstruentibus, ut rebus externis illapsis.

De Morbis Pulmonis.

Pulmonis Intemperies, est ejusdem a temperie naturali, ad præternaturalem, propter causas tam externas quam internas, deflexio. Ad Externas referuntur potiones frigidæ vel calidæ; ær, qui parum alteratus ad pulmonem defertur, in iis, qui columella destituuntur: ad Internas, humores, qui eo sive ex capite, sive ex aliis partibus, maxime ex hepate, deducuntur.

Peripneumonia, die Lungenfucht, est pulmonis a sanguine, in substantiam ejus effuso, cum pectoris angustia, spirandi difficultate, febre acuta & tussi, inflammatio. Causa, est sanguis, qui ex dextro cordis sinu in venam arteriosam effunditur, & non modo venas & arterias pulmonis, sed etiam totum corpus implet. Concitatur a causis externis, ut aëre frigido, potu vini generosioris, & similibus.

Pulmonis angustia, est vasorum ejus, propter obstructionem, compressionem, vel exsiccationem, inter-

terceptio, tussim, oppressionem, & respirandi difficultatem inducens.

Pulmonis Vulnere cognoscuntur, ex respirationis, oblacionem organorum, difficultate; spumantis ex ore sanguinis cum tussi rejectione, faciei modo rubente, modo pallido colore. Fiunt autem bifariam. Nam interdum accidit, ut caro pulmonum lædatur, & tum, quia sanguis in cavum thoracis destillat; nec cruenta exspuitio, nec tussis ulla urget, sed respiratio est difficilis. Interdum venæ pulmonis afficiuntur, & tum sanguis rubicundus, niger, spumosus affluit, ac tussis est perpetua, nisi virium imbecillitas, aut pulmonum oppressio a sanguine adsit.

Phthisis seu Tabes, est pulmonum a materia acri, erodente, cum febre lenta, tussi, sputoque cruento & purulento, exulceratio, qua sensim totum corpus consumitur & extenuatur. Causa, est vel vitiosa pulmonis constitutio, ab ipso ortu a parentibus contracta; vel acris & exedens e capite destillatio; aut humor acer, e corde in pulmones ejectus.

De Morbis Thoracis.

Mediastini seu Septi, quod pulmonis lobos disjungit, *inflammatio* oritur a sanguine bilioso: eam consequitur febris continua, respiratio frequens & celer, dolor ad sternum, cui Mediastinum alligatur, & thoracis incendium.

Diaphragmatis Tumores alii sunt *Frigidi*, & oriuntur a materia cruda & tenui, in Diaphragmatis densitatem, ex ejusdem vel compressione, vel percussione, penetrante: Cognoscunturque, ex spirandi difficultate, & hypochondriorum tensione. Alii sunt *Calidi*, & oriuntur a sanguine calido & bilioso, inferuntque

febrim continuam, respirationem parvam & frequentem, ac præcordiorum tensionem, cum diaphragmatis palpitatione.

Pleuritis, est pleuræ & adjacentium muscutorum, ab influxu humoris fervidi exorta, cum dolore lateris punctorio, tussi, respiratione difficili, febri continua acuta, pulsu duro, inæquali & frequente, inflammatio. Nimirum, materia fervida, seu sanguis purus vel impurus, potissimum ex vena cava cordi lassidente, in tenues ejusdem propagines influit, iisque ruptis vel dilatatis, cum impetu in pleuram incurrit. Interdum *Pleuritis* oritur a flatibus, qui inter membranas aut internas aut interiores se ingerunt, easque distendunt divelluntque a vicinarum partium adhæsu.

Empyema est cavitatis thoracis a materia purulenta copiosa constipatio, difficultatem respirationis, cum tussi sputoque purulento, inducens.

Tabes Dorsi est, quando illud contabescit. Quod fit, vel a nimia Venere; vel cum calor, spinali medullæ insitus, a copiosiore sanguine obruitur; vel cum meatus, per quos nutrimentum ad eam defertur, obstruuntur; vel cum prava destillatio in eam incumbit.

Gibbus est, cum, parte aliqua dorsi contracta, illius motus alicubi sistitur, & quidem vel retrosum, dorso protuberante, vel in latera, vel antrorsum inflexo; unde eo malo affecti corpus erigere nequeunt. Oritur a situs vertebrarum dorsi seu articulorum perversione, & in hunc vel illum locum, a naturali sede inclinatione: acciditque vel ab ortu, vel a casu, aliove externo violento impetu.

De Symptomatibus Pulmonum & Thoracis.

Respirationis vitia, sunt *Μακρόπνοια*, seu respiratio magna, thoracem admodum distendens, & copiosum aërem adducens; quod vi febrium fit, in quibus cordis calor accenditur: *Ταχύπνοια*, seu respiratio frequentior, quam intemperies pulmonum, pectoris, cordis, vel abundantia halituum calidorum inducunt: & *Δυσπνοια*, seu difficultas respirationis, quæ ex vitio ipsorum organorum, five a causis externis, uti argento vivo, carbonibus, calce &c. five ab internis, uti angustia vasorum, obstructione &c. affectorum, exoritur.

Asthma, est frequens, densa, & anhelosa, respiratio, a pertinaci bronchiarum pulmonis seu obstructione, seu compressione proveniens. Ea in gravitate pectoris, cursu, & acclivi itinere molestat.

Tussis, est vehemens, crebra, & sonora spiritus copiosi, prius a pulmonibus attracti, efflatio, a veloci pulmonis & thoracis contractione edita, ut id, quod spirandi organis molestum est, excutiat. Causa igitur ejus est, quicquid pulmones, & asperam arteriam, membranamque, qua intus vestitur, afficere potest; quod imprimis faciunt humor & vapor.

Hæmoptysis, est sanguinis cum tussi, ex partibus respirationi dicatis, rejectio, citra illarum inflammationem accidens. Causa est, quicquid venarum unitatem solvit, five per Anastomosin aut illarum apertionem, five per Diæresin aut solutionem, five per Diapedesin aut transsudationem id fiat.

De Cordis Affectibus.

Palpitatio Cordis, est ejusdem, vel quod mole-
stum est expellentis, vel quod utile est attrahentis, &
deficiens restaurantis, inordinata, & ex dilatione
& subsidientia composita motio. Causa est, vel res
facultatem motricem irritans, vel refrigerationis,
propter intemperiem calidam, necessitas, vel spiri-
tuum defectus.

Animi deliquium, est præceps subitusque virium
omnium, vitalium cumprimis, lapsus, cum pulsu
imminuto sæpeque abolito, & sudore frigido, a sum-
ma cordis debilitate, vitio & defectu spirituum vita-
lium, quorum etiam reliquum a corpore ad centrum
confluit, exortus. Nempe, cum spiritus vitales de-
ficiunt, nec cor, nec ulla pars in corpore actiones
suas edere potest.

De Morbis Mamillarum.

Inflammatiō Mamillarum, est tumor durus, &
cognoscitur ex rubore, dolore, pulsu, & calore. Ori-
tur vero ex sanguinis attracti, transmissi, vel suppressi
copia.

Tumor Flatuosus Mamillarum, est dolor acutus,
in mamma præsertim sinistra, cum brachii, totius
lateris, costarum & scapularum cruciatu. Oritur
ex crasso halitu ad eas tendente.

Magnitudo Mammarum quæ indecora est, oritur
a crebra earum contrectatione, & flatulentorum
copia.

Lactis Defectus, est vel ex vitio sanguinis, qui deficit
ob morbos exsiccentes; vel vitio facultatis lactificæ;

quando illa tam debilis est, ut sive sanguinem, sive chylum, neque attrahat, neque coquat.

Redundantia Lactis, a sanguinis aut chyli copia, & forti facultate lactifica procedit.

Coagulatio Lactis fit, quando partes subtiliores & tenuiores sensim exhalant, & crassiores remanent, unde glandulæ indureseunt, & tumores, imo & abscessus exoriuntur.

CAPVT XVI.

De Morbis Infimi Ventris.

MOrbi Infimi Ventris complectuntur affectus Oesophagi, Ventriculi, Intestinorum, Ani, Mesenterii, Hepatis, Abdominis, Lienis, Renum, Vesicæ, Partium genitalium, & Umbilici.

De Morbis Oesophagi.

Intemperies Oesophagi, est ejusdem a nativa temperie ad præternaturalem recessus. Oritur ex calore, & quidem vel externe, uti a fumo, pulveribus; vel interne, uti a vaporibus siccis. Oritur item ex frigore, velut ex potu nimis frigido; & ex humore, velut ex catarrhis defluentibus.

Tumor Oesophagi, est ipsius in magnitudine sua excessus: & cognoscitur ex deglutiendi impedimento. Oritur vero ex iis causis, a quibus tumores generantur.

Angustia Oesophagi est, quando illius meatus imminuitur. Cognoscitur ex eo, quod facilius liquida, quam solida deglutiuntur: & provenit a medicamentis constringentibus, aut vaporibus.

De

De Morbis Ventriculi.

Intemperies Ventriculi, est simularium ejus partium præternaturalis in primis qualitatibus constitutio. Est igitur alia *Calida*, quæ cognoscitur ex cibi inappetentia, salivæ lentitudine, faucium & linguæ ariditate: alia *Frigida*, quæ cognoscitur ex ructu acido, flatu, salivæ nimietate: alia *Humida*, quæ cognoscitur ex absentia sitis, salivæ redundantia: alia *Sicca*, quæ cognoscitur ex regionis ventriculi extenuatione & contractione, quam gracilitas totius corporis sequitur: Hæc *Intemperies* oritur interdum sine humorum præsentia; interdum propter aliquem humorem, vel in ventriculo genitum, vel aliunde delapsum.

Dolor Ventriculi, est tristis ejusdem sensatio, a rebus distendentibus vel mordicantibus, & sic continuum ejus solventibus, exorta. Causa ergo vel *Externa*, uti nuclei, vel cibus acrior corruptionem passus; vel *Interna*, uti humores biliosi, & pituitosi, seu aliunde allapsi, seu in ventriculo geniti.

Ardor Ventriculi, der Sod / est humorum in ventriculo, vi caloris præternaturalis, excitata ebullitio, ita ut fervor ad gulam usque sentiatur. Efficit hunc ciborum pravitas aut corruptio, in calidioribus præsertim ventriculis; cum videlicet succus & humor, qui inde gignitur biliosus & ardens, halitum diffundit: quod maxime evenit, corpore post cibum assumptum validius per equitationem, cursum, aliumve motum, commoto.

Inflatio Ventriculi est, cum flatus ventriculum implentes & distendentes, dolorem pariunt.

Anorexia, est prostrata ciborum omnium appetentia, ex defectu sensus suctionis in orificio superiore

ventriculi exorta, unde vel neutiquam, vel tardius, quam pro naturæ exigentia, cibus appetitur. Oritur a succis & biliosis & corruptis, alimenti in toto corpore abundantia, corrugationis in ventriculo impotentia, aut excrementi crudi, insipidi, lenti & pituitosi, sive ex cibus geniti, sive aliunde affluentis copia.

Canina appetentia, est continua ac insatiabilis vorandi cupiditas, a vehementi suctionis sensu in ore ventriculi exorta, aliquando cum vomitu, aliquando cum diarrhœa affligens. Provenit a nimia alimenti in corpore indigentia, seu propter vermes chylum depascentes, seu propter nimias evacuationes, tam insensibiles quam sensibiles, ob partium nimium calorem.

Pica (ab ave ita dicta, quæ eodem affectu laborat) quæ & κίηα & μαλακία, est appetitus absurdus, substantiæ alienæ, liquidæ, vel solidæ, præter naturam & rationem alimenti, ex tristi suctionis sensu, & iudicii, res eius idoneas vel ineptas discernentis, corruptione, a vitioso excremento, tunicis imbibito, peculiari substantiæ proprietate os ventriculi infestante.

Nimia Sitis, est major & frequentior potionis consuetæ appetentia, ob tristem suctionis in ore ventriculi sensum, ex alimenti humidi defectu, & propriæ humiditatis alteratione exorta.

Concoctionis lesio, est concoctricis facultatis, in sua circa alimentum actione, vitium; quo fit, ut vel non, vel tarde, vel depravate concoquat.

Singultus, est motus ventriculi convulsivus, tensione & dilatatione fibrarum partis superioris constans, quo expultrix irritata, noxia tunicis ventriculi, imprimis oris & œsophagi, infixæ, cum sonitu & vehementi contorsione elidere tentat. Oritur a potu frigi-

frigido, alimentis vel medicamentis acribus, evacuatione nimia, & cibis corruptis, item veneno assumpto.

Ructus, Röpffen / aufsteigender Magen / est violenta & sonora flatus, in ventriculo stabulantis, per superiora eruptio. Fit, quando ventriculus flatibus impletur, & diaphragma ad excutiendos illos ventriculum adjuvat, qui tunc, pro materiæ in ventriculo hærentis diversitate, varios odores redolent.

Rugitus, Rurren des Bauches / est sonitus ventris, excitatus ab humoribus vel flatibus, in ventriculo aut intestinis discurrentibus, nec exitum invenientibus, editurque maxime circa sinistrum hypochondrium, aut umbilicum: isque virginibus, ob coarctationem hypochondriorum, ut graciles appareant, sæpe accidit.

Nausea, est inane vomendi desiderium, cum tristi molestia, æstu & anxietate, quo ventriculus, constrictis inferioribus, & dilatatis superioribus, ejicere quidem, quæ sibi molesta sunt, conatur, sed præ imbecillitate, vel paucitate, aut contumacia materiæ, nihil, præter tenuem & aqueum humorem, per os excernit.

Vomitus, est materiæ molestæ, in ventriculi capacitate contentæ, per superiora, sensibilis & palpabilis cum impetu rejectio. Causa est, quicquid superius orificium ventriculi offendere, & ad expulsionem, vel copia, vel qualitate mordaci, vel substantiæ ratione & dispositione irritare potest.

Cholera Humida, quæ & Vera, das Bauchgrimmen / est assidua & immoderata humoris pravi, cum vehementi perturbatione & violentia, per superiora & inferiora rejectio, a facultate expultrice valde irri-

tata, exorta. Affectus hic acer est & ferox, in quo ventriculus & intestina mire torquentur, & flatuum copia distenduntur. Causa præcipua bilis est, quæ, supra modum aucta, huc illuc impellitur, ac diffluit.

Cholera Sicca, quæ & *Notha*, est spiritus flatuosi per superiora & inferiora, cum inflatione ventris, strepitu, & lumborum ac laterum dolore, excretio.

De Morbis Intestinorum.

Inflammatio Intestinorum, est eorundem tumor, a sanguine, extra vasa in illa elapso, & putrescente, exortus.

Obstructio Intestinorum est, quæ alimenti prolapsionem, aut fæcis dejectionem impedit. Oritur vel a tumore præter naturam in intestinorum substantia orto, vel a copiosis resiccatisque fæcibus. Interdum etiam crassa & lenta pituita, copiosius collecta, firmiter intestinis adhærescit, omnemque eorum capacitatem implet.

Abscessus, Darm-Apstem / ab inflammatione oritur, eoque rupto, pus primum saniosum, deinde album & concoctum, per anum excernitur.

Angustia Intestinorum ex eo præcipue cognoscitur, quod fæces per alvum non recte excernuntur: idque fit, vel ab externis adstringentibus & exsiccantibus, uti cydoniis; vel a fæcibus induratis, vel a pituita crassa.

Vermes, sunt animalcula, præter naturam, in intestinis, ex crasso, lento & viscido humore, a calore vivido, per putredinem suscitato, genita, eorum animalium exemplo, quæ ex putri materia, vi cœlestis caloris, vitam habent. Materiam suppeditant cruditas & crapula,

pula; maxime autem usus eorum alimentorum, quæ facile putrescunt, ut lactis, fructuumque dulcium & fugacium. Signa sunt, ventris difficultas cum murmure atque torsione, lentericum profluvium, faciei pallor, visus læsio, narium pruritus, oris ventriculi præcordiorumque compunctio, animi defectiones, epilepsia.

Hernia Intestinalis, est intestinorum de sua sede prolapsus. Causæ sunt illæ, quæ processum, a peritonæo productum, vel laxare, vel rumpere possunt.

Iliaca passio, est dolor in intestinis tenuioribus acerbus, a violenta continui solutione, cum tumore ventris, ad similitudinem chordæ involuti, tantaque alvi obstructione, ut nihil descendat, sed humores & excrementa interdum per vomitus violenter rejiciantur, exortus.

Colica passio, est dolor intestini coli, a rebus continuum solventibus exortus. Signa sunt, sensus doloris in intestinis crassioribus terebrans & perforans; hypogastrii inflatio; fæcum ac flatuum suppressio; nausea, ructus, vomitus. Provenit colica passio ab humoribus crassis & viscidis, inter intestinorum tunicas hærentibus; a fæcibus duris & retentis; itemque a flatibus in cavitate contentis, exitu carentibus. Nimirum, flatus copiosior, in intestino colo congestus, cum propter obstructionem erumpere nequit, intestinum vi distendit atque divellit.

De Morbis Ani.

Ani procidentia, est exterioris in recto intestino partis, extra prominentia. Provenit a magno conatu, qui fit in egestionem fæcum; irritatione magna, quæ vel in dysenteria, vel tenesmo affligit; vel ab imbecilli-

cillitate musculorum, qui, post alvi egestionem, anum retrahere solent.

Alvi Retentio, est fæcum vel nulla, vel, pro ratione assumptorum, admodum parva dejectio. Oritur aut ex vitio fæcum, aut vitio intestinorum.

Lienteria, *Durchlauf* / est nimis celer alimentorum, ea forma, qua assumpta sunt, per alvum excretio, vitio facultatis retentricis & expultricis ventriculi & intestinorum proveniens.

Cæliaca, est celer esculentorum & potulentorum ex ventriculo ad intestina transitus, unde illa chyli aut cremoris specie profluunt.

Diarrhœa, est immoderata, frequens ac diuturna alvi dejectio, qua humores excrementitii & sinceriores, quantitate, vel qualitate, expultricem ventriculi & intestinorum facultatem stimulant, sine vehementi doloris sensu, profluunt.

Dysenteria, *rote Ruhr* / est alvi frequens, cruenta, cum dolore ventris, & intestinorum exulceratione, a materia acri, erodente, & peculiariter intestinis infesta, dejectio. *Causa*, sunt humores acres, intestina erodentes, qui, per contagium dysentericum infecti, in venas & arterias penetrantes, fermentationem efficiunt, & similem dispositionem toti massæ sanguineæ imprimunt, ac eandem cum aliis humoribus, more purgantium, concitant. Pravam quoque dispositionem intestinis affigunt, ita ut chylus præterfluens in humorem vitiosum mutetur, nec fæces alvi naturalem elaborationem & qualitatem recipiant. Aliquando, præter sanguinem, mucus quidam excernitur; atque tunc *Alba Dysenteria*, *die weiße Ruhr* nominatur: ea gravior est rubra, quia ab intestinorum substantia magis exulcerata provenit.

Fluxus alvi sanguineus fit sine dolore & exulceratione: oriturque ob sanguinis copiam, profectam vel ab intemperie hepatis calida, vel a membri alicujus præcisione, vel ab evacuationis consuetæ suppressione; aut venam ruptam, vel apertam.

Inflammatio Intestini Recti, fit vel a causis violentis, vel a medicamentis & cauteriis corrodentibus.

Verrucæ, sunt aut *Condylomata*, seu tumores pelli- culæ ani, tubercula nimirum dura & occallescentia, ex humore melancholico excrescentia, tædio quam dolore molestiora; aut *Thymi* seu *Verrucæ asperiores*, quæ si multum excrescant, *Ficus* appellantur.

Rhagades seu *Fissuræ*, *Schrunden im Pactedarm* / sunt oblonga ani sine tumore ulcuscula, eaq; vel superficialia vel profunda; callosa, vel callo carentia; humida & saniem fundentia, vel sicca & canerosa, quibus sphincteris rimæ proscinduntur. Oriuntur a sæcum duritie nimia, aut acriorum humorum erodentiumque affluxu; & tum pruritus, & dolor acerrimus cum ardore infestat.

Intertrigo, *der Wolf* / est cutis ani abrasio, seu exoriatio aut attritio, ab equitatione & ambulatione, aliave externa frictione, præcipue cum quis eo loco calet, & sudore perfunditur, proveniens.

Pruritus ani, est ejusdem dolorosa quædam titillatio. Oritur maxime ab humoribus acribus, falsis & viscidis, sphincteri, sive musculo intestini recti adherentibus; interdum a vermibus, aut ulcere.

Tenesmus, est assidua per alvum ejiciendi cupiditas cum dolore, dum interim vel nihil, vel pauca mucosa dejiciuntur. In hoc affectu prolabitur interdum intestinum rectum, & accidit simul urinæ, propter vicinitatem & consensum harum partium, stillicidium,

vel difficultas. Causa est, quicquid intestini recti extremitati affigitur, & ejus facultatem expultricem stimulare potest. Talia sunt, nimia intestini recti refrigeratio, calculus, vermes, denique biliosi, pituitosi, & falsi humores.

Hepaticus fluxus est, cum dilutus & aquosus sanguis, recentis carnis loturæ persimilis, per alvum effunditur. Causa illius est hepatis imbecillitas.

Hæmorrhoidum fluxus, est nimia sanguinis per venas hæmorrhoidales dejectio. Effluit primo sanguis niger & crassus, dein bonus ac rutilus, tandem citrinus & pallidus. Causa est, quicquid vim expultricem venarum & arteriarum, jecoris item, vel lienis irritat, vel retentricem earundem lædit.

Hæmorrhoidum suppressio, est sanguinis per venas ani elabi conantis interceptio, unde istæ in dolorem cum tumore elevantur. Causa est sanguis fæculentus & crassus, elabi cupiens.

De Morbis Mesenterii.

Intemperies Mesenterii plerunque est calida & sicca, a materia simili oborta, quæ vel ibi colligitur, vel aliunde transmittitur.

Mesenterii Obstructio oritur, quando vel venæ lacteæ, a chylo crasso, lento, viscido, sunt obstructæ; vel venæ mesaraicæ a vaporosis & crassis flatibus, aut humoribus acribus intercipiuntur.

Mesenterii Inflammatio, est ejusdem tumor, ab humoribus, cum sanguine nutriente, in spatia ipsius effusis, vel glandulis altius impactis, & calore externo accedente putrescentibus, exortus.

Dolor Mesenterii, est tristis ipsius sensus, qui a materia calida & acri, in membranas ipsius detrusa, oritur,

tur, cum ventris & lumborum perpetuo dolore, per intervalla, autumnali præcipue tempore accedente, affligit, interdum & in caput, & totum corpus distribuitur.

Pancreatis Obstructio, dolores circa regionem ventriculi, & in dorso, quin & difficilem respirationem excitat.

Omentum, per ramî splenici surculos, interdum fæculentos, a liene suscipit humores, atque inde sæpe abdomen, in sinistra parte, versus umbilicum, in tumorem attollitur, sæpe, compresso ventre, sonus & strepitus exauditur.

De Morbis Hepatis.

Intemperies Hepatis, est ejusdem a temperamento naturali, propter causas externas & internas, deflexio.

Obstructio Hepatis, est vasorum in hepate angustia, a materia ipsorum cavitatem implente, producta, alimenti distributionem impediens.

Inflammatiô Hepatis, est ejusdem tumor calidus, ex sanguine impacto, & in ipsa Hepatis substantia putrescente, exortus, cum febre continua, dolore gravativo, sensusque ponderis in dextro hypochondrio affligens.

Hepatis Scirrhus, Leber Knollen/ est ejusdem tumor durus, dolorificus, ab humore crasso, in visceris substantia impacto & indurato, genitus.

Ulcus Hepatis, est ejusdem a pure, vel succo erosio, quod perpetua colluvie, alimento continenter alluente, sordescit.

Imbecillitas Hepatis, est facultatum ejusdem, a causis suis inducta læsio.

De Morbis Abdominis.

Ascites, est abdominis ab humore aquoso, seroso & falso, in ejus capacitatem, Hepatis, Lienis, & Renum vitio, effusi, cum pedum, femorum, & scroti tumore, distensio.

Tympanites, est abdominis ex multo flatu, a calore vel debili, vel torrefaciente excitato, in illius capacitatem concluso, distensio.

De Morbis Lienis.

Lienis Obstructio, est ejusdem ab humoribus crassissimis infarctio.

Lienis Inflammatio, est ejusdem a sanguine, in substantiam ejus effuso, in tumorem elatio.

Scirrhus Lienis, est tumor ejusdem durus, ab humore crasso, glutinoso & indurato procedens.

Dolor Lienis, das *Wilk-Schwen* / a solutione continui, & tensione membranae oritur. Accidit interdum sanis, in latere plerunque sinistro, aliquando & in dextro, potissimum post cibum sumtum, si tunc corpus validius equitatione aliove motu graviore agitetur.

Affectio Hypochondriaca, est vitiosorum, in venae portae, arteriae coeliacae & mesentericae ramis, ob laxam lienis coctionem, absque putredine collecta, & per vaporum emissionem multa symptomata inferens, colluvies. Dicitur *Hypochondriaca*, ob locum utriusque hypochondrii, per quem partem illam corporis, quae, sub nothis costis, ad ilia usque utrinque se porrigit, & cum musculis viscera ipsa complectitur, intelligere oportet. Interdum *Melancholiae* nomen accipit, quia cerebrum per consensum afficitur. *Signa* sunt, Ventriculi cruditas, dolor, alvi adstrictio, aestus

æstus in hypochondriis quasi inflammatorius, qui motu, cibo, potu, & calidioribus magis ingravescit. Amplius, urina modo tenuis, propter vias obseſſas, modo turbida, propter humoris admiffionem; Flautulentia, & in sinistro præſertim hypochondrio fluctuatio; anxietas, cordis palpitatio, palati, oris & linguæ ſiccitas, reſpiratio difficilis, & cerebri perturbatio proveniunt. *Cauſa* ſunt humores pituitoſi, biliōſi & melancholici, qui propter lienis, ob intemperiem calidam, coctionem læſam, in venæ portæ, arteriæ cœliacæ, & meſentericæ ramis, majoribus præſertim, colliguntur. *Curatio* fit per Chirurgiam, cum ſanguis mittitur, & Pharmaciam, cum humor corruptus educitur. Conferunt etiam Acidulæ, Thermæ, Chalybs, ſi, præmiſſa primarum viarum evacuatione, adhibeantur.

De Morbis Renum.

Obſtruſtio Renum, eſt vaſorum in renibus, a cauſis ſuis inducta oppreſſio: cujus *Signa* ſunt, urinæ retentio, vel paucitas, & exinde gravitatis circa lumbos ſenſus: *Cauſa* vero, viſcidi, craſſi & lenti humores.

Renum Inflammatio, ſeu *Nephritis*, eſt Renum a ſanguine, in ipſorum ſubſtantiam effuſo, & ibidem putreſcente, intumeſcentia, cum vehementi dolore, & fibroſis aut arenofiſis excretionibus conjuncta.

Calculus Renum, eſt ſubſtantia ſolida, & lapidoſa, in renibus, adjumento caloris, exorta. *Signa* ſunt, dolor, qui in lumbis afficit, urina cruenta, ſtupor crurum, naufea, & vomitus. *Cauſa*, eſt ſuccus lapideſcens, qui provenit ex fæculentia alimentorum, quæ, ſi retineatur, huic vel illi parti ſe agglutinat, perque
novum

novum materiæ appulsum quotidie augetur, & aucta sensim redigitur ad siccitatem.

Ulcus Renum oritur a calculo intus coërcito, qui vel pondere Renem contundit, vel attritu comminuit exeditque. Tum Urina, antequam purulenta esse incipit, cruenta, præsertim ab exercitatione & labore, evadit.

De Morbis Vesicæ.

Calculus Vesicæ ex calculi Renum definitione percipitur. *Signa* ejus, pruritus dolorque acerbus in collo vesicæ, urina guttatim emissa, ejusque sedimentum arenosum.

Vesicæ Inflammatio, non tam ipsius substantiæ, quæ tenuis & exsanguis, insidet, quam sphincteris musculo. *Signa* sunt dolor acerbus, urinæ cum summo mejendi conatu suppressio, pubis ad umbilicum propter urinæ copiam distensio. *Causa*, est eadem, quæ aliarum inflammationum.

Meatus urinarii angustia, est ejusdem a causis suis profecta, & urinæ suppressionem inducens, interceptio. Est vero alia ab obstructione, quæ fit aut a calculo, aut a grumo sanguinis, aut pituita, crassa & viscida; alia a constipatione, per carunculam, callum, verrucam in meatu urinario enatam.

Incontinentia urinæ, est ejusdem, propter sphincterem resolutum, vel vesicam compressam, sine acrimoniæ & doloris sensu, præter imperii arbitrium, emissio.

Diabetes, est celerrima & copiosissima potus non transmutati emictio, a vi intensa renum attractrice exorta, & cum siti valida & perpetua affligens.

Ischuria, est urinæ, ob frustrationem facultatis expultricis, suppressio, ita ut hujus nihil excernere possit.

possit. Oritur a vesicæ morbis, vel meatus urinarii angustia.

Stranguria, est urinæ guttatim facta, cum vel sine dolore, & continuo ad mingendum stimulo, excretio, ab assidua facultatis expultricis vesicæ, propter affectum sphincterem, stimulatione, vel retentricis minimo etiam onere gravatæ, debilitate, exorta. Oritur ergo ab urinæ acrimonia, pure, ab hepate, renibus, vel aliunde transmissio; calculo, inflammatione, aut vicinarum partium affectu.

Dysuria, est urinæ ardentis, interdum paucæ, interdum copiosæ, cum cruciatu, sine interruptione, redditio, a causis tam externis, quam internis, meatum urinarium afficientibus, exorta.

Mictus purulentus, est una cum urina excretio saniei, in vesica congestæ. Congeritur autem, vel ipsius vesicæ, vel ureterum, vel meatus urinarii, vel renum, jecoris, thoracis vitio.

Mictus cruentus, est sanguinis una cum urina excretio, ob ejusdem in vesica congestionem, quæ vel a renibus, vel hepate provenit, exorta.

Mictus Pilaris, seu *Trichiasis* est, ubi, cum urina, materia mucosa, nunc pilis aut capillis, nunc tenuibus foliis similis excernitur. *Causa*, est crassa & viscida pituita, in venis a calore exsiccata & coacta, quæ in longo, per angustias renum & ureterum venas, transitu, in tanta longitudine excernitur.

De Morbis Partium Genitalium.

Hernia Scroti, est ejusdem tumor, vel ab omento in ipsum delapso, vel a flatu, aut aqua ibidem collectis, aut massa carnea ibi genita, exortus.

Impotentia virilis est, quando virga nullo conatu erigi aut extendi potest. Oritur a spiritus vitalis defectu.

fectu, vel quia paucus est, propter cordis frigiditatem & siccitatem, vel, quia alio avocatur; quod in meditationibus, timore, verecundia &c. accidit.

Salacitas, est nimia in venerem, vitio feminis, pro-
pensio; interdum etiam tanta, ut in furorem vertatur.

Priapismus, est erectio virgæ, citra veneris appetentiam, a flatuoso spiritu, fistulosum penis nervum replente, exorta.

Gonorrhœa, est nimia & invita feminis, suo & sper-
maticarum partium vitio exorta, profusio.

Sterilitas, est concipiendi, vitio seu genitalium,
seu feminis, seu uteri, seu sanguinis menstrui, prove-
niens impotentia.

Mola, est massa sine ossibus & visceribus, ex im-
perfecta conceptione, feminis tum masculini, tum
fœminini vitio, loco fœtus genita.

De Morbis Umbilici.

Hernia Umbilicalis, est Umbilici, ab intestinis,
omento, aqua, flatu, vel carnosâ substantia, in eun-
dem prolapsis, vel ibidem exortis, intumescencia. Est-
que alia *Intestinalis*, quando intestina in umbilicum
prolabuntur; alia *Omentalis*, quando omentum in
umbilicum procidit.

CAPVT XVII.

De Medicamentis.

M*edicamentum* in genere, est omne id, quod, cor-
pori ægro applicatum, illud a statu præternatu-
rali ad naturalem, per facultates suas, reducere aptum
est.

Medicamenta varie *dividuntur*: & constitutionis re-
spectu, sunt vel *Simplicia*, vel *Composita*. *Simplicia*
vocan.

vocantur, quæ talia sunt, qualia natura produxit, quæque nullam ab arte compositionem sortiuntur, etsi ingrediuntur compositionem arte factorum: Sunt autem vel Fossilia, vel Vegetabilia, vel Animalia, vel Microcosmica.

Medicamenta Fossilia sunt ea, quæ ex terræ visceribus depromuntur, uti Terræ, Succī concreti, Bitumina, Lapides, Metalla.

Medicamenta Vegetabilia, sunt Arbores, Frutices, & Herbæ; quatenus illæ removendis corporis humani affectibus, vel totæ, vel partibus suis, radicibus nempe, lignis, corticibus, foliis, floribus, fructibus, & humoribus inserviunt.

Medicamenta Animalia sunt, quæ vel ab animalibus totis, vel ipsarum partibus desumuntur.

Medicamenta Microcosmica sunt, quæ ex corpore humano, ad depellendos humani corporis affectus, desumuntur.

Composita Medicamenta, vel a Natura, vel ab Arte sunt talia. Ad illa revocantur Acidulæ, & Thermæ. *Acidule* sunt aquæ, quæ sapore acido, & viribus aliis, a mineralibus imbutæ, morbos, si convenienter adhibeantur, depellunt. *Thermæ*, sunt aquæ calidæ, quæ e terra perpetuo profiliunt, ab igne subterraneo effervescunt, & morbos, vires a fossilibus sortitæ, depellunt, si convenienter adhibeantur.

Medicamenta Composita Artificialia sunt, quæ, ab arte, ex simplicibus, prævia aliqua præparatione componuntur, & in certam formam rediguntur. Sunt vero vel Interna, vel Externa.

Interna dicuntur, quæ per os intra corpus assuntur: Et sunt vel Fluida, vel Solida, vel Media.

De Medicamentis Internis Fluidis.

Medicamenta Interna Fluida sunt, quæ instar aquæ fluunt, uti Decocta, Infusa, Potiones, Vina medicata, Cerevisiæ medicatæ, Oxymel, Aqua hordei, Acetum medicatum, Aquæ destillatæ, Syrupus, Julepus, Emulsio, Essentiæ, Spiritus, Tincturæ, Olea.

Decocta, fiunt ex vegetabilibus, animalibus, & mineralibus, interdum, si opus sit, incisis, contusis, vel rasis, in aqua vel simplici, vel præparata, ad ignem lentum vel clarum, in vase aperto, vel clauso, ad partem tertiæ vel quartæ consumptionem decoctis, ita ut cocta colentur, aromatizentur, clarificentur.

Infusa, fiunt ex vegetabilibus, vel mineralibus, purgantibus, vel vomitoriis, proportionem sesquialtera vel dupla, in liquorem aliquem coniectis, & in eodem certo spatio maceratis, post colatis.

Potiones fiunt, quando liquoribus evacuantia electuaria, extracta, pulveres, rotulæ &c. sine decoctione, miscentur.

Vina Medicata parantur, quando vinum defæctum, aut mustum, sine saccharo, vel cum eo, viribus medicamentorum simplicium, vel subito, per olea, spiritus, & tincturas, vel per infusionem longam, impregnatur.

Cerevisiæ medicatæ eadem ratione parantur.

Oxymel fit, quando acetum cum melle miscetur, & plantæ in eo interdum immerguntur.

Aqua Hordei fit, quando Hordeum in aqua vel solum, vel cum passulis, aniso, cinnamomo, ad crepaturam decoquitur, colatur, & gutta una vel altera spiritus vitrioli, vel sulphuris acidi, admiscetur.

Acc-

Acetum Medicatum fit, quando in Aceto simplicia vel composita macerantur, vel ex eorundem succis idem elicitur.

Aque Destillate, vel in Cucurbita per Balneum Mariæ, ex plantis frigidis, iisque vel totis, vel confusis, & in succos redactis; vel in vesica ex calidis, & quorum vis non facile evocatur, iisque fermentatis, eliciuntur.

Syrupi, ex decoctis, infusis, succis depuratis, aceto, parantur, saccharo aut melle condiuntur, ad mellis fere consistentiam decoquuntur, & tam ad alterandum, quam ad purgandum, raro soli, sæpius duplo aquarum destillatarum diluti, usurpantur.

Julepi, fiunt ex aquis destillatis, succis, conservis, & saccharo, vel sine decoctione, vel cum decoctione.

Emulsiones ex seminibus, nucleis, margaritis, coralliis, cornu cervi, fructibus etiam nonnullis, liquore affuso confusis & expressis, parantur.

Essentie, ex viridum herbarum succo, cum S. V. expresso, & in B. M. digesto, colorato, per inclinationem separato fiunt, & cum pauxillo sacchari in syripi formam coquuntur.

Spiritus, in aquarum tam simplicium quam compositarum destillatione, una cum aquis descendunt, ab iisque postea per cucurbitam, phialam &c. separantur. Sed hoc de volatilibus accipere oportet; nam fixiores, retorta, igneque fortiori ejiciuntur.

Tincturae, ex siccis plantis, plerunque calidis, confusis, menstruo, id est spiritu vini, rore majali, vel alio interveniente, in loco calido, vase clauso, tam diu extrahuntur, donec menstruum non amplius coloratur: & vel per chartam filtrantur, vel digestionem depurantur.

Olea, vel sine aquis ex gummosis & resinosis eliciuntur, vel cum aquis in destillatione descendunt, vel ab iis aut per separatorium, aut per fila linea crassiora, vel per chartam bibulam separantur, in quibusdam subsident.

De Medicamentis Internis Solidis.

Medicamenta Interna Solida sunt, Pulveres, Salia, Croci, Flores, Præcipitata, Vitra, Fæculæ, Confecta, Rotulæ, Morsuli, Trochisci, & Pillulæ.

Pulveres, ex medicamento uno vel pluribus confusis constant.

Sal rebus fere omnibus inest duplex: *Volatile*, nonnullis Essentiale dictum, quod ignem & calorem non sustinet, sed avolat, & calcinatione discutitur: & *Fixum*, quod paratur e cineribus plantarum & lignorum, dum ex iis lixivium conficitur, idq; coquitur donec omnis aqua exhalet, & tum sal relinquitur.

Croci, sunt subtiles pulveres, vel tincturæ, in pulveris formam redactæ, crocei coloris. Præcipui sunt *Crocus Metallorum*, qui nihil aliud est quam antimonium cum nitro calcinatum, & in pulverem crocei coloris redactum; & *Crocus Martis*, qui variis modis paratur.

Flores, Chymicis nominantur plerunque subtiliores corporis partes, a crassiore per sublimationem separatæ.

Præcipitati nomen præcipue tribuitur Mercurio: qui, postquam in aqua forti solutus est, ab aqua solvente separatur subsidetque, *Mercurius præcipitatus*, vel *Turbith minerale* nominatur.

Vitrum ex calcibus rerum paratur, si cinis aut calx validissimo igne fundatur, addaturque ad fusionem

matu-

maturandam nonnunquam Borax, vel alii pulveres fusorii: fusa materia super pelvim calefactam, vel aliam tabulam effunditur. Sic paratur Vitrum, & Succinum Antimonii.

Fæcula, est pulvis quidam farinaceus, instar amyli, & fit ex succo radicum quarundam expresso, qui si in loco frigido collocetur, fæcula sponte subsidet, quæ, effuso humore supernatante, in umbra siccat.

Confecta, sunt condita arida, ob saporis gratiam inventa, & parantur tam ad alterandum, quam ad evacuandum.

Rotule, a figura rotunda sic dictæ, sunt etiam vel alterantes, vel purgantes, & parantur cum saccharo: cujus proportio vulgatissima est octupla in alterantibus, & quadrupla in purgantibus.

Morsuli, eodem fere modo fiunt; & sunt vel alterantes, vel purgantes, vel nutritivi.

Trochisci seu Pastilli, sunt medicamenta solida, coherrentia, ex convenientibus, cum liquore exceptis, constantia, figura seminis lupinorum, & superficie plana, eo fine inventa, ut medicamenta pulverizata, sub hac solida figura, adversus æris injurias tutius conserventur. Parantur ex omnis generis medicamentis, non solum pulveribus & speciebus, sed etiam additis succis inspissatis, conservis, extractis, aut similibus confectionibus.

Pillule seu nativæ, sunt medicamenta in formam globulorum redacta, ut integra deglutiantur, & insuavitas minus gustu percipiatur. Fiunt ex pulveribus cum humore commixtis.

De Medicamentis Internis Mediis.

Medicamenta Interna Media, quæ inter fluida & solida intercedunt, habent sub se Extracta, Resinas, Conservas, Conditæ, Rob, Electuaria, Eclegmata, Saponæas, & Bolos.

Extractum, perinde ac Tinctura extrahitur, & ad consistentiam vel mellis, vel pillularum, vel pulveris redigitur.

Resina, ex gummosis extrahitur, & aqua rosarum in extractionem, cum spiritu vini factam, præcipitata, calore lento siccatur.

Conserva, fit ex floribus, interdum herbis & radicibus mollioribus contusis, & cum sacchari duplo conditis.

Conditum, fit ex radicibus, corticibus, fructibus, aut durioribus aqua maceratis vel coctis; aut mollioribus saccharo & melle conditis, ut diutius durent, & gustui gratiores sint.

Rob, seu succus inspissatus ex fructibus, nonnunquam ex floribus, vel cum expressione, vel sine expressione, coquitur, sacchari subduplo aut pari quantitate addita.

Electuarium, fit ex conservis, speciebus, rotulis, trochiscis, addita succi vel syrupi proportionata quantitate.

Eclegma, seu *Looch*, ex speciebus, pulveribus, conservis, succis, cum liquore vel syrupo mistis fit, & ad pulmonum ac thoracis vitia adhibetur.

Saponæa, est linctus ex amygdalis decorticatis, contusis, & cum saccharo, in aqua conveniente dissoluto, ad mellis consistentiam coctis, additis ad finem amylo, & aqua rosarum.

Bolus,

Bolus, ex electuariis, pulpis, conservis, speciebus, cum pauxillo syrupi componitur, inq; globosam figuram redigitur; & vel ad purgandum, vel vomendum, vel alterandum, vel aliam intentionem adhibetur.

De Medicamentis Externis, & speciatim de Fluidis.

Medicamenta Externa, sunt vel Fluida, vel Solida, vel Media, vel Indifferentia. *Fluida* sunt, Clysteres, Collutiones oris, Gargarismi, Olea, Epithemata, Stillicidia, & Lotiones.

Clysteres, qui & *Enemata*, sunt medicamenta, quæ per anum in intestina, instrumento idoneo injiciuntur. Fiunt e radicibus, corticibus, foliis, floribus, fructibus, in aqua coctis & colatis. Vfus ipsorum est in alvo laxanda, abstergendo, flatibus discutiendis, adstringendo, renum & intestinorum dolore sedando.

Collutiones oris, seu Διακλύσματα, sunt medicamenta, quæ in ore detinentur, & sine deglutitione, linguæ beneficio, hinc & inde agitantur. Doloribus dentium & gingivarum imprimis destinata sunt.

Gargarismi, sunt medicamenta, quibus fauces sine deglutitione colluuntur, humorque ore contentus reciproco motu ad fauces agitur. Fiunt ex aquis destillatis, vel decoctis convenientibus.

Olea, parantur vel per destillationem, vel per expressionem succi oleaginosi.

Epithemata, extremis corporis partibus applicantur, & fiunt ex aquis destillatis, succis, infusis, parti & affectui convenientibus. Pertinent ad ea Oxy-

rhodina, quæ fronti peculiariter ad refrigerandum & repellendum applicantur.

Stillicidia, parantur ex aqua communi, decoctis &c. Adhibentur ex vasculo, proboscide inclinata.

Lotiones, sunt vel totius corporis, & vocantur *Balnea*; vel ejusdem partium.

De Medicamentis Externis Solidis.

Medicamenta Externa Solida sunt *Glandes*, *Pessis*, *Emplastra*, *Cerata*, *Cauteria*.

Glandes, vulgo *Suppositoria*, sunt medicamenta solida, quæ ano immittuntur, figura tereti, instar candelæ ceræ, quatuor vel quinque digitos transversos longa. Adhibentur ad alvum laxandam, ægro debiliore.

Pessis, est medicamentum, sinui pudoris indendum, figuram habens oblongam, teretem, longitudine digiti & crassitie, paratum vel ex sacculo lineo oblongo, vel lana, & gossypio, res medicamentosas excipientibus.

Emplastra, sunt medicamenta, quæ, linteis vel pelibus tenuibus inducta, cuti corporis tenacius adherescunt.

Cerata sunt, quæ majorem partem ceræ recipient, & emplastro minus duram habent consistentiam.

Cauteria, sunt medicamenta, quæ adurendi corpus, crustamque excitandi vim habent. *Vlcus cauterio excitatum Fontanella* dicitur.

De Medicamentis Externis Mediis.

Medicamenta Externa Media, sunt *Balsama*, *Limenta*, *Vnguenta*, *Cataplasmata*.

Balsa-

Balsama, conficiuntur ex oleis incorporatis.

Linimenta, sunt medicamenta, mediæ inter oleum & unguentum consistentiæ : paranturque, quando oleis, butyro, pinguedinibus adduntur pulveres, succi, resinæ, & lacrymæ arborum.

Unguenta, a Linimentis consistentia crassiore differunt: & parantur vel sine igne, vel cum igne, ex pinguedinibus, oleis, radicibus oleo maceratis, & ad consumptionem liquoris decoctis.

Cataplasma, est compositio mollis, pulti similis, ex aliquo farinæ genere, floribus, & aliquo humido, aut unctuofo parata.

De Medicamentis Externis Indifferentibus.

Medicamenta Externa Indifferentia vocantur, quæ aliquando parantur liquida, aliquando solida, aliquando media. Suntque Apophlegmatizantia, Dentifricia, Errhina, Ptarmica, Odoramenta, Smeigmata, Suffitus, Collyria.

Apophlegmatizantia sunt, quæ, ore detenta, pituitam e capite, & vicinis locis proliciunt.

Dentifricia, ad dealbandos, extergendos, & stabilizandos dentes, gingivasque laxas comprimendas parantur.

Errhina, sunt medicamenta, quæ naribus, capitis purgandi gratia, induntur.

Ptarmica, ab his non multum differunt, & sterutationem excitant.

Odoramenta fiunt ex iis, quæ suavem odorem excitant.

Smegmata parantur ex sapone raso, cui pulveres convenientes adduntur, & omnia cum liquore in unam commiscentur massam.

Suffitus, ad odoramenta pertinent, & forma pulveris, trochiscorum, & pyramidum parantur.

Collyria, adhibentur externe oculis, & parantur vel sicca, vel humida, vel vaporosa, quando vapor, ex rebus coctis exhalans, capite linteo tecto, oculis excipitur.

De aliis Medicamentorum Differentiis.

Medicamenta Temperata sunt, quæ in qualitatibus primis non excedunt: uti Asparagus, Glycyrrhiza.

Medicamenta Calida sunt, quæ calefaciendo humanum corpus alterant: suntque talia, in Primo, Secundo, Tertio, vel Quarto gradu. *Calida in primo gradu* sunt, quæ vix sensibilibiter calefaciunt: uti Absinthium, Borrago. *Calida in secundo gradu* sunt, quæ manifeste, sed citra læsionem, calefaciunt: uti Betonica, Pimpinella, Nux Moschata. *Calida in tertio gradu* sunt, quæ vehementer quidem, & cum molestia, sed citra corruptionem, calefaciunt: ut Asarum, Juniperus, Hyssopus, Anisum, Foeniculum. *Calida in quarto gradu* sunt, quæ, cum gravissima corporis humani læsione, calefaciunt: uti Allium, Cæpa, Sinapi, Piper.

Medicamenta Frigida sunt, quæ frigefaciendo humanum corpus alterant: suntque talia, in Primo, Secundo, Tertio, vel Quarto gradu. *Frigida in primo gradu* sunt, quæ corpus humanum vix sensibilibiter frigefaciunt: uti Mala cydonia, Pruna, Myrtus. *Frigida*

Frigida in secundo gradu sunt, quæ manifeste, sed citra effusionem, frigefaciunt: uti Acetosa, Cichoria, Lactuca, Cucurbita, Pepones. *Frigida in tertio gradu sunt*, quæ vehementer quidem, sed sine corruptione, frigefaciunt: uti Portulaca, Sempervivum, semen Cicutæ. *Frigida in quarto gradu sunt*, quæ frigefaciendo corrumpunt: uti Folia Cicutæ, Papaveris, Opium.

Medicamenta Humida sunt, quæ humefaciendo corpus humanum alterant: suntque talia pleraque Primi, & Secundi, gradus. *Primi gradus sunt*, Radices Malvæ, Citri caro. *Secundi*, flores Nymphææ, Violarum, Pepones.

Medicamenta Sicca sunt, quæ siccando corpus humanum alterant: suntque talia Primi, Secundi, Tertii, & Quarti gradus. *Sicca in Primo sunt*, fructus baccae Juniperi, Castaneæ, Thus: in *Secundo*, Radix Rhamni, Calamus odoratus, Foeniculum: in *Tertio* Cinnamonum, Galanga, Hyssopus: in *Quarto*, Ruta sylvestris, Allium, Sinapi, Nasturtium.

Medicamenta Digerentia sunt, quæ naturam in coquendis humoribus, præter naturam peccantibus, mutant.

Medicamenta Emollientia sunt, quæ id, quod concretum est, & obduruuit, lenificant.

Medicamenta Indurantia sunt, quæ emollientibus opponuntur.

Medicamenta Laxantia sunt, quæ illi pravae dispositioni, quam materia quædam, vel vapor, vel flatus, partium spatia replens & dilatans, efficit, medicantur.

Medicamenta Anastomatica dicuntur, quæ vasorum ora aperiunt.

Medi-

Medicamenta Attenuantia sunt, quæ dissolvunt & extenuant crassos, viscidos, & glutinosos humores, ut vel sponte sua evanescant, vel trahentium vi facile dissipentur.

Medicamenta Aperientia sunt, quæ internas obstructions reserant.

Medicamenta Incrassantia sunt, quæ succos tenuiores & liquidiores crassiores reddunt.

Medicamenta Emplastica sunt, quæ sua substantia meatus corporis oblinere, oppilare, & offercire possunt, eidemque illita tenaciter adhærent.

Medicamenta Extergentia sunt, quæ lentos & glutinosos humores, corpori adhærescentes, eluunt.

Medicamenta Anodyna sunt, quæ calore suo moderato, meatus reserando, dolorem leniunt, ipsiusque causam, per insensibilem transpirationem discutunt.

Medicamenta Narcotica sunt, quæ stuporem parti, ne sentiat id, quod dolorificum est, inducunt.

Medicamenta Attrahentia sunt, quæ non solum tenues & serosos humores, sed & crassiores, & partibus alte infixos, in superficiem educunt.

Medicamenta Repellentia sunt, quæ humoris in parte influxum, frigiditate sua aquosa, prohibent, vel eum, qui recens influxit, atque in eo nondum impæctus fluctuat, reprimunt.

Medicamenta Adstringentia sunt, quæ ex crassa & terrea substantia constant, meatus partis contrahunt, tenuiores partes elidunt, & sic etiam repellunt.

Medicamenta Maturantia sunt, quorum adjuvamento calor natus sanguinem nativum in pus convertit.

Medi-

Medicamenta Glutinantia sunt, quæ, recentium vulnerum diducta labra conjungunt, &, ne quippiam inter ipsa influat aut succrescat, impediunt.

Medicamenta Cicatricem inducentia sunt, quæ & id, quod confluit, & humorem, qui in ipsa carne continetur, consumunt, ut caro in cutis similitudinem mutetur.

Medicamenta Corrodentia, excrecentem carnem mollem tollunt, extimamque ejus superficiem sensim liquefaciunt.

Medicamenta Putrefacientia, carnem duriores colliquant.

Medicamenta Psilothra, pilos extirpant, partemque glabram reddunt.

Medicamenta Purgantia sunt, quæ humores, in corpore humano præter naturam stabulantes, per inferiora extrudunt. Atque vel proprio humori, ut bili, melancholiz, vel omnibus humoribus expellendis dicantur; quæ posteriora proprio nomine *Catholica* appellari solent.

Medicamenta Vomitoria sunt, quæ humores per superiora ejectiont.

Medicamenta Diuretica sunt, quæ urinam cient, perque eandem peccantem materiam evacuant.

Medicamenta Hydrotica sunt, quæ materiam peccantem per ambitum corporis sensibiliter pellunt; dicuntur alias *Sudorifera*.

Medicamenta Diaphoretica sunt, quæ per insensibiles corporis meatus materiam educunt. Sunt omnia calida, materiamque in halitum convertunt, & poros cutis aperiunt.

Medicamenta Planetica, e germinibus, quæ, secundum aliquorum opinionem, a planetis appellationem

nem & vires suas accipiunt, & in operando pendent, parantur : suntque totuplicia, quot Planetas numeramus. Atque *Saturnina* germinalia illa vocantur, quæ sunt aspectu horrido, odore ingrato; *Jovialia*, quæ saporem & odorem habent gratum; *Martialia*, quæ sunt forma aculeata & aspera, sapore caustico; *Solaria*, quæ sunt colore flavo, odore fragrante, sapore grato; *Veneræa*, quæ habent florem album, humorem lentum, saporem dulcem; *Mercurialia*, quæ varium florum colorem habent, & filiquas gerunt; *Lunaria* denique, quæ folia habent crassa, succulenta, saporis aquei, vel subdulcis.

CAPVT XVIII.

De Ratione Medendi.

Ratio Medendi est, quæ auxilium corpori humano ægro, sed sanabili, apte præstat: & dividitur in Προθετικήν & Αφαιρετικήν.

Ratio Medendi Προθετική est, quæ, quantum viribus naturæ deest, tantumdem supplere, per augmentationem & multiplicationem, nititur.

Ratio Medendi Αφαιρετική est, quæ potentiam sanativam ab impedimentis liberare, & eandem ad actum promoveri allaborat.

Αφαίρεσις, respicit tum humores quantitate, qualitate, motu & loco peccantes; tum ipsos flatus.

Αφαίρεσις Humorum Quantitate peccantium, per venæ sectionem, frictiones, inediam, balnea, hæmorrhoidas, menses, scarificationem, cucurbitulas, & hirudines absolvitur.

Aφαιρεσις Humorū Qualitate peccantium, consistit in alteratione, purgatione, vomitione, diuresi, sudatione.

Aφαιρεσις Humorū Motu peccantium, habet sub se Revulsionem, Repulsionem, Derivationem, & Interceptionem. Atque *Revulsio* est materiæ, in aliquam partem fluentis, in contrarium conveniens averfio. Fit vero per venæsectionem, cucurbitulas, hirudines, ligaturas, frictiones &c. *Repulsio*, est humoris influentis, per medicamenta repellentia, conveniens rejectio. *Derivatio*, est humoris, parti incumbentis, ad vicina conveniens averfio. *Interceptio*, est aditus humorum, in ipsa via, ne ad partem pertinent, per medicamenta conveniens interclusio.

Aφαιρεσις Humorū Loco peccantium, continet Emollitionem, Discussionem, Suppurationem, & Attractionem. Atque *Emollitio* est humoris indurati & crassi, per medicamenta malactica, alteratio. *Discussio*, est humoris in parte hærentis & emolliti, per insensilem transpirationem, medicamentorum diaphoreticorum beneficio, conveniens dissipatio. *Suppuratio*, est humoris, qui discuti non potest, in pus, per medicamenta maturantia, conveniens mutatio. *Attractio*, est materiæ pertinaciter infixæ, per medicamenta attrahentia, conveniens motio.

Aφαιρεσις Flatuum, est eorundem, per medicamenta carminativa, in corpore humano, conveniens dissipatio.

CAPVT XIX.

DE OFFICIO MEDICI.


A Sclepiades, referente Celso, l. 3. c. 4. officium esse Medici dixit, ut tuto, ut celeriter, ut iucunde curet. Sed, quod vere monet Ovidius, l. 1. de Ponto,

Non est in Medico, semper relevetur ut ager:

Interdum doctus plus valet arte malum.

Quamobrem, ut est apud Romanum Sapientem, lib. 6. de Benef. c. 13. si omnia fecit, ut sanaret, peregit Medicus partes suas.

Denique, cum jam conclamatum est, Medici, secundum eundem, l. 2. de ira c. 6. quibus vitam non potuerunt largiri, facilem exitum præstant.



ARS VALETVDINIS BONÆ MENTIS.

O Peram danti mihi, ut Filii desiderio, de ratione ejus, quæ ad corpus attinet, valetudinis tuendæ, & vocibus, quibus morbi illam affligentes designantur, explicandis, utcunq; satisfacerem, illud commodum succurrebat, DE ANIMI MORBIS, qui secundum verum M. Tullii effatum, & perniciosiores & plures sunt quam corporis, & inter quos ac corporis morbos, eodem teste, Chrysippus comparisonem similitudinis instituere solebat, aliquid adjungere. Ecquid enim juvat, si lateri bene sit, anima autem interim langueat? & si, in corpore sano, mens malesana doloribus acerbis torqueatur? Inde ergo hic libellus natus est, in quo, ut Filio recte consulerem, sermonem omnem ad eum direxi; & sic blande, moreq; pervulgato patrum, illum sum allocutus:

MI FILI:

Perpulisti me, ut quædam generatim, quomodo sanitas corporis tibi conservanda sit, & quid mali horrida illa & infausta morborum nomina portentant, aliorum tradita secutus, strictim, & ut res patiebantur tuæ, exponerem. Sed, æge, o Noster! date mihi vicissim, & porro

Accipito hæc animo, letamque advertito mentem.

Anima vivitur, non corpore. Hujus igitur præcipua
Hh cura

cura tibi habenda. Atque corporis quidem morbos sanare, Medicorum est, ac

-- -- *Abrotanum egro*

Non audet, nisi qui didicit, dare.

Præsidia quoque adipiscendæ sanitatis fere omnia extra quærantur. Enim vero, corrupto & corruptori animo nisi quis ipse medeatur, & ex sese medicinam petat, conclamatum est, nec licebit unquam convallescere. Sunt autem animi morbi **AFFECTVS**. Horum enim intemperies illum cruciat, lancinat, & ad exitium affligit. Cæterum, quid, quotoque numero, ex communi sententia, Affectus sint, tum ex aliis, quos suppeditavi, tum præcipue ex **Ethico**, tenes libellis. Restat, ut, quomodo intra mediocritatem eos coërcere, aut rebelles compescere conveniat, docearis. Queruntur vulgo, hoc disciplinæ genus, quo nullum aliud magis necessarium, & ab Aristotele, & a Philosophis cæteris antiquis, quin & recentibus fere omnibus, Morum Magistros professis, fuisse neglectum: quod ita se habere non negaverim, si de doctrina in artis modum redacta quis loquatur. Inferuere nihilo secius Sapientes Veteres, Cicero præcipue, Seneca, & Epictetus, sparsim suis scriptis præcepta, quomodo Affectus cujusque generis tractandi sint, & Animæ in illos dominium asserendum. Pauca ex his, aliisque Veterum, interdum & Sacras Literas, & ex Novis Scriptoribus fere solum Cardinalem Bonam in subsidium vocando, in tuæ, *Mi Fili*, spem utilitatis, & vitæ correctionem ac emendationem, uti aptim tum memoriæ, tum in Adversariis se offerebant, in ordinem redigere visum est. Atq; uti Phrygiones, e varii coloris filiis,

lis, unum aliquod aulæum formant; sic ego ex pulcherrimis Sapientum scitis concinnavi hoc narthecium. Malui hac in re aliorum quam meis verbis uti: nam, autore Quintiliano, *quæ ab aliis bene sunt dicta, eorum relatio plus interdum autoritatis affert, & laudem majorem conciliat, quam si nostra sint.* Imo, ecquomodo mihi eadem quæ Veteribus vis aut fides? Vt in uno aliquo telo aut gladio multum interest, a qua manu veniat; sic in sententia, ut penetret, valde facit robustæ alicujus & receptæ autoritatis pondus. Rem difficilem ausus sum, & ex Lipsii Politicis exemplar mihi sumpsi: non quod æmularer, (ambitiosum enim id, & ultra meas vires) sed tamen imitarer & sequerer, quantum diversitas ingeniorum, & scribendi in hoc genere exercitatio pateretur. Quippe, cum Plinio juniore, *stultissimum credo, ad imitandum non optima quæq; proponere:* nec magnum peccatum est, utut quis ab archetypo suo labitur & decedit; cum quod idem ille ait, *pictores quoq; pulchram absolutamq; faciem raro nisi in pejus effingant.* Agnosco: Lipsius quæ scripsit, complevisse apes floribus, & innexuisse videntur, mireque concisa sunt omnia & arguta. Nobis non licuit esse tam beatis, ut idem præstaremus. Unde nec aliud propositum fuit, quam, quod Quintilianus alicubi commendat, vitæ præcepta, & pulchritudinem rerum, ut plus ad formandam mentem valeant, claritate orationis, quæ venustissimis Sapientum dictis inest, illuminare. Cæterum, secus ac Lipsius fecit, ea, quæ Græci Autores suppeditarunt, Latinis tantum verbis recensere, rationis & consilii erat: ut nempe melius tibi consulerem, nec te obturbarem, aut irretirem orationis hoc filum. Fecere idem multi,

quorum institutum in praesentia exprimere placuit. Graeca si omnino requiris, ea ad oram libri conjicias licet, qui labor multum conferet ad memoriam. Adduxi etiam interdum dicta Autorum longiuscula, in quo & ipso a Lipsio recessi. Nimirum, in praecipis ad virtutem, pravaricatio mihi videtur, cursim & breviter attingere, quae sint inculcanda, insigenda; nam, plerisque, longiore tractatu, vis quaedam & pondus accedit; utque corpori ferrum, sic monitum praeclarum, non ictu magis, quam mora imprimitur. At, in illo, quod interdum (etsi raro admodum) Autorum verba non rigide, & ut ab iis posita, repono, sed in Casu aut Tempore, pro rationis meae conformatione, pauxillum inflexo, sequutus sum Lipsii exemplum, eoque mihi licere id facere, quod ille fecit, putavi: nec aliter aequè hic, ac illius, constare potuit textus. Tu interim cave sis, obsecro, ullum divinorum horum monitorum numis Philippeis aureis a te auferat, si quis emtor venerit. Quin potius sedulo operam dabis, ut secundum ea res rationesque tuas componas, & quotidie meliorem te reddas. Summa huc redit, ut ostendam, quo pacto Affectibus tum generatim, tum singulis etiam, ne sese efferant, occurrendum sit: & quibus mediis humillime deprimendi, si ex insperato & temere consurrexerint, ne mens tua impotenti temeritatis incursu transversa feratur. Non destituet, in succum & sanguinem ista convertere conantem, successus. Quippe, *nihil est tam difficile* (& jam nunc, *Fili, ex Seneca (a) te affari occipio*) & *arduum, quod non humana mens vincat*, & *in familiaritatem perducatur assidua meditatio*: nulliq; sunt tam feri, & *sui juris Affectus, ut non disciplina perdomentur.*

(a) l. 2. de Ira. c. 18. 13.

tur. Quodcunq; sibi imperavit animus, obtinuit. Quidam, ne unquam riderent, consecuti sunt: vino quidam, alii Venere, quidam omni humore interdixere corporibus. Alius, contentus brevi somno, vigiliam indefatigabilem extendit: Didicerunt alii tenuissimis & adversis funibus currere, & ingentia, vixq; humanis toleranda viribus, onera portare, & in immensam altitudinem mergi, ac sine ulla respirandi vice perpeti maria. Mille sunt alia, in quibus pertinacia impedimentum omne transcendit, ostenditq; nihil esse difficile, cujus sibi ipsa mens patientiam indiceret. Istis, quos paulo ante retuli, aut nulla tam pertinacis studii, aut non digna merces fuit. Nos non advocabimus patientiam, quos tantum præmium expectat, felicitis animi immota tranquillitas? Sanabilibus egrotamus malis: ipsaq; nos, in rectum genitos, natura, si emendari velimus, juvat. Nec, ut quibusdam dictum est, arduum in virtutes & asperum iter est; plano ad euntur. Non vanæ tibi auctor rei venio: facilis est ad beatam vitam via: ini modo bonis auspiciis, ipsoq; DEO bene juvante.

REMEDIA GENERALIA, AFFECTVVM QVORVMCVNQVE MOTVS IMPEDIENTIA.

MI FILI:

(a) Pars magna bonitatis est, velle fieri bonum: at intra voluntatem solam neutiquam sistendum, sed manus operi admovenda. Vti vero in rebus cæteris, (b) nihil rite, nihil providenter, homines sine Dei immortalis ope, honore, consilio, auspicantur, ita

Hh 3

in

(a) Sen. ep. 34. (b) Plin. in Panegyrr.

in Virtutis quoque studio nemo profecerit, nisi di-
vinam opem imploret, (a) neq. continens quis esse
potest, nisi Deus der: (b) nec potest res tanta sine ad-
miniculo Numinis stare. (c) Adi ergo Dominum, &
deprecare illum, & dic ex totis praeordiis tuis quoti-
die inter preces ceteras:

(d) Domine pater & Deus vitæ meæ, ne
derelinquas me. Extollentiam oculorum meo-
rum ne dederis mihi, & omne desiderium a ver-
te a me. Aufer a me ventris concupiscentias,
& concubitus concupiscentiæ ne apprehendant
me, & animæ irreverenti & infrunitæ ne tra-
das me. (e) Da mihi sedium tuarum assistri-
cem Sapientiam, & noli me reprobare a pueris
tuis: quoniam servus tuus sum ego, & filius
ancillæ tuæ, homo infirmus, & exigui temporis,
& minor ad intellectum iudicii & legum. Mit-
te ergo Sapientiam de cœlis sanctis tuis, & a se-
de magnitudinis tuæ, ut mecum sit, & mecum
laboret, & deducat me in operibus meis sobrie,
& custodiat me in sua potentia, & erunt acce-
pta opera mea. Cogitationes enim mortalium
timidæ, & incertæ providentiæ nostræ, ac cor-
pus, quod corrumpitur, aggravat animam, &
terrena inhabitatio deprimit sensum multa co-
gitantem. (f) Deus, in adiutorium meum in-
tende: Domine, ad adjuvandum me festina,
(g) ut ambulem in via bona, & calles iustorum
custo-

(a) Sap. 8. 21. (b) Sen. ep. 41. (c) Sap. l. c. (d) Syrac. 23.

(e) Sap. c. 9. (f) Psal. secundum Latinos 62. 1. (g) Prov. 2. 29.

custodiam. (a) Domine, exaudi orationem meam, & clamor meus ad te veniat. (b) Adjutor meus & liberator meus es tu: Domine ne moreris.

Postquam piis precibus defunctus es, *neutiquam cogitandum tibi, quasi a Deo discedas*: Quin potius semper memineris, quod (c) *prope est a te Deus, tecum est, intus est.*

Ille arbiter & inspector operum, consiliorum, mentis. Ille (d) interest animis nostris, & cogitationibus mediis intervenit.

Ille, (e) quæ nos gerimus auditq, & videt.

(f) Namq; mihi pro vero constat, omnium mortalium vitam divino Numine invisi; neq; bonum neq; malum facinus cujusquam pro nihilo haberi, sed ex natura diversa præmia bonos malosq; sequi.

Omni^{bus} parietibus inscribendum erat,

(g) -- INNOCVI VIVITE: NVMEN ADEST.

(h) Quis enim non timeat omnia providentem, & cogitantem, & animadvertentem, & omnia ad se pertinere putantem, curiosum & plenum negotii Deum?

(i) Quid prodest, ab homine aliquid esse secretum? cum Deus nobis perpetuo affideat, Affectuum, operumque ex illis provenientium (k) malorum bonorumq; nostrorum, observator & custos.

Enim vero, quia sic homines sumus, & circa Affe-
ctuum imprimis motus, plerunque magis Viri ali-
cujus

Hh 4

(a) *Psal.* 101, 1. (b) *Psal.* 69, 6. (c) *Sen. ep.* 41. (d) *Sen.*
ep. 84. (e) *Plaut. Capt.* (f) *Sallust. ad Cæs.* (g) *Ovid.* 1.
de arte. (h) *Cic.* 1, *de Nat. Deor.* (i) *Sen. ep.* 48. (k) *Idem*
ep. 41.

cujus, insigni auctoritate præditi, interventum veremur, quam illum omnituentem DEI oculum; velim ut, de Supremi Numinis præsentia, quæ ubique tibi præsto est, certissimus, jam insuper *fingas, virum aliquem gravem, coram quo turpiter & immodeste te gerere non audeas, & coram quo illi quoque, qui scelere & maleficio pascuntur, vitia sua supprimerent, corycæum tibi adesse, qui te perpetuo respiciat.* Tibi, dictum puta, quod Seneca Lucilio suo dixit; ac, pro Catonis & Lælii nominibus, æque verenda alia substitue: (a) *Aliquis vir bonus nobis eligendus est, ac semper ante oculos habendus, ut sic tanquam illo spectante vivamus, & omnia tanquam illo vidente faciamus.* Hoc, mi Lucili, Epicurus præcepit: custodem nobis & pedagogum dedit: nec immerito. Magna pars peccatorum tollitur, si peccaturis testis adsistat. Aliquem habeat animus, quem vereatur, cujus auctoritate etiam secretum suum sanctius faciat. O felicem illum, qui non ad spectus tantum, sed etiam cogitatus emendat! O felicem, qui sic aliquem vereri potest, ut ad memoriam quoque ejus se componat, atque ordinet! Qui sic aliquem vereri potest, cito erit verendus. Elige itaque Catonem: si hic videtur tibi nimis rigidus, elige remissioris animi virum Lælium: elige eum, cujus tibi placuit & vita, & oratio, & ipsius animum ante te ferens & vultus, illum semper tibi ostende, vel custodem, vel exemplum. Opus est, inquam, aliquo, ad quem mores nostri se ipsi exigant. Nisi ad regulam, prava non corriges.

Imaginario & ficto Custodi, *virum verumque magister ut accedat, necessitas summopere efflagitat.*

gitat. Nam, (a) ut medici est, agrotos, ita Philo-
sophi, homines vitiosos monere.

(b) Quare aliquem invocare oportet virum fidelem
& sapientem: addo & ætate provecum: quippe

(c) Mens, & ratio, & consilium in senibus est.

Est quoque in (d) senibus autoritas major, quod
plura nosse & vidisse creduntur; quod Homerus fre-
quentissime testatur.

Porro talem adscisce, (e) qui velit & possit tibi
prodesse: cujus reverearis occursum, non reformi-
des: qui non castiget errantem, sed emendet: cujus
vita plus oculis, quam auribus probetur. Male im-
perat, qui præcipit, & non facit.

Optime (f) homines exemplis docentur, quæ impri-
mis hoc in se boni habent, quod approbant, quæ præ-
cipiunt fieri posse.

(g) Zeno Stoicus dictitabat, malle se unum videre
Indum, qui sponte flammis absumatur, quam omnes de
Patientia audire & discere probationes.

Isti ergo, tali tantoque, quem descripsi, (h) non eru-
bescas omnia mala tuâ pandere, omnia pectoris pene-
tralia referare. -- Quicquid prave propensionis,
quicquid morbose qualitatibus in te est, quicquid delin-
quis, quicquid etiam boni facis, quicquid cœlitus immis-
sum tibi existimas, prudenti ejus discussioni committe.
Sepe illum deprecare, ut, si quem tibi notaverit tur-
bulentum inherere affectum, indicare ne gravetur;
idq; frequenter faciat, nec, redarguendi verecundia
impeditus, vitia tua dissimulet.

H h 5

Obte-

(a) Epictetus apud Stobæum. (b) Cardin. Bona in manud. ad
cælum c. 2. (c) Cic. de Senect. (d) Quintil. l. 12. c. 4.
(e) Cardin. Bona d. l. (f) Plin. in Paneg. (g) Clem. Alex.
2. Strom. (h) Cardin. Bona d. l.

Obtestare per omnia sacra, ut tibi (a) *manum porrigat adjutricem, ostendat pericula, insidias detegat, & in ancipiti pugna instruat ad victoriam.*

Cæci enim sumus in vitiis nostris, (b) Harpastæ, Senecæ uxoris fatuæ, omnino similes, quæ, cum subito desisset videre, nesciebat esse se cæcam, & subinde pædagogum suum rogabat, ut migret, quod domus tenebrosa esset. Idem nobis accidit, & (c) *nemo se avarum esse intelligit, nemo cupidum.*

Proinde & (d) *abs quo vis homine, cum opus est, beneficium accipere gaudeas correctionis.* Scilicet, a nullo non (e) admoneri bonus gaudet; pessimus quisq; correptorem asperrime patitur.

Hinc adeo, (f) *amicum castigare ob meritam noxiam, immune est facinus, verum in ætate utile & conducibile.*

Neque negari potest, (g) *ita comparatam esse hominum naturam omnium, aliena ut melius videant & dijudicent, quam sua.* Quod eo fit, quia in re nostra aut gaudio sumus præpediti nimio, aut egritudine.

Cum virtuosos quoq; & iis, qui minime affectibus indulgent, tibi vivendum est. (h) *Sumentur a conversantibus mores: & ut quedam in contactos corporis vitia transiliunt, ita animus mala sua proximis tradit. Ebriosus convictores in amorem vini traxit: impudicorum cætus sortem quoq; & siliceum virum emolliit: avaritia in proximos virus suum transtulit. Eadem ex diverso ratio virtutum est, ut omne, quod secum habent, mitigent. Nec tam*

(a) Cæd. Bonam. *manud. c. 2.* (b) Sen. *ep. 50.* (c) Id. *ib.* (d) Terent. in *Adelph.* (e) Sen. 3. *de ira c. 37.* (f) Plaut. in *Trin.* (g) Terent. *Heaut. a. 3. sc. 1.* (h) Sen. 1. 3. *de ira c. 8.*

tam valetudini profuit utilis regio, & salubrius cœlum, quam animis parum firmis, in turba meliorum versari. Quæ res quantum possit, intelliges, si videris, feras quoq; convictu nostro mansuescere, nulliq; immani bestię vim suam permanere, si hominis contubernium diu passa est.

Neque vero velim ego, ut semper & unice ab aliis pendeas. Namque (a) imitatio per se ipsa non sufficit. Quamobrem, tu quoq; (b) *præscribe tibi formam quandam, & legem, quam custodias: quamq; & ipse tecum, & in congressibus hominum observes, ac ad quam verba & facta tua exigas.*

Severa hæc lex esse debet, & simul ac eam transgressus fueris, (c) *quantum potes, teipse coargue. Inquire in te: accusatoris primum partibus fungere, deinde judicis, novissime deprecatoris: aliquando te offende.*

Præcipue, *die jam exacto, examen tui instituas.* Tum, ex Pythagoræ instituto, quid (d) dixeris, audiveris, egeris, accurata lance pensitandum. Non audebunt foras prorumpere Affectus tui, si scient quotidie ad judicem esse veniendum. Tranquillus, altus, ac liber somnus sequetur, (e) *cum aut laudatus est animus, aut admonitus, & speculator sui censorq; secretus, cognoscit de moribus suis.*

Sextium imitare, cuius in more positum, (f) *ut, consummato die, cum se ad nocturnam quietem recepisset, interrogaret animum suum: Quod hodie malum tuum sanasti? cui vitio obstitisti? qua parte melior es?*

Æmu-

(a) Quintil. l. 10. c. 2. (b) Epict. enchir. c. 20. (c) Sen. ep. 28.

(d) Cic. de Senect. (e) Sen. 3. de Ira c. 26. (f) Id. ibid.

Æmulare, cum Seneca, qui sic de se: (a) *Utor hac potestate, & quotidie apud me causam dico. Cum sublatum e conspectu lumen est, & conticuit uxor, moris jam mei conscia, totum diem mecum scrutor, facta ac dicta mea remetior. Nihil mihi ipse abscondo, nihil transeo. Quare enim quicquam ex erroribus meis timeam? cum possim dicere: Vide, ne istud amplius facias, nunc tibi ignosco.*

(b) *Hoc nos pessimos facit, quod nemo vitam suam respicit. Quid facturi simus, cogitamus, & id raro: quid fecerimus, non cogitamus. Atqui consilium futuri ex præterito venit.*

Cæterum, a nocte & quiete, *ad diurna opera* mihi revocandus es. Opera, inquam: nam (c) *nihil est, qui piger est, nimisq, id genus odi ego male:*

Quoniam, (d) *nihil agendo homines male agere discunt.*

(e) *Cernis, ut ignavum corrumpant otia corpus: Ut capiant vitium, ni moveantur, aquæ?*

Vnde,

(f) *-- -- -- Si non
Intendens animum studiis & rebus honestis,
Invidia vel amore vigil torquebere.*

Aut sane (g) *torpent ecce ingenia desidiosæ juventutis:*

& (h) *Neglectis urenda filix innascitur agris.*

(i) *Nemo est casu bonus: discenda virtus est.*

idque mature & in tempore. (k) *Quia juvenis potes discere, potes facilem animum, & adhuc tractabilem ad meliora convertere.* (a) *Quem-*

(a) l. 3. de Ira c. 26. (b) Idem ep. 73. (c) Plaut. in Rudente. (d) Colum. l. 11, c. 11. (e) Ovid. l. 1. de Ponto. (f) Horat. l. 1. ep. 2. (g) Sen. l. 1. controuv. (h) Horat. l. 1. Sat. 3. (i) Sen. ep. 123. (k) Id. ep. 108.

(a) *Quemadmodum ex amphora primum, quod est sincerissimum, effluit, gravissimum quodq; turbidumq; subsidit: sic in ætate nostra, quod optimum, in primo est. Accedit, quod*

(b) *Dediscit animus sero, quod didicit diu.*
Imo,

o Noster! (c), *vite summa brevis spem nos vetat inchoare longam.*

(d) *Huc adverte aures, currit mortalibus ævum, Nec nasci bis posse datur, fugit hora.*

& nimis

(e) -- -- *properat cursu
Vita citato, volucrisq; die
Rota præcipitis vertitur anni.
Duræ peragunt pensa Sorores
Nec sua retro fila revolvunt.*

Absit igitur, ut ista

(f) -- *angustæ miseræq; brevissima vitæ
portio*

in res supervacuas, ineptas, & puerilibus crepundiis similes insumatur. Efficiet sic ista vitæ brevitatis, mortisque cogitatio, (g) *ut nihil unquam humile cogites, nec impense cupias quicquam.*

Idcirco, (h) *quicquid facies, respice ad mortem.*

Simul cogita incertas vices rerum, & eorum, *quæ aliis acciderunt, nihil a te alienum puta; nihil arbitrare non posse evenire, antequam evenerit, ut nihil*

(a) Sen. ep. 108. (b) Sen. in Troad. (c) Horat. l. 1. od. 4. (d) Sil. Ital. l. 15. Bell. Pun. (e) Sen. in Herc. Fur. (f) Juven. Sab. 9. (g) Epictet. in Enchir. c. 27. (h) Sen. ep. 114.

hil mireris, cum advenerit. Multum confert provisio animi, & præparatio, ad minuendos Affectus. Semper (a) Sapiens assuescit futuris malis, & , quæ alii diu patiendo levia faciunt, hic levia facit diu cogitando. Audimus aliquando voces imperitorum, dicentium: Nesciebam, hoc mihi restare. Sapiens scit, sibi omnia restare: quicquid factum est, dicit: **Sciebam.**

Proprium hoc (b) ingenii magni est, præcipere cogitatione futura, & aliquando ante constituere, quid accidere possit in utramq; partem, & quid agendum sit, cum quid evenerit: nec committere, ut aliquando dicendum sit: **Non putaram.**

Non recusemus ferre sortem, quam alii patiuntur, & ad quam subeundam nati sumus. Stemus fidenter, & aperte tela fortunæ adverso excipiamus pectore. (c) Imperetur æquitas animo, & sine querela mortalitatis tributa pendamus. Hyems frigora adducit: algendum est. Æstas calores refert: æstuandum est. Intemperies cœli valetudinem tentat: egrotandum est. Et fera nobis loco occurret, & homo perniciosior feris omnibus. Aliud aqua, aliud ignis eripiet. Hanc rerum conditionem mutare non possumus: id possumus, magnum sumere animum; & viro bono dignum; quo fortiter fortuita patiamur, & naturæ consentiamus. Natura autem hoc, quod vides, regnum mutationibus temperat. Nubilo serena succedunt: turbantur maria, cum quieverunt: stant invicem venti: noctem dies sequitur: pars cœli consurgit, pars mergitur: contrariis rerum æternitas constat. Ad hanc legem animus noster aptandus est: hanc sequatur, huic pareat: & , quæcunq; fiunt, debuisse fieri, patet:

(a) Sen. ep. 76. (b) Cic. 1. Offic. (c) Sen. ep. 107.

patet: nec velit objurgare naturam. Optimum est, pati, quod emendare non possis: & Deum, quo auctore cuncta proveniunt, sine murmuratione comitari. Malus miles est, qui Imperatorem gemens sequitur. Quare impigri atq; alacres excipiamus imperia, nec deseramus hunc operis pulcherrimi cursum, cui, quicquid patimur, intextum est: & sic alloquamur Deum, cujus gubernaculo moles ista dirigitur, quemadmodum Cleanthes alloquutus est:

Duc me parens, celsiq; dominator poli,
Quocunq; placuit. Nulla parendi mora est:
Assum impiger.

Eandem hanc animi moderationem transfer ad res minutas quoque, vel potius ab his ordire, ut usque & usque in Bonæ Mentis consuetudinem te infirmes, ac *pedetentim ad altiora & sublimia progrediaris.* (a) *Theatra cum frequentas, te nulli nisi tibi ipsi studere appareat: hoc est, ea duntaxat fieri velis, quæ sunt: & eum solum vincere, qui vincit. Clamore autem, aut arrisione, aut longiore commotione penitus abstineto. Ac post discessum, ne multum de iis, quæ acciderunt, disputa.*

(b) *Cum ad Magnatum aliquem iturus es, proposito tibi, fore, ut eum domi non invenias, ut inclusus sit, ut occludantur tibi fores, ut ille te negligat.*

Item, (c) *Cum puerum vocas, fieri posse cogita, ut præsto non sit: & ut sit, nihil agat ex animi tui sententia. Neq; vero ei tam bene sit, ut tuarum perturbationum habeat ille potestatem. Et sane, (d) si puerum peccare non vis, stultus es: Id enim postulas, ut vitium non sit vitium, sed quiddam aliud.*

Simi-

(a) Epictet. Enchir. c. 49. (b) Id. c. 52. (c) Idem c. 17.
(d) Idem c. 19.

Similiter, (a) Si ollam diligis, memineris te ollam diligere: nam, ea confracta, non perturbaberis. Si amicum, hominem a te diligere; nam, eo mortuo, non perturbaberis.

Pari modo, (b) Opus aliquod aggressurus, ipse tibi subjicito, cujusmodi sit illud opus. Si lavatum abieris, ea tibi proposito, quæ sunt in balneo: alios perfundi, alios loco pelli, alios convicia facere, alios furari. Sic tutius rem aggredieris, si ipse tibi dixeris: Et statim lavabo, & meum institutum naturæ congruens conservabo. Eodemq; modo in unoquoq; negotio.

(c) Oleum si effunditur, villum cum surripitur, dicis: ὅτι πῶστε πωλεῖται ἀπάθεια, πῶστε ἀπαρξία: Tanti venit tranquillitas, tanti constantia: gratis autem nihil acquiritur.

In summa, (d) quemadmodum in ambulando caves, ne clavum calces, pedemve distorqueas: sic in degenda vita cave, ne gubernatricem actionum mentem ledas.

(e) Quicquid inciderit, in eo memento, ad te conversus, inquirere, qua facultate sis ad usum ejus instructus. Si quam formosam videris, ad eam rem temperantiæ facultas in promptu erit. Si labor objectus fuerit, tolerantiam reperies: si convicium, patientiam invenies. Quod si te ita consuefeceris, visis non obtemperabis.

Amplius sciendum, & tenendum memori mentē, esse quoq; victum cultumq; corporis, si nimius fue-

(a) Epict., in enchir., c. 8. (b) Id., c. 9. (c) Id., c. 17. (d) Idem, c. 60. (e) Idem c. 14.

fuerit, magnum ad Affectuum intemperiem & concitationem irritamentum.

Turpissimum, (a) *plus cibi ingerere, quam capias, & stomachi tui non nosse mensuram. Quam multa ebrii faciunt, quibus sobrii erubescant!*

Quippe, inulto cibo & potione completis, (b) *neque pes, neque mens, satis suum officium facit.*

(c) *Postera die ex ore halitus crudi, ac fere rerum omnium oblivio, morsque memoria.*

(d) *Premium vero summum ebrietatis, libido portentosa, & jucundum nefas.*

(e) *Hanc ergo sanam & salubrem formam vite tenere memento, ut corpori tantum indulgeas, quantum bonæ valetudini satis est. Durius tractandum est, ne animo male pareat: cibus famem sedet, potio sitim exstinguat, vestis arceat frigus.*

(f) *Quæ gloria est, capere multum? cum penes te palma fuerit, & propinationes tuas strati somno, ac vomitantes, recusaverint; cum superstes toti convivio fueris; cum omnes viceris virtute magnifica, & nemo tam vini capax fuerit, vinceris a dolio.*

(g) *Alexandrum tot itinera, tot prælia, tot hyemes, per quas, victa temporum locorumque difficultate, transierat, tot flumina ex ignoto cadentia, tot maria, tutum dimiserunt: intemperantia bibendi, & ille Herculanæus ac fatalis scyphus, condidit.*

Ex his, uti sua sponte consequitur, *fugendum esse consortium* illorum, qui, Epicuri de grege porci, animam pro sale habent, & non, ut vivant, comedunt, sed, ut comedant, vivunt: ita haud minus fugiendi alii omnes, qui flagitiis se nobilitant, & fræna

(a) Sen. ep. 83. (b) Ter. in Eun. (c) Plin. l. 14. H. N. c. 22.

(d) Id. ib. (e) Sen. ep. 8. (f) Idem ep. 83. (g) Id. ib.

Affectibus vitis que laxant. Dat enim contagio labem, & (a) hærebit tumor, quam diu cum superbo conversaberis : nunquam sevitiam in tortoris contubernio pones : incendunt libidines tuas adulterorum sodalitia.

Quin imo,

- (b) Si vitare velis acerba quedam,
Et tristes animi cavere morsus,
Nulli te facias nimis sodalem,
Gaudebis minus, & minus dolebis.

Etiam ipse egressus in publicum, & cum multis conversatio, non caret damno : atque in cœtu hominum, (c) nemo non aliquod nobis vitium aut commendat, aut imprimit, aut nescientibus allinit. Vtque quo major est populus, cui commiscemur, hoc periculi plus est.

Nempe (d) si velis vitiis exui, longe a vitiorum exemplis recedendum est : turbæ immixtus,

- (e) Periculosa plenum opus aleæ
Tractas, & incedis per ignes
Suppositos cineri doloso.

REMEDIA GENERALIA, AFFECTVS COMMOTOS COMPESCENTIA.

MI FILI:

(f) Pars superior mundi & ordinatior, ac propinqua sideribus, nec in nubem cogitur, nec in tempestatem

(a) Sen. ep. 104. (b) Martial. l. 12. epigr. 34. (c) Sen. ep. 7.
(d) Id. ep. 104. (e) Horat. l. 2. Od. 1. (f) Sen. l. 3. de Ira. c. 6.

tem impellitur, nec versatur in turbinem: omni tumultu caret: inferiora fulminant. Eodem modo sublimis animus, quietus semper, & in statione tranquilla collocatus est.

Atque, ô terque quaterque beatos, quibus talis mens inest, (a) quos nulli metus terrent, nullæ agri- tudines exedunt, nullæ libidines incitant, nullæ futi- les lætitiæ exultantes languidis liquefaciunt volupta- tibus. Ut maris igitur tranquillitas intelligitur, nul- la ne minima quidem aura fluctus commovente: sic animi quietus & placatus status cernitur, cum pertur- batio nulla est, qua moveri queat.

Sed, admodum paucis, ab omni memoria, ea obti- git felicitas, ut mentem perpetuo serenam haberent,

(b) -- -- vix totidem, quot
Thebarum portæ, vel divitis ostia Nili.

Quapropter, (c) semper tu hoc facito, cogites, id opti- mum esse, tute ut sis optimus: si id nequeas, saltem ut optimis sis proximus: & quoties erumpere vult affe- ctus, atque simul ac movere sese occipit,

(d) -- hunc frenis, hunc tu compesce catena.

Fungatur mens officio, nec malis suis cedat, sed contra audentior imperium suum vindicet.

(e) Tenendum est, rapiente fluctu, gubernaculum, luctandum cum ipso mari, eripienda sunt vento vela.

(f) Turpis est navigii rector, cui gubernacula flu- ctus eripuit, qui fluctuantem navim tempestati per- misit,

qui, (g) attonitus & vomitans.

li 2

Verum,

(a) Cic. 5. Tusc. (b) Juven. Sat. 13. (c) Plaut. in Trin.
(d) Horat. l. 1. Epist. (e) Sen. ep. 109. (f) Cardin. Bonæ
in manud. ad cæl. c. 15. (g) Sen. ep. 109.

Verum, heus tu! *Maturato opus*, (a) imbecillis est primo omnis affectus, deinde ipse se concitat, & vires dum procedit, parat. Proinde,

(b) *Principiis obsta, sero medicina paratur,
Cum mala per longas invaluere moras.
Sed propera, nec te venturas differ in horas,
Qui non est hodie, cras minus aptus erit.*

Ita profecto res se habet: (c) Facilius est excludere pernicioſa, quam regere: & non admittere, quam admiſſa moderari. Nam cum ſe in poſſeſſione poſuerunt, potentiora reſtore ſunt, nec recidi ſe minuiſſe patiuntur. Deinde, ratio ipſa, cui freni traduntur, tamdiu potens eſt, quamdiu diducta eſt ab affectibus: ſi miſcuit ſe illis, & inquinavit, non poteſt continere, quos ſubmovere potuiſſet. Ut in præceptis datis corporibus nulum ſui arbitrium eſt, nec reſiſtere morarive dejecta potuerunt, ſed conſilium omne & pœnitentiam irrevocabiliſ præcipitatio abſcidit, & non licet eo non pervenire, quo non ire licuiſſet: ita animus, ſi in iram, amorem, alioſq; ſe projecit affectus, non permittitur regere impetum. Rapiat illum oportet, & ad imum agat ſuum pondus, & vitiorum natura proclivis.

(d) Optimum eſt itaq; ad primum mali ſenſum mæderi ſibi: tum verbis quoq; ſuis minimum libertatis dare, & inhibere impetum. Facile eſt autem, Affectus ſuos, cum primum oriuntur, deprebendere. Morbum ſigna præcurrunt. Quemadmodum tempeſtatis ac pluvie ante ipſas notæ veniunt: ita iræ, amoris, omniumq; iſtarum procellarum, animos vexan-

(a) Sen. ep. 116. (b) Ovid. de rem. am. (c) Sen. l. 1. de Ira c. 7. (d) Idem l. 3. 6, 10.

vexantium, sunt quedam prænuntia. Qui comitiali vitio solent corripī, jam adventare valetudinem intelligunt, si calor summa deseruit, & incertum lumen, nervorumq; trepidatio est, si memoria sublabitur, caputq; versatur. Solitis itaq; remediis incipientem casum occupant, & odore gustuq;, quicquid est, quod alienat animos, repellitur: aut fomentis contra frigus rigoremq; pugnatur.

Quæris, quibus mediis adversus Affectus pugnandum sit? Principio **Objecta**, quibus ii moventur, a te segrega.

(a) Omne rationale animal nihil agit, nisi primum specie alicujus rei irritatum est, deinde impetum cepit, deinde assensio confirmavit hunc impetum.

Solenter itaque adducendus est animus (b) ad alia studia, sollicitudines, curas, negotia. Loci deniq; mutatione, tanquam egroti non convalescentes, sæpe curandus est.

(c) Nec vino infirmum animum committamus, nec formæ, nec adulationi, nec ullis rebus blande trabentibus.

(d) Quantum possumus nos, a lubrico recedamus: in sicco quoq; parum fortiter stamus.

Jam, uti corporis morbi **contrariis curantur**, ita animi quoq;. Arbor curva, ut recta evadat, in partem adversam flectitur: atq; quemadmodum (e) Bestiis cicuratis capimus immanitate efferatas; sic gaudio timorem, metui spem, desiderio difficultatem optatis potiundi, opponere oportet.

(f) **Rebus angustis animosus atq;
Fortis appare: sapienter idem**

II 3

Con-

(a) Sen. ep. 113. (b) Cic. 4. Tusc. (c) Sen. ep. 116. (d) Idem ibid. (e) le Pere Senault dans l'usage des passions, trait. 3. discours. 5. (f) Hor. l. 2. Od. 10.

*Contrahes vento nimium secundo
Turgida vela,*

Etenim,

(a) *Sperat infestis, metuit secundis
Alteram sortem, bene præparatum
Pectus.*

Atque hoc est, quod Plato, autore Plutarcho, (b) suadebat, insanum Deum, alio sobrio repressum, castigare.

Idque a Socrate haustum, qui (c) vergendo in diversam partem, & contrarios perturbationi motus instituendo, invictum erectumq; se servavit.

Porro, talem te præsta in tuis rebus, prout in alienis te gerere consueveris. (d) Exempli gratia: Si vicini puer poculum, aut quid aliud confregerit, in promptu illud statim est: Ita fieri solere. Scito igitur, si & tuum confractum fuerit, eundem esse te oportere, qui fueris, cum frangeretur alienum.

Quippe, (e) nonne id flagitium est, te aliis consilium dare, foris sapere, tibi non posse auxiliarier? Vulgo tamen hæc passim & ubique fieri videas.

(f) Filius alterius obiit, aut uxor: nemo est, quin dicat, humanum id esse. Sin ipsi alicui id acciderit, statim, Heu mihi, inquit, o me miserum! Meminisse autem oportebat, ut affecti simus, cum tale quippiam de aliis audiverimus.

Abiit a me, ut istis agritadinum medicinis eam quoque adscribam, etsi Ciceroni (g) magnam dictam, quam affert longinquitas & dies.

Sane

(a) Hor. l. 2. Od. 10. (b) lib. de audiendis Poëtis. (c) Idem lib. de Ira cohibenda. (d) Epictet. in Enchir. c. 33. (e) Ter. Heaut. 4. 5. s. 1. (f) Epictet. in Enchir. c. 33. (g) 3. Tusc.

Sane quidem, (a) *omnis ægritudo mora tandem decrescit; & licet contumacissimum, dolorem tempus adimit & enervat.*

At, *visne igitur diem operiri, quo Affectus te invito desinat, an ipse illi finem imponere? Cur non id consilio præripes, quod allatura est diuturnitas?*

De cætero, inhæreat animo, & quasi Oraculo missum placeat: (b) *Ita vita est hominum, quasi cum ludas tesseris. Si illud, quod maxime est opus jactu, non cadit, illud, quod cecidit forte, id arte ut corrigas.*

REMEDIA AMORIS.

MI FILI:

Est quidam bonus amor, qui (c) *illuc tendit, unde sumsit originem: ad bonum accedit; quia a summo bono procedit.*

Hunc cave sis unquam ex animo dimoveas tuo, atque utinam is omnes urat!

(d) *O felix hominum genus,
Si vestros animos amor,
Quo cælum regitur, regat!*

Sed turpi & Venereo amorì litare non licet, æque bonæ mentis ac corporis pesti, ac ideo malo propemodum haud medicabili. Nempe, quia & fere

(e) -- *amor, morbi non amat artificem.*

Tu audi recta suadentem, & pessulum animo obde, ne queat irrepere. Quæ dum dico, id dico, ut *otium diligenter fugias.*

Li 4

Nam-

(a) Cardin. Bona manud. ad cæl. c. 15. (b) Ter. in Adolph. 4. 4. f. 7. (c) Card. Bona manud. ad cæl. c. 13. (d) Boeth. 1. 2. de consol. met. 8. (e) Propert. 1. 2. el. 1.

Namque,

(a) *Quam platanus vino gaudet, quam populus
unda,*

*Et quam limosa canna palustris humo;
Tam Venus otia amat.*

Vnde, si

(b) *Queritur, Ægysthus quare sit factus adulter:
In promptu causa est, desidiosus erat.*

Atenim,

(c) *Otia si tollas, periere Cupidinis arcus:
Contemtaq; jacent, & sine luce, faces.*

(d) *Desidiam puer ille sequi solet: odit agentes.*

Quoniam ergo

(e) *Cedit amor rebus, res age, tutus eris,*

Tantum huic remedio tribuit Theocritus, ut (f) unum & solum crederet, sic effatus: *Nullum contra amorem natum est remedium aliud, o Nicia, nequod vel inungi vel aspergi possit, ut opinor, quam Musa.*

Sed, supersunt alia quoque: inter quæ non minimo loco ponenda in cibo & potu frugalitas, quæ, (g) inimica luxuriosis epulis, & aliena nimie vini abundantie.

Etenim, (h) verbum hercle hoc verum est: sine Cerere & Libero friget Venus.

Contra vero,

(i) -- *Venus in vinis, ignis in igne furit.*

Ad

(a) Ovid. de Rem. am. (b) Idem ib. (c) Idem ib. (d) Id. ib.
(e) Id. ib. (f) Idyl. 11. (g) Val. Max. l. 2. c. 5. (h) Terent. in Eun. a. 4. f. 5. (i) Ovid. 1. de arte am.

Ad hæc,

- (a) *Ecce cibos etiam, medicine fungar ut omni
Munere, quos fugias, quosve sequare, dabo.
Daunius, an Libycis bulbis tibi missus ab oris,
An veniat Megaris, noxius omnis erit.
Nec minus erucas aptum vitare salaces;
Et quicquid Veneri corpora nostra parat.
Vtilius sumas acuentes lumina rutas;
Et quicquid Veneri corpora nostra negat.*

Porro, cum Fœminis quoties tibi agendum erit,
oculos emissitios habere minime oportet.

- (b) *Si nescis, oculi sunt in amore duces.*

- (c) *Amoris principium est ea voluptas, quæ ex
aspectu percipitur: nemo enim amore capitur, nisi
prius specie fuerit oblectatus.*

Vsque adeo (d) *amoris fons & origo est flos cor-
poris, qui oculos intrat, ex oculis in animum dilabitur.
Prima enim via, qua pulchritudo se insinuat, sunt oculi.*

Quemadmodum autem nolo, ut obtutu, in Fœ-
minas defixo, hæreas, ita prohibeo pariter, ut oculis
usurpes *libros ad corruptelam factos*, iisque
legendis tempus, cujus jactura nulla gravior, teras,
vel potius perdas.

- (e) *In quo numero Amadeus est, ingeniosi nugatoris
proles, pestilens liber, si unquam fuit, & natus blan-
de inficere aut interficere juventutem.*

Necte impedio, quo minus in eundem censum re-
feras, multos ex iis, quos Recentiores, ejus vestigia cal-
cando, composuere, quiq; vulgo, jure bono, barbaro
vocabulo, Romanzi audiunt. li 5 Et.

- (a) *Ovid. de rem. am.* (b) *Propert. l. 2. el. 15.* (c) *Aristot. 9.
Ethic. c. 5.* (d) *Max. Tyr. Dissert. 9.* (e) *Lipsius notis in
l. 1. Polit. c. 10. sub f.*

Etiam Veteres amatorii libelli caute admodum tractandi:

- (a) *Carmina quis tuto potuit legisse Tibulli?
Vel tua, cujus opus Cynthia sola fuit?*

Novissime,

- (b) *Si potes, & ceras remove. Quid imagine
muta*

Carperis? hoc periit Laodamia modo.

Amplius, probe tecum perpende, *quanta mala
eos maneant, quos Amor occupavit*, ita ut

- (c) *cum Leone, & cum Excetra, cum Cervo, cum
Apro Aetolico, cum avibus Stymphalicis, cum Anteo
deluctari mavelim, quam cum amore.*

Crede mihi,

- (d) *Durius in terris nihil est quod vivat amante.*

Scilicet, (e) *in amore hæc omnia insunt vitia: inju-
ria, suspiciones, inimicitiae, induciae, bellum, pax rursum;*

- (f) *insomnia, ærumna, error, terror, & fuga,
ineptia, stultitiaq; adeo, & temeritas, incogitantia,
excors immodestia, petulantia, cupiditas, & male-
volentia. Inheret etiam aviditas, desidia, injuria,
inopia, contumelia, & dispendium, multiloquium,
pauciloquium.*

Neque hæc solum, sed &

- (g) *Labitur totas furor in medullas,
Igne furtivo populante venas.
Non habet latam data plaga frontem,
Sed vorat tetras penitus medullas.*

Quid

(a) Ovid. de rem. am. (b) Idem ib. (c) Plautus in Persa a. 1. s. 1.
(d) Propert. l. 2. el. 18. (e) Ter. in Eun. (f) Plaut. in Mer-
cat. (g) Sen. in Hippol. a. 1.

Quid multa?

(a) Quot lepores in *Atbo*, quot apes pascuntur in
Hybla:

Cerula quot baccas *Pallados* arbor habet:
Littore quot conchæ: tot sunt in amore do-
lores.

(b) Nec omnis ætas ad perdiscendum sat est amanti,
dum id perdiscat, quot pereat modis.

Vnde passim vides, (c) adeo homines immutarier
ex amore, ut non cognoscas eundem esse.

Quoties igitur pulchritudo aliqua animum tuum
tentat, dic illico: (d) *Apagesis* amor, tuas res tibi
habe. Quid mihi tecum, *venustas*, rerum o-
mnium res maxime *inconstans* & *fallax*?

Tu, anceps

(e) -- -- bonum mortalibus,
Exigui donum breve temporis,
Ut velox celeri pede laberis!
Non sic vere novo prata decentia
Æstatis calidæ despoliat vapor,
Sævit solstitio cum medius dies,
Et noctem brevibus præcipitat rotis;
Languescunt folio lilia pallido,
Et gratæ capiti deficiunt rosæ:
Ut fulgor, teneris qui radiat genis,
Momento rapitur, nullaq; non dies
Formosi spoliū corporis abstulit.
Res es forma fugax. Quis sapiens bono
Confidat fragili?

Cæte-

- (a) Ovid. l. 2. de arte am. (b) Plaut. in Trucul. a. 1. f. 1.
(c) Ter. in Eun. a. 2. f. 1. (d) Plaut. in Trin. a. 2. f. 1.
(e) Sen. in Hippol.

Cæterum, etſi, (a) tu quod cavere poſſis, ſtultum
admittere eſt,

&

(b) -- vitare plagas in Amore ne laciāmur,
Non ita difficile eſt, quam captum retibus ipſis
Exire, & validos Veneris perrumpere nodos.

Docebo tamen, (c) quomodo te redimas captum quam
queas minimo, antequam te afflictes, aut maceres,
& quod ille apud Cornicum (d) ſibi evenire queritur,
amore ardens, & prudens, ſciens, vivus, vidensq; pereas.
Quamobrem, cum victus es;

(e) Quale ſit id quod amas, celeri circumſpice
mente,
Et tua læſuro ſubtrahere colla iugo,

Sed heus, feſtina:

(f) Dum novus eſt, cæpto potius pugnemus amori:
Flamma recens parva ſparſa reſedit aqua.

Mox,

(g) -- in primo limine ſiſte pedem.
Opprime, dum nova ſunt, ſubiti mala ſemina
morbi.

Crede mihi,

(h) Amorem ſi fovere atq; alere deſiſtas, cadit,
Breviq; vires perdit extinctus ſuas.

Semel

(i) Qui blandiendo dulce nutrit malum,
Sero recuſat ferre, quod ſubiit, iugum.

Nimi:

(a) Ter. in Eun. a. 4. ſ. 6. (b) Lucret. l. 4. (c) Ter. in Eun. a. 1.
ſ. 1. (d) ibid. (e) Ovid. de rem. am. (f) Idem ep. 16. He-
roid. (g) Idem de rem. am. (h) Sen. in Octav. (i) Idem
in Hippol.

Nimirum, (a) *aliis rebus occupanda mens, quæ curas ingerant, & memoriam rei amatæ dimoveant.*

Quidam, (b) *etiam novo quodam amore veterem amorem, tanquam clavo clavum, ejiciendum putant.*

Sane quidem,

(c) *Successore novo vincitur omnis amor: verum caute hoc remedio utendum, ne Scyllam, quod ajunt, vitare cupiens, in Charybdin incidas.*

Quibusdam (d) *profuit, attente disquirere mala & incommoda rei amatæ, quæ ejus decorem & amabilitatem imminuerent.*

Cape in rem hanc exemplum geminum. (e) *Virgo quædam pulchra, nobilis, & casta, abrafo universo crinium suorum ornatu, & elegantia, facieq; sua cinere aqua permixto delibuta, juvenem, erga se impudice inflammatum, accivit, eiq; cum ingressus esset, dixit: Tune hanc deformitatem amas? Ille vero, tanquam ex furore revocatus, non modo libidinis ignem extinxit, verum etiam ingenti postea castitatis amore flagavit.*

Sic (f) *Hypatia, virgo Alexandria doctissima, prolati quibusdam muliebribus pannis, inq; auditorem suum, a quo contra honestatem adamabatur, conjecit, & impuri ortus signo demonstrato, dixisse fertur: Istud quidem adamas, adolescens; nihil autem pulchrum. Hunc vero, præ pudore, & stupore indecoræ demonstrationis, erubuisse, modestioremque esse factum.*

Quid?

(a) Cardin. Bona, *manud. ad cæl. c. 13.* (b) Cic. 4. *Tusc.*
 (c) Ovid. *de rem. am.* (d) Card. Bona *c. 13.* (e) Pelusiotæ
 l. 2. ep. 53. (f) Suidas in *Hypatia.*

Quid? quod (a) multos curavit pudor, dum se digito signari, vulgiq; fabulam fieri doluerunt; & rei fœditatem, plenam dedecore, plenam periculis, & pœnitentiæ obnoxiam considerarunt.

Adjicio in cumulum *externa quædam remedia*, ne quid desit. (b) E bove sylvestri nigro, si sanguine ricini lumbi perungantur mulieri, tedium Veneris fieri dixit Osthanes. Idemq; accidere, pota birci urina, admista propter fastidium nardo.

Nec minus proditum, (c) pulverem, in quo se mula volutaverit, corpori inspersum, mitigare ardores amoris.

Hoc nempe superest, ut, quibus aliter mederi non licet, amantes ab asino medicinam accipiant: sed optimum fortasse fuerit, si pro eo in pistrino molant.

REMEDIA ODII.

MI FILI:

(d) Odium definiunt affectionem quandam & propositum male faciendi, ejusque occasionem captandi.

Atque (e) odium gignitur, quod quem odio quis habet, eum vel simpliciter, vel erga se malum esse imaginatur. Nam, & qui injuria se affectos putant, autorem injuriæ odisse solent: & qui alias injuriosi aut malitiosi videntur, eos aversamur atq; moleste ferimus.

Maxime odium accenditur, si ab iis inimiciter nobiscum agatur, a quibus maxime amari oportebat.

Ita.

(a) Card. Bona manud. ad cœl. c. 13. (b) Plin. l. 28. H. N. c. 19.

(c) ab eodem l. 30. c. 16. (d) Plutarchus in libello de invidia & odio inf. (e) Idem ib. sub. init.

Itaque accerbissima esse odia inter conjunctissimos solent: (a) *Et hoc non sine ratione contingit, dum, a quibus deberi sibi beneficium expectant homines, ab eisdem non solum privari beneficio, sed insuper ladi se putant:*

Et tum, (b) *quæ apud concordēs vincula charitatis, incitamenta irarum sunt apud offensos.*

Hinc apud Græcos (c) proverbio ferebatur: *Fratrum contentiones Et iræ sunt acerbissimæ, Et, qui se nimium amant, hi se nimium oderunt.*

Exemplo Atreus apud Senecam in Thyeste, qui nec ambigebat propriam vitam perdere, dummodo simul frater periret, plenus furoris clamitans:

*Hæc ipsa pollens inclyti Pelopis domus
Ruat vel in me, dummodo in fratrem ruat.*

Additque vesanus:

*Age, anime, fac, quod nulla posteritas probet,
Sed nulla taceat; aliquod audendum est nefas,
Atrox, cruentum.*

Id ergo inter Iram & Odium maxime interest, quod illa, cum multa in inimicum mala ingesta fuere, detumescit: nec enim aliud iratus, quam reponere injuriam, ac talionem reddere desiderat, deinde misertur. Odium autem nunquam terminatur misericordia, ne in morte quidem.

Qualem animum spirant illa Phalaridis, epistola ad Eteonicum: *Malevolentia Pythonis erga me non vivus modo obliviscar nunquam; sed ne mortuus quidem.*

Patet ex istis, quanta hujus Affectus si enormitas. Cui accedit, quod, si aliquibus credimus, (a) uni-

(a) *Aristot. l. 7. pol. c. 7. (b) Tacit. l. 1. Ann. (c) Aristot. l. cii.*

(a) *universa Philosophia nulla remedia suppeditare potest, ad sanandos eos, qui hoc malo laborant.*

Et vero, inter ipsos Judæos, divinis institutis cultissimam gentem, pro lege, quanquam perperam, valebat: (b) *Diliges proximum tuum, & odio habebis inimicum tuum*: ut haud mirum sit, Gentiles odiis multum indulsisse.

Nos itaque Christiani, id quod Philosophia ignorat, quod ab humana sapientia neutiquam profectum est, *audiamus Christi Servatoris præceptum*, severe edicentis: (c) *Ego dico vobis: Diligite inimicos vestros, benefacite his, qui oderunt vos: & orate pro persequentibus & calumniantibus vos: ut sitis filii Patris vestri, qui in cælis est: qui Solem suum oriri facit super bonos & malos, & pluit super justos & injustos.*

Istam imprimis Magistri sui doctrinam graviter inculcandam sibi sumens Discipulus Johannes, (d) hortatur nos, verbis dulcissimis: *Filioli mei, non diligamus verbo, neq. lingua, sed opere & veritate.*

Nec minus (e) interminatur: *Qui non diligit, manet in morte: omnis, qui odit fratrem suum, homicida est. Et scitis, quoniam omnis homicida non habet vitam æternam in semetipso manentem.*

Id pronunciatum recte secum reputans Augustinus, (f) *qui odit fratrem suum, inquit, homicida est. Nondum armata manus est, nondum faucem obsedit, nondum insidias preparavit, nondum venena quæsit, & reus in oculis Domini, concepto jam odio tenetur. Adhuc vivit, quem querit occidere, & occidisse jam judi-*

(a) P. Senault dans l'usage des passions, p. 265. (b) Matth. c. 5. v. 43. (c) Ib. v. 44. 45. (d) 1. Ep. c. 3. v. 18. (e) Ibid. v. 15. (f) l. 50. Hom. 42.

judicatur. Quantum enim ad te pertinet, occidisti, quem odisti.

Atque sufficere utique poterant de salute sua sollicitis, sanisque ac sobriis omnibus, ad Odium minime in pectus admittendum, aut saltem receptum rursus inde eradendum, quæ divinitus sic nobis fuere præcepta. Sed neque hic penitus excludi se patitur, rationem in subsidium advocans, ancillaris Philosophia.

Hæc igitur abesse jubet ab homine, sancto animali, menteque alta prædito, *Affectum turpissimum, qui ne in bruta quidem*, quæ Natura ventri & appetitui sensitivo obedientia finxit, *cadit*.

Negari nequit, (a) pugnant inter se aquilæ & dracones, cornices & ululæ, parus & carduelis, quorum etiam sanguinem occisorum permisceri negant, sed, etiam si quis confundat, utrumque, seorsim diffluere narrant. Probabile est etiam, leoni adversus gallum, & elephantum adversus murem atrox odium esse, a metu natum: Quod enim timetur, id odio est.

At, animantia ista (b) in suo genere probe degunt; congregari videmus, & stare contra dissimilia. Leonum feritas inter se non dimicat; serpentum morsus non petit serpentes: nec maris quidem belluæ ac pisces, nisi in diversa genera, seviunt.

Poëta hæc (c) sic extulit:

-- -- -- parcit

Cognatis maculis similis fera. Quando leoni
Fortior eripuit vitam leo? quo nemore unquam
Exspiravit aper, majoris dentibus apri?

Kk

Indi-

(a) Plut. lib. de invidia & odio. (b) Plin. Præf. l. 7. H. N.

(c) Juven. Sat. 15.

*Indica tigris agit rapida cum tigride pacem
Perpetuam: sævis inter se convenit ursis.*

Non itaque homo hominem odisse debet, (a) cum inter nos cognationem quandam natura constituerit. Quippe

(b) -- cœlesti sumus omnes semine oriundi.

Proinde, (c) quomodo hominem homini natura conciliat: sic inest quoq; huic rei stimulus, qui nos amicitiarum appetentes faciat.

Ab Origine communi, quo implicamur, nexum, atctius adhuc constringit *vinculum*, quo in *humana societate* colligamur.

(d) *Nefas*, est nocere patriæ: ergo civi quoq;. Nam hic pars patriæ est. Sanctæ partes sunt, si universum venerabile est: ergo & homo homini. Nam hic in maiore tibi urbe civis est. Quid si nocere velint manus pedibus? manibus oculi? Ut omnia inter se membra consentiunt, quia, singula servari, totius interest: ita homines singulis parcent, quia ad cœtum geniti sumus. Salva autem esse societas, nisi amore & custodia partium, non potest.

Porro, (e) *Odii Affectui* tantum subjacent *ignavi*, timidi, & suspiciosi, qui undecunq; damnum metuunt.

Quo quisque major est, & ad majora genitus, eo magis sibi ab illo cavet.

Inquires: (f) Quid ergo? impunitus erit ingratus? Quid ergo? impunitus erit impius? quid malignus? quid avarus? quid impotens? quid crudelis?

Sicci-

(a) l. 3. ff. de just. & jure. (b) Lucret. l. 2. (c) Sen. ep. 9.
(d) Idem l. 2. de Ira c. 31. (e) Cardin. Bona, manud. c. 13.
(f) Sen. l. 3. de Benef. c. 17.

Siccine vero (a) impunita tu credis esse, quæ invisa sunt? aut ullum supplicium gravius existimas publico odio?

(b) Eos quidem, quorum calumnia Socrates fuit oppressus, ut extreme malos, ita oderunt, itaq, aver-
sati sunt cives, ut neq, ignem eis accenderent, neq, in-
terrogantibus responderent, neq, in balneo aqua ute-
rentur eadem, sed, quæ illi lavissent, eam, tanquam pol-
lutam, iuberent a ministris effundi: donec illi impa-
tientia odii sese suspendunt.

Ad hæc, odio abstinendum, siue par est, quem laces-
sere voles, (c), siue superior, siue inferior. Nam, cum
pare contendere, anceps est: cum superiore, furiosum:
cum inferiore, sordidum.

(d) Major vero nulla potest esse vitiositas, quam
optimis esse inimicum.

(e) Ac Therstæ corporis vitia Homerus cum mul-
tiplici atq, copiosa oratione depinxisset, animi pravi-
tatem brevissime, ac quasi uno verbo, expressit:

Pelidæ imprimis erat, atq, inimicus Vlyssi.

Odium intra nos conceptum amplius compe-
scimus, (f) excitando animum ad amorem, per
considerationem alicujus boni in eo, quod odio ha-
betur.

(g) Vel, ubi fides fit, nos non esse affectos injuria,
vel, ubi, quos ut malos oderamus, bonos esse persuade-
tur, vel beneficio accepto. Ultima enim gratia, ut
Thucydides inquit, etsi minor sit, tamen tempestive in
vita potest majus diluere crimen.

K k 2

Sed

(a) Sen l. 3. Benef. c. 7. (b) Plut. lib. de invidia & odio. (c) Sen.
l. 2. de Ira c. 34. (d) Plut. l. de invidia & odio. (e) Id. ib.
(f) Card. Bona manu. c. 13. (g) Plut. l. de inv. & odio.

Redeat in memoriam, istam (a) *mentis ad tranquillio- rem habitum inclinationem*, istum egregium *humani animi ab odio ad gratiam deflexum*, Gentilibus quoque commendatum & usurpatum.

Quorum exceptæ voces, non oportere eos *privatis odiis dissidere*, qui publice *summa juncti essent potestate*.

Quod *speciosius aliquanto injuriæ beneficiis vincantur*, quam *mutui odii pertinacia pensentur*.

Valde clarum in *Africano Superiore ac Ti. Graccho depositarum inimicitiarum exemplum*. Siquidem ad *cujus mense sacra, odio dissidentes, venerant, ab ea & amicitia & affinitate juncti discesserunt*. Non contentus enim *Scipio, auctore Senatu, in Capitolio, Jovis epulo cum Graccho concordiam communicasse*, *filiam quoque ei Corneliam protinus ibi despondit*.

Quin, *hujusce generis humanitas etiam in M. Cicerone præcipua apparuit*. *Aulum namq; Gabinium, repetundarum reum, summo studio defendit, qui eum in Consulatu suo Urbe expulerat*. Idemq; *P. Vatinius, dignitati suæ semper infestum, duobus publicis judiciis tutatus est, ut sine ullo crimine levitatis, ita cum aliqua laude*.

Studeamus & nos mereri hanc laudem. (b) *Cogitemus, quoties ad ignoscendum difficiles erimus, an expediat, omnes nobis inexorabiles esse. Quam sepe veniam, qui negavit, petit? quam sepe pedibus ejus ad- volutus est, quem a suis repulit? Quid est gloriosius, quam iram amicitia mutare?*

Eo vero in universum (c) *nihil est iniquius, quam aliquem heredem paterni odii fieri*.

Deni-

(a) *Val. Max. l. 4, c. 2. hinc inde.* (b) *Sen. l. 2. de Ira c. 34.*

(c) *Ib. id.*

Denique, ut hoc quoque obiter addam, *aliorum odium tute evita- bis*, Fili, si (a) sic vita erit: facile omnes perferre ac pati; cum quibus eris cunq; una, iis te dedere, eorum obsequi studiis, adversus ne- mini: nunquam præponens te illis. Ita, facillime si- ne invidia laudem invenias, & amicos pares.

REMEDIA DESIDERII.

MI FILI:

(b) Nihil monuisse te malim, quam hoc, quod nemo monetur satis, ut *desideriis tuis modum imponas*, & miscere vitia desideriiis diligentissime caveas.

Haud illud præcipio, ut aliquid naturæ neges: con- tumax est, non potest vinci, suum poscit.

Verum, (c) multa impetum animi movent, quæ pe- tuntur petentium malo.

Scis, quam multa mala blanda sint;

Circumspicienti tot millia hominum inquieta, se of- ferent, qui, ut aliquid pestiferi consequantur, per mala nituntur in malum; petuntq; mox fugienda, aut et- iam fastidienda.

Nempe, ea, quorum Desideria illos probe confe- cerant, deinde mala esse, aut inania, aut minora, quam speraverint, adepti, ac multa passi, vident.

Tu, ne quid delinquas, fac rerum discrimina accu- rate teneas.

Principio, Res quædam Propriæ & a nobis posses- sæ sunt: quasdam alii in suis bonis numerant. Ad eas, quæ postremi generis, nefas est Desideria ac vota ex- tendere. Percellat pectus pavore, a Supremo Nu-

Lk 3

mine

(a) Ter. in Andr. a. 1. f. 1. (b) Sen. ep. 119. hinc inde. (c) Ex ejusdem ep. 118. varie excerpta.

mine, inter terrificos tonitruum fragores & fulgurum ignes, cœlitus emissum interdictum: (a) *Non concupisces uxorem proximi tui: non domum, non agrum, non servum, non ancillam, non bovem, non asinum, & universa, quæ illius sunt.*

Jam porro, (b) *res quedam in potestate nostra sunt, quedam non sunt. In nostra potestate est opinio, appetitio, desiderium, aversatio; & ut uno complectar verbo, quælibet nostræ actiones. Nostri arbitrii non sunt corpus, pecunia, gloria, imperia: ad summam, ea, quæ ipsi non agimus, omnia.*

(c) *Illæ nec prohiberi ab aliquo, nec impediri possunt, & bene se habent, rationem ducem si sequantur.*

(d) *Hæc aliena sunt, & impedimentis obnoxia. Quare ea omnino non appetes; vel ita saltem, ut scias, ab aliorum arbitrio pendere, & diu tecum esse non posse; quia sic exigit eorum conditio.*

Proinde (e) *memento, sic in vita esse versandum, tanquam in convivio. Si quid circumferendo ad te pervenerit, porrecta manu partem modeste capito. Præterit? Ne detine. Nondum adest? Ne longe appetitum extendito: sed expecta, dum ad te perlatum fuerit.*

(f) *Affidua autem exercitatio necessaria est, ut res extra te possitas, tanquam nihil ad te spectantes, spernere discas. Id si fueris assequutus, nunquam dolebis externa tibi deesse: sicut non doles, quod Rex Tartarorum non sis, aut quod alis careas ad volandum. Quæ extra vos, nihil ad nos.*

Ca.

(a) Deut. 6, 21. (b) Epist. in Enchir. c. 1. (c) Cardin. Bona
manud. ad cœl. c. 14. (d) Idem ib. (e) Epist. in Enchir. c. 21.
(f) Card. Bona in manud. c. 14.

Capies tum sinceram voluptatem, quod earum rerum, in quas homines vulgo spes & vota sua collocant, voluptate non caperis.

Inter hæc primum locum *Divitiæ & Opes* sibi vindicant,

At tu,

(a) *Non possidentem multa, vocaveris
Recte beatum: rectius occupat
Nomen beati, qui Deorum
Muneribus sapienter uti,
Duramq; callet pauperiem pati,
Pejusq; letho flagitium timet.*

Heus! me respice: (b) *Pauper sum, fateor, pa-
tior, quod Deus dat, fero.*

Et adeo, (c) *odi ego aurum, multa multis sepe sua-
fit perperam.*

Nam, quæ

(d) *Crescentem sequitur cura pecuniam,
Majorumq; fames,*

(e) *Avaritia fidem, probitatem, ceterasq; artes
bonas subvertit; pro his, superbiam, crudelitatem,
Deum negligere, omnia venalia habere docuit.*

Et, (f) *nullum est officium tam sanctum atq; sole-
mne, quod non avaritia comminuere aut violare so-
leat.*

Ex adverso, certo certius (g) *Bonæ Mentis soror
paupertas est:*

Vnde, (h) *quemcunq; in aliqua laude miramur,
eum paupertas ab incunabulis nutrita est: pauper-*

Kk 4

tas,

(a) Horat. l. 4. Od. 9. (b) Plaut. in *Aulul.* a. 1. s. 2. (c) Idem
in *Capt.* a. 2. s. 2. (d) Horat. l. 3. Od. 16. (e) Sallust. in
Catil. (f) Cic. pro *Quint.* (g) Petron. in *Satyr.* (h) Apul.
in *Apol.*

tas, inquam, prisca apud secula omnium civitatum
conditrix, omnium artium reperitrix, omnium pecca-
torum inops, omnis gloriæ munifica, cunctis laudibus
apud omnes nationes persuncta.

Sed, (a) postquam divitiæ esse honori cœpere, & eas gloria, imperium, potentia sequebatur, hebescere virtus cœpit, & marcere.

Circumfer oculos, & aspice, quam dura & deploranda ejus sors sit, quem Pecunia possedit. Invenies, uti cupiditate quærendi miserrimum, ita nec habendi fructu felicem esse. Alieno semper imminet: (b) quantum illi in arca, quantum in horreis jaceat, quantum parcat, aut fœneret, nec acquisita tantum, sed & acquirenda sollicitis computat articulis.

An de Caligula non stultitia tantum, sed & ærumna, quod satis est, dici potest? qui (c) *contrectanda pecunie cupidine adeo incensus fuit, ut sæpe super immensos aureorum acervos, patentissimo diffusos loco, & nudis pedibus spatiatus, & toto corpore aliquandiu volutatus sit.*

At, finge Pecuniam, illius, cui obtigit, animum non
corrumpere, nec maiorem sui cupiditatem incutere.
Saltem,

(d) *An vigilare metu exanimem, noctesq, diesq,
Formidare malos fures, incendia, servos,
Ne te compilent fugientes, hoc juvat?*

Enim vero, ex animi mei sententia dico, edico;

(c) *Horum*
Semper ego optarim pauperrimus esse bonorum.

(f) -- *Tuta est hominum tenuitas :
Magna periculo sunt opes obnoxie.*

Quam-

(a) Sallust. in Catilin. (b) Sen. ep. 10. (c) Sueton. in vita.

(d) *Horat. l. 1. Sat. 1.* (e) *Id. ib.* (f) *Phædrus l. 2.*

Quamobrem, tu quoque, Fili:

(a) -- Tolle querelas:

Pauper enim non est, cui rerum suppetit usus.
Si ventri bene, si lateri est, pedibusque tuis;
nil

Divitiæ poterunt regales addere majus.

Augebit Divitiarum contemptum, ubi tecum reputaveris, quod (b) caduca nimium hæc, & fragilia puerilibusq; consentanea crepundiis sunt, quæ vires atq; opes humane vocantur: Affluunt subito, repente dilabuntur.

(c) Multa sæpe & locupletibus accidunt, sæpe inimum summa decidunt.

(d) Levis est Fortuna: cito reposcit, quæ dedit.

Pompejo cuidam, Caji Cæsaris cognato, quo nemo sui ævi erat ditior, ad postremum (e) defuit panis & aqua: cum tot flumina possideret, in suo orientia, & in suo cadentia, mendicavit stillicidia: fame ac siti periit.

Hanc ob causam Scythæ jure bono dixere, (f) sine pedibus esse fortunam, quæ manus & pennas tantum habet: cumq; manus porrigit, pennas quoq; comprehendere non sinit.

Opibus *Honos* parissimus est. Atque ideo hujus quoque cupidine te duci nolim.

Sæpe indignos

(g) -- Ex humili magna ad fastigia rerum
Extollit, quoties voluit Fortuna jocari.

Kk 5

Ea.

(a) Hor. l. 1. ep. 12. (b) Val. Max. l. 6. c. 9. (c) Quintil. declam. 9. (d) Pub. Syrus. (e) Sen. de tranquill. c. 11. (f) Curt. l. 7. c. 8. (g) Juven. sat. 3.

Eadem

- (a) *Fortuna, sevo leta negotio, &
Ludum insolentem ludere pertinax,
Transmutat incertos honores.*

Namque, (b) nihil est tam contrarium rationi & constantiæ, quam Fortuna.

Et, (c) incertissimo flatu huc atq; illuc aëtos, quos in sublime extulit, improvise cursu destitutos, profundo cladium miserabiliter immergit.

Plerunque,

- (d) -- cum blanditur, captatum advenit.

Vnde crebro,

- (e) *Quem dies vidit veniens superbum :
Hunc dies vidit fugiens jacentem.*

Sic prorsus (f) Sejanum, quo die Senatus deduxerat, populus in frustra divisit : in quem, quicquid congeri poterat, Dii hominesq; contulerant, ex eo nihil superfuit, quod carnifex traheret.

Amplius *Frugalitas* discenda tibi, &

- (g) -- *Quam parvo liceat producere vitam,
Et quantum natura petat. Non erigit egros,
Nobilis ignoto diffusus Consule Bacchus :
Non aurq; myrrhaq; bibunt, sed gurgite puro
Vita redit. Satis est populis fluviusq; Ceresq;*

(h) *Quisquis exit in lucem, iussus est lacte & pane contentus esse.*

(2) Fd-

(a) Horat. l. 3. carm. od. 9. (b) Cic. 2. de Divin. (c) Val. Max. l. 6. c. 9. (d) Pub. Syrus. (e) Sen. in Thyest. a. 3. (f) Sen. de Tranquil. c. 11. (g) Lucan. l. 4. (h) Sena ep. 29.

(a) *Fames non est ambitiosa; contenta desinere, quo desinat, non querit. Elapso momentaneo palati iudicio, non suavius sapit pretiosum, quam vile.*

Si esuris, (b) *edendum est. Vtrum hic panis sit plebejus an siliginæus, ad naturam nihil pertinet. Illa ventrem non delectari vult, sed impleri.*

Apud Poëtam, nescio quem, Plutarcho (c) *allegatum, est laude dignus, qui nec assis nimis, neq. gaudet elixis, & susq. deq. fert, cibus quo condiatur pacto.*

Si sitis, bibendum est. (d) *Vtrum hæc aqua sit ex lacu proximo excepta, an ea, quam multa nive cluseris, ut rigore refrigeretur alieno, ad naturam nihil pertinet. Illa hoc unum jubet, sitim exstingui.*

(e) *Egregie itaq. Horatius negat, ad sitim pertinere, quo poculo aqua, aut quam eleganti manu ministratur. Nam si pertinere ad te iudicas, quam crinitus puer, & quam perlucidum tibi poculum porrigat, non sitis.*

(f) *Hæc eadem mediocritas ad communem usum cultumq. Vitæ transferenda est.*

(g) *Possumus vestiri sine commercio Serum.*

(h) *Homo nudus creatus est, & non erubescibat; non enim poterat rubore eum afficere nuditas ignorata. Postquam vero peccavit, abjecta innocentie chlamyde, quæ satis eum tegebat, externa vestis pudori velando necessaria fuit. Sed, quod olim in pœnam irrogatum fuit, nunc in dignitatis prerogativam transivit. Queruntur vestimenta, non quæ tegant, sed quæ ornent, quæ alienis oculis ac libidini placeant.*

(a) Sit

(a) Cardin. Bona manud. c. 4. (b) Sen. ep. 119. (c) In lib. de Ira cohibenda. (d) Idem ib. (e) Idem ib. (f) Cic. 1. Offic. (g) Sen. ep. 90. (h) Card. Bona manud. c. 10.

(a) Sit igitur vestis tua artis expertus; non ad pompam, sed ad necessitatem, infra fastum, supra sordes.

(b) Quemadmodum stultus est, qui, emturus equum, non ipsum inspicit, sed stratum ejus & frenos. Sic stultissimus est, qui hominem ex veste aestimandum putat.

Nec minus (c) tum te felicem judica, cum poteris in publico vivere: cum te parietes tui tegent, non abscondent: quos plerumque circumdatos nobis judicamus, non ut tutius vivamus, sed ut peccemus occultius.

Caput rei est: (d) Finem omnium rerum specta, & supervacua dimittes.

(e) Id egit rerum natura, ut ad bene vivendum non magno apparatu opus esset.

(f) -- -- Multa petentibus
Desunt multa. Bene est, cui Deus obtulit
Parca, quod satis est, manu.

Nimirum, (g) nunquam parum est, quod satis est: nunquam multum est, quod satis non est. Post Darium & Indos, pauper est Alexander Macedo: querit, quod suum faciat; scrutatur maria ignota, in Oceanum classes mittit novas, & ut ita dicam, mundi claustra perumpit. Quod naturæ satis est, homini non est.

Seneca inter sapientem virum, & Deum, eam ob causam similitudinem esse contendit, (h) quod uterque nullis fere externis bonis sit indigus.

Si ambitiosa nimis hæc tibi videtur comparatio, placeat, uti modestus, ita & verus magis iste S. Chrysostomus.

(a) Card. Bona man. c. 10. (b) Macrobi. l. 1. Saturn. c. 11.
(c) Sen. ep. 43. (d) Idem. ep. 119. (e) Idem Consol. ad Helv. (f) Horat. l. 3. Od. 16. (g) Sen. ep. 119. (h) Ep. 26. 73. 92. 119. alibi.

softomi sermo: (a) *Quid quæso? nonne in hoc Angeli a nobis differunt, quod non egent, ut nos? Igitur quanto paucioribus indigemus, tanto magis illis appropinquamus: quanto pluribus, tanto magis ad hanc caducam vitam deflectimus.*

REMEDIA FUGÆ.

MI FILI:

Tenes jam, Desideria tua in rebus externis, ac tuæ potestati exemptis, haud nimis occupanda esse.

Fugam igitur pariter, sive (b) *aversationem*, ab iis rebus amovebis omnibus, quæ in nobis sitæ non sunt, atq; in eas transferes, quæ naturæ eorum, quæ nostri arbitrii sunt, repugnant.

Siquidem, (c) *si ea solum aversere, quæ eorum naturæ, quæ in tua potestate sunt, repugnant; in eorum, quæ aversaris, nihil incides. At, si morbum averseris, aut mortem, aut inopiam; calamitatem subibis.*

Certe (d) *multa fugimus, & abominamur, tanquam noxia, & adversa, quæ revera utilia sunt. Fit enim plerunq; ut spiritui plurimum profint, quæ appetitui adversantur. Quæ nocent, docent. Mors, exilium, paupertas, ignominia, labor, egritudo, & cætera ejusdem generis, quæ in tua potestate non sunt, nec mala sunt, nec pertinent ad te. His itaq; non fugam, non abominationem opponere debes, sed conceptæ de illis opinionis neglectum. Hæc omnia Socrates larvas apposite nuncupabat. Nam, ut pueris larvæ incutiunt metum, cum nihil in illis, præter externam speciem, horribile sit; ita in rebus contingit, quas, non ut sunt, sed ut apparent, apprehendere soles.*

(a) Hoc

(a) Homil. 80. in Johann. (b) Epistlet. in Enchir. c. 7. (c) Idem c. 6. (d) Cardin. Bona manud. c. 14.

(a) Hoc si quis in medullas demiserit, & omnia aliena mala, quorum ingens quotidie copia est, sic adspexerit, tanquam illis liberum & ad se iter; multo ante se armabit, quam petatur.

Non fugit igitur Sapiens *Opprobria*, sed, cum male de eo loquuntur homines, ait: (b) *Moverer*, si iudicio hoc facerent: nunc morbo faciunt: bene nesciunt loqui; faciunt, non quod mereor, sed quod solent.

Quibusdam enim canibus sic innatum est, ut non proferitate, sed pro consuetudine latent.

Moverer, si de me *Marcus Cato*, si *Laelius Sapiens*, si alter *Cato*, si duo *Scipiones* ista loquerentur. Nunc malis displicere, laudari est. Non potest ullam auctoritatem habere sententia, ubi, qui damnandus est, damnat.

Proinde scit, quod (c) istic est thesaurus stultis in lingua situs, ut questui habeant male loqui melioribus.

Accipit itaq;, & mussitat injurias suas. Nam (d) *Bacchæ* bacchanti si velit advorsarier, ex insana insanio-rem faciet, feriet sæpius.

Non fugit Sapiens *Paupertatem*, verum, in egestate constitutus, ait: (e) *Honestares est paupertas leta*, & ad legem naturæ si componatur, longe divitiis anteferenda. Lex autem naturæ hos nobis terminos statuit, non esurire, non sitire, non algere.

Exiguum natura desiderat; opinio immensum. Is maxime divitiis fruitur, qui minime indiget.

Pau-

(a) Sen. l. de tranquill. an. c. 11. (b) e Senecæ Excerptis varietum ista, tum alia, quæ sequuntur, deprompta. (c) Plaut. in Pœn. a. 3. s. 3. (d) Idem in Amphitr. a. 2. s. 2. (e) ex Sen. Exc.

Paupertas expedita est, secura est. Cum classicum cecinit, scit se non peti: cum aliquo conclamatum est, quomodo exeat, non quid efferat; querit: nudum latro transmittit, etiam in obsessa via pauperi pax est.

Multis divitias parasse, non finis miseriarum fuit, sed mutatio. Abstrahunt a recto divitiæ, mutant animos, superbiam, arrogantiam, & insolentiam pariunt, invidiam trahunt, mentem alienant.

Sæpius pauper, quam ii, qui felices vocantur, & fidelius ridet: cura, velut nubes levis, transit, nulla solitudine concutitur.

(a) *Pecuniam vero si cuiquam fortuna ademit, aut si alicujus eripuit injuria, tamen dum existimatio est integra, facile consolatur honestas egestatem.*

Non fugit Sapiens Exsilium, ac, nulla sua culpa, innocens solum vertere coactus, ait: (b) Non patria mihi interdicitur, sed locus: mox alibi civitate donabor. In quamcunq; terram venio, in meam venio. Patria est, ubicunq; bene est. Sapiens peregrinatur in hoc orbe; stultus semper exulat.

Non fugit Sapiens Dolores, aut Morbum, quin potius, quoties cum iis conflictandum est, fidenter dicit: (c) Cum morbo mihi res est, semper una esse non possumus: aut vincetur, aut vincet: aut ego febrim relinquam, aut ipsa me.

(d) *Magnos cruciatus habet morbus; sed hos tolerabiles intervalla faciunt. Nam summi doloris intentio invenit finem. Nemo potest valde dolere, & diu. Sic nos amantissima nostri natura disposuit, ut dolorem aut tolerabilem, aut brevem faceret. Ma-*

ximi

(a) Cic. pro Quint. (b) e Sen. Exc. (c) ex eisdem. (d) Sen. ep. 78.

ximi dolores consistunt in macerrimis corporis partibus, nervis, articulisq., & quicquid aliud exile est: acerrime sevit, cum in arcto vitia concepit. Sed cito hæ partes obstupeſcant, & ipso dolore sensum doloris amittunt.

Non malum judicat Sapiens, *aliquem ex his, quos amat, amittere*: hoc enim tam ineptum foret,

(a) *quam flere, quod arboribus amœnis, & domum suam ornantibus, decidant folia.*

Denique, nec propriam *Mortem* fugit Sapiens, memor, (b) *hac conditione in mundum se intrasse, ut exiret, nascentiq., sibi Naturam hunc posuisse terminum: stultum esse, timere, quod vitare non possis: multos se præcessisse, omnes sequuturos. Hunc esse humani officii finem, neminem sanum moleste tulisse exauctorari.*

Breviter: non secus se gerunt Sapientes, quam si Deus ipse iis assidue in aurem insusurret: (c) *Quid habetis, quod de me queri possitis, vos, quibus recta placuerunt? Aliis bona falsa circumdedit, & animos inanes, velut longo fallaciq., somnio, lusi: auro illos, argento & ebore ornavi: intus boni nihil est. Vobis dedi bona certa, mansura: quanto magis versaveritis, & undiq., inspexeritis, meliora majoraq., Contemnite paupertatem. Nemo tam pauper vivit, quam natus est. Contemnite dolorem: aut solvetur, aut solvet: Contemnite fortunam: nullum illi telum, quo feriret animum, dedi. Contemnite mortem: que vos aut finit, aut transfert.*

Vide mihi, Fili, quotusque aliqui, ista meditando, & mala hujus vitæ non fugiendo, sed familiaritatem cum iis contrahendo, profecerint. (a) *Agrip-*

(a) Sen. ep. 104 (b) rursus ex Seneca Excerpt. (c) Seneca de Provid. c. 6.

(a) *Agrippinus vir talis erat, ut semper adverse rei, quæ ipsi accidisset, laudationem conscriberet. Si febricitabat, febris: si male audiebat, infamiae: si exulabat, exilii: cum vero aliquando pransuro intervenisset, qui nuntiaret, jubere Neronem, ut exulatum iret: Ergo, inquit, Aricia prandebimus.*

Seneca noster, (b) se hanc animosam Demetrii, fortissimi viri, vocem audisse testatur: *Hoc unum, Dii immortales, de vobis queri possum, quod non ante mihi voluntatem vestram notam fecistis. Prior enim ad ista venissem, ad quæ nunc vocatus adsum. Vultis liberos sumere? illos vobis sustuli. Vultis aliquam partem corporis? sumite. Non magnam rem promitto. Cito totum relinquam. Vultis spiritum? Quid ni? nullam moram faciam, quo minus recipiatis, quod dedistis. A volente feretis, quicquid petieritis. Quid ergo est? maluissem offerre, quam tradere. Quid opus fuit auferre? accipere potuistis. Sed ne nunc quidem auferetis: quia nihil eripitur, nisi renitenti.*

Nefas esset, ex eodem Seneca (c) non recensere illud a Canio, quem Cajus Cæsar, Romanus Falaris, perimere jussit, contemptæ mortis exemplum; quæ vir ille dixerit, quæ fecerit, quam in tranquillo fuerit. Ludebat latrunculis, cum Centurio, agmen perituro- rum trabens, & illum quoq. citari jubet. Vocatus, numeravit calculos, & sodali suo, Vide, inquit, ne post mortem meam mentiâris, te vicisse. Tum annuens Centurioni: Testis, inquit, eris, uno me antecedere. Lussisse tu Canium illa tabula putas? illust. Tristes erant amici, talem amissuri virum. Quid mœsti,

Ll

in-

(a) Epictet. apud Stobæum, (b) lib. de Provid. c. 5. (c) lib. de tranquill. an. c. 14.

inquit, estis? Vos quæritis, an immortales animæ sint: ego jam sciam. *Nec desit, in ipso veritatem sine scrutari, & ex more suo quæstionem habere. Prosequebatur illum Philosophus suus: nec jam procul erat tumultus, in quo Cesari Deo nostro fiebat quotidianum sacrum. Quid, inquit, Cani, nunc cogitas? aut quæ tibi mens est? Observare, inquit Canius, proposui, illo velocissimo momento, an sensurus sit animus, exire se. Promisitq;, si quid explorasset, circumitorum amicos, & indicaturum, quis esset animarum status.*

O ingentem in mediis tempestatibus tranquillitatem! O Viros in tantum laudandos, in quantum humana virtus intelligi potest, & æternitate dignissimos! O etiam Christianis exemplaria disciplinæ!

REMEDIA GAVDII

MI FILII:

Proprie quidem, secundum M. Tullium, (a) *cum ratione animus movetur placide atq; constanter, tum illud Gaudium dicitur: cum autem & inaniter & suffuse animus exultat, tum illa Latitia gestiens, vel nimia dici potest.*

(b) *Vulgo tamen sic loquimur, ut utrumque hilaritatis genus voce Gaudii complectamur.*

Atque prius illud quidem, (c) *quod non nascitur nisi ex virtutum conscientia:*

Vel, quod (d) *tibi ex te omne nascitur, nolim a te segreges.*

Ha-

(a) 4. Tuscul. (b) Sen. ep. 59, (c) Idem ib. (d) Idem ep. 124.

Habuit hoc in animo Romanus Sapiens, asserens, (a) nullum malum gaudium esse, & Virgilium, cum mala mentis Gaudia dixit, diserte quidem, sed parum proprie verba fecisse, pronuncians.

Ex eodem fonte promanat, quod porro differit: Quid ergo? inquis, stulti ac mali non gaudent? non magis, quam prædam nacti leones. Cum fatigaverunt se vino & libidinibus, cum illos nox inter vina defecit; cum voluptates angusto corpori, ultra quam capiebat, ingestæ, suppurare cœperunt, tum exclamant miseri Virgilianum illum versum:

Namq; ut supremam falsa inter gaudia noctem
Egerimus, nosti.

Sed, ab infrunito illo gaudio, quod homines Stulti & Mali gaudent, penitus tibi abstinendum esse, monitore non eges.

(b) Quia sicut sonitus spinarum ardentium sub olla; sic risus stulti.

Improbiorum autem (c) risum reputabis errorem, & gaudio illorum dices: Quid frustra deciperis?

Externarum & suo modo licitarum rerum res hoc loco agitur, quarum (d) lætitia loquax est, atq; ostentatrix sui: & a quo morbo magnæ parti hominum nulla cautio est.

Cum igitur aliquid ex iis, quæ vulgus bona reputat, tibi obicitur, (e) ita gaudere debes, ut in gaudio tuo modestia eluceat; neq; animus ita dissolvatur, quin possis libere, si opus sit, a lætitia ad mœrorem transire.

(a) Sen. ep. 59. (b) Eceles. 7, 7. (c) c. 2, 2. (d) Symm. l. 1. ep. 73. (e) Card. Bona Manud. c. 15.

Namque hoc (a) *Gaudium*, nisi impendentis mutationis habens trudatur, præcipites nos aget, atq; ut ab officio & decore excidamus, efficiet.

Non effuse autem nimis gaudebis, considerando tecum, quam (b) nihil quicquam homini tam prosperum divinitus datum, quin ei tamen admixtum sit aliquid difficultatis; ut etiam in amplissima quaq; letitia subsit quæpiam vel parva querimonia, conjugatione quadam mellis & fellis. *Vbi uber, ibi tuber.*

(c) *Fortuna* nunquam perpetuo est bona: & usque adeo,

(d) Non annis anni, non menses mensibus usq;
Conveniunt, seq; ipse dies, aliumq; relinquit,
Horaq; non ulli similis producitur horæ.

(e) *Fugit terrena voluptas*; & quæ nos gaudia vocamus, sæpe initia tristitia sunt;
Secundum illud Poëtæ:

(f) *Gaudia principium nostri sunt, Phoece, doloris.*

Saltem, (g) ita Diis placitum, voluptatem ut mæror comes consequatur: Quin incommodi plus maliq; illi co assit, boni si obtigit quid.

Etiam *Periculum*, quod a Gaudii excessu imminet, movere te debet, ne huic perturbationi nimis indulgeas.

(h) *Vix verisimile est, in eripiendo spiritu idem gaudium potuisse, quod fulmen: & tamen potuit.* Nunciata enim clade, quæ ad lacum Thrasymenum, altera mater, sospiti filio ad ipsam portam facta obviam, in complexu ejus exspiravit. *Altera, cum falso mor-*

(a) *Isid. Pelus. l. 3. ep. 204.* (b) *Apul. in Florid.* (c) *Ter. in Hec. a. 3. f. 3.* (d) *Manil. l. 3. Astron.* (e) *Card. Bona manud. c. 15.* (f) *Ovid. l. 7. Metam.* (g) *Plaut. in Amphitr. a. 1 f. 2.* (h) *Val. Max. l. 2. c. 12.*

mortis filii nuncio domi mœsta federet ; ad primum conspectum redeuntis exanimata est. Genus casus inusitatum : quas dolor non extinxerat , lætitia consumpsit.

(a) De Rhodio etiam Diagora celebrata historia est. Is Diagoras tres filios adolescentes habuit, unum pugilem, alterum pancratiasten, tertium luctatorem : eosq; omnes vidit vincere coronariq; eodem Olympic die : Et cum ibi eum tres adolescentes complexi, coronis suis in caput patris positis, suaviarentur, cumq; populus gratulabundus flores undiq; in eum jaceret : ibi in stadio, inspectante populo, in oculis atq; manibus filiorum animam efflavit.

Neque est, quod dicas mihi : non succedere tale quid, nisi ob magnam rem. Ecce, Philemonem in joculario eventu (b) vis risus immoderati abstulit. Paratas ei ficus, atq; in conspectu positas, a sellò consumente, puerum, ut illum abigeret, inclamavit. Qui, cum jam comestis omnibus supervenisset, quoniam, inquit, jam tardus fuisti, da nunc merum a sellò. Ac protinus urbanitatem dicti crebro anbelitu cachinnorum prosecutus, senile guttur salebris spiritus prægravavit.

Esto, non semper mors Gaudii impotentiam consequitur : at trahit secum mala alia. (c) Dionysius, Heracliensium tyrannus, cum de morte Alexandri M. certior factus esset, Lætitiæ statuam consecravit ; Et ad primum nuncium eo affectus est modo, præ exuberanti gaudio, ut vertigine correptus prolaberetur, Et a sana mente conspiceretur alienus.

Hinc merito aliqui, cum aliter Gaudii nimietatem temperare se posse desperarent, *tristium rerum obiectu* id assequi studuerunt.

De Saladino (a) notum, eum subuculam præferre sibi iussisse, & proclamare, *nihil ipsum de gloria reportaturum, præter tantundem panni.*

Maximilianus I. Imperator, (b) *capulum funebrem e querno ligno, arcæ viatoriæ inclusum, secum circumferebat.*

(c) Rabbini veteres, cum convivas in hilariis valde lætos animadverterent, vasa vitrea ingentis pretii frangebant, ne sincera esset voluptas, & ut lætis sollicitum aliquid interveniret.

Nec aliam ob causam, in Trimalcionis epulis, potantibus, qui intererant, (d) *larvam argenteam attulit servus, sic aptam, ut articuli ejus, vertebræq, locatae, in omnem partem flecterentur. Hanc cum super mensam semel iterumq, abjecisset, & catenatio mobilis aliquot figuras exprimeret, Trimalcio adjecit:*

Heu, heu nos miseros, quam totus homuncio nil est!

Sic erimus cuncti, postquam nos auferet Orcus.

REMEDIA TRISTITIÆ.

MI FILI:

(e) *Tristitia malum præsens, vel re ipsa, vel apprehensione, cum quadam perturbatione & inquietudine, execratur.*

Ori-

(a) Calvis. in Chron. ex Marino. (b) Lips. Mon. Polit. l. 7. c. 14. (c) Ciemara Berachot c. 5. (d) Petron. in Satyr. (e) Card. Bona Manud. c. 15.

Oritur maxime, ut Carneades assererat, (a) ab hac una causa, quod inexpectato nobis accidit quippiam.

Idem (b) pulchre etiam Poëta docuit. Ulysses enim, cane mortuo, cum non continuisset lacrymas, uxori adflicto flenti, nihil tale passus est. Huc enim venerat, animo ratione jam ante confirmato, & adversus motum munito: in illum autem fletum subita res & inexpectata eum conjecerat.

Igitur, (c) nihil æque te ab his animi fluctibus vindicaverit, quam si animi robore id tibi præstes, ne quid ex his, quæ eveniunt, subitum sit.

Sero animus ad periculorum patientiam, post pericula, instruitur.

Non sunt illæ homine sapiente dignæ voces: Non putavi hoc futurum: Nunquam hoc eventurum credidissim. Quare autem non?

Novisse debebas, omnem conditionem versabilem, & quicquid in ullum incurrit, posse in te quoque incurere.

Quin potius sic sentias, sic loquaris: Sciebam, inquam tumultuosum me contubernium natura clussisset. Totiens in vicinia mea conclamatum est; totiens præter limen immaturas exsequias fax cereusque præcessit: sæpe altius ruentis edificiū fragor sonuit: multos ex his, quos forum, curia, sermo, mecum contraxerat, nox abstulit, & vinctas ad sodalitiū manus copulatas intercidit. Mirer, aliquando ad me pericula accessisse, quæ circa me semper erraverunt?

(a) Plut. lib. de anim. tranquil. (b) Id. ib. (c) Sen. lib. de tranquil. an. qui & alia, quæ sequuntur, suggessit.

Nunquam elabatur e memoria Menandreum illud:
(a) *Dicere haud vivus potest quisquam: Hoc non ob-*
tinget mihi.

Nam, quod (b) *Publius tragicis comicisq; vebe-*
mentior ingeniis, quotiens mimicas ineptias, & ver-
ba ad summam caveam spectantia reliquit, inter multa
alia, cothurno, non tantum sipario, fortiora dixit:

Cuius potest accidere, quod cuiquam potest.

Præterea, (c) *solemus ut plurimum non rebus, sed*
rerum opinionibus, cruciari.

Quapropter, (d) *deme rebus tumultum, deme per-*
sonam, redde singulis faciem suam: nihil in illis terri-
bile esse videbis, præter ipsum timorem. Id nobis eve-
nit grandioribus, pueris quod parvulis solet. Hi,
quos amant, quibus assueverunt, cum quibus ludunt, si
personatos vident, expavescunt. Tu vero, pueris de-
terior, ad tantam ineptiam pervenisti, ut non solum
dolore, sed doloris larva, & panico terrore ve-
xeris.

Sed & in re alia puerulis apprime similes sumus.
(e) *Pueruli, si quis ludicrarum rerum unam ipsis aufe-*
rat, reliquis etiam omnibus projectis, plorant, ac voci-
ferantur: ita, una aliqua in re fortuna nobis obtur-
bante, inique ferendo & lamentando, cætera omnia
eam nobis reddere inutilia querimus, & ob amissa do-
lore afficimur, non gaudemus relictis.

In hoc vero etiam pueris deteriores & molliores
sumus, quod sæpe, non præsentia tantum, sed & futura
mala, ac quorum ipsi causa sumus, flemus.

Haud

(a) *Apud Plut. lib. de an. tranquil.* (b) *Iterum e Sen. lib. de*
tranquil an. (c) *Card. Bona manud. c. 15.* (d) *Idem c. 17.*
(e) *Plut. lib. de an. tranquil.*

Haud secus, (a) cum per magna camporum spatia porrigeret exercitum, nec numerum ejus, sed mensuram comprehenderet. Persarum Rex insolentissimus, lacrymas fudit, quod intra centum annos nemo ex tanta juventute superfuturus esset. At illis erat admoturus fatum ille ipse, qui flebat, perditurusq; alios in terra, alios in mari, alios in prælio, alios in fuga: Et intra exiguum tempus consumpturus illos, quibus centesimum annum timebat.

Valebit istorum meditatio ad id, ne mens tua impotenti Tristitiæ incursum transversam ferri se patiat. Magis autem adhuc admissionem illius horrebis, cum cogitabis, quanta *Incommoda*, imo vero, *mala* (b) nam *incommoda* alia sunt dicenda, secum afferat.

Attende Menandrum: (c)

Multorum malorum causa omnibus est suapte natura

Tristitia. Propter hanc enim insania oboritur

Multis, Et ægritudines incurabiles,

Interficiunt etiam aliqui seipsos præ tristitia.

Aut, si mavis, audi Syracidem: (d) *A tristitia festinat mors, Et cooperit virtutem, Et tristitia cordis flectit cervicem.*

(e) *Multos occidit tristitia, Et non est utilitas in illa.*

Recta monenti igitur obtempera, & (f) *Tristitiam non des animæ tuæ, Et non affligas temetipsum in consilio tuo.*

Ehodum! iterum iterumque tibi dico: (g) *Ne deris in tristitiam cor tuum, sed repelle eam a te.*

L I 5

At-

(a) Sen. lib. de brev. vitæ c. 16. (b) Ter. in Eun. a. 2. s. 3.

(c) apud Stobæum serm. 97. (d) c. 38, 19. (e) ib. c. 30, 25.

(f) ib. v. 22. (g) ib. c. 38, 21.

Atque ut melius animo tuo inhæreant, quæ disse-
rui prolixius, ecce tibi breviter summa eorum capita,
his Ciceronis verbis (a) velut in fascem colligata:
Erit igitur in consolationibus prima medicina, docere,
aut nullum malum esse, aut admodum parvum: altera,
& de communi conditione vitæ, & propriæ, si quid
sit de ipsius, qui mœreat, disputandum: tertia, sum-
mam esse stultitiam frustra confici mœrore, cum intel-
ligas, nihil posse profici.

Enim vero, sat scio, sic objectabis, sic loqueris:
Quid faciam, Pater? (b) Aliud fortasse aliis vitii est:
ego sum animo leni notus: non possum adversari pla-
ne tristitiæ.

Est, inquam, (c) mihi pectus, & mollis affectus.

Vtique (d) hominis est, affici dolore, sentire:

(e) Ego autem homo sum: humani nihil a me ali-
num.

Annon, & meos, & Amicorum casus defleam, &
horum quidem magis, quam proprios?

Nam,

(f) -- ex semet nihil natura creavit
Pectore amicitie majus, nec rarius unquam.

(g) Est enim quedam etiam dolendi voluptas.

Nec

(h) -- mihi cornea fibra est.

Scio, Fili, (i) sunt, quorum mentes etiam nocentium
supplicia confundant, qui ad omnium sanguinem pal-
lescant, ignotorum quoque miseriis illacryment.

At,

(a) Ex 3. Tuscul. (b) Ter. Hec. a. 2. s. 2. (c) Quintil. declam. 9.

(d) Plin. l. 8. ep. 16. (e) Ter. Heaut. a. 1. s. 1. (f) Maril.
l. 2. Astronom. (g) Plin. l. 8. ep. 16. (h) Persius sat. 1.

(i) Quintil. declam. 9.

Verum enim vero nolim plane affectibus indulgeas. Interim, non te impedio, quo minus tua mala, si a tempus fert, defleas, & Amicis quoque te des, lacrymasque tuas iis commodas.

Modo memineris, (a) adprime in vita esse utile, & ne quid nimis.

At, plerumque non ibi consistunt dolores, ubi cœserunt, (b) sed quamlibet in tenuem recepti tramitem, atissime evagandi sibi viam faciunt.

(c) Olynthi cantharos, ferunt, in locum quendam, cui ab exitio ejus insecti Cantharolethrum dicitur, reiectos, quod exire inde nequeant, perpetua circumfusione enecari: sic aliqui in malorum considerationem ubi incidere, inde se revocare & recreare non vident.

Tu cave sis, similem iis te præstes: & (d) ejiciunda circule hæc est mollities animi.

(e) Cui si frenos remittas, nulla materia non maxima est.

Equidem, (f) recens animi dolor consolationes recusat ac refugit: idem tamen eas mox desiderat, & clementer admotis acquiescit.

Ergo plange miseras tuas, (g) præsertim si in amici sinu defleas, aqua quem lacrymis tuis vel laus sit parata, vel venia;

quique te interdum, (h) aut consolando, aut consilio, aut re juverit.

Sunt,

(a) Ter. in Andr. a. 1. f. 1. (b) Vellej. l. 2. c. 3. (c) Plut. lib. de an. tranq. (d) Ter. in Eun. a. 2. f. 1. (e) Plin. l. 5. ep. 9. (f) Id. ep. 15. (g) Idem l. 8. ep. 16. (h) Ter. in Heaut. a. 1. f. 1.

Sunt, si nescis, ipsæ *Lacrymæ* remedium Tristitiæ, &

(a) -- est quædam flere voluptas :
Expletur lacrymis egeriturq; dolor.

(b) Dolor per lacrymas effluit.

Sed hæc medicina propemodum ipso malo pejor est: qualis illa etiam, quæ a *Tempore* petitur.

Sane, (c) dolores mitigat tempus:

Nec (d) falsum est, quod vulgo audio dici, diem adimere ægritudinem hominibus.

Quia vero alia remedia supersunt, nolim illa adhibeas, quibus periculum est, ne mœror magis accendatur tuus.

Si quid sinistri accidit, cape *Chelyn* tuam, & laxos modos ciere stude.

(e) Nam & Achillem, Vatum maximus refert, ægri animi curas fidibus resolvisse.

(f) Hoc est, cur cantet vinc-tus quoq; compede fossor,
Indocili numero cum grave mollit opus:

Cantet & innitens limosæ pronus arenæ,

Adversotardam qui trahit amne ratem.

Cantantis pariter, pariter data pensa trabentis,
Fallitur ancillæ decipiturq; labor.

Cum Musicam tractandi satias est, *circumfer animum ad leta* nihilque tetrici habentia, spectanda aut legenda.

Graviter vulgo desipimus, quippe (g) oculos, nimio splendore offensos, ad florida & viridia avertentes, reficimus

(a) Ovid. l. 4. Trist. (b) Sen. l. 10. controu. (c) Quintil. l. 6.

(d) Terent. Heaut. a. 3. s. 1. (e) Symmach. l. 3. ep. 74.

(f) Ovid. l. 4. Trist. el. 1. (g) Plut. in l. de an. tranq.

et eadem vero cogitationem rebus dolorem afferentendimus, eamque meditationi molestiarum commorari.

erge nunc aures: (a) Aliquando *vestatio iter* et *mutata regio*, vigorem dabunt, *convictus* et *liberalior potio*: nonnunquam et usque ad *sanitatem* veniendum, non ut mergat nos, sed ut det. Eluit enim curas, et ab imo animum movet: morbis quibusdam, ita tristitia medetur: *Libertas* non ob licentiam linguæ, dictus est inventor vini, *libertas* liberat servitio curarum animum, et as-

Ecquid beo te dulci remedio? Nec mirum, quipere amara.

vero magis ad palatum sit, etiam in metrum rem illud propinabo: Evax!

Vina parant animos, faciuntque caloribus aptos:

Cura fugit, multo diluiturque mero.

Tunc veniunt risus, tunc pauper cornua sumit:

Tunc dolor, et cura, rugaque frontis abit.

hil ergo peccant, sed acu rem tangunt, qui Sani Regi obsequuntur, suadenti: (d) *Date sicciterentibus, et vinum his, qui amaro sunt animo: et obliviscantur egestatis suæ, et doloris sui recordentur amplius.*

ovissime, si irrita sint remedia cætera omnia, sermone bono letificabitur tristis,

(f) *memoriam malorum joci venustas franget.*

Quip-

Sen. lib. de tranq. an. c. ult. (b) Ter. in Eun. a. 2. s. 2.

(c) Ovid. l. 1. de arte, (d) Prov. 31, 6. 7. (e) Ib. c. 12, 25.

(f) Symm. l. 3. ep. 39.

Quippe, (a) *nihil aque agrum reficit atq; adjuvat, quam amicorum affectus.*

Quapropter (b) *oportet ei, qui in dolore est, orationem ab amicis adhiberi, non quæ assentetur, sed quæ consoletur.*

Namq; (c) *levius tunc hominem dolores affligunt, & una pars ex multis aufertur, cum quis eos comiti suo narravit.*

Etsi vero de remediis tantum adversus privata mala haecenus loquutus sum; tamen iisdem tristitia & cura, quæ ex *publicis* oritur, similiter hebetabitur, (d) *si quis recte aut commode tractaret.*

Addo autem horum proprium & peculiare pharmacum:

(c) Dulce mœrenti populus dolentum;
 Dulce lamentis resonare gentes;
 Lenius luctus lacrymaeq; mordent;
 Turba quas fletu simili frequentat,
 Semper, ab semper, dolor ipse magnus;
 Gaudet in multos sua fata mitti,
 Seq; non solum patuisse pœna.
 Ferre, quam sortem patiuntur omnes;
 Nemo recusat.

REMEDIA SPEI.

MI FILI:

Spes nobis dicitur gaudium animi, ex opinione boni impendentis, quod voluptatem aut adferre, aut conservare valet, prognatum.

Huic

(a) Sen. ep. 78. (b) Plut. lib. de exsilio. (c) Callimachus apud Stob. serm. 111. (d) Ter. Heaut. 2, 1. f. 1, (e) Sen. in Troade a. 4.

Huic nemo facile convicium dicit: (a) Est enim communissimum, & quibus reliqua omnia desunt, ea adest.

(b) -- -- Credula vitam

Spes fovet, & melius cras fore, semper ait.
 Spes alit agricolas, spes sulcis credit aratis
 Semina, quæ magno fœnore reddat ager.
 Hæc laqueo volucres, hæc captat arundine pisces,
 Cum tenues hamos abdidit ante cibis.

(c) Tolle Spem hominibus, nemo victus tentabit arma: nemo, infeliciter expertus navigationem, alios appetet questus: nemo naufragus vivet. Spes est ultimum rerum adversarum solatium.

(d) Hæc facit, ut vivat fossor quoq; compede victus,
 Liberaq; a ferro crura futura putet.

Hæc facit, ut, videat cum terras undiq; nullas,
 Naufragus in mediis brachia jactet aquis.

Sæpe aliquem solers medicorum cura relinquit;
 Nec Spes huic vena deficiente cadit:

Carcere dicuntur clausi sperare salutem:

Atq; aliquis pendens in cruce vota facit.

Equidem, haud impedio, quo minus huic affectui paululum loci in animo relinquas.

Est enim Spes (e) proprium ornamentum humanae animæ: ac solus vere homo res bonas expectat, & bona Spe se sustinet.

Et adeo etiam (f) Sapientibus, vita Spe confirmanda est.

At

(a) Plut. in conviv. VII. Sap. (b) Tibul. l. 2. el. ult. (c) Sen. l. 5. contr. 1. (d) Ovid. l. 1. de Ponto el. 7. (e) Philo Alex. in Abrah. (f) Menander apud Stobæum serm. 108.

At vero, (a) ut Crura, sic Spem quoq, non amplius extendere convenit, quam fieri potest.

Hunc igitur modum tenebis, ut (b) neq, bona adspirante fortuna, totam laxes habenam, & ut in malo successu bonam Spem concipias.

Ita tamen, ut Socratici illius effati (c) nunquam te capiat oblivio: Neq, mulier sine viro, neq, bona Spes absq, labore, utile quicquam parit.

Vt sic, (d) re magis, quam Spe, tuti esse debeamus.

Vltra hæc, rectum consistere nequit, & (e) de futuro nemo sanæ mentis certam Spem sibi est sponsurus.

Hæc enim (f) Spes, δ'ἀνὰ φύσιν, natura est detrimetosa,

Quippe, (g) vanæ Spes fuitiles habent exitus.

Imo, (h) Spes mala, sicut malus viæ dux, ad peccata ducit.

(i) Estq, res pessima mortalibus, quæ multas civitates commisit.

Ac, vel (k) ob exiguas Spes, magna sæpe eveniunt infortunia.

Sed, quid vulgo agitur? Quia (l) Spem pretio non emimus, tantum nobis capimus, quantum animus recipit:

Nec de nostra (m) stultitia dici, ut dignum est, potest.

(n) Non videmus, quam multa nos incommoda exagitant, quam male nobis conveniat hoc corpus? Nunc de ventre, nunc de capite, nunc de pectore ac faucibus queri-

(a) Epictet. apud Stob. serm. 108. (b) Euripides apud eundem. (c) Apud eundem. (d) Sym. l. 16. ep. 38. (e) Polyb. l. 3. Hist. c. 31. (f) Thucyd. (g) Pindarus Nem. od. 8. (h) Socrates apud Stob. serm. 108. (i) Euripides ibid. (k) Polyb. l. 1. c. 37. (l) Ter. in Adolph. a. 2. s. 2. (m) Idem in Phorm. (n) Sen. ep. 120.

querimur: alias nervinos, alias pedes vexant: nunc dejectio, nunc destillatio: aliquando superest sanguis, aliquando deest: hinc atq; illinc tentamur, & expellimur, quod evenire solet in alieno habitantibus. At nos, corpus tam putre sortiti, nihilominus æterna proponimus, & in quantum potest ætas humana protendi, tantum Spe occupamus, nulla contenti pecunia, nulla potentia. Quid hac re fieri impudentius, quid stultius potest? Nihil satis est morituris, imo morientibus.

Obsecro te, (a) vide, in quanta cecitate mens nostra sit.

Merito igitur (b) Plato dicebat, Spes esse vigilantium hominum somnia.

Nec minus recte Ajax apud Sophoclem professus est: Pro nihilo hominem puto, qui inani Spe concepta incalescit.

Etenim, (c) qui semper a futuris pendent, & absentia desiderant, Spe, tanquam rate, feruntur atq; fluctuant, etiamsi nunquam extra muros prodeant.

Quin amplius, (d) qui futura cupide expectant, conficiuntur angore & metu:

Quoniam, (e) nihil æque amarum, quam diu pendere. Æquiore quidam animo ferunt præcidi Spem suam, quam trahi.

Tam (f) difficilis est hominibus utcunq; conceptæ rei mora.

Tum vero, (g) maxime cruciantur, cum sero sentiunt, frustra se aut pecuniæ studuisse, aut imperiis, aut opibus, aut gloriæ.

Mm

Ergo,

(a) Sen. ep. 120. (b) Ælian. l. 13. c. 29. (c) Plut. lib. de exsilio. (d) Cic. 1. de Fin. (e) Sen. 2. de Benef. c. 5. (f) Vellej. l. 2. (g) Cic. 1. de Fin.

Ergo, mi Fili, (a) ut pedibus loca invia & prærupta non petis; ita nec animo ea speranda, quæ in tua potestate non sunt. Omne miseriæ momentum hoc est; defuisse voluntati, quod speravit.

Hinc (b) sæpe admonendus est animus, ut, quæcunq; extra te, & circa te sunt, aspiciat ut peritura, tenuiq; filo pendentia. Quid oblivisceris conditionis tuæ? Mortalis natus es: nihil tibi de hodierna die promittitur, nihil de hac hora. Instat a tergo mors.

Hæc

(c) Vitæ summa brevis, Spem nos vetat inchoare longam:

Nec unquam pectus mortale (d) magis divinum est, quam ubi mortalitatem suam cogitat, & scit, in hoc natum hominem, ut vita defungeretur: nec domum esse hoc corpus, sed hospitium; & quidem breve hospitium: quod relinquendum est, ubi te gravem esse hospiti videas.

Novissime, quia, in hac vita, (e) insperata accidunt magis sæpe, quam quæ speres,

& plurimum, (f) quod non expectas, ex transverso fit; cum

(g) Prudens futuri temporis exitum
Caliginosa nocte premat Deus:

Commendemus illi fortunam nostram, (h) ex rebus desperatis gratia major hominibus.

RE-

(a) Card. Bona manud. c. 16. (b) Idem ib. (c) Horat. l. 1. od. 4. (d) Sen. ep. 120. (e) Plaut. in Mostel. a. 1. s. 3. (f) Petron. in Satyr. (g) Horat. l. 3. Od. 29. (h) Eurip. apud Stobæum serm. 109.

REMEDIA DESPERATIONIS.

MI FILI:

(a) *Desperatio est ægritudo, sine ulla rerum expectatione meliorum.*

Eam (b) *causant inertia, abjectio animi, nimia difficultatum apprehensio, vitiosa sui diffidentia, viriumq; & industriæ defectus.*

Nempe, (c) *ita pleriq; ingenio sumus omnes, nostri nosmet pœnitet:*

Et, affectibus servientes, in levi infortunio animum despondendo, querimur cum servo apud Comicum:

(d) *Nunc illud est, quod si omnes omnia sua consilia conferant, atq; huic malo salutem querant, auxilii nihil adferant.*

Cæterum, Desperatio isthæc (e) *vincitur, excitando animum eorum exemplo, qui, etiam in gravioribus angustiis constituti, omnia obstantia generose superarunt.*

Præter istud, (f) *non contemnenda sunt ad tolerandum dolorem remedia, firmitas animi, turpitudinis verecundia, exercitatio, & consuetudo patiendi.*

Quamobrem, (g) *nemo nisi sua culpa diu dolet.*

Et, (h) *quid oberit, quin ipsi de nobis meliora semper cogitemus?*

(i) -- *Non, si male nunc, & olim
Sic erit.*

Mm 2

(a) Qua-

(a) Cic. 4. Tusc. (b) Card. Bona manud. c. 16. (c) Terent. in Phor. a. 1. f. 3. (d) Eundem in Adelph. a. 3. f. 2. (e) Card. Bona manud. c. 16. (f) Cic. 5. Tusc. (g) Quintil. l. 6. (h) Val. Max. l. 6. c. 9. (i) Hor. l. 2, od. 10.

(a) *Quare deficiamus ? quare desperamus ? quicquid fieri potuit, potest.*

Vtique (b) *stultum est, perpetuæ infelicitatis se prædamnare, spemq., quæ etiam incerta recte fovetur, interdum certam in desperationem convertere.*

Sane nihil (c) *dementius, quam angere futuris, nec se tormento reservare, sed arcessere sibi misérias & admoveere, quas optimum est differre, si discutere non possis.*

Proinde,

(d) *Qui nil potest sperare, desperet nihil.*

Ohe! (e) *Quam sæpe forte temere eveniunt, quæ non audeas optare.*

(f) *Quoties felicitatis causa & initium fuit, quod calamitas vocabatur?*

(g) *Quam multos militia morbus eripuit? quosdam, ne ad ruinam domus suæ accurrerent, inimicis vadimonio tenuit: ne in piratarum manus pervenirent, quidam naufragio consecuti sunt.*

(h) *Desinit morbus, incendium exstinguitur, ruina, quos videbatur oppressura, deposuit; mare, quos bausserat, eadem vi, qua sorbebat, ejecit incolumes; gladium miles ab ipsa perituri cervice revocavit;*

(i) *aliquis carnifici suo superstes fuit.*

(k) *Multi suis hostibus in pugna præstantiores, postea victi ab illis, meliorem fortunam nacti sunt.*

Vice versa, (l) *sæpe quis sospes e pugna, & e sonitu telorum evasit, sed ipsum domi fatalis mors apprehendit.*

Sæpe

(a) Sen. ep. 98. (b) Val. Max. l. 6. c. 9. (c) Sen. ep. 74. (d) Sen. in Medea a. 2. (e) Ter. in Phor. a. 5. f. 1. (f) Sen. ep. 110. (g) Idem l. 6. de Benef. c. 9. (h) Idem ep. 30. (i) Id. ep. 13. (k) Eurip. apud Stobæum serm. 109. (l) Callinus apud eund. serm. 49.

Sæpe, (a) magna gratulatione excepta res, gradum sibi struxit in præceps.

Calamitatibus (b) verus ille animus, & in alienum non venturus arbitrium, probatur: hæc ejus obrussa est. Non potest athleta magnos spiritus ad certamen adferre, qui nunquam sugillatus est. Ille, qui fudit sanguinem suum, cujus dentes crepuerunt sub pugno, ille, qui supplantatus, adversarium toto tulit corpore, nec projecit animum projectus, qui quoties cecidit, contumacior resurrexit, cum magna Spe descendit ad pugnam.

(c) Multum enim adjicit sibi Virtus laceffita. Tum vero, ipsa

(d) Fortuna fortes metuit, ignavos premit.

Agendum, Fili! (e) Bono sis animo. Multa Deo facilia sunt, etiam quæ desperant homines.

Quocirca, (f) non debemus animum ob dolorem despondere; verum harmonicos imitari, & melioribus deteriora obscurando, ac mala bonis occupando, concinnum vite, nobisq; conveniens temperamentum conficere.

REMEDIA AVDACIÆ.

MI FILI:

(g) Sapientie junctam habere audaciam plurimum conducit: seorsim vero audacia nocet, & calamitatem infert.

Sed nobis de posteriore hac sermo est, eaq; (h) oritur a propriæ virtutis nimia existimatione; a con-

M m 3 temtu

(a) Sen. ep. 110. (b) Idem ep. 13. (c) Idem ib. (d) Sen. in Medea. (e) Eurip. apud Stob. serm. 109. (f) Plut. lib. de tranquill. (g) Evemus apud Stob. serm. 49. (h) Card. Bona manu. c. 17.

temtu adversariorum ; a præcipiti ingenio , rebusq₃ gerendis minus exercitato.

Tu , fuge Audaciam , (a) haud imprudenter speculatus , neminem celerius opprimi , quam qui nihil timet , & frequentissimum initium esse calamitatis , securitatem.

Amolire igitur a te nimiam securitatem , quin & Jactantiam amolire. (b) Apud Bactrianos vulgo usurpabant : Canem timidum vehementius latrare : altissima quæq₃ flumina minimo sono labi.

Sed nec cæco furore in pericula ruendum. (c) Plus metuit , qui prudentior est : nam vires proprias metitur , solerter prospiciens , quid valeant , quid ferre recusent.

(d) Temeritas , ubi primum impetum effudit , velut quædam animalia amisso aculeo , torpet.

Quin &

(e) -- nemo se tuto diu

Periculis offerre tam crebris potest.

Quem sæpe transit casus , aliquando invenit.

Igitur , o Fili,

(f) O & præsidium , & dulce decus meum ;

(g) -- ne fræna animo permitte calenti :

Da spatium , tenuemq₃ moram : male cuncta ministras

Impetus , hoc , oro , munus concede Parenti.

Nul-

(a) Vellej. Pat. l. 2. (b) Curt. l. 7. (c) Card. Bona manud. c. 16. (d) Curt. l. 4. (e) Sen. in Herc. Fur. (f) Hor. l. 1. carm. od. 1. (g) Stat. l. 10. Theb.

Nulla negotio animadvertis, quorsum ego cam.
 Illud vitiorum

(a) *Monstrum horrendum, informe, ingens, cui
 lumen ademptum*

etiam illius fatui ignis, quo aliorum scelerum obscuritas nonnihil renitet, oculosque nostros præstringit, hoc est, *Duella & Monomachias* peto: illam, proh! eheu! fundi Academiæ Germaniæ, ut latibula alia taceam, calamitatem: illam pestem, quæ in Bonæ Mentis Officinas se ingessit: quæq; facit, ut maximus Romanorum Sapientum Seneca, in mendacioprehendatur, cum (b) dixit: *Fateor, insitam esse nobis corporis nostri caritatem: fateor, nos hujus gerere tutelam.*

Quid ego multa de immanitate, fœditate, iniquitate illius memorem?

Vt verbis paucis omnia, quæ in vituperium illius dici aut cogitari possunt, complectar, supremum illud argumentum, quo Paulus, Sanctissimus Apostolus, in re atroci simili (c) usus est, &, quo nullum aliud ad pudorem horroremque extorquendum efficacius credidit, meum faciam oportet: *πνεῦμα ἡμῶν οὐκ ἐστὶν ἐν τῷ ἔθνει οὐνομαζέται: Pravitas hæc, ne nominatur quidem inter Gentiles.*

Certe nulla gens tam fera, tam a vero veri Dei cultu aliena, tam expers rationis, aut extitit unquam, aut extat, quæ ob nullam, certe levissimam plurimum, causam, inter ingenuos & bonis artibus operantes Adolescentes, ex condicito, ausuque privato, armis digladiandi morem, aut probaverit, aut probet.

Quod res est, proloquor. Haud ulla, præter nostras Academias, haud ulla omnino, quæ

- (a) -- nascentem videt ora Solem,
 Quæq; ad occasus jacet ora seros,
 Si qua ferventi subjecta Cancro est,
 Si qua majoris glacialis Urse
 Semper errantes patitur colonos,
 Novit hos æstus juvenum feroces.

Dei, hominumque fidem! Est sane Turcarum natio, cæteris omnibus,

- (b) Seviore ingenio, & ad horrida promptior arma:
 Nec scelerata tamen

tantopere, ut, vel ipsis militibus, arma aliter quam pro Republica sumere concedat.

Quanquam scio, si in aliorum manus ista perveniant, surdis me fabulam narraturum, narrabo tamen, quod in literas retulit Augerius Busbequius, cordatus Vir, & Ferdinandi I. Cæsaris ad Solymannum Turcarum Imperatorem Legatus, cum forte fieri queat, ut ipsam Megaram, quæ nostrorum Juvenum animos ita fascinavit, ut illos piacula nulla resolvant, criminis sui pudeat. Exponam, inquit ille, (c) quid Turcæ sentiant de Monomachia, unico apud nos præclaræ fortitudinis testimonio. Fuit in regione Hungariæ, nobis contermina, magna virium fama Singiaccus Arslambegus. Nemo eo validius intendebat arcum: nullius ferrum altius penetrabat, neq; hostibus erat formidolosius. Huic se æmulum comparaverat Velibegus, ejusdem laudis affectator, finitimorum locorum & ipse Singiaccus. Æmulatio, aliis forte rebus audita, ad summum odium, insidias, & vulnera processit. Hac,

an

(a) Sen. in Hippol. a. 1. (b) Ovid. l. 1. Metam. (c) Epist. 3.

an alia de causa, arcessitus Constantinopolin Velibegus, mihi incompertum, venit certe, ex quo, cum alia multa quæsiuissent in Divano Bassæ, postremo de dissidio ipsius cum Arslambego audire voluerunt. Tum prolixè recitavit totam illarum simultatum scenam, causas, progressum, & quo deniq; evasissent, & ut causam suam faceret meliorem, subjunxit, se ex insidiis ab Arslambego vulneratum: quibus nihil opus fuisset, si se dignum suo nomine Arslambegus præstare voluisset: quandoquidem ipse pugnam cum eo nunquam subterfugisset, ut quem ad singularem pugnam multoties provocasset. Hoc Bassæ aversantes, Tunc commilitoni tuo singulare certamen denunciare ausus es? deerant quippe Christiani, in quos pugnares. Vivit uterq; vestrum pane nostri Imperatoris, nihilominus inter vos de vita decernere parabatis. Quo jure, quonam exemplo? An ignorabatis, utercunq; vestrum cecidisset, Imperatoris damno casurum? Quo dicto, duciem in carcerem jusserunt, in quo multis mensibus maceratus, vix tandem liberatus est, existimatione valde diminuta.

Subjungit post ista Busbequius, eleganter & præclare: Apud nos multi, hoste publico nunquam conspecto, quod in civem & contubernalem strinxerunt ferrum, clari & memorabiles habentur. Quid iis moribus facias, ubi virtutis locum vitia occupant, & quod pœnam meretur, gloriæ & honori vertitur?

Ego hic ad vota me converto, & te, Deus Summe, propter vulnera Filii tui, (a) cujus nomen vocatur Admirabilis, Consiliarius, Deus, Fortis, Pater futuri seculi, Princeps Pacis, oro, obtestor: concede propitius,

M m 5

ut

ut tandem, (a) detestabilis Duellorum usus, fabricante Diabolo introductus, ut, cruenta corporum morte, animarum etiam perniciem lucretur, ex Christiano orbe penitus exterminetur.

(b) *Votum secunda, qui potes, nostrum, DEVS, Rebusq₃ lassis adsis.*

REMEDIA TIMORIS.

MI FILI:

(c) -- *Pelle fœmineos metus,
Et inhospitalem Caucasum mente indue,*

Namque

(d) *Degeneres animos timor arguit.*

quia, (e) *timidus, natura etiam ad inanes sonos pavidus:*

eique (f) *nihil non strepit.*

(g) *Pavor sapientiam omnem ex animo expul-
torat:*

Est quippe (h) *timiditas, corruptio legitimi iudicii, de rebus metuendis, aut non metuendis: aut ignorantia terribilium, non terribilium, & neutrorum.*

Vt proinde merito suaserit M. Tullius Torquato suo: (i) *Non adhibeas in consilium cogitationum tuarum desperationem aut Timorem.*

(k) *Vita enim mollis, & mala cupiditas, neq₃ domum, neq₃ civitatem recte gubernaverint.*

(a) In

(a) Concil. Trident. Sess. 25. de Reform. c. 19. (b) Sen. Herc. Fur. a. 3. (c) Sen. in Medea. (d) Virg. 4. Æn. (e) Ennius apud Cic. l. 3. de Orat. (f) Sen. l. 4. de Benef. c. 26. (g) Sophocles apud Stob. serm. 6. (h) Hieracles apud Stob. l. c. (i) Lib. 6. famil. ep. 1. (k) Euripid. apud Stob.

(a) *In pugna vero, viri timidi nullum habent numerum, sed præsentēs absunt.*

Certe, (b) *timidos fortuna non juvat.*

Solosque (c) *fortes adjuvat, ut est in veteri proverbio.*

Affligit quoque corpus Timor. Scilicet,

(d) *refugit timido sanguen, atq; albescit metu :*

(e) *Totus tremit, horretq;*

Quin & Timor (f) *os ipsum coram hominibus obstupefactum reddit, & animum, quæ libet dicere, non permittit.*

Sic ergo plerunque (g) *plus in metuendo mali est, quam in illo ipso, quod timetur.*

Cæterum, hominibus (h) *Timor incutitur, aut ex ipsorum periculis, aut ex communibus.*

Amplius, (i) *aut præsentibus torquemur, aut futuris, aut utrisq;*

Enim vero, ad Præsentia mala haud proprie Timor attinet : attinent Fuga, Tristitia, Desperatio, quibus quomodo medendum sit, jam edoctus es.

Circa Futura, (k) *in tutum nos reducamus, excogitantes subinde, quibus possint timenda depelli.*

Quapropter, (l) *primum dispice, an certa argumenta sint venturi mali ; ac subinde hoc in animo volve, majorem partem mortalium, cum illi nec sit quidquam mali, nec pro certo futurum sit, æstuarè ac discurrere. Nemo enim resistit sibi, cum cœperit impelli, nec Timorem suum redigit ad verum. Nemo dicit*

(a) Euripid. apud Stob. (b) Sophocles ib. (c) Cic. 2. Tusc.
 (d) Ennius apud Cic. loco dicto. (e) Ter. in Eun. a. 1. s. 2.
 (f) Cic. 1. 6. Famil. ep. 4. (g) Euripides apud Stob. (h) Cic.
 1. 2. de Orat. (i) Sen. ep. 13. (k) Idem ep. 14. (l) Idem
 ep. 13.

dicit, *Vanus auctor est, vanus : aut finxit, aut credit.* *Damus nos referentibus, & expavescimus dubia pro certis, non servamus modum rerum, statim in timorem venit scrupulus.*

(a) *Talis est animorum nostrorum confusio, qualis Lucretio visa est :*

Nam veluti pueri trepidant, atq; omnia cecis

In tenebris metuunt : ita nos in luce timemus.

Imo, (b) *nescio quomodo magis vana perturbant. Vera enim modum suum habent : quicquid ex incerto, conjectura, & licentiae paventis animi traditur. Nul- li itaq; tam perniciosi, tam irrevocabiles, quam lymphatici metus sunt. Ceteri enim sine ratione ; hi sine mente sunt. Inquiramus itaq; in rem diligenter.*

Nonnunquam, nullis apparentibus signis, quæ mali aliquid pronuncient, animus sibi falsas imagines fingit, aut verbum aliquod, dubiæ significationis, detorquet in pejus, aut maiorem sibi offensam proponit alicujus, quam est, & cogitat, non quantum iratus ille sit, sed quantum liceat irato. Nulla autem causa vitæ est, nullus miseriarum modus, si timetur, quantum potest.

*Felices vero brutas pecudes, quibus natura id tribuit, ut nullis vanis terroribus inquietentur, & tantum ea, quæ vere sibi adversa, metuant. Nam (c) quid est, quare pavonem, quare anserem gallina non refugiat, cum tanto minorem, & ne notum quidem sibi, accipitrem fugiat ? quare pulli felem timent, canem non timent ? Apparet, illis inesse scientiam nocituri, non experimento collectam. Nam, antequam possint experiri, cavent. Deinde, ne hoc casu existimes fieri, nec metuunt alia, quam debent, nec unquam obli-
scuntur*

cuntur hujus tutelæ & diligentie; equalis est illis a pernicioso fuga. Præterea, non fiunt timidiora vivendo.

Quanto durior nostra præ illis conditio, quos falsa & inanes res attonitos habent? Non oculos intendimus, non judicium adhibemus, non, quid timeamus, novimus, & sæpe tantum (a) metum alter alteri tradidit.

At, inquires, non de nihilo est, quod ego sic timeo. Omnino (b) verisimile est, aliquid futurum mali.

Sed chodum! Non statim verum est. Quam multa non expectata venerunt, quam multa expectata nunquam comparuerunt? Etiam si futurum est, quid juvat dolori suo occurrere? satis cito dolebis, cum venerit: interim tibi meliora promitte. Quid facies lucri? tempus. Multa intervenient, quibus vicinum periculum, vel prope admotum, aut subsistat, aut desinat, aut in alienum caput transeat.

(c) Ergo & Spem ac metum examina: &, quoties incerta erunt omnia, tibi save, crede, quod mavis. Si plures habebis sententias metus, nihilominus in hanc partem potius inclina, & perturbare te desine.

Sapienter admodum (d) Epicurus censuit, stultam esse meditationem futuri mali, aut fortasse ne futuri quidem: satis esse odiosum malum omne, cum venisset.

Atque sane, (e) est sine dubio stultum, quia quandoque sis futurus miser, esse jam miserum.

Vnde, mi Fili, (f) illud tibi præcipio, ne sis miser ante tempus: cum illa, quæ velut imminetia expavisti, fortasse nunquam ventura sint, certe nondum venerint.

Va-

(a) Sen. ep. 110. (b) Idem ep. 13. (c) Idem ib. (d) Cic. 3. Tuscul. (e) Sen. ep. 24. (f) Idem ep. 13.

Valetque de certo venturis insuper illud:

(a) *Stultum est timere, quod vitare non potes.*

(b) *Sed ego alia te ad securitatem via ducam. Si vis omnem sollicitudinem exuere, quidquid vereris, ne eveniat, eventurum utiq; propone: & quodcunq; est illud malum, tecum ipse metire, ac timorem tuum taxa.*

(c) *Præmeditatio futurorum malorum, lenit eorum adventum.*

(d) *Tolerabilius feret incommodum, qui cognoverit, necesse esse, homini tale quid accidere.*

Scilicet, (e) omnes, cum secunda res sunt maxime, tum maxime secum meditari oportet, quo pacto adversam fortunam ferant: pericla, damna, exilia.

(f) *Quicquid fieri potest, futurum cogitemus:*

& (g) *purgemus animum, sequamurq; naturam, a qua aberranti cupiendum timendumq; est.*

(h) *Ea lege sumus nati, ut nemo in perpetuum esse possit expers mali.*

Cæterum, cum te, mi Fili, mala jam invadunt, actutum (i) *deme rebus tumultum, deme personam, redde singulis faciem suam: nihil in illis terribile esse videbis, præter ipsum timorem.*

(k) *Multa, per noctem habita terrori, dies vertit ad risum.*

Terribiles visu formæ, letumque, labosque; egregie Virgilius noster. Non re dixit terribiles esse, sed visu: id est, videri, non esse.

(a) *Quæ.*

-
- (a) *Publ. Syrus.* (b) *Sen. ep. 24.* (c) *Cic. 3. Tusc.* (d) *Idem ib.* (e) *Ter. in Phorm. a. 2. f. 1.* (f) *Sen. ep. 24.* (g) *Idem ep. 98.* (h) *Cic. 3. Tusc.* (i) *Card. Bonæ manud. c. 17.* (k) *Sen. ep. 104.*

(a) *Quædam ergo nos magis torquent, quam debeant: quædam ante torquent, quam debeant: quædam torquent, cum omnino non debeant.*

Porro, interdum (b) contemptum periculorum assiduitas periclitandi dabit. Sic sunt nauticis corpora, ferendo mari dura: agricolis, manus tritæ: ad excutienda tela; militares lacerti valent: agilia sunt membra cursoribus. Id in quodq. solidissimum est, quod exercuit.

Idcirco:

(c) *Perfer & obdura: dolor hic tibi proderit olim.*

Aque poteris, hac ratione, (d) dolores, quocunq. modo corpus invaserint, perferre, & fortunæ dicere: Cum viro tibi negotium est: quære, quem vincas.

Apud Hecatonem invenitur etiam, (e) cupiditatum finem ad Timoris remedia proficere. Defines, inquit, timere, si sperare desieris. Dices, quomodo ista tam diversa pariter sunt? Ita est, mi Fili, cum videantur dissidere, conjuncta sunt. Quemadmodum eadem catena & custodiam & militem copulat: sic ista, quæ tam dissimilia sunt, pariter incedunt. Spem metus sequitur.

(f) *Simus igitur ea mente, quam ratio & veritas præscribit, ut nihil in vita nobis præstandum, præter culpam, putemus: eaq. cum careamus, omnia humana placate & moderate feramus.*

RE-

(a) Sen. ep. 13. (b) Idem lib. de provid. c. 4. (c) Ovid. lib. 3. amor. el. 10. (d) Sen. ep. 98. (e) Idem ep. 5. (f) Cic. lib. 6. famil. ep. 1.

REMEDIA IRÆ.

MI FILI:

Ira nobis propulsanda est, Affectus, quæ alius nullus atrocior: quam Stoici apud Ciceronem (a) sic definiunt, ut Ira sit libido puniendi ejus, qui videatur læsisse injuria.

Sed magis convenit ista Aristotelis, apud Stobæum, (b) descriptio: Ira est perturbatio immanis affectione, dura & violenta potentia, cædium causa, calamitatis socia, jacturam concilians & dedecus, pecuniarum perniciēs, ad hæc perditionis origo.

Est ergo, ceu dixi, Ira ex omnibus affectibus affectus maxime teter ac rabidus. (c) Cæteris enim aliquid quieti placidique inest; hic totus concitatus, & in impetu doloris est: armorum, sanguinis, suppliciorum, minime humana servens cupiditate: dum alteri noceat, sui negligens; in ipsa irruens tela, & ultionis, secum multa tractura, avidus.

(e) Cæteri affectus dilationem recipiunt, & curari tardius possunt: hujus incitata, & se ipsa rapiens violentia, non paullatim procedit, sed, dum incipit, tota est. Nec, aliorum more vitiorum, sollicitat animos, sed abducit: nec in ea tantum, in quæ destinavit, sed in occurrentia obiter furit. Cætera vitia impellunt animos: ira præcipitat. Alia vitia a ratione, hæc a sanitate desciscit. Alia accessus lenes habent, & incrementa fallentia: in Ira dejectus animorum est; ne repulsa quidem in tedium acta, ubi adversarium fortuna subduxit, in seipsam morsus suos vertit.

Cum-

(a) Cic. 3. Tuscul. (b) Serm. 18. (c) Sen. lib. 1. de ira c. 1.

(d) Idem l. 3. c. 1.

Cumque (a) cætera vitia liceat abscondere, & in abdito alere, Ira se profert, & in faciem exit:

(b) ac velut ignis omnia corripit; quantoq; studiosius eam tegere conaris, eo amplius effervesceat.

(c) Accedit, quod nullam transit ætatem: nullum hominum genus excipit. Quædam gentes, beneficio egestatis, non novere luxuriam: quædam, quia exercitæ & vagæ sunt, effugere pigritiam. Nulla gens est, quam non ira instiget, tam inter Grajos, quam barbaros potens.

Vitia (d) cætera singulos corripunt: hic unus affectus est, qui interdum publice concipitur. Nunquam universus populus unius fœminæ amore flagravit: nec in pecuniam aut lucrum tota civitas spem suam misit: ambitio viritim singulos occupat: Impotentia, non est malum publicum. Sæpe in iram uno agmine itum est: Viri, fœminæ, senes, pueri, principes, vulgusq; consensere: & tota multitudo, paucissimis verbis concitata, ipsum concitatore anteceffit. Ad arma protinus ignesq; discursum est, & indicta finitimis bella, aut gesta cum civibus: totæ cum stirpe omni crematæ domus.

Ad hæc, (e) in omnes personæ hic exardescit affectus.

(f) Irascimur & hostibus, & amicis, liberis, parentibus, atq; adeo etiam Diis, bestiis, anima carentibus instrumentis, ut Thamyris,

Auro illigatum cornu rumpens;

Rumpens harmoniam tendifidis lyræ.

& Pandarus, sese exsecrans, nisi arcum combureret;

Confractum manibus. -- --

N n

Xer-

(a) Sen. l. 1. de ira c. 1. (b) Card. Bona manud. c. 7. (c) Sen. l. 3. de ira c. 2. (d) Idem ib. (e) Idem ep. 18. (f) Plut. lib. de cohob. ira t. 2. Op. p. 455.

Xerxes autem & mari stigmata ac verbera ingessit, & ad montem epistolam misit: Atbo divine, cœlum tangens vertice: nolimeis operibus lapides facere magnos & intractabiles; alioqui te excisum in mare deturbabo.

Sic nos vulgo (a) vestimenta sepe scindimus, vasa projicimus, frangimus calamum, laceramus chartam; cum his uti ex animi sententia non valemus.

(b) Cœlum ipsum petimus iracundia. Hinc blasphemiae; hinc querimoniae adversus Deum; hinc de ejus providentia motæ ab impiis controversiæ.

Exemplum e gentilibus præbet (c) Cæsar, qui iratus cœlo, quod obstreperet pantomimis, quos imitabatur studiosius quam spectabat, quodq; comessatio sua fulminibus terreretur, prorsus parum certis, ad pugnam vocavit Jovem, & quidem sine missione, Homericum illum exclamans versum:

Ἡ μὲν ἀνάνεια, ἡ ἐγὼ σ.

Quanta dementia fuit? putavit, aut sibi noceri ne a Jove quidem posse, aut se nocere etiam Jovi posse.

Adde, quod Ira (d) tam ex amore nascitur, quam ex odio: non minus inter seria quam inter lusus & jocos.

Quòdque (e) irascimur sepe non illis, qui læserunt, sed his, qui læsuri sunt.

(f) Nec interest, ex quam magna causa nascatur.

(g) Nam, ne initia quidem semper habet magna & valida: cum & dictærium, & jocus, & risus, & nutus, & multa id genus alia, multis iræ causa fuerint.

Sic

(a) Card. Bonaman. c. 7. (b) Idem ib. (c) Sen. l. 1. de ira c. ult.

(d) Plut. l. de coh. ira p. 455. (e) Sen. l. 1. de ira c. 3.

(f) Idem ib. (g) Plut. lib. de cohib. ira p. 454.

Sic in furorem sæpe nos agit (a) parum agilis puer, aut tepidior aqua potui, aut turbatus torus, aut mensa negligentius posita.

(b) Sic refractarius equus & contumax; sic canis oblatrans, & perstreptentes aviculæ; sic importunus muscarum volatus, aut culicum morsus bilem concitant, & impatientiæ nostræ pœnas luunt.

(c) Ut ille, qui cum agasonem vellet ferire, & is exclamasset, Atheniensem se esse, ad asinum conversus, ac fatus, tu vero Atheniensis non es, multis verberibus bestiam obruit.

(d) Ut Ctesipho pancratiasta, mulam calce referendam sibi existimans.

(e) Crede mihi: levia sunt, propter quæ non leviter excandescimus, qualia, quæ pueros in rixam & jurgium concitant.

(f) Indicia autem amarulentorum & morosorum hominum possis conspicere in faciebus servorum, stigmatis, compedibus:

Semperque solus iracundi in ædibus

Auditur ejulatus cantor:

dum intus dispensator flagellatur, torquentur ancillæ.

(g) Itaq, nullus animi motus perinde & in odio est, & contemnitur.

(h) Videmus, etiam servos, nuper emtos, non quærere, an superstitiosum, vel invidum, sed an iracundum nacti sint dominum.

Nn 2

Enim

(a) Sen. l. 2. de ira c. 24. (b) Card. Bona man. c. 7. (c) Plut. de coh. ira p. 461. (d) Idem p. 457. (e) Sen. l. 3. c. 36. (f) Plut. l. c. p. 454. (g) Idem ib. p. 455. (h) Idem p. 462.

Enim vero, proh pudor! (a) *Nos, qui feras cicuramus, lupos demulcemus, ac leonum catulos in ulnis circumgestamus:*

Nos, quorum ingenium & industria eo profecere,

(b) *piſto quod juga delicata collo
Pardus sustinet, improbaeq; tigres
Indulgent patientiam flagello:
Mordent aurea quod lupata cervi;
Quod frænis Libyci domantur ursi;
Et, quantum Calydon tulisse fertur,
Paret purpureis aper capistris;
Turpes effeda quod trahunt bisontes,
Et molles dare jussa quod choreas
Nigro bellua nil negat magistro.*

At, iidem nos, tales tantique, iræ nostræ tam impotentes sumus, ut nulla prope res cicurare nos, aut moderi nobis possit.

(c) *Cæcus est ignis stimulatus Ira,
Nec regi curat, patiturve frænos.*

Interim, certum nihilo secius est, (d) *iis, qui operam navare velint, iram non esse incurabilem.*

Quanquam, ex Heracliti apud Aristotelem (e) pronunciato, *difficile est iræ resistere:*

atque, quod Menander apud Stobæum (f) asserit, *semel conceptam cohibendi magnus est iram labor.*

Itaque ergo, (g) *ad iram recte moderandam, diligentia & studium requiruntur.*

Vnde, tu Fili, (h) *te ante componas, quotidie meditare, resistendum esse iracundiæ.*

Nam-

(a) Plut. lib. de cohib. ira p. 452. (b) Martial. l. 1. epigr. 105.

(c) Seneca in Medea. (d) Plut. l. c. p. 454. (e) Lib. 2. Eudem.

c. 7. (f) Serm. 18. (g) Ibid. (h) Cic. l. 1. ep. 1. ad Q. Fr.

Namque, (a) quemadmodum, qui obsidionem expectant, desperatis externis auxiliis, intro necessaria congerunt atq; deponunt: ita maxime oportet, que adversus iram faciunt, eminus e Philosophia desumpta, in animum comportare. Quippe non facile facultas dabitur ea inferendi, cum eorum usum tempus postulat.

Duo autem discenda sunt: scilicet, & quibus mediis penitus ab Ira tibi cavere possis: &, quomodo subortam cohibere conveniat.

Atque (b) quamvis Iram vincere, tum magna res videatur, tum revera sit: majus tamen est, cavere & providere, ne in ipsam incidamus.

(c) Nam, si cœperit ferre transversos, difficilis ad salutem recursus est.

Quapropter (d) dicam primum, quemadmodum in iram non incidamus: deinde, quemadmodum ab illa liberemur.

Novissime, obiter adjiciam aliqua, velut ex abundanti, eo facientia, (e) ut irascentem retineamus, placeamusq;, & ad sanitatem reducamus.

Cæterum, (f) ne irascamur, præstabimus, si omnia vitia iræ nobis subinde proposuerimus, & illam bene estimaverimus. Accusanda est apud nos, damnanda: perscrutanda ejus mala, & in medium protrahenda sunt, ut, qualis sit, appareat.

Est vero Ira (g) monstrum rabidum & execrabile, affectus maxime implacidus, & turbulentus: qui, si semel invaserit hominem, vix in eo humane nature vestigia relinquit.

Nn 3

Hinc

(a) Plut. p. 454. (b) Dion. Halic. apud Stob. Serm. 18. (c) Sen. l. 1. de ira c. 8. (d) Idem l. 3. c. 5. (e) Idem ib. (f) Idem ib. (g) Card. Bona man. c. 7.

Hinc rectissime (a) *quidam e Sapientibus Viris iram dixerunt brevem insaniam :*

sive (b) *iratum ab insano tempore tantum distare.*

Iidemque argute dixerunt, (c) *iratos exisse de potestate, id est, de consilio, de ratione, de mente.*

(d) *Quid est enim, quo non progrediatur eodem ira, quo furor ?*

(e) *Æq̃ impotens sui est, decoris oblita, necessitudinum immemor, in quod cœpit pertinax & intentata, rationi consiliisq; præclusa, vanis agitata causis, ruinis simillima, quæ super, id quod oppressere, franguntur.*

Proinde, (f) *Pyrrhum, maximum præceptorem certaminis gymnici, solitum ajunt, his, quos exercebat, præcipere, ne irascerentur.*

Vt vero amplius, mi Fili, (g) *scias, non esse sanos, quos ira possedit, ipsum illorum habitum intuere.*

Nam, ut furentium certa indicia sunt, audax & minax vultus, tristis frons, torva facies, citatus gradus, inquietæ manus, color versus, crebra & vehementius acta suspiria: ita irascentium eadem signa sunt.

Flagrant, & micant oculi, multus ore toto rubor, exæstuante ab imis præcordiis sanguine: labia quatuntur, dentes comprimuntur, horrent ac subriguntur capilli, spiritus coactus ac stridens, articulorum seipsos torquentium sonus, gemitus mugitusq;, & parum explanatis vocibus sermo præruptus, & complosæ sæpius manus, & pulsata humus pedibus, & totum concitum corpus, magnasq; minas agens, fœda visu & horrenda facies, depravantium se, atq; intumescen-
tium.

(a) Sen. l. 1. de ira c. 1. (b) Cato apud Stob. serm. 18. (c) Cic. 4 Tusc. (d) Id. ib. (e) Sen. l. 1. de ira c. 1. (f) Idem l. 2. c. 14. (g) Idem l. 1. c. 1.

tium. Nescias, utrum magis detestabile vitium sit, an deforme.

Nempe, (a) liquit decor omnis iratos;

(b) Nunc subito, retrorsum sanguine fugato, pallentes, nunc, in os omni calore ac spiritu verso, subrubicundos, & similes cruentis, venis tumentibus, oculis nunc trepidis & exsiliens, nunc in uno obtutu defixis & hærentibus. Adjice dentium inter se arietatorum, & aliquem esse cupientium, non alium sonum, quam est apris, tela sua attritu acuentibus. Adjice articulorum crepitum, cum se ipsæ manus frangunt, & pulsatum sæpius pectus, anhelitus crebros, tractosq; altius gemitus, instabile corpus, incerta verba subitis exclamationibus, trementia labra, interdumq; compressa, & dirum quiddam exsibilantia. Ferarum, mehercules, sive illas fames exagitat, sive infixum visceribus ferrum, minus tetra facies est, etiam cum venatorem suum semianimes morsu ultimo petunt, quam hominis ira flagrantis.

Prorsus, (c) qualia Poëta inferna monstra sinxere, succincta serpentibus, & igneo flatu: quales ad bella excitanda, discordiamq; in populos dividendam, pacemq; lacerandam, teterrimæ inferum exeunt Furie: talem nobis iratum hominem figuremus, flamma lumina ardentia, sibilo mugituq; & gemitu & stridore, & si qua his invisior vox est, perstreptem.

Atque, heus tu! (d) Qualem intra putas esse animum, cujus extra imago tam fœda est? quanto illi intra pectus terribilior vultus, acrior spiritus est, intensior impetus, rupturus se, nisi eruperit?

(a) Sen. l. 2. de ira c. 35. (b) Idem l. 3. de ira c. 4. (c) Lucem l. 2. c. 35. (d) Idem ib.

Quod si turpitudine, quam in homine efficit Ira, non te satis movere potest, ut ab Ira tibi temperes; moveat te illud *summum, quod valetudini tuæ infert, detrimentum.*

Etenim (a) *affectus Iræ, nisi curentur & castigentur, in naturalem morbum abeunt:*

(b) *Et ideo Ira vitanda est, non moderationis causa, sed sanitatis.*

Audi, quæso, quid in hanc rem nobis de Nicolao Peireskio, Insigni Viro, in vita ejus, Gassendus (c) narret: imo penitus clavis trabalibus illud menti tuæ insige, prout a me quoque factum esse, serio tibi testor. Erat Peireskius *suapte natura subiracundus: dicebat* vero nihil sibi unquam animi regendi persuasionem æq. fecisse, ac *spectaculum casu quodam exhibitum in microscopio.* Quippe, cum in eo conclusisset pediculum ac pulicem, observavit, pediculum lucta instituta sic commotum fuisse, ut sanguis a capite in caudam, itu, redituq. continenti, distraheretur. Hinc nempe est argumentatus, quanta fieri per iram debeat humorum, spirituum, facultatum omnium perturbatio; quantam declinet perniciem, qui illi non fecerit locum.

Et, profecto, ita res est, in irato homine (d) *tumescunt venæ, concutitur crebro spiritu pectus, rabida vocis eruptio colla distendit: tunc artus trepidi, inquietæ manus, totius corporis fluctuatio.*

Proinde, quidam (e) *nimio fervore rupere venas; & sanguinem supra vires elatus clamor egressit, & luminum suffudit aciem in oculos vebementius humor egestus.*

Mul.

(a) Apollonius Macedo, apud Stob. serm. 18. (b) Idem ep. 18.

(c) pag. 214. (d) Sen. l. 2. de ira c. 35. (e) Idem l. cit.

(a) *Multi continuaverunt iræ furorem; nec, quam expulerant, mentem unquam receperunt. Ajacem in mortem egit furor, in furorem ira.*

(b) *Multos iracundia mancos, multos debiles fecit.*

At, quid ego, quam singulis & privatim nociva Ira sit, multis persequor?

(c) *Si effectus ejus, damnaq; intueri velis, nulla pestis humano generi pluris stetit. Videbis cades ac venena, & reorum mutuas sordes, & urbium clades, & totarum exitia gentium, & Principum sub civili hasta capita venalia, & subjectas tectis faces, nec intra mœnia coërcitos ignes, sed ingentia spatia regionum hostili flamma relucencia. Aspice nobilissimarum Civitatum fundamenta vix notabilia: has ira dejecit. Aspice solitudines, per multa millia sine habitatione desertas: has ira exhausit. Aspice tot memoriæ proditos Duces, mali exempla fati. Alium ira in cubili suo confodit; alium inter sacra mensæ ira percussit; alium inter leges, celebrisq; spectaculum fori, lancinavit; alium filii parricidio dare sanguinem jussit; alium servili manu regalem aperire jugulum; alium in cruces membra dividere.*

Porro, (d) *Ira abstinendum est, sive par est, qui lacerandus est, sive superior, sive inferior. Nam, cum pare contendere, anceps est: cum superiore, furiosum: cum inferiore sordidum.*

Imo, si inimicus (e) *imbecillior, parce illi; si potentior, tibi.*

N n 5

Addc,

(a) Sen. l. cit. c. 36. (b) Idem l. 3. c. 28. (c) Idem l. 1. de ira c. 2. (d) Idem l. 2. de ira c. 34. (e) Idem 2. de ira c. 5.

Adde, quod (a) te alius non lædet, nisi ipse velis. Tum autem læsus eris, cum te lædi existimaris.

Nulla igitur causa est offensionis, præter opinionem,

Proinde (b) tolle damni opinionem, & nihil nocebit tibi. Nulla res attingit, aut movet animum, aut ad ipsum intrat: solus ipse se ipsum movet; & quale tulerit iudicium, talia fiunt ea, quæ accidunt.

Sed & simul (c) tollenda ex animo suspicio & conjectura, fallacissima irritamenta Iræ.

(d) Mendacium subtiliter limandum a radicibus:

(c) Quandoquidem & illi peccant, quos minime putes:

Et, qui non peccant, impugnantur fraudibus.

Quædam mera (f) interpretatio eo producit, ut videantur injuria.

(g) Ille me parum humane salutavit; ille osculo meo non adhæsit; ille inchoatum sermonem cito abrupit; ille ad cœnam non vocavit; illius vultus aversior visus est.

(h) Quod accidere vides in animalibus mutis, idem in homine deprehendes: frivolis turbamur, & inanibus. Taurum color rubicundus excitat; ad umbram aspis exsurgit; ursos leonesq; mappa proritat. Omnia, quæ natura fera ac rabida sunt, consternantur ad vana. Idem & stolidis ingeniis evenit: rerum suspitione feriuntur: adeo quidem, ut interdum injurias vocent modica beneficia.

Por-

(a) Epictet, Enchir. c. 37. (b) Card. Bona manud. c. 7. §. 9.

(c) Sen. l. 2. de ira c. 24. (d) Phædrus l. 3. (e) Idem ib.

(f) Sen. l. 3. de ira c. 11. (g) Idem l. 2. c. 24. (h) Idem l. 3. c. 29. 30.

Porro & (a) his, quæ narrata sunt, non debemus cito credere. Multi ementiuntur, ut decipiant: multi, quia decepti sunt: alius criminatione gratiam captat, & fingit injuriam, ut videatur doluisse factam. Est aliquis malignus, & qui amicitias coherentes diducere velit: est suspicax, & qui spectare ludos cupiat, ut ex longinquo tutoq; speculetur, quos collisit.

(b) Causa iracundiæ, opinio injuriæ est, cui non facile credendum est; nec apertis quidem manifestisq; statim accedendum. Quædam enim falsa veri speciem ferunt. Dandum semper est tempus: veritatem dies aperit. Ne sint aures criminantibus faciles. Hoc humanæ naturæ vitium suspectum, notumq; nobis sit: quod, quæ inviti audimus, libenter credimus: & antequam judicemus, irascimur.

(c) Ergo exploranda est Veritas multum prius, Quam stulta prave judicet sententia.

(d) Non deerit suspicioni argumentatio: simplicitate opus est, & benigna rerum æstimatione. Nihil, nisi quod in oculos incurret, manifestumq; erit, credamus: & quoties suspicio nostra vana apparuerit, objurgemus credulitatem. Hæc enim castigatio consuetudinem efficiet non facile credendi.

Amplius: (e) Non vis esse iracundus? ne sis curiosus. Qui inquit, quid in se dictum sit, qui malignos sermones, etiamsi secreto habiti sint, eruit, se ipse inquietat.

Non expedit, omnia videre, omnia audire. Multæ nos injuriæ transeant: ex quibus plerasq; non accipit, qui nescit.

Quin

(a) Sen. l. 2. de ira c. 29. (b) Idem l. 2. c. 22. (c) Phædrus l. 3.

(d) Sen. l. 2. de ira c. 24. (e) Idem l. 3. c. 10.

Quin & ex cognitis (a) alia differenda sunt, alia deridenda, alia donanda.

Præcipue illud (b) reputandum est, ab hominibus multa crimina per ignorantiam ac imperitiam committi, de quibus, si moneantur, mox desistunt.

Nimirum, Sapiens (c) scit, neminem nasci sapientem, sed fieri: scit, paucissimos omni ævo sapientes evadere, quia conditionem humanæ vitæ perspectam habet: nemo autem naturæ sanus irascitur. Quid enim, si mirari velit, non in sylvestribus dumis poma pendere? quid si miretur, spineta sentesq; non utili aliqua fruge compleri? nemo irascitur, ubi vitium natura defendit.

Ante omnia vero lædenti animus (d) intuendus est, an voluerit, an inciderit: coactus sit, an deceptus: odium secutus sit, an præmium: sibi morem gesserit, an manum alteri commodaverit.

Sed & Sapiens (e) dimittit sæpe eum, cujus peccatum deprehendit; si pœnitentia facti spem bonam pollicetur; si intelligit, non ex alto venire malitiam, sed summo, quod ajunt, animo inherere.

Apud illum quoque (f) puerum ætas excusat, fœminam sexus, extraneum libertas, domesticum familiaritas.

Atque hac moderatione, & æquanimirate tanto magis in rebus, quæ te proprie non concernunt, utendum.

(g) Accurate consectari & scrutari inquirendo omnia, atq; in medium protrahere omnia servi negotia, omnes amici actiones, omnia aliorum studia & susur-

(a) Sen. l. 3. de ira c. 2. (b) Stob. serm. 17. (c) Sen. l. 2. de ira c. 11. (d) Idem l. 3. c. 12. (e) Idem l. 1. c. ult. (f) Idem l. 3. c. 24. (g) Plut. de ira cohib. p. 461.

susurros: ea vero res iras gignit multas atq; continuas, & quotidianas, quarum summa eo redit, ut morosi intractabilesq; reddamur. Euripidis est, Deum res magnas curare; exiguas fortune dimissas sinere.

Præterea, (a) corpus frugalitate ad facilitatem est assuefaciendum.

Haud enim (b) mente recte uti possumus, multo cibo & potione completi:

(c) -- -- simul assis
*Miscueris elixa, simul conchyliis turdis,
 Dulcia se in bilem vertent:*

(d) distendentur corpora, & animi cum corpore tumescent:

Maxime vero (e) *Vinum* incendit iram, quia calorem auget, pro cuiusq; natura.

Idcirco (f) profuerit, ut calentibus ingeniis subtrahatur vinum, quod pueris Plato negandum putat, & ignem vetat igne incitari.

Velim quoque, (g) Fili memineris, quod pœnitudo lammumq; te sequutura sint, si quicquam immane commiseris ex iracundia.

Fieri aliter nequit:

(h) *Exemplo quodcunq; malo committitur, ipsi Displicet auctori, prima hæc est ultio, quod se Judice nemo nocens absolvitur.*

Vnde (i) *Iracundie tristitia comes est: & in hanc omnis Ira, vel post pœnitentiam, vel post repulsam, resolvitur.*

Seve-

(a) *Plut. de ira cohib. p. 461.* (b) *Cic. 5. Tusc.* (c) *Horat. l. 2. Serm. sat. 2.* (d) *Sen. l. 2. de ira c. 20.* (e) *Idem lib. cit. c. 19.* (f) *Idem c. 20.* (g) *Epictetus apud Stob. serm. 18.* (h) *Juven. Sat. 13.* (i) *Sen. l. 2. de ira c. 6.*

Severis, ad præcavendam iram, remediis, lepidum aliquod miscere, quid prohibet, a Dialogista apud Plutarchum, in de cohibenda ira libello, (a) in hanc sententiam suggestum: *Proclivi ad iram cavendum est a rebus raris & curiose elaboratis, qualia sunt pocula, sigilla, & pretiosi lapides. Hæc enim perditæ, magis furorem cient, quam paratæ facilia & quotidiana. Nerone, cum is octangulam scenam, ob sumptus magnitudinem pulcritudinemq; spectaculum admirabile, confici curasset, Seneca reprehendit, dicens: nunc te pauperem esse demonstravisti: hæc enim scena amissa, similem aliam nullam adipisceris.*

Ridebis, Fili, & dices, hoc remedium tuæ conditioni non convenire. Sed, quid scis ergo tu, quæ tibi olim evenient? Bono animo sis:

(b) *Prudens futuri temporis exitum
Caliginosa nocte premit Deus,
Ridetq; si mortalis ultra
Fas trepidat.*

(c) *Quod hodie non est, cras erit: quod non expectas, ex transverso fit: sic vita traditur: & super nos fortuna negotium curat.*

(d) -- *Sors omnia versat.*

Ego quoque, (c) duro initio usus adolescentiæ, nunc non omnino nullum locum occupo in Literaria, (quæ mihi Civili potior; nam,

(f) *Regnare nolo, liber ut non sim mihi,)*
Republica.

Fra-

(a) Pag. 461. (b) Horat. l. 3. Carm. Od. 29. (c) Petron. in Satyr. (d) Virgil. Ecl. 9, (e) Corn. Nep. in Cinlone. (f) Phædrus l. 3.

Frater germanus (a) gloriam armis belli repperit, & Dux Militaris Venetis operam locat.

Verum, ludo te tantum, nec illorum parentum similis sum, qui, (b) sicut omnia, Spes quoq, suas ambitione donant.

Interea loci, si tute his non egebis, licebit ea cum aliis communicare: (c) nam, vetus verbum hoc quidem est: communia esse amicorum inter se omnia.

Nec defuere, qui hoc remedium valde commendatum haberent.

Quæ, cum dico, Cotyn Regem dico: (d) Is erat natura celer ad iram, sævusq, castigator eorum, qui in ministerio deliquissent. Hospes quidam ad illum detulit vasa fragilia tenuiaq, sed scite curiosoq, torno elaborata. At is hospiti quidem dedit munera; cæterum vascula omnia confregit. Demirantibus, & quærentibus, cur id faceret? Ne, inquit, sævire in servos, si forte vascula frangerent.

Dico item Cæsarem Augustum: Hic enim, (e) cum cænaret apud Vedium Pollionem, fregerat unus ex servis ejus crystallinum. Rapi eum Vedius jussit, nec vulgari periturum morte: murænis objici jubebatur, quas ingens piscina continebat. Evasis e manibus puer, & confugit ad Cæsaris pedes, nihil aliud petiturus, quam ut aliter periret, nec esca fieret. Motus est novitate crudelitatis Cæsar, & illum quidem mitti, crystallina autem omnia coram se frangi jussit, compleriq, piscinam.

Offendas apud Plutarchum alia averruncandæ Iræ remedia, pol! præclara, & quantivis facienda.

Vult

(a) Ter. Heaut. a. 1. s. 1. (b) Petron. in Satyr. (c) Terent. in Adelph. a. 5. s. 3. (d) Plut. in Apophth. (e) Sen. l. 3. de ira c. 40.

Vult enim (a) ut Anaxagoram imitemur, utq₃ is, narrata filii morte, respondit: sciebam me genuisse mortalem: ita irritantibus identidem nos delictis hoc accinere: Sciebam, me, cum emerem servum, non emissem sapientem: sciebam, me parasse amicum, cujus animus motibus esset obnoxius: sciebam, mulierem mihi esse, cum acciperem mulierem.

Addit prudenter: Quod si quis Platonikum istud: Numnam & ego talis sum? subinde insusurrans, intro rationem avertat, ac aliorum reprehensionibus de cavendo peccato cautionem sibi inserat: ne is non magno vitiorum in aliis odio indulserit, seipsum veniam plurima indigere sentiens.

Nempe (b) omnes inconsulti & improvidi sumus, omnes incerti, queruli, ambitiosi. Quid levioribus verbis ulcus publicum abscondo? omnes mali sumus. Quicquid itaq₃ in alio reprehenditur, id unusquisq₃ in suo sinu inveniet.

(c) Alia fecimus, alia cogitavimus, alia optavimus, aliis favimus: in quibusdam innocentes sumus, quia non successit.

(d) Placidiores itaq₃ invicem simus: mali inter malos vivimus.

(e) Sed ubi tam æquum judicem invenies? Fidei acerrimus exactor est perfidus; & mendacia persequitur, ipse perjurus; & litem sibi inferri ægerrime calumniator patitur. Aliena vitia in oculis habemus: a tergo nostra sunt.

(f) Peras imposuit Jupiter nobis duas;
Propriis repletam vitiis post tergum dedit;
Alienis

(a) pag. 463. (b) Sen. l. 3. de ira c. 26. (c) Idem l. 2. c. 28.

(b) Idem l. 3. c. 26. (c) Idem l. 2. c. 28. (f) Phædrus l. 4.

Alienis ante pectus suspendit gravem.

Hac re videre nostra mala non possumus :

Alii simul delinquant , Censores sumus.

Hinc adeo , (a) quivis nostrum iratus & puniens, Aristidis & Catonis voces ingerit : Noli furari, mentiri, socors esse : & quod est omnium turpissimum, iratos irati ipsi objurgamus, & quæ per iram sunt peccata, ea per iram vindicamus.

(b) Quanto melius est abire in diversum, nec vitia vitiis componere ? Nam quis sanus constare sibi videatur, si mulam calcibus repetat, & canem morso ?

Nunquam (c) committet Virtus, ut vitia, dum compescit, imitetur.

Illud vero Dialogistæ apud Plutarchum (d) institutum, quod postremis verbis ipse enarrat, modusq;, quem tenuit, tam sapiens, tam adlæ, omnibusq; vitiis, si recte tractetur, aditum præcludendum, in vita utile est ac salutare, ut nihil supra. Fecit probe: nec fieri potest, ut quis melius rebus suis consulat. Arrige aures, Fili, & imitare !

Magnum, inquit, & divinum mihi illud Empedoclis visum est :

Esse velis abstemius improbitatis.

Quin & ista pacta sive vota, ut non inelegantia, neque aliena a Philosopho probavi, cum per annum pollicebantur se velle re Venerea & vino abstinere, Deumq; continentia sua venerari. Itemq;, per certum tempus mendacio vacare, ut animadvertere possent, quomodo & in jocos, & in seriis omnibus veritatem tenerent. His ego animis meum comparans, pietate illis nibilo inferiorem, sacros quosdam initio dies, quibus ira vacarem,

O o

carem,

(a) Plut. de ira coh. p. 463. (b) Sen. l. 3. de ira c. 27. (c) Idem l. 2, c. 6. (d) p. 464.

carem, paucos institui, tanquam vini & ebrietatis vacuas, ac si Nephalia (id est sobria) Sacra, & libationes mellis agerem. Deinde mensem, mox duos, eandem tenui rationem. Atq; hoc pacto me ipsum expertus, successu temporis magnos feci ad patientiam progressus, temperanter me ipsum attendens atq; custodiens, cum boni ominis comprecationibus, immunem Irae, & purum omnis pravi sermonis, absurdaq; actionis ac perturbationis, quæ, propter voluptatem exiguam atq; ingratham, turbas magnas, turpissimamq; adferret pœnitentiam.

Heus, Fili, iterum hoc dico, cape hinc quod imiris exemplum tibi, (a) nunquam videbis melius consilium dari.

Hoc autem dum agis, quotidie cum jam noctescit, animus ad rationem reddendam vocandus est, & dispiciendum, annon aliquid voto tuo adversum commiseris. Sic facile (b) desinet ira, & erit moderatior, quæ sciet sibi quotidie ad iudicem esse veniendum.

Poterant ea, quæ adversus Iram ingessi, remedia sufficere: sed, cum aliud ex alio occurrat, juvat illorum quoq; mentionem injicere;

(c) quamvis materia tanta abundet copia,
Labori faber ut desit, non fabro labor.

Strictim tamen, quæ amplius ad Iram ab animo propulsandam conducunt, Senecam præceptorem sequutus, inculcabo,

(d) ut exequamur cœptum propositi ordinem.

Nempe, multum (e) proderit cogitatio mortalitatis. Sibi quisq; ut alteri dicat: Quid juvat, tanquam

in

(a) Ter. in Eun. a. 2. s. 3. (b) Sen. l. 3. de ira c. 36. (c) Phædrus l. 4. (d) Idem ib. (e) Sen. l. 3, c. 42.

in æternum genitos iras indicere, & brevissimam ætatem dissipare? Quid juvat, dies, quos in voluptatem honestam impendere licet, in dolorem tormentumq; transferre?

(a) Ira, ob alienum peccatum, sordida & angusti pectoris est:

(b) Nec magis quisquam eodem tempore & iratus potest esse, & vir bonus, quam æger & sanus.

Nihil valde proficit Ira, & eos quos occupavit, ludibrio exponit. Nemo enim facile (c) credit irascentium verbis, quorum strepitus magni, minaces sunt, intus mens pavidissima.

(d) Quicquid terret, & trepidat.

Et Ira adeo tantum (e) fere in morsum labiorum, stridorem dentium, vanas incursiones, maledicta stultas habentia minas insumitur, ac deinde ridicule, antequam ad finem, ad quem festinabat, perveniatur, ultro concidit.

Atq; hinc merito deridetur,

(f) qui sine virtute vanas exercet minas.

Iram *damna* comitantur. (g) Ira, patri luctum, marito divortium attulit, Magistratui odium, Candidatorepulsam.

(h) Dat pœnas, dum exigit.

Insuper Ira (i) *naturam hominis mutat*. Illa, in amorem hortatur, hæc in odium: illa, prodesse jubet, hæc nocere.

Iam, (k) bonus vir est. qui injuriam fecit? noli credere. Malus? noli mirari. Dabit pœnas alteri, quas debet tibi: & jam sibi dedit, qui peccavit.

O o 2

(a) Quid

(a) Sen. l. 2. de ira c. 6. (b) Id. ib. c. 12. (c) Id. l. 1. c. 16. (d) Sen. l. 2. c. 11. (e) Plut. lib. de coh. ira p. 458. (f) Phædrus l. 3. (g) Sen. l. 3. c. 5. (h) Idem ib. (i) Idem ib. (k) Idem l. 2. c. 30.

(a) Quid novi est, si inimicus nocet, amicus offendit, filius labitur, servus peccat?

Hoc age: Elige in societatem (b) simplices, faciles, moderatos, qui iram tuam nec evocent, & ferant.

(c) Non tantum exemplo melior sit, qui cum quietis hominibus vivit: sed & causas irascendi non invenit, nec vitium suum exercet. Fugere itaq; debebis omnes, quos irritaturos iracundiam scies.

Cæterum, (d) est levamentum malorum ingentium, pati, & necessitatibus suis obsequi.

Vt vero (e) quietus esse possit animus, non est jactandus, nec multarum rerum actu fatigandus, nec magnarum, supraq; vires appetitarum.

Nulli fortuna tam dedita est, ut multa tentanti ubiq; respondeat. Sequitur ergo, ut is, cui contra, quam proposuerat, aliqua cesserunt, impatiens hominum rerumque sit: ex levissimis causis irascatur, nunc personæ, nunc negotio, nunc loco, nunc fortunæ, nunc sibi.

Nec minus uni negotio intentum, oportet (f) æque cavere lassitudinem corporis. Consumit enim, quicquid in nobis mite placidumq; est, & acria concitat. Ideo, quibus stomachus suspectus est, processuri ad res agendas majoris negotii, bilem cibo temperant; quam maxime movet fatigatio: sive quia calorem inedia compellit, & nocet sanguini, cursumq; ejus, venis laborantibus, sistit: sive quia corpus attenuatum & infirmum incumbit animo. Certe, ob eandem causam, iracundiores sunt valetudine aut ætate fessi. Fames quoq; & sitis, ex eisdem causis vitanda est: exasperat enim & incendit animos. Vetus dictum est: A lassorixam queri: æque autem & ab esuriente, & a sitiēte, & ab omni homine, quem aliqua res urit.

Trans-

(a) Sen. l. 2. de ira c. 31. (b) Idem l. 3. c. 8, (c) Id. ib. (d) Id. l. 3. c. 16, (e) Id. ib. c. 6, (f) Id. c. 9.

Transfer, Fili, dicta ista nostra, in succum ac sanguinem, & robur ac æs triplex circa pectus habebis, ne ulla unquam Ira, ex qualicunq; re, in illud queat introrumpere. Sed tamen, dum ætatem, dum genus vitæ, quod nunc te tenet, reputo, operæ pretium est, ut adversus duo, e quibus Ira inter æquales tibi potissimum prognasce solet, peculiariter te muniam. *Contumelias* innuo, & illud de *rebus literariis, aut iis, quæ in Orbe forte accidunt*, recte, an secus gesta fuerint, contendendi studium.

Equidem non diffiteor: (a) *Hominis animus in auribus habitare videtur: bonis enim auditis corpus gaudio repletur: contrariis autem, ira inflatur.*

Interea loci, utiq; (b) *nihil est jucundius, & docto viro dignius, quam ferre posse conviciantem. Quoniam si ille, cui convicium fit, dissimulaverit, in ipsum autorem redundat.*

Scit Sapiens, quod illi,

(c) *sinistra quos in lucem Natura extulit,
Non quicquam possunt nisi meliores carpere.*

Quapropter (d) *nihil magis suaferim, quam sumere ingentem animum.*

Namque (e) *hujus est, injurias despicere. Ultionis contumeliosissimum genus est, non esse visum dignum, ex quo peteretur ultio. Multi leves injurias altius sibi demisere, dum vindicant: ille magnus & nobilis est, qui, more magnæ feræ, latratus minutorum canum securus exaudit.*

(a) Herodotus apud Stob. serm. 18, (b) Philemon apud eundem eodem loco. (c) Phædrus l. 2, (d) Sen. l. 3. de ira c. 32, (e) Idem l. 2, c. 32.

(a) *Vt tela a duro resiliunt, & cum dolore cadentis solida feriuntur : ita nulla magnum animum injuria ad sensum sui adducit, fragilior eo quod petit.*

(b) *Quare fers aegri rabiem, & phrenetici verba ? puerorum protervas manus ? nempe, quia videntur nescire, quid faciant. Quid interest, quo quisq; vitio fiat imprudens ? imprudentia par in omnibus patrocinium est.*

Quin tu igitur hoc mihi observa :

(c) *Dicetur aliquis male de te locutus, cogita, an prior feceris : cogita, de quam multis loquaris. Cogitemus, inquam, alios non facere injuriam, sed reponere : alios pronos facere, alios coactos facere, alios ignorantes : etiam eos, qui volentes scientesq; faciunt, ex injuria nostra non ipsam injuriam petere.*

Des quoque hoc, si potes, potes autem si periculum feceris, effectum, ut, (d) si quis nunciarit, quendam tibi maledicere, ne refutes, quæ dicta sunt, sed respondeas, eum nescisse cætera tua vitia ; nam alioqui non illa sola fuisse dicturum.

Cæterum, in Disputando, (e) noli studium cognoscendi in libidinem contendendi vertere,

(f) Quoties disputatio longior & pugnacior erit, in prima resistamus.

Ante omnia (g) vide, non tantum, an verum sit, quod dicis, sed, an ille, cui dicitur, veri patiens sit.

Hoc pacto (h) noli congregari cum imperitis. Nolunt discere, qui nunquam didicerunt.

(i) Ea tenent, quæ invaserunt, & eripi sibi judicium suum, etiamsi pravum est, non sinunt ;

Sem-

(a) Sen. l. 3. de ira c. 5. (b) Idem ib. c. 26. (c) Idem l. 2. c. 28. (d) Epictet. enchir. c. 48. (e) Plut. de ira cohib. p. 462. (f) Sen. l. 3. de ira c. 8. (g) Idem c. 37. (h) Idem ib. (i) Idem l. 1. c. 14.

Semperque (a) pro judicio stant erroris sui.

Maxime vero a conviviorum sodalitatibus abesse debent altercationes.

(b) Neq; enim ebrius aliquis sobrium quicquam docebit, neq; sobrius ebrio quicquam persuadebit. Vbi autem sobrietas abest, inanis & irritus est contentionis labor.

(c) Ἀλλήλοις δ'εἰς, cum invicem se mutuis exhortationibus amici ad amorem immortalitatis exacuunt.

In eruditis vero placidisq; disputationibus, (d) non est levitas, a cognito & damnato errore discedere; & ingenue fatendum est; aliud putavi, deceptus sum. Hac vero superbæ stultitiæ perseverantia est: Quod semel dixi, qualecunque est, fixum ratumque sit. Non est turpe, cum re mutare consilium.

Mi Fili! (e) Nunc eorum, qui placide & leniter se gesserunt adversus iram, pulcerrimas voces, pulcerrima facta ad contemplandum proponam.

Juvat enim (f) inspicere, tanquam in speculum, in exempla moderata & lenia;

præcipue illorum, (g) quibus nec ad irascendum causa defuit, nec ad ulciscendum potestas.

Primum in scenam producam (h) Socratem, peripetium senem, per omnia aspera jactatum, invictum tamen.

(i) A palestra secum duxerat ad cœnam Euthydemum. Ibi cum Xanthippe irata accurrisset, ac, factis conviciis, mensam ad extremum subvertisset, surgens

O o 4

Eu-

(a) Phædrus l. 4. (b) Epictet. apud Stobæum. (c) Plin. l. 3. ep. 7.

(d) Sen. l. 4. de benef. c. 38. (e) Plut. l. de ira coh. p. 457.

(f) Ter. in Adelph. a. 3. s. 3. (g) Sen. l. 3. de ira c. 22 (h) Id. ep. 104. (i) Plut. lib. de ira coh. p. 451.

Euthydemus, magno concepto dolore, abitum parabat. Tum *Socrates*: nonne, inquit, nuper apud te gallina quaedam involans idem hoc fecit, nihil me indignante?

Eundem, (a) ajunt, colapho percussum nihil amplius dixisse quam, Molestum esse, quod nescirent homines, quando cum galea prodire deberent.

M. Catonem quidam in balneo percusserat: (b) Postea satisfaciendi, Cato, non memini, inquit, percussum me.

(c) Bonus ille *Phocion*, injuria uxori suae facta, tantum ab auctoris accusatione absuit, ut, cum ille sponte, metu percussus, *Phocionem* accederet, & veniam postulareret, inquiens, ignorasse, quod ejus uxor fuisset, in quam injuriosus fuerat; hoc sermone sit usus: Mea quidem uxor nihil abs te affecta est, sed fortassis alia: proinde non est, cur excusationem apud me dicas.

(d) *Lycurgi Lacedaemonii* facinus quis nostrum non miretur? qui, a cive quodam, altero multatus oculo, eum a populo sibi traditum, ut suo arbitrato multaret, nulla quidem poena affecit, sed instituit. Cumq; jam virum bonum effecisset, in theatrum produxit. Admirantibus autem *Lacedaemoniis*, Hunc, inquit, cum a vobis superbum & injustum accepissem, vobis equum & popularem restituo.

(e) Quid facilius fuit *Antigono*, quam duos manipulares duci jubere, qui incumbentes regio tabernaculo, faciebant, quod homines & periculosissime & libentissime faciunt, de Rege suo male existimant? Audierat omnia *Antigonus*, utpote cum inter dicentes & audientem palla interesset, quam ille leviter commovit, & Longius, inquit, discedite, ne vos Rex audiat.

(a) Idem

(a) Sen. l. 3. de ira c. 11. (b) Id. l. 2. c. 32. (c) Stob. serm. 18.

(d) Epist. apud Stob. serm. 18. (e) Sen. l. 3. de ira c. 22.

(a) *Idem, tam miti animo hostium suorum maledicta, quam civium tulit. Itaq, cum in parvulo quodam castello Græci obsiderentur, & fiducia loci contemnentes hostem, multa in deformitatem Antigoni jocarentur, & nunc staturam humilem, nunc collisum nasum deriderent: Gaudeo, inquit, & aliquid boni spero; si in castris meis Silenum habeo. Cum hos dicaces fame domuisset, captis sic usus est, ut eos, qui militia utiles erant, in cohortes describeret, ceteros præconi subiceret: id quoq, se negavit facturum fuisse, nisi expediret his dominum habere, qui tam malam haberent linguam.*

(b) *Haberem alios multos Veterum proponendos, qui contumeliose tractati, sive verbis conviciosi, sive aliis modis, nullo pacto re ultionem exequuti sunt, sed oratione fortassis admonuerunt, aut aliter æquo leniq, animo improbitatem hominum tulere.*

Sed modus servandus est, atque (c) *id arbitror adpræmere in vita esse utile, ut ne quid nimis.*

Ideo (d) *pauca ex ingenti turba exempla protuli.*

Quod superest, postremo nunc, mi Fili, (e) *te illud admoneo, ut, si plene iram vitare non potes, quod ante occupatur animus ab iracundia, quam providere ratio potuit, ne occuparetur; mature ei resistas, & male conciliatum affectum ex animo ejicias.*

(f) *Quæ quidem mihi virtus non interdum minor videtur, quam omnino non irasci.*

Atque, quia (g) *sæpe ad nos Ira venit, sæpius nos ad illam,*

consultissimum est, (h) ipsis repugnare seminibus,

O o s

atque

(a) *Sen. l. 3. de ira c. 22. (b) Stob. serm. 18. (c) Ter. in Andr. a. 1. s. 1. (d) Sen. l. 3. de ira c. 14. (e) Cic. lib. 1. ep. 1. ad Q. Fr. (f) Idem ib. (g) Sen. l. 3. de ira c. 12. (h) Idem l. 1. c. 8.*

atque (a) vires ejus, antequam spatientur, opprimere.

(b) Sicut ergo flammam, pilis leporis, ellychnio, aut paleis accensam, facile est inhibere: ubi vero solidas ac crassas res corripuit, celeriter absunit,

Sublime fabrorum sibi subjiciens opus, ut ait Æschylus: ita qui iram ab initio adnadvertit, sensimq; intelligit, eam a sermone aliquo aut promiscua scurrilitate incensam fumare, is non magno opus habet labore, sed plerunq; ipso silentio & contemptu oppressit. Ut enim ignem exstinguit, qui materiam ei non suggerit: ita Iram præcavet & arcet, qui eam initio non alit, neq; sese inflat.

Est vero (c) prima quædam excandescentiæ, tanquam tyranni, opprimendæ ratio, non parere, neq; obtemperare ei jubenti vociferari, torvum tueri, cedere seipsum; sed quiescere, neq; affectum morbi intentionem jactatione & clamore facere.

(d) Quamobrem optimum est, ut placide nos contineamus, aut fugiamus, occultemurq; nos, & in quietem tanquam portum confugiamus, ubi Ira quasi morbi comitialis accessionem præsensimus: ne cadamus, aut in alios potius incidamus.

(e) Vultus remittatur, vox lenior sit, gradus lentior: paulatim cum exterioribus interiora formentur.

Nempe, (f) in Ira nihil magis decet quam quies, ut Sappho præcipit:

Ira cum pectus rapida occupavit,

Futiles linguæ jubeo cavere

Vana latratus jaculantis.

Enim

(a) Sen. l. 1. c. 8. (b) Plut. lib. de ira coh. p. 454. (c) Inem p. 455. (d) Idem ib. (e) Sen. l. 3. de ira c. 13. (f) Plut. l. de ira coh. p. 456.

Enim vero, (a) optimum est quidem ita assuescere domare iracundiam, ne facile ad ipsam accendaris. Sin minus, saltem ne quod ipsa imperat, statim irrationalis animæ pars ad finem perducatur.

(b) Hæc namq; concitata, nihil unquam providenter agere novit, sed litigandi studio quasi ebria, temere quovis rapitur.

Ergo, (c) maximum remedium Iræ, dilatio est; ut primus ejus fervor relanguescat, & caligo, quæ premit mentem, aut residat, aut minus densa sit. Quædam ex his, quæ te præcipitem ferebant, hora, non tantum dies, molliet.

Imo, nec vel tam longo spatio opus videtur. Vnde Athenodorus (d), valedicturus Augusto Cæsari, volens aliquod philosopho dignum monumentum apud illum deponere, adjecit: Cæsar, cum iratus fueris, ne quid dixeris, fecerisve, priusquam Græcarum literarum XXIV. nomina apud te recensueris.

Porro, (e) Iram sæpe misericordia retro agit, imprimis quando eos, quibus irascimur, de admissis serio dolere deprehendimus.

(f) Sævi quoq; implacabilesq; domini, crudelitatem suam impediunt, si quando pœnitentia fugitivos reduxit: & dedititiis hostibus parcimus.

Interdum (g) faciet nos mitiores, si cogitaverimus, quid aliquando nobis profuerit ille, cui irascimur, & meritis offensa redimetur.

(h) Illud quoq; occurrat, quantum commendationis nobis allatura sit, clementiæ fama, & quam multos venia amicos utiles fecerit.

Pro.

(a) Euseb. apud Stob. ser. 17. (b) Theophrastus apud eund. illo loco. (c) Sen. l. 3. de ira c. 1. (d) Plut. in Apopht. (e) Sen. l. 1. de ira c. 16. (f) Petron. in Satyr. (g) Sen. l. 2. de ira c. 34. (h) Idem ib.

Proderit quoque, si molliter delicateque tractetur iratus animus. (a) Si *Lectio* illum carminum obleniat, & *historia fabulis derineat*.

Mirum quoque est, quam *Musicae* modulationibus mens resolvatur. Orpheus

(b) *immites potuit flectere cantibus*
Umbrarum dominos:

ad ejusque lyrae sonum,

(c) -- *lacrymis victarum carmine fama est*
Eumenidum maduisse genas.

Atque sic (d) *Pythagoras* perturbationes animi lyra componebat.

Ejus alumnus & disciplinae sectator Clinias, (e) si quando in iram delapsus esset, atq. ad iracundiam se precipitem ferri sensisset, confestim, prius quam prorsus invaderetur ab ira, & elucesceret in ipso mentis affectu, chordis adaptatis, citharam pulsavit. Interrogantibus autem, ob quam causam id faceret? Quoniam, inquit, mitigor animo.

(f) Videtur autem mihi Achilles etiam in Iliade, quum accinit citharae, veterumq. res gestas cantando sibi ipsi in memoriam accersit, furorem & indignationem sopire.

Sic (g) Graccho Oratori, quod & moribus esset austerioribus, & in dicendo vehementior, fistula fuit concinnata, quali Musici vocem paulatim in utramq. partem per tonos deducunt. Hanc, eo orante, servus tenens a tergo adstabat, tonumq. lenem suggerebat. Itaque herum a vociferatione revocabat, asperitatemq. & iracun-

(a) Sen. l. 3. de ira c. 9. (b) Sen. Herc. Fur. a. 2. (c) Ovid. lib. 10. Metam. (d) Sen. l. 3. de ira c. 9. (e) Aelian. l. 14. Hist. c. 23. (f) Idem ib. (g) Plat. l. de ira coh. p. 456.

iracundiam vocis auferebat. Ita is iram dicentis demulcebat atq; sedabat.

(a) *Quibusdam, ut ait Sextius, iratis, profuit aspexisse speculum. Perturbavit illos tanta mutatio sui: velut in rem præsentem adducti non agnoverunt se.*

Nempe, sic (b) fertur, *Minervam, cum fistula caneret, Satyro his verbis castiganti,*

Non te decet forma isthæc, pone fistulas,

Et arma capeſſe componens recte genas,

non obtemperasse: cum autem in flumine faciem suam eſſet contuita, indignatam fuiſſe, ac miſſas feciſſe fiſtulas.

Statim:

(c) *I procul hinc, dixit, non eſt mihi tibia tanti.*

At, veræ deformitatis, quam Ira gignit, (d) quantum imago illa speculo repercussa reddit? *Animus si ostendi, & si in ulla materia perlucere poſſet, intuentes nos confunderet, ater maculoſusq; æſtuans, & distortus, & tumidus. Nunc quoq; tanta deformitas ejus eſt per oſſa carnesq;, & tot impedimenta effluentis: quid ſi nudus oſtenderetur?*

Verum enim vero Menandro (e) viſum fuit, *haud aliud eſſe iræ pharmacum, quam gravem orationem amici viri.*

Atque ſane negari nequit, magna vis eſt eloquentiæ, & adeo

(f) -- *magno in populo cum ſæpe coorta eſt*

Seditio, ſævitq; animis ignobile vulgus,

Jamq; faces & ſaxa volant, furor arma miniſtrat.

Tum

(a) Sen. l. 2. de ira c. 36. (b) Plut. l. de ira coh. p. 456. (c) Ovid. 3. de arte. (d) Sen. l. c. (e) Apud Stob. ſerm. 18. (f) Virg. l. 1. Æn.

*Tum pietate gravem ac meritis, si forte virum
quem*

Conspexere, silent, arrestisq; auribus adstant.

Ille regit dictis animos, & pectora mulcet.

Quanquam cauto hic opus est: neque enim omnibus eadem dicere convenit. (a) *Quadam non nisi decepta sanantur.*

Itaque, mi Fili, iratos placare cum volueris, (b) *alteri dices: vide, ne inimicis iracundia tua voluptati sit. Alteri: vide, ne magnitudo animi tui, creditumque apud plerosq; robur, cadat. Indignor mehercule, & non invenio dolendi modum: sed tempus expectandum est: dabit pœnas. Serva istud in animo tuo, cum potueris, & pro mora reddes. Castigare vero irascentem, & ultro obviam ire ei, incitare est.*

(c) *Varie aggredieris, blandeque: & si insignis homo sit, dicas ei licet, quod Phœnix Achilli apud Homerum.*

(d) *Reprime iracundiam tuam Achilles, haud te decet animi crudelis esse.*

Quomodo & (e) *Aristoteles Alexandrum, excandescentem ira, placare volens, & sedare summam indignationem, hæc ad eum scripsit: Excandescentia & ira non erga pares, sed erga superiores & potentiores existere solet; tibi vero nemo par est.*

De cætero, (f) *quod in luctu dici solet, efficacissime & in Ira dicetur: Vtrum aliquando desines, an nunquam? si aliquando; satius est, iram relinquere, quam ab Ira relinquì. Sin semper hæc cogitatio durabit; vides, quam impacatam tibi denuncies vitam. Qualis enim*

(a) Sen. l. 3. de ira c. 40. (b) Idem ib. (c) Idem ib. (d) Il. 10.

(e) Ælian. l. 12. Hist. c. 54. (f) Sen. l. 3. de ira c. 28.

enim erit semper tumentis? Adjice nunc, quod nisi bene te ipse succenderis, & subinde causas quibus stimuleris, renovaveris, sua sponte ira discedet, & vires illi dies subtrahet. Quanto satius est, a te illam vinci, quam a se?

Summe vero æstuantes stimulisque quasi furoris actos, & nil nisi vindictam spirantes sic interdum alloquaris: Quid ruimus in pugnam? quid certamina nobis accersimus: quid imbecillitatis obliti, ingentia odia suscipimus, & ad frangendum fragiles consurgimus? jam istas inimicitias, quas implacabili gerimus animo, febris aut aliud malum corporis vetabit geri. Jam par acerrimum media mors dirimet. Quid tumultuamur, & vitam seditiosi conturbamus? stat super caput fatum, & pereuntis dies imputat, propiusque ac propius accedit. Istud tempus, quod alienæ destinæ morti fortasse citra tuam est.

Aristoteles (a) tradit, si quis irascenti large aquam frigidam; infuderit, illum iram sedaturum.

Ipsus addit quoque causam, sic enim, inquit, calor extinguitur:

Dialogista vero apud Plutarchum (b) non tantum experientiam in fidem allegat, sed & superaddit bina ejusmodi remedia alia, aitque: Vidi non modo frigida affusa iram sedari, ut Aristoteles narravit: sed & Metu oblato extinctam; & subito etiam mehercule Gaudio delinitum (ut est apud Homerum) multis pacatumque animum.

Memini, apud Philippum Melanchthonem legisse, ipsum aliquando Lutherum, (c) cum ferveret maxime, tam placidum quam ovem reddidisse,

in

(a) Problem. sect. 8. (b) l. de ira coh. p. 454. (c) Ter. in Adelph. a. 4. s. 1.

in aurem ejus infufurrando illud Ovidii:

(a) *Vince animos iramq; tuam, qui cætera vincis.*

(b) *Nempe, omnia hæc nunc verba hæc redeunt denique:*

(c) *Consilium pro moribus cujusq; capiendum erit. Quosdam enim preces vincunt: quidam insultant, instantq; submissis. Quosdam terrendo placabimus: alios objurgatio, alios confessio, alios pudor cæpto dejecit.*

(d) *Pro cujusq; morbo medicina queratur.*

Voto finienda est, delira, extremo affectu, Dissertatio. OPTIME MAXIME DEVS, qui Christiani (e) Imperii molem, in amplissimum terrarum Orbis fastigium extulisti, te publica voce obtestor atq; precor, custodi, serva, protege hunc statum:

eique Reges, Principes, ac Magistratus semper destina, quorum cervices, oneri subjectos populos regendi fortiter sustinendo, sufficiant: quiq; potestate sua benigne utantur:

Qui (f) procedant in tribunal, non furentes, nec infesti, sed vultu legis:

Qui firmiter persuasum teneant, quod nihil æque pulchrum sit, quam

(g) *Consulere patriæ, parcere afflictis, feram
Cede abstinere, tempus atq; ira dare,
Orbi quietem, seculo pacem suo.*

Quodque,

(h) *Hæc summa virtus, petitur hæc cælum via.*

Postre-

(a) Ep. 3. Horoid. (b) Ter. in Adelph. a. 1. s. 2. (c) Sen. l. 3. de ira c. 1. (d) Idem l. 1. c. 16. (e) Vellej. in fine hist. (f) Sen. l. 1. de ira c. 16. (g) Sen. in Octav. (h) Idem ibid.

Postremis verbis ad te, Mi Fili, sermo redit, tibiq;
voveo, (a) ut, dimotis fallacium affectionum tenebris,
splendorem veræ lucis possis agnoscere.

Enim vero:

(b) *Nubibus atris*
Condita, nullum
Fundere possunt
Sidera lumen.
Si mare volvens
Turbidus Auster
Misceat æstum;
Vitrea dudum,
Parq, serenis
Vnda diebus,
Mox resoluta
Sordida cæno,
Visibus obstat.
Quiq, vagatur
Montibus altis
Defluus amnis,
Sæpe resistit,
Rupe soluti
Objice saxi.
Tu quoq, si vis
Lumine claro
Cernere verum,
Tramite recto
Carpere callem;

Pp

Gau-

Gaudia pelle,
Pelle Timorem,
Spemq; fugato,
Nec Dolor adsit.
Nubila mens est,
Vinctaq; frænis,
Hæc ubi regnant.



PRÆFATIO.

SYNOPSIS

METAPHYSICÆ.



PRÆFATIO.

QUODNAM Metaphysicæ objectum sit, & cui fini inventa fuerit, non una omnium est sententia; quos ego opinionibus suis libens abundare permitto. Atq; utinam olim quoq; nihil mihi commercii fuisset cum illorum tricis, quibus nimis implicitus eram, cum bonarum horarum dispendio. Quia vero, præ cæteris, ii sententiam suam mihi verisimilem reddidere, qui, Aristotelis autoritate (verene, an perperam, non disputo) sese munientes, contendebant, hoc Metaphysicæ proprium munus esse, ut prius Ens generatim, secundum communem naturam, & generales affectiones, declaret, deinde ad nobilissimas ejus species, Deum, Angelos, & Humanam Animam considerandas, progrediatur; nec absurdi quoq; quicquam hæc asseveratio continet: sic Filium quoq; institui. Servant ergo illam methodum ea, quæ sequuntur, præcepta: & ad Metaphysicam revocavi, quæ alii in peculiari disciplina, cui Pneumaticæ nomen dedere, docent. Nuspiam oneravi infirmitatem discantis, subtilitate quæstionum, aut distinctionum parum profuturarum; sed ad intellectum, quin & utilitatem illius descendendi, qui paucis, non omnino, in Metaphysica philosophari, eamq; disciplinam, utpote aliis studiis consecratus, degustare potius, quam illa ingurgitare
te

fese debebat. Inter cætera hoc imprimis mihi curæ fuit, ut Dei existentiam, & Animæ immortalitatem sedulo inculcarem; in quibus prora puppisque consistit omnis humanæ eruditionis: & qua doctrina, ob seculi, in quo, proh! eheu! vivimus, perversitatem, & *ἀθεϊσμός*, bene præparatum pectus habere, salus est adolescentibus.



SYNOPSIS METAPHYSICÆ.

CAPVT I.

De Natura & Partibus Metaphysicæ.

Quid est Metaphysica?

Metaphysica, sive Scientia Prima, aut Prima Philosophia, est disciplina communissima & generalissima, considerans Ens quatenus Ens, est, & nobiliores ejus species. Sive: Metaphysica est scientia generalissima, contemplans ea, quæ res Physicas, aliarumque scientiarum objecta transcendunt, nempe Ens, quatenus Ens, ejusque Affectiones, & prima, universalissimaque Principia, & quoque præcipuas Species.

Quæ sunt Partes Metaphysicæ?

Partes Metaphysicæ duæ sunt, una Generalis, altera Specialis. Atque *Pars Generalis* agit de natura Entis in communi: *Specialis* agit de Speciebus, Deo, Angelis, & Anima humana.

CAPVT II.

De Ente.

Quot modis Ens accipitur?

Ens accipitur vel Generalissime, vel Generaliter, vel Stricte.

Quid est Ens Generalissime acceptum?

Ens, Generalissime acceptum, notat omne illud, de quo aliquid, vel quod de aliquo potest enunciari. Vel, est omne id, quod quovis modo est, & quod cogitari potest

potest aut dici. Hæc significatio comprehendit omnia, quæ sub conceptum humanum cadere possunt, sive sint *Vera*, sive *Ficta*, sive *Possibilia*, sive *Impossibilia*.

Quid est Ens Generaliter acceptum?

Ens Generaliter acceptum, notat omne illud, quod esse obtinet, sive in se, sive in suis causis: atque vulgo hoc vocant *Ens Nominale*, quatenus nimirum significat essentiam veram, non fictam, præcisam ab actu existendi exercito. Ad realitatem enim sufficit, ut quid esse possit, licet revera non existat.

Quid est Ens Strictè acceptum?

Ens, Strictè acceptum, notat omne illud, quod revera in rerum natura obtinet esse positivum & reale, quocunque modo: atque vulgo hoc vocant *Ens Participiale*, quia notat actum essentiæ secundum, per quem in rerum natura existentiam obtinere, & in aliquo entium gradu constitui dicitur.

Quid est Existentia?

Existentia est id, quo primo & formaliter constituitur essentia in latitudine entis positivi & realis atque actualis, sive extra suas causas.

Quid est Essentia?

Essentia, est radix & principium realium operationum, atque primo in re vel objecto aliquo cognoscitur, non quidem primitate inchoationis, sed ordine causalitatis. Nimirum, essentia objecti est, quod ita primo in eo concipitur, ut nulla ratio a priori reddi possit, cur tali objecto conveniat; ipsum vero potius est ratio & causa, cur alia objecto conveniant, & a quo oriuntur alii conceptus.

Quid est Ens Positivum?

Ens Positivum est, quod habet essentiam veram, positivam, sibi debitam.

Quid est Ens Negativum?

Ens Negativum est, quod Essentiam negat & tollit. Atque cum hoc fit citra subjecti aptitudinem, & conditionem ad formam recipiendam requisitam, dicitur *Ens pure Negativum*: Cum vero notat tantum carentiam rei vel essentiæ positivæ in subjecto, rem negatam recipere apto, dicitur *Ens Privativum*.

Quid est Ens Reale?

Ens Reale est, quod extra fictionem intellectus, vere esse obtinet, ut *Homo*.

Quid est Ens Rationis?

Ens Rationis est, quod, non habet vere esse, nisi per mentis fictionem, ut *Chimera*, *homo irrationalis*: hæ enim res in se entitatem non habent; a ratione tamen ut entia cogitantur.

Quid complectitur Ens Generaliter acceptum?

Ens Generaliter acceptum complectitur Ens, quod est Actu, & Ens, quod est Potentia.

Quid est Ens Actu?

Ens Actu est, quod per sese subsistit, seu in sese actum essendi obtinet, & vere persistit in rerum natura.

Quid est Ens Potentia?

Ens Potentia est, quod actu essendi caret, habet tamen aliquam realitatem in suis causis, a quibus produci, & in esse actuali collocari, nullam involvit contradictionem: ut *Rosa in hyeme*.

Quid

Quid est Accidens?

Accidens, est quod est extra rationem quidditatis : ut *Albedo*, respectu hominis : estque vel Reale seu Physicum, vel Logicum.

Quid est Accidens Reale seu Physicum?

Accidens Reale seu Physicum est, cujus totum esse, est inhaerere subjecto, a quo realiter distinguitur. Vti, *Virtus* in homine ; *Calor* in igne.

Quid est Accidens Logicum?

Accidens Logicum est, quicquid contingenter advenit alteri, deque illo accidentaliter prædicatur. Sic, esse *vestitum*, prædicatur accidentaliter de homine ; *rationale*, de animali.

Quid est Nihilum?

Nihilum est, quod nullum esse reale habet. Atque dividitur in Negativum stricte tale, & Privativum.

Quid est Nihilum Negativum stricte tale?

Nihilum Negativum stricte tale, est absentia realitatis alicujus in quovis subjecto. Dicitur *Negatio negans* ; item *Pura negatio*. Vt, *non-Deus*, *non-Homo*.

Quid est Nihilum Privativum?

Nihilum Privativum, est absentia certæ entitatis in subjecto hujus capace. Vocatur alias *Privatio*, eiq; opponitur *Habitus*.

Quotuplex est Conceptus Entis?

Conceptus Entis duplex est : unus Formalis, alter Objectivus.

Quid est Conceptus Formalis?

Conceptus Formalis, est actus intellectus, repræsentans objectum.

Quid est Conceptus Objectivus?

Conceptus Objectivus, est ipsum objectum, prout ab intellectu cognoscitur.

Quid est Abstrãctio?

Abstrãctio, est actio intellectus agentis, quo objectum e statu objectivo & fundamentalì, elevatur in statum universalem, sive ideæ, ut distincte cognoscatur.

CAPVT III.

De Principiis Meraphysicæ.

Quæ sunt Principia Metaphysicæ?

PRincipia Metaphysicæ duplicis sunt generis: Generalissima, & minus Communia.

Quæ sunt Principia Generalissima?

Principia Generalissima sunt, quæ a totali Metaphysicæ subjecto, adeoque toto ejus ambitu, petuntur, ac possunt generaliter applicari rebus omnibus, quæ in Metaphysica tractantur. Talia habentur:
 1. Impossibile est, idem simule esse & non esse. 2. Quodlibet est, vel non est. 3. Quicquid est, quam diu est, necesse est esse. 4. De quavis re vera est affirmatio, vel negatio.

Quæ sunt Principia minus Communia?

Principia minus Communia sunt, quæ ab aliquo particulari Metaphysicæ subjecto desumuntur. Vt:

Omne

Omne totum majus est sua parte : Posita causa in actu, ponitur effectus.

CAPVT IV.

De affectionibus Entis in Communi.

Quid est Affectio Entis ?

Affectio Entis, est conceptus generalissimus, Ens transcendentaliter denominans, & cum eo reciprocans.

Quotuplices sunt Affectiones Entis?

Affectiones Entis sunt duplices: Simples, & Disjunctæ.

Quid est Affectio Entis Simplex :

Affectio Entis Simplex est, quæ prædicatur de Ente in sensu simplici, nec includit conceptus oppositos. Vt: Omne ens est bonum, &, Omne Bonum est Ens.

Quid est Affectio Entis Disjuncta ?

Affectio Entis Disjuncta est, quæ prædicatur de Ente sub duplici conceptu, eoque disjuncto. Vt: Omne Ens est causa vel causatum, &, Omne, quod est causa vel causatum, est Ens.

Quot sunt Affectiones Entis Simples ?

Affectiones Entis Simples sunt tres: Vnum, Verum, Bonum.

CAPVT V.

De Vno.

Quid est Vnitas?

VNitas, est attributum transcendentale, quo ens denominatur incommunicabile & indivisum entita-

titative, divisumque est a quovis alio. Ita lignum est unum, si non sit divisum: quod si dividatur, non manet unum, sed plura fiunt ligna.

Quotuplex est Vnum?

Vnum duplex est, vel Per se, vel Per Accidens.

Quid est Vnum Per Se?

Vnum Per Se est; quod essentiam habet integram & indivisam, estque in uno prædicamento, ut, *Dew*, *Homo*: nihil enim refert, utrum unum hoc simplex sit, an compositum, dummodo inter partes componentes æcta conjunctio existat.

Quid est Vnum per Accidens?

Vnum per Accidens est, quo plures res ex se completæ, ex naturis diversis & divisis, in indivisionem quandam, sine tamen arctissima partium conjunctione, coalescunt; atque hoc per se non est in uno prædicamento: v. c. *Acervus lapidum*, *Exercitus*, *Domus*, *Respublica*. Cohærent autem partes, vel beneficio artis, ut *Domus*; vel beneficio naturæ, uti concretum naturale ex substantia & accidente.

Quid est Vnitas Singularis?

Vnitas Singularis, est rerum, quatenus extra mentem in se indivisæ, & ab aliis divisæ existunt.

Quid est Vnitas Universalis?

Vnitas Universalis, est rerum, quatenus, uno conceptu communi, plures earum inter se similes apprehenduntur.

Quid est Multum?

Multum est, quod ex plurium entium collectione constat.

CAPVT VI.

De Vero.

Quid est Veritas?

Veritas, est conformitas intellectus cum re, siue objecto, quando nimirum res intellectui repræsentatur, prout est. Sive: Veritas entis, est ejus convenientia cum sua idea, quam de ea format intellectus, siue diuinus, siue humanus; ratione cujus proinde illud ipsum est, quod eo nomine, quo appellatur, significari solet. Hinc, quia Veritas non inest enti, sed tantum intellectui de ente, non est proprie affectio entis, sed illud tantum extrinsece denominat.

Quid est Falsitas?

Falsitas, est difformitas intellectus cum re, quæ est extra eundem; siue, cum id intellectui verum appareret, quod tale non est.

Vnde provenit Falsitas?

Falsitas, provenit ex ignorantia, quæ duplex est: Ignorantia puræ negationis, &, Ignorantia pravi dispositionis.

Quid est Certitudo?

Certitudo, est firma adhæsiō intellectus ad objectum.

Quotuplex est Certitudo?

Certitudo triplex est: Moralis, Physica, & Metaphysica?

Quid est Certitudo Moralis?

Certitudo Moralis est, quæ habetur ex causis physice quidem fallibilibus, infallibilibus tamen moraliter loquen-

loquendo, hoc est, propemodum infallibilibus. Sic nobis certum est, esse Americam, ex dictis nimirum tot prudentum & veracium hominum.

Quid est Certitudo Physica?

Certitudo Physica est, quæ nititur principiis physicis, quæ ex natura rei non possunt aliter se habere: ut certitudo de cursu Petri, quem currentem video.

Quid est Certitudo Metaphysica?

Certitudo Metaphysica est, qua ita proponitur obiectum, ut in ordine ad omnem potentiam non possit aliter esse: ut certitudo, quam habemus de Dei existentia, aut de primis & universalissimis Principiis.

CAPVT VII.

De Bono.

Quid est Bonitas?

Bonitas, nimirum transcendentalis, est perfectio inesse debita: atque, hoc sensu, Bonum illud dicitur, quod habet perfectionem debitam inesse. Intelligitur vero *Perfectio Essentialis*, qua res omnia habet, quæ ad essentiam ejus constituendam requiruntur. Quomodo homo perfectus & bonus est, quia constat corpore & anima rationali, in quibus consistit essentialis ejus perfectio.

Quotuplex est Bonum?

Bonum duplex est: Vnum, quod tale est per Essentialitatem; alterum, quod tale est per Participationem.

Ecquod est Bonum tale per Essentialitatem?

Bonum tale per Essentialitatem est, quod perfectionem suam habet a seipso, & cujus bonitas necessario actu existit. Tale bonum est solus Deus.

Ec-

Ecquod est Bonum tale per Participationem?

Bonum tale per Participationem est, quod perfectionem suam habet ab alio dependentem. Qua ratione omnia, excepto solo Deo, bona sunt, etiam Diabolus.

Quid est Perfectio Essentialis?

Perfectio Essentialis est, per quam quid absolute, aut certe in suo genere, plenam habet integritatem, adeo ut res per se vera & bona censeatur.

Quid est Perfectio Accidentalıs?

Perfectio Accidentalıs est, quæ non tam ad esse, quam ad melius esse pertinet, reique decus & ornamentum adjicit.

Quid est Perfectio Simpliciter talis?

Perfectio Simpliciter talis est, quæ omnem imperfectionem cujuscunque generis excludit.

Quid est Perfectio Secundum Quid?

Perfectio Secundum Quid talis est, quæ quidem in certo rerum genere est perfectio, ita tamen, ut imperfectionis cujusdam sit indicium.

Quid est Malum?

Malum in abstracto, est carentia perfectionis essentialis inesse debitæ; ac proinde Malum in concreto, est res, quæ caret aliqua perfectione, ad essentiam suam requisita. Sic vero nullum ens malum est, quippe non esset ens, si careret aliqua perfectione essentiali.

CAPVT VIII.

De Actu & Potentia.

Quid est Actus?

Actus est, qui dirigitur ad potentiam, eamque perficit: sive, importat ordinem & respectum ad potentiam, & per eum definit aliquid esse in potentia, si in ea fuit. Vt, *hic homo; iste Angelus.*

Quomodo Actus dividitur?

Actus varie dividitur. Est enim Actus alius Purus, vel Impurus; alius Primus, vel Secundus; alius Formalis, vel Entitativus; alius Signatus, vel Exercitus; denique alius est Elicitus, vel Imperatus.

Quid est Actus Purus?

Actus Purus est, qui excludit omnem potentiam passivam: uti *Deus*, qui ab omni passione immunis est.

Quid est Actus Impurus?

Actus Impurus est, cui semper aliquid potentia passivæ admixtum adhæret: ut *omnis creatura.*

Quid est Actus Primus?

Actus Primus, est ipsa rei forma, sive substantialis, sive accidentalis, quatenus ea involvit potentiam agendi vel patiendi: ut *Scientia, Anima.*

Quid est Actus Secundus?

Actus Secundus, est actio a forma procedens: ut *Contemplatio, Ridere.*

Quid est Actus Formalis?

Actus Formalis est, quo Ens existit per suam formam: ut *Homo per animam rationalem.*

Quid

Quid est Actus Entitativus?

Actus Entitativus, est ipsa rei, quæ non est corpus naturale, existentia: h. e. vera rei positio extra nihil: ut *Deus, Angeli, Materia prima, Forma, Accidentia.*

Quid est Actus Signatus?

Actus Signatus, est ratio formalis alicujus rei, in se considerata. Sive, est forma generalis, abstracta a suis accidentibus.

Quid est Actus Exercitus?

Actus Exercitus, est res substrata rationi formali. Sive, est forma, quæ cum certa specie concrevit. Sic Metaphysicus agit de *Causa* in actu signato, quia inquit, quænam sit ratio formalis Causæ in genere, & quotuplex sit in specie. At Astronomus agit de *Causa* in actu Exercito, dum inquit, quæ res sit causa Eclipsæos.

Quid est Actus Elicitus?

Actus Elicitus est, qui immediate producitur a voluntate, & in ea manet: ut, *velle diligere Deum.*

Quid est Actus Imperatus?

Actus Imperatus est, qui producitur ab alia quadam facultate, tanquam principio proximo, sed voluntate illam facultatem movente ad exercitium; ut, *quando voluntas movet intellectum ad intelligendum.*

Quid est Potentia?

Potentia est, qua Ens esse posse intelligitur, quando nondum est; hoc est, licet actu nondum sit, non habet tamen repugnantiam ad existendum.

Quomodo Potentia dividitur?

Potentia varie dividitur: Est enim Potentia alia Activa, Passiva, & Objectiva; alia Universalis, vel Particularis;

cularis; alia Proxima, vel Remota; alia Prima, vel Secunda; denique alia Naturalis, vel Obedientialis.

Quid est Potentia Activa?

Potentia Activa est, in cujus virtute aliquis continetur effectus, & per eam produci potest: quomodo est in Deo potentia creandi; in Sole calefaciendi; in Architecto edificandi.

Quid est Potentia Passiva?

Potentia Passiva est, qua aliquid aptum est recipere aliquam formam: sicut in aqua est potentia recipiendi calorem: in homine, potentia recipiendi eruditionem.

Quid est Potentia Objectiva?

Potentia Objectiva, est non repugnantia rei, ad hoc, ut fiat & existat. Ita mundus, antequam creabatur a Deo, erat in potentia objectiva; quia ante sui creationem non erat, nec tamen ipsi repugnabat existere.

Quotuplex est Potentia Activa?

Potentia Activa, est vel Rationalis, vel Irrationalis.

Quid est Potentia Rationalis?

Potentia Rationalis, sive Intellectualis est, quæ, positis omnibus ad agendum requisitis, potest agere, & non agere. Sicut homo potest scribere, vel non scribere. Voluntas eandem rem potest amare, & odire.

Quid est Potentia Irrationalis?

Potentia Irrationalis, sive non-rationalis est, quæ, positis omnibus ad agendum requisitis, non potest non agere; sicut frigus necessario frigefacit; calor tantum calefacit.

Quotuplex est Potentia Rationalis?

Potentia Rationalis, est vel Ordinata, vel Absoluta.

Quid est Potentia Ordinata?

Potentia Ordinata, est principium exequendi aliqua conformiter legi rectæ, secundum ordinem præfixum ab illa lege. Sic Princeps, jubens furem suspendi, agit per potentiam ordinatam: quia id facit, ex præscripto legis de furibus suspendendis.

Quid est Potentia Absoluta?

Potentia Absoluta, est principium, posse agere præter illam legem institutam; ut, si Princeps poenam suspendii in fure in aliam commutet. Atque sic Potentia Dei quoque dividitur in Ordinatam, & Absolutam. Potentia Dei Ordinata, est ipsa Dei potentia, quatenus accommodata est, & quasi debita, exequendæ alicui communi legi, ab ipso met institutæ. Ita, cum Sol perpetuo movetur cursu, fit hoc per potentiam Dei Ordinatam. Potentia Dei Absoluta, est ipsa Dei potentia, quatenus nulli communi ordini, a se in rebus instituto, addicta est, & suo modo cum exequi tenetur, sed extra illum ordinem nonnunquam operatur; uti, cum Deus, ad Josuæ preces, Solis cursum cobibuit. Vtramque hanc Dei potentiam sub se complectitur Omnipotentia, per quam Deus omne illud efficere potest, quod, ut fiat, contradictionem nullam implicat. Sic contradictionem implicat, Deum, quatenus talem, mori, Deum esse injustum.

Quid est Potentia Universalis?

Potentia Universalis est, quæ ad plures & diversos actus se porrigit: qualis potentia est Dei, quoad actiones omnium creaturarum; Cæli, quoad generatio-

nem plantarum, aliarumque rerum naturalium; *Materia Prima*, ad recipiendum quaslibet formas.

Quid est Potentia Particularis?

Potentia Particularis est, quæ ad unum actum est determinata: qualis potentia est in *magnete*, ad attrahendum ferrum; neque enim, uti ferrum, ita aurum quoque ac argentum, aut alia metalla attrahit.

Quid est Potentia Proxima?

Potentia Proxima est, cui proxime & immediate respondet actus. Sic in *pane*, in ventriculo animalis concocto, est potentia proxima ad chylum.

Quid est Potentia Remota?

Potentia Remota est, inter quam, & actum ultimum, alius mediat & intercedit actus. Sic in *Pane* potentia remota est ad Sanguinem.

Quid est Potentia Prima?

Potentia Prima, est naturalis quædam habilitas: uti *puer adhuc rudis*, in potentia prima, est *Poëta*; habet enim aptitudinem ad poësin discendam.

Quid est Potentia Secunda?

Potentia Secunda, est habitus, quo quis præditus, potest bene promteque operari: ut, qui *Poësin didicit*, potest poëmata jam effingere.

Quid est Potentia Naturalis?

Potentia Naturalis est, quæ viribus naturæ creaturarum, cum generali Dei concursu, potest perducì ad actum. Talis potentia naturalis est in *vite*, ut producat vinum.

Quid

Quid est Potentia Obedientialis?

Potentia Obedientialis est, per quam creatura apta est, ad actum aliquem supernaturalem, sed cum concursu Dei speciali, producendum. Talis potentia obedientialis erat in Aqua, cum Christus ex ea efficeret Vinum.

Quid est Impossibilitas?

Impossibilitas, est repugnantia ad existendum, in eo, quia attributa contradictoria involvit, vel minimum ab hac vel illa causa creata fieri nequit.

CAPVT IX.

De Principio & Principiato.

Quot modis sumitur vox Principii?

VOx Principii duobus modis accipitur, Late, & Stricte.

Quomodo accipitur Vox Principii Stricte?

Stricte accipitur vox Principii, cum idem significat, quod Causa.

Quomodo accipitur Vox Principii Late?

Late accipitur vox Principii, cum latius patet, quam causa, & designat primum, unde aliquid est quocunque modo: atque hoc sensu omnis quidem causa est principium, sed, non omne principium est causa. Sic, in Divinis, Pater est Principium Filii; Aurora, est Principium diei.

Quot sunt Requisita Principii?

Requisita Principii duo sunt: 1. Vt principium quodammodo prius sit principiato, saltem secundum nostrum modum concipiendi. 2. Vt sit aliqua con-

nexio, vel consecutio, inter Principium & Principiatum.

Quomodo dividitur Principium?

Principium aliud est Essendi, aliud Cognoscendi: aliud Causale, aliud non Causale: denique, aliud Incomplexum, aliud Complexum.

Quid est Principium Essendi?

Principium Essendi est, quod ad alicujus rei constitutionem sive essentiam concurrat. Sic *Materia* est principium essendi corporis: *Anima rationalis* est principium essendi hominis.

Quid est Principium Cognoscendi?

Principium Cognoscendi est, quod ita rei cognitioni inservit, ut simul haud concurrat ad illius constitutionem. Sic se habet *Effectus*, respectu suæ causæ; *Accidens*, respectu subjecti; nam ex effectu causa, & ex accidente subjectum, cognoscuntur.

Quid est Principium Causale?

Principium Causale est, quod ita est Principium, ut simul habeat verum influxum causalem in aliud. Sic *Materia & Forma* sunt Principia corporis naturalis, in *Physicis*.

Quid est Principium Non-Causale?

Principium Non-Causale est, quod ita est principium, ut non simul habeat influxum causalem. Sic *Privatio* est Principium non-causale corporis naturalis; *Pater Filii*, in *Divinitate*.

Quid est Principium Incomplexum?

Principium Incomplexum appellatur medius terminus, in demonstratione.

Quid

Quid est Principium Complexum?

Principium Complexum, est integra Propositio, per quam aliquid demonstratur. Ita in hac demonstratione: O. Extensum est divisibile: O. Quantum est extensum: E. O. Quantum est divisibile; Principium incomplexum est *Extensum*, est enim medius terminus: Complexum Principium est hæc Propositio: O. Quantum est extensum; quia per eam demonstratur, Quantum esse divisibile.

Quotuplex est Principium Complexum?

Principium Complexum duplex est, vel primo verum, vel ex eo ortum.

Quodnam est Principium Complexum primo verum?

Principium Complexum primo verum est, quod per seipsum fidem habet: uti, *Suum cuique est tribuendum*.

Quodnam est Principium Complexum ex primo ortum?

Principium Complexum ex primo ortum, sive Secundum est, quod ex primo aliquo probatur seu demonstratur, ut: *Furtum non est faciendum*.

Quid est Principiatum?

Principiatum est, quod habet principium: vel, quod aliunde est; ut *Mundus* respectu Dei; *Dies*, respectu Solis.

CAPVT X.

De Causa & Causato in communi.

Quid est Causa?

CAusa, est principium, per se influens esse in aliud:
Vel, definiente ita Galeno: Causa est, quæ suapte
natura ei, quod fit, partem aliquam generationis con-
fert. Sic *Architectus* est causa domus; *Æs*, numi.

Quid est Causalitas?

Causalitas est id, quo mediante causa producit effe-
ctum; ut *Actio*, respectu efficientis.

Quid est Ratio Causandi?

Ratio Causandi, est id, per quod res constituitur
causa in actu primo, potens in effectum influere; ut
Calor in igne.

Quot sunt Causæ?

Aristoteles s. *Metaphys.* quatuor constituit Causa-
rum genera: Efficientem, Finem, Materiam, & For-
mam: Quas ipse ad divisionem bimenbrem revo-
cat, cum Causam aliam dicit esse Internam, aliam Ex-
ternam.

Quid est Causa Interna?

Causa Interna est, quæ intra rei, cujus est causa, es-
sentiam continetur: uti *Materia*, & *Forma*.

Quid est Causa Externa?

Causa Externa est, quæ essentiam causati non ingre-
ditur, sed extra eam est constituta; uti *Efficiens*, &
Finis.

Quomodo dividitur Causa?

Causa alia est Actu, vel Potentia; alia Vera, vel Sine
qua non; alia Totalis, sive Solitaria, vel Partialis, sive
Socia;

Socia; alia Remota sive Mediata, vel Proxima sive Immediata; alia Procatartica vel Proëgumena; denique alia Subordinata, alia non-Subordinata.

Quid est Causa Actu?

Causa Actu est, quæ actu & revera influit in effectum, ut *Architectus actu ædificans*.

Quid est Causa in Potentia?

Causa in Potentia est, quæ actu non influit in effectum, habet tamen potentiam influendi; ut *Architectus dormiens*, vel aliquid aliud agens, respectu ædificii.

Quid est Causa Vera?

Causa Vera est, quæ vere & realiter influit esse in effectum: sive, quæ est aliqua ex quatuor causarum generibus.

Quid est Causa Sine qua non?

Causa Sine qua non est, quæ non quidem est vera causa, nec enim physice vel moraliter influit, sed habetur tamen ab imperitis pro causa, quia effectus sine ea esse vel fieri nequit. Vti, si pater mittat filium in forum, atq; contingat filium labi in platea, pater dicitur causa sine qua non hujus lapsus; si enim non misisset filium, non fuisset ille lapsus.

Quid est Causa Totalis?

Causa Totalis est, quæ ita influit in effectum, ut non concurrat alia causa ejusdem ordinis, in eodem genere: ut *Vnus equus trahens currum*. Sunt autem *Causæ ejusdem ordinis* omnes in eodem genere æque mediatæ, vel immediatæ; æque universales, vel particulares; &c. *Causæ ejusdem generis* dicuntur omnes

causæ Efficientes, omnes Materiales, omnes Formales, omnes Finales.

Quid est Causa Partialis?

Causa Partialis est, quæ ita influit in effectum, ut simul concurrat alia causa ejusdem ordinis, in eodem genere: ut, quando duo equi simul trahunt currum, tum quilibet equus dicitur tantum causa partialis.

Quid est Causa Remota?

Causa Remota sive Mediata est, quæ influit in effectum, interveniente alia causa ejusdem generis. Sic *herus, jubens famulum calefacere hypocaustum*, est causa mediata calefactionis. *Frumentum*, est materia remota panis.

Quid est Causa Proxima?

Causa Proxima sive Immediata est, quæ ita influit in effectum, ut non intercedat alia causa ejusdem generis: uti *famulus* est causa immediata calefactionis; *farina*, est materia proxima panis.

Quid est Causa Procatartica?

Causa Procatartica est, quæ extrinsecus impellit ad agendum.

Quid est Causa Proëgumena?

Causa Proëgumena est, quæ intrinsecus movet ad agendum.

Quid sunt Causæ Subordinatæ?

Causæ Subordinatæ, sunt plures causæ, ita inter se invicem comparatæ, ut una, vel ex sua natura, vel alio modo, ab altera dependeat in causando. Sic *creatura* in agendo dependet a Deo: illa vocatur *Causa secunda*; Deus autem vocatur *Causa prima*.

Quid

Quid sunt Causa non-Subordinata?

Causæ non Subordinatæ, sunt plures causæ, quarum una, nec ex sua natura, nec alio modo, dependet ab altera in causando: ut *duo equi*, simul trahentes currum unum, aut quorum quisque currum trahit peculiarem.

Quid est Causatum?

Causatum, est omne, quod dependet a causa: ut *domus* respectu architecti.

C A P V T X I.

De Causa Efficiente & Effectu.

Quid est Causa Efficiens.

Causa Efficiens, est causa, unde primum mutationis & quietis est principium. Etsi enim finis primum est in intentione, non tamen primum est in reali causatione; neque materia potest recipere formam, nisi prius ab efficiente alteretur; neque forma, nisi ab efficiente, uniri potest materiæ. *Causalitas Efficientis*, est Actio; quia ab hac agens formaliter dicitur agens, seu efficiens. *Ratio Causandi*, est potentia activa; quia per hanc aliquid aptum est, ut sit efficiens.

Quid est Effectus?

Effectus est id, in quod influit efficiens per suum influxum: ita *Mundus* est effectus Dei; *Domus*, architecti.

Quomodo dividitur Causa Efficiens?

Causa Efficiens alia est per Se, vel per Accidens: alia Physica, vel Moralis; alia Principalis, vel Instrumentalis; alia Naturalis vel Libera; alia Interna, vel
Ex-

Externa; alia Vniversalis, vel Particularis; denique alia Vnivoca, vel Æquivoca.

Quid est Causa Efficiens Per Se?

Causa Efficiens per se est, a qua, ut tali, effectus procedit: ut, *Musicus est causa per se cantionis.*

Quid est Causa per Accidens?

Causa per Accidens est, a qua, ut tali, effectus non procedit: Sive, quæ habet quidem influxum per se Physicum, sed agit sine influxu morali; vel habet influxum per se moralem, sed sine influxu Physico. Ut, *Musicus est causa per accidens statuæ: vinitor, fodiens terram, causa thesauri inventi.*

Quid est Causa Efficiens Physica?

Causa Efficiens Physica est, quæ producit effectum, per influxum Physicum: ut *Carnifex*, cum facinorosum capite plectit.

Quid est Causa Moralis?

Causa Moralis est, quæ imputative tantum influit esse in effectum, h. e. quæ, licet realiter non producat effectum, ita tamen se habet in ordine ad mores, ac si actu influeret, & ideo non minus imputatur ei effectus, ad culpam, vel meritum, ac si revera & per se eum produxisset: uti *Judex*, cum jubet, ut *carnifex facinorosum capite plectat.* Sunt ergo Causæ morales omnes, quæ applicant agens ad patiens: item præcipientes, consulentes, rogantes, non impediētes, cum possint, ac teneantur.

Quid est Causa Efficiens Principalis?

Causa Efficiens Principalis est, quæ influit in Effectum, virtute non ignobiliore, quam ad ipsum producen-

ducendum requiritur; ut *Faber, respectu operis, quod efficit.*

Quid est Causa Instrumentalis?

Causa Instrumentalis est, quæ influit in effectum, virtute ignobiliore, quam ad eum producendum requiritur. Sic, *malleus causa instrumentalis est fabri.*

Quomodo dividitur Causa Principalis?

Causa Principalis, est vel Prima, vel Secunda.

Quid est Causa Prima?

Causa Prima est, quæ a nulla alia causa dependet, ab ipsa vero dependent aliæ omnes: ut Deus. Dicitur *prima*, quia & natura, & tempore, & dignitate prior est omnibus agentibus.

Quid est Causa Secunda?

Causa Secunda est, quæ ab alia causa in agendo dependet, & esse, fieri, ac conservari, ab eadem accipit: quales sunt omnes Causæ, excepto Deo.

Quid est Causa Efficiens Naturalis?

Causa Efficiens Naturalis, est causa, quæ agit per potentiam naturalem, & ad unum oppositorum est determinata: ita *Ignis urit, Magnes trahit ferrum.*

Quid est Causa Libera?

Causa Libera seu Voluntaria est, quæ agit per potentiam liberam, estque Indifferens ad opposita: ut *Deus, Angeli, Homines.* Præter hos vero, omnes aliæ causæ efficientes agunt ex naturæ necessitate, non ex proposito voluntatis.

Quomodo dividitur Causa Naturalis?

Causa Naturalis, est vel Necessaria, vel Sufficiens tantum.

Quid

Quid est Causa Necessaria?

Causa Necessaria est, sine qua non potest esse effectus, nec ipsa sine effectu: ita se habet ortus Solis, respectu diei.

Quid est Causa Sufficiens tantum?

Causa Sufficiens tantum est, quæ sine effectu esse non potest, sed bene effectus sine ipsa; ut, jugulatio, respectu mortis.

Quid est Causa Efficiens Interna?

Causa Efficiens Interna est, cujus effectus est in eodem subjecto, in quo est ipsa. Sic, intellectus est causa interna actus intelligendi: quia actus intelligendi in anima, in qua est intellectus, producit.

Quid est Causa Efficiens Externa?

Causa Efficiens Externa est, quæ non est in eodem subjecto, in quo est effectus. Sicut ignis, produciens calorem in aqua, est causa caloris externa.

Quid est Causa Efficiens Universalis?

Causa Efficiens Universalis est, quæ influit in effectum, actione ita illimitata & indifferenti, ut simul in plures & specie differentes effectus influere possit. Ita Deus est causa universalis, ad omnium rerum productionem concurrens.

Quid est Causa Particularis?

Causa Particularis est, quæ cum causa universali influit in effectum, actione ita determinata, ut simul, ad plures specie differentes effectus producendos, concurrere non possit. Vt homo, produciens alium hominem.

Quid est Causa Vnivoca?

Causa Vnivoca est, quæ producit effectum sibi similem in specie: uti, cum homo generat hominem.

Quid est Causa Æquivoca?

Causa Æquivoca est, quæ producit effectum sibi dissimilem in specie: uti, cum Sol producit Ranam, vel Murem.

Quid est Actio Immanens?

Actio Immanens est, quæ recipitur in ipso supposito, a quo elicitur. Vt Intellectio.

Quid est Actio Transiens?

Actio Transiens est, quæ recipitur in subiecto, distincto ab agente. Vt ferrum calefit ab igne.

Quid est Actio Instantanea?

Actio Instantanea est, quæ fit in instanti; seu, quæ non coëxtenditur certis partibus temporis: ut Creatio.

Quid est Actio Successiva?

Actio Successiva est, quæ coëxtenditur certis partibus temporis; seu, quæ fit in tempore. Sic Aqua sensim calefit ab igne.

Quid est Antiperistasis?

Antiperistasis, est intensio qualitatis, propter circumstantem, seu obliquentem contrariam: uti intensio frigoris in aqua puteali, propter calorem æstivum.

Quid est Exemplar Externum?

Exemplar Externum, est res, quam sibi proponit artifex, ut ejus similitudinem exprimat, vel imitetur.

Quid

Quid est Exemplar Internum?

Exemplar Internum, est intellectualis forma, quam imitatur effectus, ex intentione agentis, determinantis sibi finem: ut *idea domus faciendæ*, in mente architecti.

Quid est Emanatio?

Emanatio, est naturalis resultantia accidentis a subiecto, cui debetur connaturaliter, tanquam ejus proprietas & modus. Vt *productio Intellectus & Voluntatis, in Anima: Frigoris, in Aqua.*

CAPVT XII.

De Causa Materiali, & Materiato.

Quid est Materia?

Materia, est causa interna, quæ per potentiam passivam influit in rem: ut *Aurum*, respectu poculi. *Causalitas Materiæ* in fieri, est generatio; in facto esse, est unio inter materiam & formam. *Ratio causandi materiæ*, est potentia passiva: quippe hujus ratione materia cum forma unitur.

Quid est Materiatum?

Materiatum, est omne id, quod ex materia constat, & intrinsece componitur.

Quomodo dividitur Materia?

Materia alia est Prima, vel Secunda; alia Necessaria, vel non-Necessaria; alia Permanens, vel Transiens; alia Proxima, vel Remota; denique, alia Sensibilis, vel Intelligibilis.

Quid

Quid est Materia Prima?

Materia Prima, est Materia, considerata sine omni forma, ex eaque omnia corpora naturalia constant, ipsa vero ex nulla constat materia.

Quid est Materia Secunda?

Materia Secunda, est Materia, considerata cum certa forma, quam actu habet. Sive, quæ ita est materia alterius, ut ipsa constet ex alia materia. Talis est omnis materia, quæ sensibus percipi potest.

Quid est Materia Necessaria?

Materia Necessaria est, quæ est adæquata effectui, ita ut effectus ex alia re naturaliter fieri non possit: ut *Farina*, respectu panis: quia panis ex alia materia fieri non potest, quam ex farina. Sic *Vinum* tantum fit ex uvis compressis.

Quid est Materia non-Necessaria?

Materia non-Necessaria est, quæ effectui non est unice adæquata; cum effectus etiam ex re alia fieri possit. Vt *Aurum*, respectu Poculi. Potest enim æq; bene poculum ex argento, aut alio metallo fieri.

Quid est Materia Permanens?

Materia Permanens est, ex qua aliquid fit, salva manente materia hujus essentia. Talis materia est *Aurum*, cum ex eo fit poculum aureum.

Quid est Materia Transiens?

Materia Transiens est, ex qua mutata, nec essentiam suam retinente, aliquid fit. Talis materia est *Farina*, cum ex ea fit panis.

Quid est Materia Proxima?

Materia Proxima est, ex qua aliquid immediate est, vel fit, ita ut non fit prius materia alterius. Vt Chylus est materia proxima sanguinis.

Quid est Materia Remota?

Materia Remota est, ex qua aliquid est vel fit, ita ut fit prius materia alterius. Sic Panis est materia remota sanguinis: quia prius ex pane chylus fit, quam sanguis.

Quid est Materia Sensibilis?

Materia Sensibilis, est corpus naturale, quatenus ex eo aliquid est vel fit: ut *Æs*, *Lignum*.

Quid est Materia Intelligibilis?

Materia Intelligibilis est, quæ magis intellectu, quam sensu percipi potest: uti *Res Mathematicæ*.

CAPVT XIII.

De Forma & Formato.

Quid est Forma?

Forma, est causa interna, quæ materiam, per communicationem propriæ suæ entitatis, actuat, ac, eam informando, compositum constituit. *Causalitas Formæ*, est unio inter materiam & formam, prout ea dicit actuationem & informationem materiæ. *Ratio causandi Formæ*, est potentia informandi materiam.

Quid est Formatum?

Formatum est, quod dependet ab aliquo intrinsece id actuante: ut *Homo*, respectu animæ rationalis.

Quomodo dividitur Forma?

Forma alia est Physica, vel Metaphysica; alia Materialis, vel Immaterialis; alia Substantialis, vel Accidental; alia Informans, vel Assistens; alia Generica, vel Specifica; denique alia Totalis, vel Partialis.

Quid est Forma Physica?

Forma Physica, est altera pars compositi naturalis, materiæ contradistincta: ut *Anima rationalis*.

Quid est Forma Metaphysica?

Forma Metaphysica, est essentia totius: ut *Humanitas* hominis, *Animalitas* animalis forma est.

Quid est Forma Materialis?

Forma Materialis est, quæ ita a materia dependet, ut naturaliter extra eam esse nequeat. Quales formæ sunt omnes formæ physicae, præter animam rationalem.

Quid est Forma Immaterialis?

Forma Immaterialis est, quæ citra materiam subsistere apta est: uti *Anima rationalis*, quæ a corpore separata permanet.

Quid est Forma Substantialis?

Forma Substantialis est, quæ cum materia, quam informat, constituit compositum per se: ut *Anima rationalis*, quæ cum corpore, quod informat, constituit hominem, qui est ens compositum per se.

Quid est Forma Accidental?

Forma Accidental, est accidens in abstracto consideratum, constituens cum subiecto inhæsionis unum per accidens; ut *Albedo*, quæ cum corpore constituit corpus album, quod est unum per accidens.

Quid est Forma Informans?

Forma Informans est, quæ unione physica conjungitur subjecto, & cum materia efficit unum per se: ut *Anima*, & omnes reliquæ formæ corporum naturalium.

Quid est Forma Assistens?

Forma Assistens est, quæ nullam habet unionem physicam cum re, cui assistit, ac ideo nec unum per se cum materia efficit, sed tantum motum dirigit. Sic *Eques* forma est assistens equi; *Nauta*, navis, *Auriga*, carpenti.

Quid est Forma Generica?

Forma Generica est, quæ importat conceptum confusum, & aliis speciebus communem: ut *Anima Vegetativa* & *Sensitiva* in homine.

Quid est Forma Specifica?

Forma Specifica est, quæ conceptum importat proprium: ut *Anima rationalis* in homine.

Quid est Forma Totalis?

Forma Totalis est, quæ informat omnes partes alicujus continui heterogenei: ut *Anima rationalis*, quæ informat omnes partes hominis.

Quid est Forma Partialis?

Forma Partialis est, quæ non totum continuum heterogeneum, sed aliquam ejus partem informat, Ita alia est forma *Carnis*, alia *Ossis*.

CAPVT XIV.

De Fine, & Finito.

Quid est Finis?

Finis, est causa externa, quæ movet efficientem ad agendum, & propter quam, vel cujus gratia res est: ut *Conjugium* a Deo est institutum, propter sobolis procreationem: ergo sobolis procreatio est finis conjugii. *Causalitas finis*, in agente intellectuâli creato, est ipsa voluntatis actio, h. e. motio voluntatis ad agendum. *Ratio causandi finis*, est bonum, quod a voluntate appetitur, sive id verum sit, sive apparens.

Quid est Finitum?

Finitum est, quod destinatur ad finem. Sic Finis rerum omnium est *Deus*; ergo omnes res sunt ad hunc finem destinatæ.

Quomodo dividitur Finis?

Finis alius est Per se, vel per Accidens; alius Cui, vel Cujus; alius Ultimûs, vel Intermedius; alius Principalis, vel minus Principalis; alius Formalis; alius Objectivus; alius Efficiendus, vel Obtinendus; alius Adæquatus, vel Inadæquatus: denique alius Internus, alius Externus.

Quid est Finis Per se?

Finis Per se est, ad quem res sua natura ordinatur: uti *Insidie* ordinantur ad perniciem ejus, cui struuntur.

Quid est Finis per Accidens?

Finis per Accidens est, ad quem aliquid ordinatur ab hoc vel illo agente, ut tamen præter naturam talis

rei sit : uti, cum quis furtum ordinat ad eleemosynas erogandas.

Quid est Finis Cui?

Finis Cui est, cujus gratia aliquid expetitur, ita ut sit simul subiectum, cui aliquid expetitur: Sic agroti gratia medicamenta adhibentur, ita ut sit simul subiectum, cui adhibentur.

Quid est Finis Cujus?

Finis Cujus, est forma quædam, cujus efficiendæ gratia agit causa efficiens. Sive, est finis, qui expetitur, ita ut non sit simul subiectum, cui aliquid expetitur. Vt, sanitatis gratia medicamenta adhibentur; sed, sanitas non est simul subiectum, cui adhibentur.

Quid est Finis Vltimus?

Finis Vltimus est, propter quem alia appetuntur, ipse vero propter nihil aliud appetitur. Vt, Deus est finis ultimus omnium rerum: ipse enim est propter se ipsum, omnes vero creaturæ, cum omnibus operationibus suis, sunt propter gloriam Dei.

Quid est Finis Intermedius?

Finis Intermedius est, propter quem ita aliquid est, ut ipse etiam sit propter aliud: ut, expulsio pravorum humorum finis est medicamenti, quam Medicus procurat, sanitatis restituendæ gratia.

Quid est Finis Principalis?

Finis Principalis est, propter quem quis ita agit, ut, etsi nullum alium finem sibi haberet propositum, tamen ageret. Ita proficiscitur mercator Lipsiam, ut merces ibi vendat: quo utique proficisceretur, etiamsi non haberet, quem in illa urbe inviseret.

Quid

Quid est Finis Minus Principalis?

Finis Minus Principalis est, propter quem quis ita agit, ut, si ad nullum alium finem referretur actio, non ageret. Sic Mercator Lipsiam proficiscitur, ut invisat filium literis ibidem incumbentem; is autem finis est minus principalis; nec enim ob hunc solum institueret profectionem.

Quid est Finis Formalis?

Finis Formalis, vocatur actio circa aliquod objectum: ut clara Dei visio, hominis finis formalis est.

Quid est Finis Objectivus?

Finis Objectivus, dicitur ipsum objectum, circa quod versatur actio: Ut ipse Deus.

Quid est Finis Efficiendus?

Finis Efficiendus est, qui, cum non existat actu, ita intenditur ab agente, ut producat: qualis finis est Sanitas, respectu medici, vel curationis.

Quid est Finis Obtinendus?

Finis Obtinendus, est res actu jam existens, quatenus eam agens intendit acquirere vel possidere: ut Pecunia, respectu avari.

Quid est Finis Adequatus?

Finis Adequatus est, qui ita exhaurit speciem aliquam actionis, ut ipsa ad nihil inclinetur aut referatur, nisi quatenus id, ad quod actio refertur, sub illo continetur: ut Oculi finis adequatus est videre.

Quid est Finis Inadequatus?

Finis Inadequatus est, ad quem actio quidem ordinatur, sed ita, ut aliæ etiam sint species boni, ad quas

agens naturalitet inclinatur: ut, *Oculi finis inadequatus est, videre nigredinem.*

Quid est Finis Internus?

Finis Internus est, qui ab eo, cujus finis est, attingitur, id est, acquiritur vel producit. Est enim semper in potestate artificis; ut in arte Medica finis internus est præscriptio medicamentorum.

Quid est Finis Externus?

Finis Externus est, qui non est in potestate artificis, neque is, si sine illo excidat, illico nomen artificis amittit: Sic finis externus medici, est sanitas.

CAPVT XV.

De Necessario, & Contingente.

Quot modis sumitur Necessarium, & Contingens?

Necessarium, & Contingens, sumitur vel in sensu Logico, quatenus est affectio propositionis, vel sensu Metaphysico, quatenus est affectio Entis.

Quid est Necessarium Metaphysicum?

Necessarium Metaphysicum est, quod non potest aliter se habere: Ita necessarium est, Deum esse justum; Solem calefacere.

Quotuplex est Necessitas?

Necessitas alia est Consequentis, vel Consequentiae; alia Absoluta, vel Immutabilitatis ex suppositione; alia Antecedens, vel Comitans.

Quid

Quid est Necessitas Consequentis?

Necessitas Consequentis est, quando tam antecedens, quam consequens, in se necessarium est: ut, si homo est animal, sentire potest; ubi utrumque, & hominem animal esse, & sentire posse, est necessarium.

Quid est Necessitas Consequentia?

Necessitas Consequentia est, quando consequens non est necessarium, nisi posito antecedente; ita tamen, ut tam antecedens, quam consequens, sint in se contingentia; Vt: Si homo æstivis diebus stat sub Sole, necessario incalescit: nam, posito hoc, quod homo tum sub Sole stet, ipsum incalescere est necessarium.

Quid est Necessitas Absoluta?

Necessitas Absoluta est, quæ simpliciter rei convenit ex natura ejus, & secundum omnes temporis differentias: Vt, hominem esse animal est necessarium.

Quid est Necessitas Immutabilitatis ex suppositione?

Necessitas Immutabilitatis ex suppositione est, cum aliquid convenit rei contingenter, si ejus natura absolute consideretur; ex suppositione vero, id est, relata ad certam temporis differentiam, dicitur ei necessario convenire, quia tunc, pro tali temporis differentia, non potest non eidem convenire: Sic necessarium est hominem currere, quando currit.

Quid est Necessitas Antecedens?

Necessitas Antecedens est, quæ oritur ex causa antecedente, & necessario operante, atque ad unum determinata; ita, ut posita tali causa, necessario sequatur effectus: Hoc pacto necessarium est cras Solem

oriri; quia ortus Solis provenit a causa antecedente necessaria, & ad unum determinata, nempe a motu primi mobilis; quo posito, impossibile est Solem non oriri.

Quid est Necessitas Comitans?

Necessitas Comitans est, quæ non oritur ex causa antecedente & necessaria, sed ex ipsa oppositione effectus, etiamsi effectus contingens sit, & a causa libera proveniat. Quomodo necessarium est Petrum sedere, posito quod sedeat; aut sedisse, posito quod sederit; aut sessurum esse, posito quod sessurus sit.

Quid est Contingens?

Contingens est, quod potest aliter se habere: Sic aqua contingenter est calida; quia potest esse frigida.

Quot modis aliquid dicitur Contingens?

Contingens aliquid dicitur tripliciter: Contingens æqualiter, ut plurimum, & raro.

Quid est Contingens Æqualiter?

Contingens Æqualiter est, quod æque potest contingere, ac oppositum: ut, me loqui, aut scribere.

Quid est Contingens ut plurimum?

Contingens ut plurimum est, quod frequentius est: ut, hominem nasci quinque digitis in manu una.

Quid est Contingens raro?

Contingens raro est, quod raro accidit: ut, cum tegula, de tecto decidens, percutit prætereuntem.

CAPVT XVI.

De Ente a se, & ab alio: itemque
Incorruptibili, & Cor-
ruptibili.

Quid est Ens a se?

ENS a se, sive independens & increatum, est, quod non est causatum ab alio: ut *Deus*.

Quid est Ens ab alio?

ENS ab alio, sive dependens & creatum dicitur, quod est causatum ab alio: ut *Creatura*.

Quid est Ens Incorruptibile?

ENS Incorruptibile est, quod de esse ad non esse transire nequit. Tale ens simpliciter est *Deus*: secundum quid vero *Creatura spiritalis*.

Quid est Ens Corruptibile?

ENS Corruptibile est, cui non repugnat non esse: ut *corpus naturale*.

CAPVT XVII.

De Simplici, & Composito.

Quid est Simplex?

SIMPLEX est, quod nec actu divisum est, nec dividi potest: ut *Deus*.

Quotupliciter aliquid Simplex dicitur?

Simplex aliquid dicitur vel absolute, vel certo genere compositionis.

Quid

Quid est Simplex absolute?

Simplex absolute est, quod nullo genere compositionis compositum est: Vt essentia divina.

Quid est Simplex certo genere compositionis?

Simplex certo genere compositionis est, quod non est compositum certo genere compositionis, etiam si alio genere compositum sit. Hoc modo *Angelus* dicitur substantia simplex, quia non constat ex materia & forma, aut partibus quantitativis, licet ex essentia & subsistentia componatur.

Quid est Compositum?

Compositum est, quod actu quidem divisum non est, aptum tamen est, ut dividatur; ut *Homo*. Compositum vero denominatur a compositione, quæ est conjunctio plurium rerum, unum tertium constituentium.

Quotuplex est Compositio?

Compositio est vel Physica, seu Realis; vel Metaphysica, seu Rationis; vel Modalis.

Quid est Compositio Physica, seu Realis?

Compositio Physica, seu Realis est, cujus extrema sunt realia, realiter a se invicem distincta. Quomodo componitur *Corpus ex materia & forma: Corpus hominis ex partibus integrantibus.*

Quid est Compositio Rationis?

Compositio Rationis est, cujus extrema sola ratione distinguuntur. Quomodo res creata componitur ex genere & differentia: ut *Homo ex animali & rationali.*

Quid

Quid est Compositio Modalis?

Compositio Modalis est ex pluribus partibus, quarum una res, altera vero modus rei est: quæ proin modaliter inter se differunt. Sic *Homo sapiens*, ex homine & sapientia; *Acus* e ferro, & certa longitudine, atque acumine componitur.

CAPVT XVIII.

De Toto, & Partibus.

Quid est Totum?

Totum est, quod habet partes: ut *Homo*, respectu corporis, & animæ rationalis.

Quomodo dividitur Totum?

Totum aliud est Essentiale vel Integrale; item Similare vel Dissimilare: quibus addunt vulgo Totum Numerale, Potentiale, & Perfectionale.

Quid est Totum Essentiale?

Totum Essentiale est, cujus partium una est ut potentia, altera ut actus, constituentium unam essentiam: ut *Petrus*, respectu corporis, & animæ rationalis.

Quomodo dividitur Totum Essentiale?

Totum Essentiale dividitur in Physicum, & Metaphysicum.

Quid est Totum Physicum?

Totum Physicum est, cujus partes sunt realiter distinctæ: ut *Corpus*, respectu materiæ & formæ.

Quod

Quid est Totum Metaphysicum?

Totum Metaphysicum est, cujus partes sola ratione distinguuntur: ut *Species, respectu Generis & Differentie*.

Quid est Totum Integrale?

Totum Integrale est, cujus quantitas a quantitate partium constituitur: uti *Homo, respectu capitis, cordis, brachiorum*.

Quid est Totum Similare?

Totum Similare est, quod constat ex partibus ejusdem specie essentiae: ut, *Aqua, Lapis, Aurum*.

Quid est Totum Dissimilare?

Totum Dissimilare est, cujus partes materiales essentia specifica differunt: ut *Oculus, qui constat ex diversis humoribus, tunicis, nervis, musculis*.

Quid est Totum Numerale?

Totum Numerale, est numerus comprehendens pluralitatem aliquorum: sicut *duodenarius* dicit numerum Apostolorum; *quaternarius*, numerum elementorum.

Quid est Totum Potentiale?

Totum Potentiale est, quod importat multas potentias, easque actu continet: ut *Anima rationalis*, quæ habet diversas potentias, visivam, auditivam, discursivam.

Quid est Totum Perfectionale?

Totum Perfectionale est, quod attenditur secundum complementum substantiae individualis: quomodo dicimus, *totus Deus, totus Angelus*.

Quid

Quid sunt Partes?

Partes sunt, sine quibus totum esse non potest. Si-
ve: Pars est, quæ continetur a toto: ut *Anima ratio-*
nalis, respectu hominis.

Quotuplices sunt Partes?

Partes sunt vel Essentiales, vel Integrantes; Prin-
cipales item, vel minus Principales.

Quid sunt Partes Essentiales?

Partes Essentiales sunt, ex quibus totum componi-
tur: ut *Materia & Forma*, respectu corporis; *Ge-*
nus & differentia, respectu speciei.

Quid sunt Partes Integrantes?

Partes Integrantes sunt, ex quibus materia totius
constituitur: ut *Caput, Cor, Pulmo*, respectu ho-
minis.

Quid est Pars Principalis?

Pars Principalis, est pars integrans totius dissimila-
ris, sine qua forma non potest abolvere suam spe-
ciem: quales in homine sunt *Caput, & Cor.*

Quid est Pars minus Principalis?

Pars minus Principalis, est pars integrans totius dis-
similaris, quæ abesse potest a composito, manente
forma illius: ut *Manus in homine.*

CAPVT XIX.

De Vniversali, & Singulari.

Quid est Vniversale?

VNiversale est, cujus entitas est divisibilis in plu-
res entitates tales, qualis est ipsa: ut *Homo*, cum
dividitur in *Petrum & Paulum*. Dividitur autem
Vni-

Universe, *ratione materialis*, sive rei substratæ, non *ratione formalis*, sive universalitatis: secus enim universale divideretur in alia universalia; quod in specie specialissima fieri nequit.

Quid est Singulare?

Singulare est, quod est indivisibile in plura talia, quale est ipsum adæquate, hoc est, in quibus tota illius ratio includatur. Ut *Petrus*, cujus essentia non dividi & communicari potest pluribus entibus, quæ participant entitatem Petrinam.

CAPVT XX.

De Identitate, & Distinctione.

Quid est Idem?

Idem, est res una, explicata pluribus conceptibus. Ita, *conceptus animalis* & *rationalis* in homine, revera idem sunt.

Quotupliciter aliquid dicitur Idem?

Idem tale est, vel Genere, vel Specie, vel Numero, vel Proportionem.

Quæ sunt Eadem Genere?

Eadem Genere sunt, quæ sub eodem Genere ponuntur: ut *Homo* & *Brutum* sub animali.

Quæ sunt Eadem Specie?

Eadem Specie sunt, quæ sub eadem Specie ponuntur: ut *Petrus* & *Paulus* sub homine.

Quæ sunt Eadem Numero?

Eadem Numero sunt, quæ sunt una numero res: ut *Homo*, & *Animal rationale*.

Quæ

Quæ sunt Eadem Proportionē?

Eadem Proportionē sunt, quæ conveniunt in uno prædicato, secundum proportionem de iis dicto: quomodo eadem sunt, *Caput hominis, & Christus.*

Quid est Distinctio?

Distinctio, est divisio unius ab altero. Sic distincta sunt, *Lumen, & Animal.*

Quotuplex est Distinctio?

Distinctio est vel Realis, vel Rationis.

Quid est Distinctio Realis?

Distinctio Realis est, quæ competit rebus, citra mentis operationem: ut *Homo, & Brutum*, distinguuntur, nemine cogitante.

Quid est Distinctio Rationis?

Distinctio Rationis est, quæ non competit rebus, citra mentis operationem: quomodo *Animal, & Rationale*, in homine intellectus distinguit.

Quomodo dividitur Distinctio Realis?

Distinctio Realis dividitur, vel in Specie talem, vel Modalem.

Quid est Distinctio Realis in Specie talis?

Distinctio Realis in Specie talis est, quæ est inter Ens & Ens, vel inter Ens & non-Ens, aut inter non-entia omnino diversa: ut inter *Petrum & Paulum*, inter *visionem & cæcitatem*; inter *tenebras & cæcitatem*.

Quid est Distinctio Modalis?

Distinctio Modalis est, quæ est inter rem aut ejus modum, aut inter modos ejusdem rei. Dicitur autem *Modus*, certa essentia determinatio, in ordine

ad certum statum præsentia, unionis, aut alterius specialioris modificationis : talis distinctio est inter *Paulum*, & præsentiam *Pauli* ; itemque inter *subsistentiam*, & existentiam *Pauli*.

Quotuplex est Distinctio Rationis?

Distinctio Rationis, est vel Rationis Ratiocinantis, vel Rationis Ratiocinatae.

Quid est Distinctio Rationis Ratiocinantis?

Distinctio Rationis Ratiocinantis est, quæ non habet fundamentum ex parte objecti, ac non fit varietate & dissimilitudine conceptuum formalium, sed generatione & repetitione ejusdem conceptus formalis : quomodo distinguitur *Ensis* a *Gladio* ; *Petrus* a seipso.

Quid est Distinctio Rationis Ratiocinatae?

Distinctio Rationis Ratiocinatae est, cum intellectus rem unam diversis conceptibus exprimit, per motus tamen fundamento & occasione aliqua in re : quomodo *Animal* in homine distinguitur a *rationali* ; cui distinctioni fundamentum in homine præbent diversi actus sentiendi & discurrendi.

C A P V T XXI.

De Subjecto, & Adjuncto.

Quid est Subjectum?

Subjectum est, quod alteri substat, vel aliud in se recipit. Sic *Substantia* est subjectum accidentium ; *Paries*, coloris.

Quotuplex est Subjectum?

Subjectum aliud est Inhæſionis, vel Tractationis; aliud Denominationis, vel Informationis.

Quid est Subjectum Inhæſionis?

Subjectum Inhæſionis est, cui adjunctum inexistit atque inhæret: ut *Homo* est subjectum doctrinæ; *Paries* albedinis.

Quid est Subjectum Tractationis?

Subjectum Tractationis, quod alias Objectum dicitur, est, circa quod aliquid occupatur: sive, est id, quod alicui potentiæ proponitur, ut circa illud, vel in illo, aliquid agat. Sic objectum visus est color; sutoris, corium.

Quomodo dividitur Objectum?

Objectum est vel Adæquatum, sive Totale; vel Inadæquatum, sive Partiale.

Quid est Objectum Adæquatum?

Objectum Adæquatum est, quod æque late patet cum suo occupante, sive eo, quod circa illud versatur: ut *Corpus naturale*, quatenus naturale, *Physicæ* est objectum adæquatum.

Quid est Objectum Inadæquatum?

Objectum Inadæquatum est, quod angustius est suo occupante: ut *Cælum* est objectum *Physicæ* inadæquatum.

Quid est Subjectum Denominationis?

Subjectum Denominationis, est totum compositum, ab adjuncto suo denominatum: ut, *Homo*, doctrinæ; *Corpus*, quantitatis subjectum est. Dicitur alias Subjectum Quod.

Quid est Subjectum Informationis?

Subjectum Informationis, est pars aliqua totius, primo & directe affecta, atque informata ab aliquo adjuncto; Sic *Anima rationalis* subjectum est *eruditionis*. Dicitur alias *Subjectum Quo*.

Quid est Adjunctum?

Adjunctum est, quod rei essentiam consequitur vel ei supervenit. Sic *Color* est adjunctum *parietis*.

Quomodo dividitur Adjunctum?

Adjunctum dividitur in *Commune*, & *Proprium*.

Quid est Adjunctum Commune?

Adjunctum Commune est, quod ita alicui inest, ut etiam aliis diversis speciebus conveniat: uti *Albedo*, respectu *Hominis* & *Cygni*.

Quid est Adjunctum Proprium?

Adjunctum Proprium est, quod uni tantum per se convenit, & non pluribus: ut *Risibilitas* respectu *hominis*.

CAPVT XXII.

De Signo & Signato, Mensura
& Mensurato.*Quid est Signum?*

Signum est, quod potentiae cognoscenti aliquid representat: ut *Fumus* signum est *ignis*; *Hedera* suspensa *vini* *venalis*.

Quotuplex est Signum?

Signum aliud est Proprium, vel Improprrium; Necessarium, vel Contingens; Naturale, vel Arbitrarium; Rememorativum, vel Prænunciativum; Pure significativum, vel Exhibitivum; denique Doctrinale, vel non-Doctrinale.

Quid est Signum Proprium?

Signum Proprium est, quod ita in cognitionem alterius nos ducit, ut ad hoc a natura, vel ab alio sit ordinatum: ita *Conceptus & Voces* sunt signa propria; quia ad nihil aliud ordinata sunt, quam ut significant sive repræsentent aliquid. Sic *Imago* repræsentat suum exemplar, ad quod per imitationem est expressum.

Quid est Signum Improprrium?

Signum Improprrium est, quod signat quidem; non tamen vel a natura, vel aliunde, ad hoc signandum est ordinatum: quales sunt *effectus*, respectu causarum; ut *Eclipsis Lunæ*, significat terram esse interpositam inter Solem & Lunam.

Quid est Signum Necessarium?

Signum Necessarium est, quod rem, cujus est signum, necessario indicat: uti *respiratio in animali* signum est vitæ. Sic *miracula Christi* fuere signum ipsius Divinitatis.

Quid est Signum Contingens?

Signum Contingens est, quod non necessario signat: ut *gladius cruentatus* non est certum signum cædis humanæ, potest enim esse cruentus ex fera occisa.

Quid est Signum Naturale?

Signum Naturale est, quod naturali vi, aliud, tanquam signatum, repræsentat: sicut *Fumus* respectu ignis.

Quid est Signum Arbitrarium?

Signum Arbitrarium est, quod significat ex arbitrio & ordinatione extrinseca: uti *elevatio digitorum* signum est juramenti.

Quid est Signum Rememorativum?

Signum Rememorativum est, quod signat aliquid præteritum; sic *cineres relictæ* significant adfuisse ignem.

Quid est Signum Prænunciativum?

Signum Prænunciativum est, quod signat aliquid futurum: ut *vulnus acceptum in corde*, mortem secuturam. Sic, *Pallida Luna* pluit, *rubicunda* flat, *alba* serenat.

Quid est Signum Pure-Significativum?

Signum Pure-Significativum est, quod tantum signat: ut *hedera suspensa* signum est vini venalis.

Quid est Signum Exhibitivum?

Signum Exhibitivum est, quod una exhibet id, quod signat: uti *Sacramenta* sunt signa visibilia invisibilis gratiæ, eamque simul fidelibus exhibent, ac in iis obstant.

Quid est Signum Doctrinale?

Signum Doctrinale est, quo in docendo utimur; uti sunt *Voces*, *Scripta*.

Quid

Quid est Signum non-Doctrinale?

Signum non-Doctrinale est, quo in docendo non utimur: uti *Fumus* significat ignem.

Quid est Signatum?

Signatum, est res, quæ per signum potentia cognoscenti representatur: ut *ignis* est signatum *fumi*; *vinum venale* *hederæ* suspensæ.

Quid est Mensura?

Mensura, est signum, quod notificat quantitatem sive perfectionis, sive extensionis, sive intensiōis, sive successiōis, sive denique multitudinis.

Quid est Mensuratum?

Mensuratum, est quantitas, quæ cognoscitur.

CAPVT XXIII.

De Finito, & Infinito.

Quid est Finitum?

Finitum est, quod habet terminos suæ perfectionis, & non includit omnem perfectionem possibilem: ut *creatura*.

Quid est Infinitum?

Infinitum est, quod non habet terminos suæ perfectionis, sed includit omnem perfectionem possibilem: ut *Deus*.

Quot modis Deus dicitur Ens infinitum?

Deus Ens infinitum dicitur 4. modis: 1. ratione Essentiæ: 2. ratione Perfectionis: 3. ratione Durationis: 4. ratione Præsentia.

CAPVT XXIV.

De Completo, & Incompleto, aliisque Entis Differentiis.

Quid est Ens Completum?

ENS Completum, est totum aliquod, vel eo modo concipitur: ut *Deus, Angelus, Homo.*

Quid est Ens Incompletum?

ENS Incompletum, est pars alterius, vel ad modum partis concipitur: ut, *Anima, Corpus, Rationalitas.*

Quid est Ens Absolutum?

ENS Absolutum est, quod non habet respectum ad aliud: ut *Homo, Albedo.*

Quid est Ens Respectivum?

ENS Respectivum est, quod involvit respectum ad aliud: ita *pater* dicit respectum ad *filium*; *potentia* ad *objectum*.

Quid est Ens Permanens?

ENS Permanens est, quod non habet partes sui esse fluentes: ut *Deus, Homo, Corpus, Quantitas.*

Quid est Ens Successivum?

ENS Successivum est, quod habet partes sui esse in fluxu, sive in successione, ita, ut non possit ejus tota essentia simul esse: ut *Annus, Dies, Hora.*

Quid est Ens Materiale?

ENS Materiale est, quod in longum, latum, & profundum est extensum: ut *Corpus naturale.*

Quid

Quid est Ens Intellectuale?

Ens Intellectuale est, quod intelligendo & volendo vivit.

PARS SPECIALIS.

De Deo, & Angelis, itemque
Anima humana.

Quotupliciter accipitur vox Spiritus?

Vox Spiritus accipitur dupliciter: uno modo *Physice*, pro corpusculo subtili & tenui: & talis est spiritus, ex ore respirantis egrediens. Alio modo accipitur *Metaphysice*, pro substantia materiæ experte, quæ contradistinguitur corpori. Ea significatio est hujus loci.

Quid est Deus?

Deus est spiritus infinitus: sive, Deus est actus purus, omnis compositionis expers: quo nihil majus, nihil melius, aut præstantius excogitari potest: & in quo nulla penitus imperfectio, nec ullius veræ perfectionis defectus locum habent: quique omnes res condidit ac conservat: ipse factorem & conservatorem nullum agnoscens.

Vnde probatur Dei existentia?

Quia, etiam secundum saniorum Gentilium effatum, omnes homines, ratione utentes, summa opiniti decet, ut Deum semper pura, integra, incorrupta, & mente, & voce venerentur, ideo quisque de illius existentia debet esse persuasissimus. Ea vero, inter cætera, sequentibus argumentis probatur indubie.

I. Deum esse, evincit ipsa illa, ceu Epicurus vocabat, *πρόληψις*, hoc est, uti Cicero, I. de Nat. Deor. interpretatur, *anticipatio sine doctrina*, omnium hominum mentibus de Dei existentia, alte infixata & implantata. Nec ulla gens tam fera & extra leges moresque projecta unquam fuit, quæ non esse vim aliquam & naturam divinam crediderit. Cum igitur, quæ Velleji Epicurei, apud Ciceronem, I. I. de Nat. Deor. verba sunt, *non instituto aliquo, & more, aut lege sit opinio constituta, maneatq; ad unum omnium firma consensus*, intelligi necesse est esse Deos; quoniam *insitas eorum, vel potius innatas cognitiones habemus*. De quo, autem omnium natura consentit, id verum esse necesse est. Quod si ullis unquam seculis, pauci quidam singulares homines reperti, qui Dei existentiam negarunt, id haud aliter ab iis factum, quam debellando prius, & cum violentia extrudendo illam conatam de Deo notitiam; quam tamen ita expellere non potuerunt, quin subinde, in calamitate aliqua, aut agone mortis constitutis, conscientia scilicet officium faciente, rediret. Nec fere alii Deum existere negarunt, quam quibus, Deum nullum esse, expediebat. Hinc tale profluit argumentum: *Quicquid omnium hominum mentibus naturaliter est impressum, illud verum sit, necesse est*. Atqui, Deum existere, omnium hominum mentibus naturaliter est impressum. Ergo, Deum existere verum sit, necesse est.

II. Tota hujus mundi machina, & partes ejus in cœli quasi sinu conclusæ, atque ordine admirabili dispositæ, satis loquuntur non casu hæc confluxisse, sed ab intellectu, & quidem excellentissimo, hoc est Deo, esse constituta. Nam, quis adeo stultus est, ut a casu aliquid tam accuratum expectet? Quasi credat,

dat, casu lapides & ligna in domus speciem coalitura; aut rotarum in molendino hydraulico implicationes, & ab allapsu aquæ motum, illam infundibuli figuram, excussorii tremorem, granorum proidentiam, & lapidum molarium rotationes, a casu sic accidere: aut ex jactis forte literis, exstiturum poëma: cum & qui figuras geometricas in litore viderat, hominis se dixerit videre vestigia; satis perspiciciens, a casu talia proficisci non potuisse. Collectio talis est: *Effectus excellentissimus arguit causam excellentissimam effectricem.* Atqui mundus hic est effectus excellentissimus. Ergo mundus hic arguit causam excellentissimam effectricem. Afferamus nunc Ciceronis huc pertinentia verba, ut intelligatur, veram esse hanc collectionem, & vim pridem eam habuisse in animis Gentilium. Sic vero ille, lib. 2. de Nat. Deor. *Quid potest esse tam apertum, tamq; perspicuum, cum cælum suspeximus, cœlestiaq; contemplati sumus, quam esse aliquod Numen præstantissimæ mentis, quo hæc regantur? Quod qui dubitat, haud sane intelligo, cur non idem, Sol sit, an nullus sit, dubitare possit.* Quid enim est hoc illo evidentius? Idem amplius confirmant, quæ sequuntur, Aristotelis, apud eundem Ciceronem, illo ipso libro, verba: *Si essent, qui sub terra semper habitavissent, bonis & illustribus domiciliis, quæ essent ornata signis & picturis, instructaq; iis omnibus, quibus abundant ii, qui beati putantur, nec tamen exissent unquam supra terram; acceperint autem fama & auditione, esse quoddam Numen & vim Deorum; deinde aliquo tempore, patefactis terræ faucibus, ex illis abditis sedibus evadere in hæc loca, quæ nos incolimus, atq; exire potuissent: cum repente terram, & maria cælumq; vidissent, nubium magnitudinem, ventorumq;*

vim

vim cognovissent, aspexissentq; Solem, ejusq; tum magnitudinem pulchritudinemq;, tum etiam efficientiam cognovissent, quod is diem efficeret, toto cœlo luce diffusa; cum autem terras nox opacasset, tum cœlum totum cernerent astris distinctum & ornatum, Lunæq; luminum varietatem, tum crescentis, tum senescentis, eorumq; omnium ortus & occasus, atq; in omni eternitate ratos immutabilesq; cursus: hæc cum viderent, profecto, & esse Deos, & hæc tanta opera Deorum esse, arbitrarentur. E quibus patet clarissime, quam vere de Gentilibus dixerit Apostolus, Rom. I, 19. 20. Quod notum est Dei, manifestum est in illis: Deus enim illis manifestavit. Invisibilia enim ipsius, a creatura mundi, per ea, quæ facta sunt, intellecta conspiciuntur: sempiterna quoq; ejus virtus, & divinitas: ita ut sint inexcusabiles.

III. Si plantarum, animalium, rerumq; naturalium omnium, imprimis vero humani corporis admirabilem constructionem, intus & extra quis respiciat, quomodo nihil defiat, nihil abundet, & ut omnia ibi, etiam minima, suos usus habeant, nullo agentis naturalis studio aut industria ita parata, liquido ea ostendunt, opificem istorum esse mentem excellentissimam. Ob finem enim agere, & habitudines rerum fini adaptare, non nisi intelligentis est naturæ. Sic argumentamur: Cujuscunq; effectus pulchritudo exsuperat potentiam agentis finiti, illa arguit potentiam agentis infiniti. Atqui corporis humani pulchritudo exsuperat potentiam agentis finiti. Ergo pulchritudo humani corporis arguit potentiam agentis infiniti.

IV. Cum Anima nostra rationalis, utpote incorporea, suo corpori unita non sit per contactum quendam physicum, neque etiam mediante vinculo, vel corpore,

poreo, vel incorporeo; (hoc enim utramque partem uniendam deberet tangere; quod tamen fieri nequit,) neque adeo alia unionis ratio, aut vinculum aliud supersit, præter mutui illius commercii causam, h. e. vim illam, quæ animam nostram in corpus, & hoc vicissim in istud agere facit; hæc ipsa autem vis a corpore non sit, utpote quod agere natura sua nihil potest, nisi moveatur ab alio; nec ab anima, quæ, imbecillitatis suæ conscia, ne pulvisculum quidem loco semovere posse, novit; nec denique a mutuo partium consensu dependeat, cum corporis nullus esse possit consensus: consequens igitur est, mutuum hoc animæ cum corpore commercium, ab alia potentiori virtute pendere. Sic inferimus: *Quarumcunque rerum conjunctio per naturæ vires fieri non potuit, illas causa infinita conjunxerit, necesse est. Atqui Animæ & Corporis conjunctio, per naturæ vires fieri non potuit. Ergo Animam & Corpus infinita causa conjunxerit, necesse est.*

V. Cum totus hic mundus aspectabilis, ejusque partes universæ ac singulæ, ab uno momento ad alterum continent existentiam suam, atque sic singulis momentis totæ quasi producantur, hanc vero continuationem a seipsis non habeant, neque etiam existentie momentum antè inferat necessario existentie momentum posterius, necesse est, existere talem causam, res omnes conservantem, quæ non opus habeat conservari ab alia, & sit a seipsa. Formalis illatio sic se habet: *Quarumcunque rerum conservationem causa finita præstare nequit, illa dependet a causa infinita. Atqui rerum creaturarum conservationem causa finita præstare nequit. Ergo rerum creaturarum conservatio dependet a causa infinita.*

VI. Vanum est, quod Athei nobis objiciunt, *illam essentiam Divinam, quam admittimus, esse incomprehensibilem*, & a nobis id concedi, quod intellectus non assequitur. Quippe, cum Divina essentia infinita sit, mirum nullum, eam finiti intellectus limites excedere. At, hac una & sola incomprehensibilis essentia admissa, tota quasi natura fit comprehensibilis, & nullo negotio rationem reddere licet rerum infinitarum, quæ cæteroqui evadit prorsus inexplicabilis. Nimirum, *Materia* existit, quia Deus eam creavit. *Motus* inest rebus, quia Deus illum rebus indidit, & in iisdem conservat. *Montes* existunt, quia Deus, ut existerent, voluit. *Homines* extant, quia originem trahunt a viro & foemina, Deum formatorem habentibus. *Bruta animantia* extant, quia Deus, cum crearet hanc mundi machinam, in ea, pecudes agere, & speciem suam assidue novis generationibus conservare jussit. Cæterum, rejiciendo unicam essentiam incomprehensibilem, simul eo ipso incomprehensibilis evadit mundus hic, cum omnibus suis partibus. Scilicet, qui sic animati sunt, coguntur in omnibus rebus admittere progressum in infinitum causarum ab invicem dependentium, ita ut nunquam ad causam primam & independentem proveniant: qua re nihil magis est incomprehensibile, nihilque magis rationi adversum. Nam, si quæras: Quare hic homo vitam vivit? respondeant, necesse est: quia a tali patre prognatus fuit, ejusque pater ab isto patre, & sic in infinitum. Si perconteris: Quare iste Leo reperitur in terra? dicant, oportet: quia genitus fuit a Leone alio, & sic in infinitum. Vbique igitur, & fere in quaque re minima, hoc modo infinitas & incomprehensibilitas sese offerunt. Neque est: ut dicant, Mundum, &

in eo Viventia, resque cæteras, aliquando e materia forte fortuna sic prodiisse. Cum enim materia, rudis quippe indigestaque moles, seipsam movere non possit, æternumque quiescat, nisi ab alio moveatur: quaeritur: Ecquæ ingentis illius commotionis materiei, qualis ad mundi machinam, quæque ejus sinu continentur, producenda requiritur, causâ fuerit? Certe Motore infinito opus erat. Quam absurdum quoque est, negare Creatorem æternum, & ejus loco introducere materiam, quæ ex se ab omni æternitate, sine causâ & principio, extiterit? Et vero, finge, res aliquas inanimas, post varias materiæ undecunque tandem ortas alterationes, emergere potuisse; quomodo materia, quæ vita & intellectu priva est, quæ nihil cogitat, nihil perspectum habet, progignere potuit ex se entia, quæ vivunt, quæ cõgitant, & judicio fruuntur? Verset quis in omnes partes materiam, aut versandam aliis causis concedat, nunquam videbit inde prognasci taurum, aut leonem: cum adeo nullis quidem historiarum monumentis proditum sit, unquam vel montem aliquem prægrandem, coacervatione quadam materiæ, in quam proclivis illa est, iis in locis se exseruisse, ubi prius non fuerat.

Quomodo probatur, Deum esse Vnum?

Deum esse Vnum, probatur: I. Quia, si duo essent, aut plures Dii, libere agentes & volentes, possent contraria velle, ac impediretur alter ab altero, quo minus, quod vellet, efficeret: quæ Deo indigna sunt. II. Si plures Deos ponas, jam nihil causæ est, cur magis duo, quam tres, aut mille, quam decem, credantur. III. Si plures essent Dii, necesse foret, ponere in singulis diversis diversas quasdam proprietates, hoc est, perfectiones,

ctiones, quibus inter se discriminentur; quod Divina natura neutiquam admittit. IV. In toto hoc universo, nihil oculis nostris se offert, quod aliquam nobis præbeat occasionem existimandi plures esse Deos. V. Etiam Gentiles, vel, unum Deum esse, aperte dixerunt, vel, si plures facti sunt Deos, omnes alios unicuiquam subditos esse docuerunt. At, qui alteri subiectus est, Deus haberi non potest. Eminere enim, vel supra omnia esse, & Deum existere, recipiuntur. VI. Tanta est, tamque admirabilis omnium mundi partium conspiratio in unum finem, ut non modo ab uno opifice factus ac colligatus sit, sed etiam uno veluti spiritu, per ejus membra permeante, contineri ac vegetari videatur. VII. Si alius esset Deus, præter unum, oporteret, eum esse pariter interminatum, seu infinitum. Non possunt autem duo infinita simul consistere: permearent enim se invicem, non quidem penetratione dimensionum; cum in re immensa nulla dimensio sit: sed ita, ut duarum essentiarum infinitarum ex omni parte commixtio consequeretur; quo nihil absurdius cogitari potest.

Anne Deo conveniunt Affectiones?

Affectiones Deo conveniunt, non in rigore, sed latius acceptæ. Affectio enim, in rigore sumpta, debet a subiecto realiter esse distincta. At, late accepta affectio, ea dicitur, quæ demonstrari potest de subiecto. Cum igitur Deus sit aliquid scibile, affectiones aliquo modo de eo prædicantur & demonstrantur.

Quotuplices sunt Dei Affectiones?

Affectiones Dei sunt vel Absolutæ, vel Respectivæ.

Quid

Quid sunt Affectiones Dei Absolutæ?

Affectiones Dei Absolutæ sunt, quæ Deo conveniunt, sine respectu ad aliquod extrinsecum; uti hæc *Negative*: Independentia, Infinitas, Immensitas, Immutabilitas: itemque hæc *Positive*: Omnipotentia, Omniscientia, Æternitas.

Quid est Independentia Dei?

Independentia Dei est, qua Deus concipitur ab alio non effectus.

Quid est Infinitas Dei?

Infinitas Dei est, qua Deus non habere terminos suæ perfectionis intelligitur.

Quid est Immensitas Dei?

Immensitas Dei est, qua Deus nullo spatio commensurari, aut includi posse significatur, sed in omni ubi, quod cogitabile est, existit.

Quid est Immutabilitas Dei?

Immutabilitas Dei est, qua Deus omnis mutationis expers esse concipitur.

Quid est Omnipotentia Dei?

Omnipotentia Dei est, qua Deus facere potest omne id, quod, ut fiat, contradictionem non implicat.

Quid est Omniscientia Dei?

Omniscientia Dei est, qua Deus omnia, simplici essentiae suæ intuitu, præsentia, præterita, & futura, præsentissima habet.

Quid est Æternitas Dei?

Æternitas Dei est, qua Deus essentiae suæ nec initium, nec finem habere intelligitur.

Quid sunt Affectiones Dei Respectivæ?

Affectiones Dei Respectivæ sunt, quæ Deo conveniunt, cum respectu ad creaturas: atque hæ sunt, vel Internæ, vel Externæ. *Internæ*, sunt Misericordia, Justitia, & Omnipræsentia. *Externæ*, sunt Creatio, Providentia, & Cooperatio.

Quid est Misericordia Dei?

Misericordia Dei est, qua Deus pronus est ad ignoscendum, & succurrendum.

Quid est Justitia Dei?

Justitia Dei est, qua Deus suum cuique tribuit.

Quid est Omnipræsentia Dei?

Omnipræsentia Dei est, qua Deus omnibus creaturis præsens esse intelligitur.

Quid est Creatio Dei?

Creatio Dei, est productio substantiæ ex nihilo.

Quid est Providentia Dei?

Providentia Dei est, qua Deus res a se conditas conservat.

Quid est Cooperatio Dei?

Cooperatio Dei est, qua causa prima cum omni actione causæ secundæ concurrit.

Quomodo dividitur Scientia Divina?

Scientia Divina dividitur in Naturalem, Liberam, & Mediam.

Quid est Scientia Dei Naturalis?

Scientia Dei Naturalis, seu Simplicis Intelligentiæ est, qua Deus cognoscit omnes res, sub objecto potentiae suæ contentas, quæ esse actuale sive habuerunt, sive habent, sive habituræ sunt: quin etiam eas, quæ non

non solum nunquam esse habuerunt, aut habent, aut habituræ sunt; produci tamen sunt possibiles.

Quid est Scientia Dei Libera?

Scientia Dei Libera est, qua Deus cognoscit eas res, quæ, per liberum voluntatis suæ arbitrium, esse actuale aliquando sive obtinuerunt, sive obtinent, sive adepturæ sunt.

Quid est Scientia Dei Media?

Scientia Dei Media est, qua Deus cognoscit illas res, quæ esse actuale non habent, nec habituræ sunt, nec etiam habuerunt; futuræ tamen essent, si tales vel tales circumstantiæ aut conditiones in creaturis ponerentur.

Quomodo Deus est Perfectus?

Deus est Perfectus, quia non tantum nihil ei deest eorum, quæ ad essentiam suam exiguntur, sed & perfectiones omnes, in genere entis possibiles, in se comprehendit, atque alias quidem *Formaliter* habet, alias *Eminenter*.

Quas Perfectiones Deus habet Formaliter?

Formaliter illas Perfectiones Deus habet, quæ de se nullam involvunt imperfectionem: ut *Sapientia*, *Bonitas*.

Quas Perfectiones Deus habet Eminenter?

Eminenter Deus illas Perfectiones habet, quæ, cum non simpliciter sint perfectiones, sed in certo tantum entis genere, atque adeo ignobiliores, quam ut in optimam substantiam cadere possint, possunt tamen a Deo virtute eminentiore produci, & in rerum natura collocari: ut *potentia edendi, bibendi, currendi*.

*Quomodo demonstratur, inesse Deo Perfectiones
formaliter, easq. infinite?*

Cum a nihilo nihil fiat eorum, quæ sunt, sequitur, ut quæ in effectis apparent perfectiones, & quæ in causa sunt, ut secundum eas causa aliquid operetur, omnes fuerint in prima causa. Neque prima causa ulla perfectione postea orbari potuit: non aliunde; quia quod æternum est, aliunde non pendet, neque quicquam ab aliena actione patitur: neq. vero a se, quia natura omnis suam perfectionem appetit. Sunt vero hæ perfectiones in Deo modo infinito: quia attributum cujusque finitur, aut quia causa, per quam existit, tantum, nec plus, ei communicavit; aut quia ipsa tantum, nec amplius, capiebat. Deo autem nulla natura quicquam sui communicat: nec ipse aliunde capit quicquam. Cum vero apertissimum sit, perfectiora dici ea, quæ vivunt, iis, quæ non vivunt; quæ agendi pollentiam habent, iis, quæ non habent; quæ intelligunt, non intelligentibus; quæ bona sunt, his, quæ minus sunt talia; sequitur ex his quæ dicta sunt, hæc omnia attributa Deo convenire, & quidem infinite. Itaque esse eum vitæ infinitæ, id est, *Æternum*: pollentiæ immensæ, id est, *Omnipotentem*: sic & *Omniscientem*, & omnino, sine ulla exceptione, *Bonum*.

Quid est Angelus?

Angelus est Spiritus finitus, independens a corpore.

Quomodo probatur Existentia Angelorum?

Existentia Angelorum probatur a posteriori, hoc est ex effectibus quibusdam mirabilibus, qui, cum nunquam tales sint, ut potentiam & virtutem agendi huma-

humanam excedant, nec vero a substantiis homine inferioribus, quin nec ab ipso Deo, (cum interdum mali sint, aut cum malo conjuncti,) proficisci queant, arguunt, dari distinctas ab his substantias, easque intelligentes, quæ tam insignes & stupendos effectus edant.

Quomodo Angeli sunt Simples?

Angeli Simples sunt, propter absentiam partis corporeæ, & partium quantitativarum; interim alias admittunt compositiones, quales sunt, Essentiæ & Existentiæ; Generis & Differentiæ; Subjecti & Accidentis. Quæ omnia dicunt compositionem aliquam, vel Realem, vel Rationis: Realem, quando inter extrema est distinctio realis: Rationis, quando extrema non nisi ratione distinguuntur.

Quomodo probatur, Angelos esse incorruptibiles?

Cum Angeli non constent ex materia & forma, sed sint substantiæ simplices, non possunt corrumpi, nec a sui natura, nec ab ullo agente creato. Nempe, quia nec pendent in fieri & conservari ab ejusmodi agentibus: neque ab iis aliquid accipere possunt, quod illorum existentiæ repugnet.

Ecquis est Angelorum numerus?

Angelorum numerum esse maximum, incertum tamen, patet ex illo Danielis 7. *Millia millium ministrabant ei, & decies millies centena millia assistebant ei.* Scilicet, sicut terreni Reges, quo sunt potentiores & ditiores, eo majore servorum & militum caterva stipati incedunt: ita etiam Deum, cum sit Rex Regum, & Dominus Dominantium, & cujus potestas est infinita, æquum erat, innumeram Ange-

lorum multitudinem creare, qui ei assisterent, ejusque jussa capefferent.

Possunt ne Angeli assumere corpora ?

Angeli possunt 1. assumere corpora animata ; ut patet in dæmoniacis. 2. corpora emortua ; cum hæc minus resistant. 3. possunt assumere corpora ex aëre, aliave materia confecta : valent enim condensare vapores & exhalationes in modum nubium, aliorumque corporum consistentium, & impedire, ne talis materia dissolvatur, aut diffluat. Neque necesse est, quod quidam volunt, ut Deus concurrat, ad confectionem corporum ejusmodi, concursu aliquo speciali ; cum enim dæmones etiam ob malos fines corpora assumant, minime convenit dicere, Deum, ut causam specialem, ista præparare. Non fit autem ex Angelo & corpore ejusmodi unum compositum per se, aut unum suppositum : secus enim Angelus haberet rationem formæ, & corpus materiæ ; quod est absurdum. Proinde, nec tale corpus Angelus informat substantialiter & vitaliter, sed tantum per accidens illi conjungitur, sicut motor mobili. Hinc, etsi ex Scriptura constat, Angelos in assumtis corporibus loqui, ambulare, comedere, aliasve operationes reales exercere, quæ, quoad entitatem & substantiam, magnam habent convenientiam cum actionibus, quas nos vitaliter exercemus, loquendo, ambulando, comedendo : nondum tamen sequitur Angelos vere operationes vitales exercere. Etenim, ut illæ operationes fiant modo vitali, debent procedere a potentia vitali, & exerceri per certa instrumenta, ad id a natura ordinata ; quod hic neutiquam locum invenit. Etsi enim Angelus, in corpore assumpto, profert sonos similes humanæ locutioni,

cutioni, non tamen proprie loquitur; sicut etiam non proprie comedit, aut ambulat, etsi cibos deglutit, & corpus de loco in locum promovet. Istæ enim actiones proprie acceptæ, præter entitatem materialem, dicunt maxime ordinem ad virtutem quandam vitalem, in membris existentem, per quam fiunt, & ad rationem, per quam diriguntur: quæ Angelis tribui non possunt, quando in corporibus assumtis tale quid operantur.

Qualis est præsentia Angelorum in loco?

De Corporibus sciendum est, quod cum illorum substantia extensa & quanta sit, adeoque partes diversas habeat, ita illa in aliis corporibus esse, ut magnitudo, & partes eorum, magnitudine & partibus loci commensurentur. Vnde non tantum unum corpus proprie est in altero, cujus ambitu continetur, sed ita loco suo inest, ut unaquæque pars ejus, loci certæ parti, ipsumque totum, toti loco adæquetur. Hinc fit etiam, ut nec plura corpora in uno corpore tertio, seu uno loco, nec unum idemque corpus, secundum diversas partes suas, in una eademque parte loci contineri possit; sicut nec plures homines in uno loco esse possunt, nec unus homo ita in uno loco, ut, ubi caput habet, simul & manus & pedes sint. Ratio est: quia, quod corpori alicui exacte commensuratur, illius magnitudinem ita corpus illud recipit, ut præter capacitatem, qua illud admittit, nullam præterea habeat, qua aliam magnitudinem suscipere possit: & cum pars parti commensuratur, ita pars loci, parti huic aut illi corporis contenti coextenditur, ut alii simul parti adæquari nequeat. Jam, de Angelis aliter se res habet. Quia enim quantitatem, seu extensionem, & partes

non habent, sic nec in rebus aliis, secundum extensionem, aut partes has vel illas, esse possunt, sed, ubicunque sunt, inextense atque toti indivisibiliter existunt. Unde fit, 1. ut Angelus non in minimo tantum corpore seu loco, & minima quaque corporis seu loci ejus parte, sed in quovis etiam puncto indivisibili, tota sua substantia contineri possit. Nec enim certam magnitudinem loci, aut partium ejus exposcit, quod magnitudinis expers est, & partes non habet. 2. Fit hinc, ut innumeri Angeli simul in uno loco aut spatio esse possint. 3. Fit quoque hinc, ut non tantum plures Angeli in uno loco, corporibus vacuo, sed etiam corporibus pleno, esse possint. 4. Evenit denique inde, ut Angelus totus, non tantum in toto loco, sed totus etiam in omnibus & singulis ejus partibus existat: ubicunque enim est, totus est; quia partes non habet. Est autem in certo loco, & partibus illius: Ergo & totus in isto, & in illis. Interim sic uno loco continetur, ut simul & eodem tempore, vi naturæ suæ, in pluribus existere nequeat. Scholastici locum corporum, proprie *locum circumscriptivum*; Angelorum, *Vbi*, & *locum definitivum* appellant. Est enim Angelus in loco, per præsentiam ad locum, seu per indistantiam suæ substantiæ a spatio, in quo est.

Qualis est Cognitio Angelorum?

Cognitio Angelorum, non est tantum simplex rerum apprehensio, verum etiam compositio atque divisio, nec non ratiocinatio. Non enim una & prima apprehensione statim intelligunt, quæ possunt subiecto attribui, aut ab eo removeri. Potest autem Angelus naturaliter certo cognoscere effectus, ex cau-

causis naturalibus contingenter futuros ; non vero eos , qui ex libero arbitrio contingenter futuri sunt. Quod enim ad priores attinet , quia ejusmodi effectus sunt determinati in suis causis , ergo certo possunt cognosci ab Angelo , non minus quam ii , qui ex necessitate a causis naturalibus oriuntur. At, actiones, quæ ex mero libero arbitrio dependent, non possunt cognoscere Angeli; nec enim eas cognoscunt in suis causis, cum hæ sint indifferentes ad utrumlibet ; neque etiam in seipsis , quia rem , quæ nondum ulla ratione existit , sic, ut aliquando in seipsa erit, cognoscere , proprium est intellectus infiniti,

Quomodo Angeli conceptus suos invicem manifestant?

Angeli conceptus suos invicem manifestant , & quodammodo loquuntur , dum voluntatem suam ita dirigunt, ut velint aliis sensa animi declarare. Vbi quidem Deus subsidio venit, & quam alter alteri vult cogitationem manifestare, per speciem intelligibilem, in alterius intellectu productam, veluti significat.

Quid est Anima Humana Separata?

Anima Humana Separata, est spiritus finitus , incompletus, præditus naturali propensione ad corpus, extra quod existit.

Vnde probatur Anima nostra Spiritualitas?

Animæ nostræ Spiritualitas seu Immaterialitas, probatur ab operationibus ejus, intellectiōne, & volitione : hæ enim sunt a corpore independentes. Quippe, *Intellectio* versatur circa res etiam spirituales,

Deum videlicet, & Angelos : quas percipere non posset, nisi aliquo modo illis esset proportionata, atque ipsa quoque spiritualis naturæ. *Voluntas* autem & ipsa a materia independens est, quia neque organis corporeis indiget, ad actus suos eliciendos, neque ab ullo agente materiali impediri directe in operationibus suis potest. Præterea, eadem voluntas nostra *naturaliter inclinatur ad bona immortalia*, & supra conditionem corporis posita: quod vel ipse innatus appetitus immortalitatis, & scientiæ rerum præclarissimarum indicat. Insuper *Voluntas* apta nata est, ut bonis mere spiritualibus, quæ corpus sensusque corporeos nec perficiunt, nec reficiunt, nec afficiunt, imo carni vel corpori sunt adversa, (in quem censum Fortitudo, Temperantia, Contemptus rerum mundanarum &c. referuntur,) sese oblectet. Non dependet ergo in his oblectamentis a corpore, quin potius illi, & appetitui sensitivo repugnat, huncque coërcet. Ac proinde, ut independens a corpore, & spiritualis sit, necesse est. Vnde vero insuper credamus, tot artes, tot scientias, tot inventa nasci potuisse, nisi a causa aliqua, mortali conditione longe superiore? Idem porro ostendit *instita omnium hominum mentibus notitia de Deo*, & Religione, conscientia admissorum scelerum, metus superstitis alicujus post mortem judicii. Quorum omnium consideratio convincit nos, convenire animæ nostræ alium aliquem statum, quam qui est brutorum, aut rerum aliarum materialium.

Vnde probatur Anima nostra Immortalitas?

Immortalitas Animæ humanæ liquido probatur, ex ipsa æterna permanentia corporum. Cum enim corpus ab anima separatum minime intereat, quamobrem
 pari-

pariter fieri nequit, ut anima, a corpore separata, extingatur. Et vero, omnimodam abolitionem rei aliqujus existentis ne mente quidem concipere licet. Quippe, nullum ejus rei Natura exemplum exhibet, omnisque ratio illi reclamationat. Ergo, quomodo fieri potest, ut, imaginationi & intellectui vim faciendo, abolitioni quis subiciat rationalem Animam, a qua omnia, quæ semel extitere corpora, immunia sunt, & quorum nullum, modo semel cœperit, esse nunquam definit. Hoc est, quomodo credat quis, Animam, quæ infinitis modis corpus antecellit, annihilationi esse obnoxiam, a qua, quicquid in natura est corporum, excipitur? Scilicet, cum Animam immaterialem esse probatum & evictum sit, similes alterationes & mutationes, quæ corporibus propriæ sunt, non admittit, sed aut qualis est semper permanet, aut omnino abit in nihilum. At, posteriori omnis rerum natura vehementer repugnat. Prius igitur ut verum sit, ex necessitate relinquitur.

Ex dictis hæc profluunt demonstrationes :

Quicquid existit, plane interire non potest.

Anima humana cogitans existit.

E. *Anima humana cogitans plane interire non potest.*

Porro :

Quicquid sua natura est immateriale, illud mutationi & alterationi, qualem corpora humana, post separationem ab anima, subeunt, non est obnoxium.

Atqui Anima humana cogitans sua natura est immaterialis.

E. *Anima humana cogitans, mutationi & alterationi, qualem corpora humana, post separationem ab anima, subeunt, non est obnoxia.*

Jam :

Jam:

Quicquid alterationi & mutationi non est obnoxium, illud tale, quale est, æternum permanet.

Atqui Anima humana cogitans, alterationi & mutationi non est obnoxia.

E. Anima humana cogitans, talis, qualis est, æternum permanet.

Palmario argumento adducto, accedunt alia, idem persuadentia. Vti, quod *sententia de Animæ interitu peccat cum Dei justitia*, quæ utique vult, ut piis bene sit, malis vero male. Non fit autem hoc sæpe in hac vita, sed contra ii, qui scelere & maleficio pascuntur, rebus utuntur prosperis; virtuti studentes cum adversa conflictantur fortuna. Superest igitur alia, post solutionem animarum & corporum, vita, in qua divina justitia, quæ a Deo separari non potest, imo ipsissimus Deus est, piis virtutum præmia, impiis vitiorum pœnas conferet.

Porro, *sententia de Animæ interitu omnem adversus Deum religionem, omnemq; honestatem evertit*, atque impietati, malisque moribus patrocinator: non potest igitur vera esse, quia sanam religionem, verumque veri Dei cultum, inter homines in orbe existere necesse est.

Tandem, *sententiam de animæ humanæ immortalitate, valde confirmat, quod in eam, ab omni ævo, omnes gentes consensere*, apud quas ratio & boni mores non plane extincti sunt, inducta feritate. Vna omnium vox fuit, estque etiamnum, illa Ovidii: *Morte carent Animæ*. Nam, cum, quæ ex hominum arbitrato veniunt, nec eadem sint apud omnes, & sæpe mutantur, hæc autem notio nusquam non reperitur, neque temporum vicissitudine mutetur: omnino causam
ejus

ejus aliquam dari convenit, quæ se ad omne genus humanum extendat: quæ alia esse non potest, quam aut oraculum Dei ipsius, aut traditio, quæ a primis humani generis parentibus manarit. Quorum prius si admittimus, constat, de quo quæritur: nec enim Dei oraculum fallere aut falli potest. Sin posterius, nulla sane ratio assignari poterit idonea, cur primos illos parentes credamus falsum aliquod, in re momenti maximi, ad omnes posteros prodidisse. Recte Ludovicus Vives, l. 2. de anima, cap. de immortalit. Quocumq; nos convertimus, sursum, deorsum, circum circa, omnia docent, clamant, testantur, immortalem esse animam. *Natura & necessitas causarum, proportio & similitudo, vita & congruentia, dignitas hominis, Dei bonitas, utilitas nostra.*

Quæ est Origo Animæ Humana?

Quæstio de Origine Animæ Humanæ difficilis admodum est: duæ autem celebres habentur Opinionones: quarum una, Animam per Traducem a Parentibus ex se natis communicari; altera, Animam a Deo immediate embryoni infundi, tuetur. Notanda Lactantii verba, e libro de Opificio Dei: *Corpus ex corporibus nasci potest; quoniam confertur aliquid ex utroque: de animis anima non potest; quia ex re tenui & incomprehensibili, nihil potest decedere. Itaq; ferendarum animarum ratio uni ac soli Deo subjacet.*

Denique cœlesti sumus omnes semine oriundi:
Omnibus ille idem pater est;

ut ait Lucretius: nam, de mortalibus non potest quicquam nisi mortale generari. Et, post pauca: *Dei sunt omnia, scilicet conceptus ipsi, & corporis in-*
forma-

formatio, & inspiratio anime, & partus incolumis,
 & quæcunq; deinceps ad hominem conservandum va-
 lent: illius munus est, quod spiramus, quod vivimus,
 quod vigemus.

Quid est Meditatio?

Meditatio est, cum, intellectus mysteria fidei at-
 tente considerat, ut veritatem eorum agnoscat.

Quid est Contemplatio?

Contemplatio est, quando anima in veritate jam
 acquisita, oculos defixos tenet, illamque in quiete
 & silentio admiratur, ac in ea
 pendet.

DEO GLORIA.

